



4.271







27. ~~28~~
T. 1698.

W 4271

XL 7/14/67

INSTITUTIONES
CHEMIAE.

PARS I.

INSTITUTIONES

CHIMIAE

PARS I

FRANCISCI DE WASSERBERG

INSTITUTIONES

CHYMICAE,

IN USUM EORUM

QUI

SCIENTIAE HUIC OPERAM DANT.

REGNUM MINERALE.

METALLA IN GENERE:

METALLA PERFECTA.



VINDOBONAE,

APUD RUDOLPHUM GRAEFFER,

MDCCLXXVIII.

Dans tout ce que j'ai dit , je n'ai cherché que le vrai, non pas uniquement pour l'honneur de le dire, mais parce que le vrai est utile aux hommes. Si je m'en suis écarté, je trouverai dans mes erreurs même des motifs de consolation.

De l'Esprit, par HELVETIUS.



PRAEFATIO



QUAM ante duos tresve abhinc elapsos annos *Examen chemicum ovi et lactis* edidi, promisi, reliquas etiam artis hermeticae partes daturum me fore, si illam Chemiae Tyronibus utilem, si acceptam fuisse, rescivero.

VENERUNT autem saepenumero multi ad me, ac, ut promissum exhiberem demum opus, exhortati fuerunt, quo sic taediosissimo scriptorum chemicorum descriptionis levarentur demum labore: vidi simul, ex sententiis, quas VIRI CLARISSIMI de illa diatribe tulerunt, opellam adtentione aliqua dignam fuisse visam.



EXCITATUS his omnibus, potissimum vero commodi Artis asclepiadeae promovendi studio excitatus, laborem adgressus fui, quem quidem promisi, quem tamen cito adeo extorquendum fore non confidi.

EXPOSUISSE autem nunc juverit rationes, quas in operis totius elaboratione mihi proposui; easque ut inspiciant, qui crisin ferre voluerint, optarem. Viros hic intelligo, qui, reipublicae litterariae in bonum nati, arbitri optimo jure salutare queunt, quorum sententiae omnem exceptionem excludunt: alios enim, qui de omni vixdum edito scripto acerbis crises pronuntiant, dum tamen ipsi ne lineam quidem absque errore, aut proprio Marte scribere norunt, forti suae relinquendos puto; tales, dum labia movent, infamiae simul suae copiosum evomunt argumentum.

NUMEROSIS vicibus audiavi acerbis Chemiae Tyronum querelas; dum, in BOERHAAV *Elementis Chemiae*, egregio sane, ac nunquam non utilissimo opere, plurima desiderari, plurima ex aliis fontibus colligenda esse in collegiis perciperent. Querelae hae
ma-



maximam partem eo reciderunt: libros citatos inveniri aegre, aut omnino non posse; si inveniantur, tum seorsim, tum simul sumtos, majores expensas requirere; turbari enkephalon lectione tot Auctorum, inter sese haud raro dissentientium; magnam demum, in illis evolvendis, temporis fieri jacturam, aliunde nimis brevis, si ad immensum artis ambitum attendas: Bibliothecas publicas insignem quidem adferre utilitatem, interim tamen libros varios in illis non exstare, aut si exstent, non sufficienti copia adesse; quum v. c. in Collegio nunc citatus **MARGGRAFIUS** triginta vel pluribus vicibus adesse deberet, ut eum simul et semel, uti quidem requireretur, confestim legere possent Auditores; nam, si quis expectare vellet, donec alter lectionem capitis indicati absolverit, effluxurum fore mensem, antequam trigesimo, quid **MARGGRAFIUS** pronuntiarit, innotescat; accedere simul et illud, bibliothecas tum non omni die, tum non omni hora patere: quod quidem peti vix unquam poterit.

Ut igitur desideriis his omnibus fieret satis, facile vidi, requiri opus, in quo contineantur, per Auctorum numerosissimorum codices dispersa, **MEDICINAE TYRONIBUS**



NECESSARIA, AC UTILIA, quantum fieri queat, omnia, cujus lectio satisfaceret exspectationi, quin tamen coactus quis foret, ut, rem quamdam cogniturus, excuteret viginti pluresve Auctores; rem unam vigesies legeret; ac sub finem, priorum oblitus, postrema non caperet; quod numerosa vice contigisse *diatribas inaugurales* composituris, (alias enim majorem paulo librorum numerum horrere non pauci solent,) probe scio.

CONGESSI hinc tum ex Auctorum omnis aevi monumentis, *latina, germanica, gallica, anglica, italica, batava* lingua scriptis in unum codicem ea, quae annoso exercitio *utilia* esse; quae *necessaria*, quae a *Tyrone*, quae a *Medico practico* desiderari posse, expertus fui. Fontes ubique consului optimos; ac, dummodo utilitatem exin enaturam viderem, vastorum voluminum raediosam, ac ilia frangentem lectionem haud abhorruui: redegi ex *Academiarum Actis*, redegi ex *Dissertationibus minoribus*, quas habere potui, redegi ex ipsis *chemicis institutionibus, cursibus, elementis &c.* quae in scopum praefixum, illico indicatum, convenire ratus

❧

9

tus fui. Fregi saepius putamen, exemi nucleum, atque cortice amarescente liberatum delicato multorum palato obtuli; etsi quidem requisitum pro quibusdam fuisset, ut in emulsum redactus exhiberetur.

MONERE autem unum inprimis debeo, quod pro crimine, nisi indicarem, forte mihi objici posset, quum tamen consulto id fecerim. Excerpsi saepenumero ipsum Auctorum textum, eumque non mutatum Commentariis inserui: non enim requisitum putavi, ut, dum v. c. BOERHAAVIUS optime, ac ita, ut melius dici vix queat, descripsit hanc vel illam encheiresin, non, inquam, requisitum putavi, ut hoc ex *latino Boerhaaviano textu* in *latinum proprium* verterem, atque sic tempus delectu absurdo verborum tere-rem, ne forte verbum a BOERHAAVIO jam dictum adferrem denuo. Utilitatem ex consilio meo in Tyrones non minorem ideo redundaturam probe scio; atque libere nunc fateor, exhibere me voluisse sub INSTITUTIONUM CHEMICARUM titulo *Bibliothecam*, aut *Pandectas eorum omnium, quae Chemiae Tyro-nibus cognitu necessaria sunt, aut utilia* — . Majus etiam haud raro sententiae accedit ro-



bur, major obtinetur perspicuitas, dum viva quasi voce loquentem Auctorem celeberrimum Lectores percipiunt: impossibile demum haud raro plane est, imprimis dum experimenta, concise ac accuratissime descripta, majoris simul momenti objectum concernentia, adferenda sunt, ut ipsa Auctoris non adhibeantur verba: haec tamen per totum non occurrunt operis decursum.

ORDINEM eum sequutus fui in expositione corporis cuiusvis, quem naturae congruum maxime credidi; nec eum, quod hic vel ille Auctor eodem jam usus fuerit, elegi.

IN aliorum sententiis refutandis decori leges, uti saltim autumo, egressus consulto nunquam fui; an enim, dum alios desententiae nostrae excellentia convincere aut illorum thesin obpugnare volumus, nulla amplius via subpetit, nisi ea, quam calcant bajuli; quam calcarunt etiam tot alii, qui, vel ex hoc capite eruditorum summorum in classem sese reponendos esse, videbantur dudum convicti?




PROPRIA tentamina hinc inde interferui; parcius tamen id feci, quum peculiari *Animadversionum Chemicarum* opusculo ea reservare maluerim.

OBPONERE vero quis poterit; *cur hoc in opere tuo non continetur, cur non illud? An hoc non legisti? An illud necessarium non erat?* Considerent, qui haec objiciunt, velim, scopum toti operi praefixum; considerent simul, quæ unice labor totus dicatus fuerit. Tradere volui ampliorem doctrinae chemicae expositionem, non conscribere de quovis capite libros, qui, uti olim de *Juris Romani* tomis dictum verissime fuit, *multorum camelorum forent onus*. Cur tempus subripere debuisssem Tyronibus onerosæ eruditionis phaleris? Cur Auctor fierem novarum querimoniarum, sublaturus veteres, prius indicatas? Metuo sane potius, ne nimium, quam, ne parum nimis, dixerim. Sed et omnia nosse vix ab homine unquam peti poterit; multa hinc inde potuisssem interferere, quæ probe novi, quorum tamen fontes, adhibito licet omni studio, acquirere non potui. Ipsa demum enormis copia rerum,
qua-



quarum ideae encephalo, omni vix non temporis puncto librorum evolutioni damnato, impressae fuerunt, efficit, ut ea, quae dudum cognita habui, non adaequatissimo occurrerint tempore. Ut objectioni dictae ex integro satisfacerem, quodvis caput per decennium reponere debuisssem, atque indies in eo contenta ruminare: sub finem vix plura, quam nunc lucraturus.

Partem hanc proximis nundinis excipiet *tractatus de SEMIMETALLIS*, quem sequentur reliqua.





METALLA,
AC
SEMIMETALLA
CONSIDERATA IN GENERE.


§. 1.

METALLICAE SUB STANTIAE dicuntur corpora naturalia firma; opaca; corpora naturae reliqua gravitate exsuperantia; igne subbilia; splendentia; sub malleo praeterea maxime, minus, aut omnino non ductilia; menstuis diversis referanda; in igne tum fixissima, indestructibilia, tum et diversa ratione volatilia, ac in calces exurenda, diversae denuo ac specificae indolis.

§. 2.

ATQUE haec quidem definitio statui poterit, dum de *substantiis metallicis in genere* sermo est, nec de singulari earum in *metalla*, et *semimetalla* divisione adhucdum agitur.

§. 3.



§. 3.

EXAMINASSE jam juverit characteres illos metallicarum substantiarum, eo, quo propositi fuerunt ordine; eosque instantiis hinc inde clarius illustrasse.

§. 4.

FIRMITAS, aut, si mavis, *durities*, varia admodum in metallicis substantiis observatur: quaedam molles adeo sunt, ut cultro scindi, caelo sculpi, quin et ungue radi facile queant; aliae vero durae deprehenduntur catenus, ut earum ope firmitatem aliorum corporum vincamus; inprimis dum artis beneficio dos haec adaucta fuit: aurum recoctione duritiei non parum perdit; molle ferrum in chalybem durissimum arte induratur; in molliem priorem arte denuo reducendum. Ratione ad proprietatem nunc dictam habita sequenti maxime sese excipiunt ordine: ferrum, platina, cuprum, argentum, aurum, stannum, et plumbum. Semimetallorum pleraque tundi, teri, comminui majori, minorive molimine in partes minores queunt.

§. 5.

DURITIES, quam metalla sub malleo majorem adquirunt, ex eo inprimis dependere videtur, quod partes earum minimae arctiores sic in contactus compellantur; quod quidem et observatione altera confirmari videtur; metallo nempe *fuso* sub eodem dato volumine minorem esse gravitatem specificam, quam metallo *malleato*. Dum vero malleus diu nimis in metallum agit, ad candescentiam usque illud candescit; et in partes demum, semimetalli fere ad instar, rumpitur; instantiam dictorum insignem ferrum subpeditat.

§. 6.



§. 6.

DURITIES dicta metallis denuo aufertur, et molliora redduntur, si majori calori inter carbones exponantur: non tamen eadem ratione caloris hic inter metalla omnia lex obtinet; mollia enim calefecisse sufficit; dum ea, quae in fluxum difficilius abire solent, candescentiae ipsi subicere necessum est.

§. 7.

METALLICAE substantiae omnes *inpellucidae* seu *opacae* ex integro sunt: metallorum ponderosissimum simul ac ductilissimum, aurum, in tenues adeo extendi potest bracteolas, ut aquae nunc innatet; opacae tamen sunt bracteolae illae; nec, luci obversae, illam transmittunt, nisi fors rimae adsint, aut foraminula, sub expansione enata, quae in errorem inducere possent minus attentum.

§. 8.

Ad opacitatem tamen hanc requiritur, ut metallicae substantiae dotibus suis metallicis adhuc omnibus gaudeant: calces enim earum igne violentissimo torta in vitrum abeunt, pulchre diaphanum; calces illae, in metallicam indolem reductae, una cum dotibus reliquis et pristinam denuo adquirunt opacitatem. Gradus hujus proprietatis assignari vix poterunt: quum propria ex aequo sit omnibus; si tamen, *Cl. MACQUERUS* ait, diversitas quaedam intercederet, vero videtur consentaneum, ordinem hic eundem, uti ratione densitatis, obtinere.

§. 9.

DETECTA nondum fuit substantia naturalis, quae metallicis foret *gravior*; quae vel pondere proxime accede-



cederet. Nec ars adhuc perficere miscelarum ope potuit, quod naturae soli fuisse videtur reservatum. Unum ex praecipuis Chrysopoeorum obstaculis gravitas erat, quam auro genuino aequalem artificiali subpeditare nunquam poterant. Pes cubicus marmoris 252. libras, pes cubicus stanni, metallorum omnium levissimi, libras 516. pes cubicus auri libras 1326. pondere exaequat.

§. 10.

GRAVITAS metallorum cum duritie, aut fusibilitate non congruit; aurum ductilissimum est, simul vero ponderosissimum metallum; platina vix arte fusibilis, refractaria gravitate ad aurum proxime accedit; stannum levissimum est, mollius tamen in tentaminibus cernitur plumbum. Pondere specifico seu densitate sic sese excipiunt: aurum, platina, mercurius, plumbum, argentum, cuprum, ferrum, et stannum. Manifestius adparebit diversitas metallicarum substantiarum, (tum et praeparatorum metallicorum quorundam) ratione ponderis ex sequenti catalogo, ubi examine hydrostatico inter sese comparata cernuntur, excerpto ex tabula gravitatum specificarum corporum diversorum solidorum ac fluidorum, a Cl. MONNIER proposita, et *Praelectionibus Physices experimentalis* Cl. COTES, Professoris Cantabrigiensis adnexa.

Aurum purum, seu cupellatum	—	—	—	19, 640.
Aurum monetae Guinée	—	—	—	18, 888.
Aurum ducatorum	—	—	—	18, 261.
Aurum monetae Louis d'or	—	—	—	18, 166.
Mercurius	—	—	—	14, 000.
Mercurius dulcis	—	—	—	13, 382.
Plumbum	—	—	—	11, 325.
Argentum, cupellatum	—	—	—	11, 091.
Argentum signatum	—	—	—	10, 535.

Mer-

Mercurius dulcis, ter sublimatus	—	9, 804.
Bismuthum	—	9, 700.
Cuprum rubrum, japanicum	—	9, 000.
Cuprum fœcicum	— — —	8, 784.
Turbith minerale	— — —	8, 235.
Cinnabaris artificialis	— — —	8, 200.
Mercurius dulcis quater sublimatus	—	8, 170.
Cuprum flavum gallorum, f. aurichalcum	—	8, 000.
Chalybs induratus	— — —	7, 850.
Ferrum	— — —	7, 645.
Regulus antimonii martialis	— — —	7, 500.
Stannum	— — —	7, 471.
Stannum aliud	— — —	7, 320.
Cinnabaris naturalis	— — —	7, 300.
Cinnabaris almadensis	— — —	6, 188.
Zincum	— — —	7, 107.
Mercurius sublim. corrosivus	— — —	6, 325.
Lithargyrium auri	— — —	6, 000.
Lithargyrium argenti	— — —	6, 044.
Cinnabaris antimonii	— — —	6, 044.
Vitrum antimonii	— — —	5, 280.
Lapis Calaminaris	— — —	5, 000.
Antimonium hungaricum &c.	— — —	4, 700.
Arsenicum album	— — —	3, 695.
Auripigmentum	— — —	3, 521.
Aqua pluvia, ceu norma comparationis	—	1, 000.

SUBIUNGERE his placuit examen hydrostaticum gravitatum specificarum quorundam corporum comparative ad aquam, excerptum ex *Mineralogia Cl. CRONSTAEDT*, ordine quo ibi proponitur.

Spathum bononiense gravitatem specificam habet relate ad aquam uti 4,500: 1000.

Adamantis gravitas specifica juxta calculos exactissimos est 3,500: 1000.

Pars I.

B

Lapi-



Lapis electrici (Tourmalin) gravitas ad aquam
uti 300. aut 350: 1000.

Basaltii gravit. specific. inter 3,000. et 3,400.

Acidi vitriolici gr. sp. 1,700: 1000.

Aurum, inter omnia corpora reliqua ponderosissimum, quum gr. ejus sp. sit ad illam aquae 19,640: 1000.

Argenti gr. sp. 11,091: 1000.

Platina, ait, auro ponderosior, et hinc ex omnibus corporibus ponderosissimum; etsi quidem proportio gr. illius sp. ad gr. aquae juxta tentamina Cl. Lewis non nisi ut 17,000: 1000. fuerit, deprehensum tamen est, gravitatem hanc, post fusionem cum aliis quibusdam metallis ad 22,000. auctam fuisse.

Stanni gr. sp. ut 7,400: 1000. vel 7,321: 1000.

Plumbi gr. sp. sat insignis, quum sit 11,325: 1000.

Cupri si *japanicum* fuerit, gr. sp. 9,000: 1000. si vero *suecicum*, 8,784, aut 8,843: 1000.

Ferri gr. sp. 7,645. aut uti 8,000: 1000.

Mercurii gr. sp. post aurum est maxima, scilicet 13,593: 1000.

Cinnabaris nativae gr. sp. 7,500: 1000.

Bismuthi gr. sp. 9,700: 1000.

Zinci gr. sp. 6,900. aut 7,000: 1000.

Arsenicum, ait, sublimatur, quum additum fuerit phlogiston, in crystallos octoedras, specie metallicae dotatas; gr. tum ejus sp. 8,308: 1000.

Calcis Arsenici in vitrum album conflatae gr. sp. 5,000: 1000.

Cobalti gr. sp. 6,000: 1000.

Niccoli demum gr. sp. 8,500: 1000.

Etsi

ETSI vero rationes hae *Cronstaedtianae* et *Monnierianae* satis hinc inde ab invicem differant, adparet tamen exin sat bene scala, qua metalla gravitate sejungantur; tum et gravissimum corporum naturalium aliorum levius esse metallo levissimo. BOERHAAVIUS ex *Philosophical Transactions* sequentem excerptit tabulam et *Chemiae Elementis* inseruit.

Aurum, 19, 636.

Mercurius, 14, 019.

Plumbum, 11, 345.

Argentum, 10, 535. v. 11, 087.

Cuprum, 8, 843.

Ferrum, 7, 852.

Stannum, 7, 321.

Granatus, 3, 978.

Vitrum, 2, 805.

Aqua antliae 1000.

INDIVIDUUS, addidit Vir incomparabilis, proprius, metallorum character, est ingens, atque alia omnia corpora longe antecellens, pondus; quod, arti omnium difficillimum productu, definit metallorum notam certam. Inde optima methodus explorandi incognita corpora: ut sciatur, an metalli multum insit? quin et saepe patet, quale id sit? Quae difficultas pondera augendi? ut caetera metalla densata mutantur in aurum; vel alia corpora transeant in metalla; quae materies auro proxima, ut in hoc mutari queat, respectu ponderis: ex pondere peti demonstrationem certam.

PLURA adferentur, dum de substantiis singulis metallicis in *specie* sermo erit.

S. II.

METALLICAE substantiae *fusibilitatis* dote gaudent; majori, facilliorique hae, minori, difficilior promoven-



da illae; platina ad fusionem ignem requirit omnium violentissimum, catoptricum; mercurius leni adeo calore funditur, ut vel in atmosphaera dispersus haerens hunc in scopum jam sufficiat: extremae binis hisce corporibus definiuntur, in scala fusibilitatis, lineae; reliqua medium diversa sub ratione tenent. Sequuntur sese hoc ordine: mercurius, stannum, plumbum, argentum, aurum, cuprum, ferrum, platina. Aurum fluit observante *Cl. MORTIMER* gradu 1300. therm: Fahrenheitiani; argentum gradu 1000; cuprum gradu 1450; ferrum gradu 1600; plumbum gradu 550; stannum gradu 420; regulus antimonii gradu 810; bismuthum reliquis omnibus facilius fluere, *Cl. POTT*, Zincum ad sui fusionem majorem calorem requirere, quam stannum, *Cl. SPIELMANN* monuit.

§. 12.

VARIUM denuo circa fusionem metallorum ipsam obtinet discrimen: alia enim, antequam fundantur, diutius candescunt, alia funduntur longe ante candescentiam; platina per annos candens in igne vulgari fusorio tamen non funditur; Zincum, quamprimum funditur, et in flammam exardescit, et floccorum alborum, seu *lanae* sic dictae *philosophicae* sub forma *avolat*. Candescentiam ante fusionem, inprimis requirunt aurum, argentum, ferrum, cuprum, et, gehennae igne fundenda, platina; ante candescentiam funditur stannum, plumbum, bismuthum; jam fere candens funditur Zincum.

§. 13.

SPLENDORE substantiae metallicaе insigni, sibi quae speciali, *splendor metallicus* dicto, gaudent: in conspe-


speculum prodit hic tum sub fusione ipsa, tum in puris nunc, tum demum in politis, vel et diffractis illis.

§. 14.

SPLENDOR hic *metallicus* insignis adeo est, et substantiis metallicis adeo proprius, ut inter notas earum características reliquas receptus fuerit, et praerogativam hanc optimo jure mereatur. Dependet autem a densitate illarum maxima; corpora etenim densissima simul sunt maxime splendentia; specula tum demum officio suo adprime funguntur, quum alteri eorum parti lamina metallica fuerit obducta: gemmae laetius nitent bracteolae metallicaе splendenti inpositae; hanc ob dotem et chalybs exactissime politus a sole illustratus adeo splendet, ut intuentium laedat oculos. Et si substantiae metallicaе splendeant omnes, hinc vix assignari possit scala splendoris, durissima tamen, et alibentia dote hac praeter reliquis gaudebunt: ordine sequenti illas disposuit *Cl. MACQUERUS*: platina, ferrum, seu potius chalybs, argentum, aurum, cuprum, stannum, plumbum.

§. 15.

NOTANDUM adhuc venit, splendorem hunc in aliis metallis diutissime durare, in aliis cito valde obnubilari, ac demum perire ex integro. Aurum splendet post saecula; plumbum vix post hebdomadam; in illo splendor suppressus restituitur, quamprimum ab adhaerentibus annosis sordibus depuratum fuerit; in hoc non resuscitabitur, nisi fundatur denuo, poliatur, altera die iisdem obducendum tenebris. Metalla, quae aeris, et aquae, et menstruorum plerorumque actionem eludunt, diutissime simul, et pulcherrime splendent; alia quae meretricis in morem adgressori cuivis cedunt,



cedunt, elegantiam ocysime deperdunt; teste auro, teste argento, teste cupro, teste ferro.

§. 16.

DUCTILITATIS, sub malleo inprimis, diversa in diversis ratio: aurum ductilissimum omnium fidem ferre superat, uti ex illis, quae, dum *de auro* sermo erit, adferentur, fiet palam; reliqua ex ordine decrescunt; et semimetallorum pleraque ductilia parum adeo sunt, ut sub malleo rumpantur prius in pulverem, quam expandantur in bracteam. Differunt metalla a corporibus ductilibus reliquis, quod ductilia sint et calida, et frigida; aliae enim substantiae ductiles demum sunt, dum calent, teste cera, teste pice; aliae, dum cudent, teste vitro. Ductilitas sub malleo, *malleabilitas* speciali titulo adpellari solet: ea tamen corpora metallica, quae sub malleo sunt ductilissima, in fila tenuissima extendi queunt; et quae malleabilia non sunt, ea nec ductilia in filum unquam erunt. Ratione ductilitatis sic sese invicem excipiunt: Aurum, argentum, cuprum, ferrum, stannum, plumbum. Mercurio ductilitatem competere, quum in substantiam solidam, frigoris intensissimi ope, redactus demum fuerit, ex tentaminibus celeberrimi BRAUNII *Petropoli* institutis, tum et ex tentaminibus CL. GMELIN *Krasnajorockensibus* evictum habetur. Circa ductilitatem inprimis metallorum bene meritus fuit CL. TILLET; eam in metallis constituere accidentale quid, CL. WENZEL nuper monuit.

§. 17.

Cum ductilitate cohaeret *tenacitas*, seu haec potius ex illa promanat. Consistit enim tenacitas in nisu partium cohaerendi invicem, etsi loco sibi invicem

cedere, aut volutari supra sese mutuo queant. Corpora metallica ductilissima simul sunt tenacissima; hinc apte Cl. MACQUERUS observavit, tenacitatem metallorum videri esse in ratione composita ductilitatis, et duritiei; durities enim reponi magis videtur in nisu partium cohaerendi invicem, quin tamen loco sibi invicem cedere, aut volutari supra sese mutuo queant: probe tamen attendendum est ad vim excedentem, qua nifus ille absolvitur; ne fors quis obponat, an et aqua ductilis sit, quum partes supra sese revolvi in illa possint.

§. 18.

TENACITAS metallorum conficitur ex adpensis ponderibus, quae, priusquam rumpantur, sustinere apta nata deprehenduntur. Sequuntur invicem lege sequenti: aurum, ferrum, cuprum, argentum, stannum, plumbum. Transductio per foramina ferri tractorii, recoctio, actio vaporum metallicorum, caloris accessus aut frigoris, metalli ab admista terra, et heterogeneis major vel minor puritas, majorem etiam aut minorem tenacitatis, ductilitatis, et malleabilitatis gradum conciliare diversis metallis poterunt.

§. 19.

METALLICAE substantiae diversis patent *mensstruis*: sub quibus inprimis salia alkalina fixa et volatilia, salia acida, sulphur, hepar sulphuris, salia media varia, olea, tum et ipsa metallica corpora sese solventia diversa sub forma, et encheiresi, intelliguntur. Quaedam referantur ab omnibus, uti v. c. ferrum, et cuprum; aliae determinatum solum requirunt, a quo domentur, laticem, v. c. aurum, et platina.



§. 20.

QUAEDAM ex illis in frigido jam referantur menstruo, v. c. ferrum in acido nitroso, aliae caloris requirunt interventum, quin et decoctio accedere simul debet, uti cuprum referandum in acido vitriolico concentrato; aliae vero languide solum, et dosi minima solvi demum debent, uti stannum in aqua regis pro purpuræ mineralis legitima confectio; hae in diluto aptius resolvuntur, uti ferrum in acido vitriolico; aliae concentratum requirunt, uti cuprum solvendum in acido vitriolico pro conficiendo exin vitriolo: mercurius et concentrationem, et calorem magnum exigit, ut solvatur in acido vitriolico.

§. 21.

ALIAE his omnibus in usum vocatis nondum resolvuntur, sed requiritur, ut menstruum in vapores actum iisdem adplicetur, uti mercurius referendus ab acido muriatico.

§. 22.

Quod vero solutionem ipsam adtinet, variae de-
nuo circa hanc occurrunt notanda; tum ratione phaenomenorum eam concomitantium; tum ratione productorum inde exfurgentium; aut diversae quantitatis metalli, solutionem subeuntis e. s. p.

§. 23.

SUBSTANTIAE multae metallicaë impetu solvuntur maximo, copia ingens vaporum expellitur, admoto igne inflammabilium subinde, uti in solutione ferri per acidum vitriolicum manifesta habetur instantia;

men-



menstruum incalescit adeo nonnunquam, ut vas teneri manibus nequeat: aliae vero tranquillae magis sunt, et paulatim demum succedunt; illis accensentur inprimis, quae in acidis mineralibus fiunt, solutiones; his, quae in acidis vegetabilibus, aut salibus alkalinis, tum fixis, tum volatilibus.

§. 24.

SOLUTIONES quaedam excolores sunt, v. c. solutio Zinci in acido nitri; aliae diversos, eosque elegantiores omnino colores obferunt; uti solutio auri in aqua regis aurea, cupri in aceto viridis, in sale alkalino volatili cyanea, in acido nitroso caerulea, argenti purissimi in acido nitroso excolor; e. f. p.

§. 25.

QUAEDAM solutiones metallorum exfatiari vix posse videntur, uti ferri solutio in acido nitri praebet instantiam; aliae determinatam magis amant metalli copiam, uti solutio stanni in acido nitroso, et aqua regia docet. Plurima metalli erosi partem, elapso longiori breviorive temporis intervallo, ex amplexibus dimittunt; docet ferri in acido nitri solutio: in quibusdam metallum solutum in crystallos concrefeit, dummodo meraca solutio fuerit; docet solutio mercurii in acido nitroso.

§. 26.

IN plurimis solutionibus metallum ipsum solvitur, et menstrui penetralia intime subit, ut sub pristina specie distingui nulla sensuum acie queat; huc spectat solutio Zinci in acido nitri, cupri in acido nitri, vel in acido salis, platinae, aut ferri, vel auri in




aqua regia e. f. p. In aliis vero menstruum non agit in metallum, nisi referatum hoc fuerit menstrui alterius beneficio; instantiam praebet solutio auri in salibus alkalinis. Distinguenda tamen exacte hic erit *dilutio* a *solutione*; sic aqua non solvit substantias multas metallicas, et, si elementaris foret, purissima, nullo omnino salino principio inbuta, vix solveret ullam; solutiones tamen pleraeque metallicaes absque ulla mutatione in aqua diluuntur, et aequabilissime divisae disparent.

§. 27.

Ex solutionibus metallicaes substantiae aut labuntur, magnam saltem partem, praecipue dum fuerint meraciores, per se; aut per corpora superaddita alia exin dejiciuntur, sive corpora haec, *praecipitantia* dicta, salia alkalina, aut terrae, absorbentes inprimis, aut metallica corpora alia, aut liquores regni vegetabilis, aut simplex aqua, aut salia demum fuerint media. Sic, ut de quovis unicum saltem habeatur specimen, ferrum dejicitur per sal alkali fixum, et volatile; cuprum, vel ferrum etc. expellitur per lapides cancerorum, ex solutione in acido nitroso facta; cuprum solutum, in acido vitriolico praecipitatur, per ferrum; acetum aurum ex menstruo suo paulatim deturbat, quod et olea faciunt aetherea, aurum aquae regiae eripientia; solutio paulo meracior stanni adfusa aqua decomponitur; cuprum etc. ejicitur per tartarum vitriolatum.

§. 28.

EXPOSITAE evaporationi metallicaes solutiones multae in crystallos concresecunt, diversa forma et colore praeditas; aliae magma potius constituunt crystallificationi non cedens. Crystalli obtentae aut in aëre diu per-



perſiſtunt non mutatae; aut in pulverem fatiſcunt, aut in liquamen, attractio ex atmofphaera humido, deliqueſcunt.

§. 29.

EXPOSITA ignis actioni producta nunc dicta menstruum suum aut mox dimittunt; aut tenacissime cum illo neſtuntur, ut avelli vix poſſint; aut encheireſi nova accedente ab eo liberantur; aut in ſublime una cum menſtruo evehuntur. *)

§. 30.

Dictum antea fuit, fuſibilitate ſubſtantias metallicas gaudere; apta ſcilicet nata ſunt, recipiendis in penetrabilia ſua particulis tot igneis, ut harum interven- tu ex compage firma in ſtatum fluiditatis abire cogantur, atque particulae metallicae particulis igneis nunc innatent: fuſio hinc genuina corporum ſolutio per ignem eſt.

§. 31.

DUM vero gradus ignis pro fuſione requiſitus re- ceſſerit, in ſtatum firmitatis denuo revertuntur. Si gradus requiſiti pro fuſione caloris paulatim non niſi removeantur, particulae metallicae regularem plus minusve directionem inter ſeſe mutuo adſumunt: REAUMURIO inprimis deſcriptam: adparet haec vel in fractura, vel in externa, ac ſuperiori ſuperficie; elegans testi-

*) ADTULISSE in praesentiarum ſufficiat haecce generalia; dum de metallis in ſpecie ſermo erit, quae circa cujuſvis ſolutionem, praecipitationem &c. notanda ſint, late exponentur.



testimonium præbet stella decantata adeo reguli antimonii, soli particularum symmetricae unioni ortum suum debens.

§. 32.

DUM substantiæ metallicæ funduntur in vasis, in quorum parietibus adscendere minus queunt, adsumunt in superficie formam subsphaericam, seu convexam. Exemplum offert stannum in vase terreo fusum. Quodsi vero recipiatur vas ferreum, aliudve metallicum, rubigine non obductum, in qua determinata corpora metallica per parietes adscendere queant, superficies non concava, sed convexa potius in medio erit: phaenomenon hoc figura diversa varie augeri vel minui potest, ac prius quidem in ora metalli fusi imprimis adparet: exponere hæc voluerunt per adfinitatem quamdam, aut adtractionem mutuam, vas inter et metallum in eo fusum; observantur tamen eadem fere in substantiis fluidis etiam diversa ratione, si cum vase, in quo continentur aut nullam, aut minorem, aut maximam unionem, seu adhaesionem potius colere queant. Hinc supersedere potuissent auctores observatione, specialem quemdam exin deduci posse metallorum characterem.

§. 33.

METALLICÆ substantiæ et calefcunt citius, et refrigerantur denuo, corporibus naturalibus aliis: frigore contrahuntur, calore expanduntur. Ambæ hæc proprietates prærogativam constituunt thermometrorum mercurialium, quum sensibilia, ex dictis, sint reliquis omnibus.

§. 34.



§. 34.

Ex *Richmannianis* tentaminibus conficitur, incallescens, ac refrigerationis non in omnibus metallicis corporibus eandem omnino esse rationem : verum antea jam dixi, ne fusibilitatem quidem in cunctis eadem lege dirigi. Notavit egregius *RICHMANN*, cuprum diutius caluisse ferro, ferrum diutius stanno, stannum diutius plumbo; diutissime prae reliquis aurum calet. Exposuit illa praeterea *RICHMANN* frigori, quo aqua in glaciem vertitur; atque tum vidit, ordinem nunc esse invertum recalescentiae sub iisdem datis progressionibus: recaluit plumbum citius stanno, stannum citius ferro, ferrum citius cupro. Deduxit ex his omnibus, esse augmenta aut diminutiones caloris in hisce substantiis nec in ratione inversa densitatis, nec analogas partium metallicarum cohaesioni, nec analogas duritiei, nec demum analogas proportioni ex proprietatibus hisce binis aut tribus compositae.

§. 35.

Dum vero binae pluresve metallica substantiae invicem junguntur, alia denuo exin oriuntur phaenomena, tum ratione incallescens, tum et ratione fusibilitatis; sic metallica compositio ex plumbo bismutho et Zinco in experimentis *Cl. Rosen*, fusilis adeo inventa fuit, ut vel in ipsa ebullienti aqua liquefceret. Alia vero phaenomena miscelarum metallicarum tum de metallis in specie agens tangam, tum vel maxime in *Introductione ad Philosophiam naturalem Ill. MUSCHENBROECKII* fusc legi poterunt.

§. 40.



§. 36.

IGNI subjectae metallicaе substantiae, praeter ea, quae ratione fusibilitatis obtinere antea dixi, varie sese gerunt: atque inde potissimum discrimen earum in *metalla perfecta, et imperfecta* deducitur.

§. 37.

EXPERIENTIA constat, quasdam igni violento per longum tempus expositas fundi quidem, verum nec in calcem abire, nec in sublime rapi, sed inmutatas persistere.

§. 38.

HAE, ob rationem nunc dictam *metalla* dicuntur *perfecta*; quum praeterea pretium iisdem adfixum fuerit maximum, seu quum reliquis longe cariora sint, *nobilem* invenerunt nomen. Huc *aurum* refertur, *argentum*; et tum ob rationes alias, tum ob fixitatem in igne, tum ob raritatem, *platina*.

§. 39.

METALLA nobilia et ductilitate simul, et malleabilitate corpora metallica alia longe excellunt; diversum tamen quid circa platinam fors obtinet.

§. 40.

ALIAE denuo metallicaе substantiae, actione ignis diuturna et accessu aeris liberi decomponuntur demum, ac in terram abeunt, quae pro diversa ratione cuiusvis metalli, cuius basin constituit; gradus ignis, quem experta fuit; temporis, quo in igne mansit, colore diverso



verso gaudet, ac in *vitra*, seu *encausta*, elegantibus coloribus dotata, fundi valet: terrarum illarum multae sapore subfalino gaudent.

§. 41.

HAEC, ob dictas nunc dotes, *metalla* dicuntur *imperfecta*; et, quum pretio minori constent, *ignobilia*, etsi quidem nobilis metalli ferrum inprimis, et cuprum nomen mereri omnino videatur. Sub hac classe militant: *cuprum*, *ferrum*, *stannum* et *plumbum*.

§. 42.

DUCTILIA haec metalla non adeo sunt, uti nobilia, cuprum tamen et ferrum ductiliora sunt stanno et plumbo.

§. 43.

PRAETER *metalla nobilia* et *ignobilia* supersunt adhuc alia corpora metallica, sub nomine *semimetallorum* nota.

§. 44.

SEMIMETALLA fere ductilia non sunt, sub malleo in fragmina maximam partem rumpuntur, igne rapiuntur, ac per vapores plerumque fugiunt. Sub hac classe collocantur: *regulus antimonii*, *bismuthum*, *Zincum*, *regulus cobaltii*, *regulus arsenici*, *Niccolum*.

§. 45.

SEMIMETALLA in igne fixa quidem non sunt, uti statim dictum fuit; terrae tamen eorum, quibus ceu ba-
fi



fi constant, summum ignem ferunt quin avolent, teste calce antimonii, calce Zinci; sub finem in vitrum abire solent. Excipiuntur ab hac lege pauca, uti per decursum monebitur.

§. 46.

Et metallis ignobilibus, et semimetallis communis adhuc dos competit, quod frigida, aut calefacta odorem singularem spirent; eminet haec dos inprimis in arsenico, stanno, plumbo; in quovis tamen eorum alius odor percipitur. Pleraque et *saporem* gaudent, magis minusve evoluto; et pleraque demum manus, dum teruntur, maculis inficiunt.

§. 47.

MONENDUM adhuc, metallicum corpus nullum, (excepto fors arsenico?) unionem inire posse cum substantia metallica alia, nisi haec dotibus metallicis integerrimis instructa sit; nec ipsae ab hac lege excipiuntur metallorum specialium terrae propriae; sic plumbum, et plumbi calx unionem non inibunt, nisi calx in formam prius reducta fuerit metallicam.

§. 48.

REMANET praeter metalla nobilia, ignobilia, ac semimetalla substantia, dictarum classium neutri apte inferenda; etsi ob speciales dotes jam ad hanc, jam ad illam accedere videatur; nunquam non fluida haec, et frigore intensissimo solum densatur, tumque ductilitatem quamdam indipiscitur, accessu caloris denuo auferendam; colore argento aemula est, pondere ad aurum proxime accedit: divinari facile quis poterit, subintelligi MERCURIUM.

§. 49.

§. 49.

QUAESTIO nunc foret, ut, quanam *metallorum* sint *partes constitutivae*, aut quibusnam ex *principio* consentur, in medium adferatur: verum tamen, cū dicere non liceat, rem hanc latere nos ex integro, adferere pariter non possumus, ad ultimos jam nos pervenisse labyrinthos: difficultatem dudum auxit, quod naturae penetralia abstrusa satis circa haec sint, quod ea, quae detegere, ac evincere non licuit, figmentis compensare maluerit ac somniis phantasticis Adeptorum turba; et quod demum principia quaerenti metallorum, chrysopoeae obtrusa fuerint aenigmata. Adducam tamen hic, Tyronum in gratiam, ex *Cl. MACQUERO* imprimis historice, quae circa hanc rem consentanea maxime rationi videntur, excerpta in Compendio: qui materiem hanc latius nosse voluerint, adire poterunt Auctores, quorum de genesi metallorum, ac principiis exstant scripta: *BECHERUM* hos inter imprimis commendo, *STAHLIUM* et *JUNCKERUM*; reliqui aut gemmas quaerenti dabunt stipulas; aut obscura dicent, quae nec intelligat Oedipus; aut, quae in Triumviris illis habentur, exscripserunt, et, vel passim reddiderunt deteriora, vel meliora non protulerunt.

§. 50.

QUUM metalla nobilia, uti prius dictum fuit, ignis actioni, quin mutantur, resistant, ignobilia vocanda fuerunt in auxilium, ut, quid perdant, quid lucrentur, tum igni, tum et aliis menstivis objecta, elucesceret.



§. 51.

METALLA hæc igni exposita in vasis clausis adeo, ut aëri nullus detur accessus, funduntur quidem et candent; ac, si id ex eorum fluat natura, in sublime adscendunt, sed non mutantur; et in frigefacto vase eadem, qua prius gaudebant, forma occurrunt.

§. 52.

EXPOSITA vero igni, aëri simul relicto aditu liberrimo, funduntur, candescunt, quaedam, uti Zincum, in flammam exardescunt; nullam tamen fuliginem, uti ligna, aliave corpora inflammabilia eructant, remanet demum *calx*, seu *terra metallica*, quam antea jam obiter consideravimus.

§. 53.

NITRO injecta candenti, *detonationem* excitant, pars inflammabilis, seu phlogiston perit, et calcinatio citius perficitur: nitrum sub hac operatione salis alkalini naturam induit; uti, dum detonationi cum carbonum pulvere exponitur, fieri adsolet.

§. 54.

ACIDO vitriolico et nitroso, quibus cum phlogisto magna intercedit amicitia, immerfa metalla imperfecta, horum ope majori etiam, minorive phlogisti parte privantur, uti ex calcium phlogisto destitutorum examine, et ex sulphure, acido vitriolico nunc incubante, aperte demonstratur.

§. 55.

Residua a calcinationibus dictis metallorum portio ab indole pristina nunc plane dejecta cernitur; nec du-
ctilis

tilis est, nec malleabilis; nec splendet; verbo, vera terra cernitur friabilis, in atomos ruens.

§. 56.

PROUT vero calcinatio protrahitur per brevius longiusve temporis spatium, prout hinc major minorve phlogisti abigitur copia, calcis etiam genesis major erit, aut minor; quum vero calx jam facta metallo cohaerere nequeat, sub pulveris forma metallo fuso innatat, aut per squamulas abscedit; priori modo a ferro et cupro, posteriori a plumbo et stanno excutitur.

§. 57.

OBTINET circa mutationem hanc metallorum in calcem magnum adeo discrimen, uti circa fusibilitatem eorum antea fuit adnotatum. Quaedam ignis actioni diu resistunt, et per exiguas partes calcinantur; in aliis totum negotium celerius multo perficitur: nonnulla partem phlogisti, superabundantem quasi, facile dimittunt, sed arcte recludunt reliquam; alia totum, quod continebant, phlogiston sat benigna dimittunt; primae calcinationi diutissime inprimis resistit cuprum; partem phlogisti diu retinet plumbum, et Bismuthum; citius et exactius a phlogisto liberantur stannum, et regulus antimonii.

§. 58.

PORTE solum phlogisti privatae, et igne violento tortae metallicaе terrae funduntur, ac in massam ponderosam, opacam quidem, minus tamen, quam metalli ipsa, his dotibus praeditam, fragilem, ductilitate ex integro spoliata abeunt; demum in *vitra* reducuntur *metallica*, vitro reliquo omni ponderosiora,



acidorum imperio adhuc, certis sub legibus obnoxia; et, si ex semimetallis confecta fuerint, vitris aliis fixitate cedentia. Gradu maximo caloris applicato, fixissimae igne furnorum vulgari non fundendae, acidis non referendae calces obtinentur. Haec oriuntur phaenomena ex instituta sensim partis phlogisticae abactione a terris metallicis.

§. 59.

PER haec evictum videri posset, metalla phlogistica parte constare, et terrestri: verumtamen clarius idem evincitur per tentamina adhuc alia, jam exponenda.

§. 60.

MISTA terra metallica cum substantia quacunque demum, phlogiston recludente, et vel in carbonem reducenda, vel in statu carbonaceo jam constituta, adjecto simul fluxo quodam salino, fusionem reddente faciliorem, phlogiston tamen copia sua, aut speciali indole non abliguriente, miscela hac crucibulo probe tecto inclusa, igne demum per gradus ad fusionis ignem usque intenso, sibilus percipitur in crucibulo per brevius, longiusve temporis spatium, prout scilicet phlogisto magis minusve orbata terra fuerit; (ignis tum in eodem conservari gradu debet) fluxu ad finem legitime deducto frigescent sensim omnia: fracto crucibulo nova metamorphosi in metallum pristinis suis dotibus instructum *reducta* oculos feriet terra, ad experimentum adhibita.

§. 61.

PHLOGISTI unice cum terra metallica unioni debet hanc reductionem, patet ex eo, quod metallum nullum



lum reduci unquam possit, quin phlogistum fuerit adjectum; quod prorsum sit indifferens, quaenam substantia phlogisto graviora recipiatur, quum idem hoc sit per omnes; quod examini subiectum reducens corpus tantumdem phlogisti perdidisse deprehendatur, quantum a terra metallica, ut reduceretur, requirebatur.

§. 62.

Certissimum equidem ex his foret, metalla destrui, expulso ex terra sua phlogisto; reduci eo restituto; hinc componi binis hisce principiis: verum enim vero alia denuo recurrit quaestio; an substantiae hae binae sufficiant ad metallorum productionem; et an aliud nulum accedere deberet principium? quaestioni non foret locus, si, quod haecenus non licuit, ex unione sola phlogisti cum substantia, quam terram esse, momenta et experimenta docerent omnia, metalla per artem possent generari.

§. 63.

Tantum vero abest, quin efficere illud queamus, nisi terra ad experimentum adhibeatur metallica, genuina, ut ipsae metallorum terrae, omni licet arte cum phlogisto iunctae, in metallum prius tamen non redeant, dum calcinatione diutius protracta, et igne intensissimo nimium exustae, et ad genium terrae simplicis redactae fuerint.

§. 64.

SUADERE tum haec, tum et consideratio, ex binis nonnisi, et iisdem principiis tantam adeo corporum varietatem ab invicem diversissimam, uti inter metalla obtinet, vix fieri posse, suadere, inquam, haec simul



mul viderentur, praeter terram et phlogiston adhuc aliud quid ad metallorum genesis requiri.

§. 65.

SUSPICATI hoc ipsum dudum fuerunt, qui rem hanc penitus examinandam sibi proposuerunt Auctores. Principes inter hos BECHERUS, eumque exponens STAHLIUS, ut malo medelam quaerent, principium adsumere mercuriale; principium hoc copiosissime haerere in mercurio; metallica hujus substantiae indolem sequi; adesse etiam insigni copia in acido muriatico, eique characterem largiri proprium; hinc opus solummodo esse, ut vel ex mercurio, vel ex acido salis, vel ex alio quocunque demum corpore, eo copiosius instructo, evocetur, ac terris jungatur simplicibus, quo hae typum sic acquirerent, ac genium terrarum metallicarum, cum parte inflammabili dein coire possent, ac metallicam indolem demum induere, edixerunt. Addiderunt simul, in diversis metallis principia diversa proportionem adesse; *principium* inprimis *mercuriale*, seu *terram mercurialem* tum copiosius, tum evolutum magis in quibusdam corporibus metallicis haerere: his inprimis accensuerunt mercurium, argentum, plumbum, arsenicum; chemicorum plerique argentum, mercurium, et plumbum, ratione inprimis phaenomenorum, quae cum acido salis juncta exserunt, a metallis reliquis sub titulo *metallorum alborum, lunarium, aut mercurialium*, sejunxerunt.

§. 66.

PROBABILIS exin saltem foret principii mercurialis existentia, ejusque requisitus ad formationem corporum metallicorum concursus. Veruntamen alia sane ratio est probabilitium rerum, alia re vera existentium. Pro-

Probabilitas principii plurimum ex dicendis jam innuitur.

§. 67.

Tum corpora, quae principio hoc praegnantia dicuntur, volatilissima sunt, uti ex cognita acidi muriatici, mercurii, et arsenici indole patet; tum ex omnibus eidem adscriptis proprietatibus conficitur, id esse debere volatilitate maxima praeditum: quum itaque volatilis principii, mercurialis terra, seu mercuriale principium, optimo jure mereatur titulum, fieri non potest, quin sub decompositione metallorum per ignis imperium, vel et per nitri candentis actionem pars insignis illius fugetur in auras, et prorsum dissipetur: hoc vero facto, qua ratione fiet reductio metallorum abs principio mercuriali denuo superaddito? Restituta enim parte phlogistica indepta fuissent alterum solummodo principium; tertium vero, idque insigne inprimis, adhucdum ex integro desideraretur. Constat autem experientia phlogisto superaddito solo, terras illas metallicam formam denuo adsumere, nec ullum ad hoc requiri mercuriale principium. Nec pro causa principii mercurialis adferri poterit, latere in substantiis, phlogiston continentibus, sufficientem simul reductendae terrae metallica in pristinam formam principii mercurialis quantitatem; hoc enim admissio perficerentur metalla, dummodo terra pura, nec metalli-
ca, cum substantia tali conjungeretur, adforent siquidem requisita ad metallum principia omnia; contrarium vero evincunt experimenta. *)

C 4

§. 68.

*) JUNGAM his, ordine quo leguntur ex *Cl. MACQUERO* excerptis momentis, et observationem propriam, qua principii mercurialis praesentia sane non evincitur.

Terra



ADFERRE quis posset, in principii mercurialis defensionem, jacturam semper fieri metalli quamdam, quotiescunque terra reducitur, eamque esse eo majorem, quo diutius protracta fuit calcinatio, quo terra magis exusta; principium itaque mercuriale sic sensim deperdi, nec, addito solum sub reductione principio phlogistico, denuo restitui: Verum tamen, an non admitti eadem veri specie posset hypothesis, phaenomenon illud, quod terrae vulgares, aut metallica, sed nimium exustae, reduci amplius nequeant, dependere solum a difficultate unionem hanc ineundi; quam terrae simplices, ob diversitatem ingentem terram inter et phlogiston intercedente, in nostris tentaminibus adeo abhorrent; unione tamen hac, naturae ipsius ope, jam partim contracta, terras longe praeiores esse, ut requisitam pro restituendo metallo phlogisti recipient copiam: terram hinc quaecumque principio inflammabili, aut naturae novercae injuria, aut ignis violentissimi actione, ex integro privatam, ratione ad nos habita, *terram esse non metallicam?* conficeretur exin, principium mercuriale nil nisi ipsum esse phlogiston, seu potius, peculiarem haud esse substantiam, quum de-

Terra pura cum acido muriatico, quod inter praecipuas principii, seu terrae, mercurialis apothecas reponitur, diversa ratione conjuncta, dein vero cum fluxu reductivo igni exposita, metallum nunquam praebuit: recepta in aliis tentaminibus terra vera metallica, sed per calcinationem violentam, et diuturnam refractaria reddita, eadem ratione tractata, nec atomum metalli largita fuit, praesentia tamen erant et terra, et phlogiston, et principium mercuriale, quae pro conficiendis metallis a sententiae supra propositae Auctoribus unice postulantur.

definiatur solum initio unionis phlogistici principii cum terra, seu aptitudine proxima, quam terra quaedam, ut cum principio inflammabili jungatur, exerit. *)

§. 69.

Quodsi sententia haec evicta satis foret, et experimentis firmata, sequeretur exin, *metallorum artificialem genesin* non solum esse possibilem, sed et faciliorem longe, quam hactenus admissum fuerat; binam enim solummodo nunc nudi invicem deberent principia; non requisitum foret jam principium illud mercuriale, quod quidem tractatu sub operationibus aliunde est difficillimum, et, undenam peti debeat, non constat; cuius nec distinctam adeo habemus notionem, uti principii phlogistici, et terrei; cuius demum ne existentia quidem extra omnem posita est controversiam. **)

C 5

§. 70.

*) IDEAE haec, Cl. MACQUERUS ait, debetur Cl. HENCKEL, quem possibilitatem artificialis metallorum productionis et credidisse, et magni fecisse, nemo certe inficias iverit.

**) HIS tamen non obstantibus, Cl. MACQUERUS ait, pro certo adsumere debemus, artificialem metallorum productionem unum ex difficillimis resolutu Chemiae esse problematibus. Legere in *Dictionnaire de Chimie* poterit momenta, quae in sententiae confirmationem Cl. VIR adtulit, cui arbitrium videri posset adfertum. Etsi vero adferere fors circumspecte tamen liceat inter numerum enormem institutorum circa negotium hoc tentaminum, quaedam, paucissima licet, meliori coronata fuisse successu, tenendum erit, summam ad hoc et scientiae naturalis, et chemiae





§. 70.

SALINI principii praesentiam in metallis adsumserunt quidem haud pauci, nondum tamen ea sic evicta haecenus fuit, ut *principii* vel *accessorii* titulum mereatur; excepto solum arsenico, communi annulo, quo

miae vulgaris aequae, ac sublimioris cognitionem requiri, nec licere illam sicco transilire pede, uti Adeptorum fastuosorum ex aequo, ac ignorantium cohors facere nunquam non solebat. Latius hisce nunc inmorari non licet, quum Tyrones chemici, quorum unice in gratiam opus hoc adgressus fui, aliis longe fatigare necessum habeant encephalon, quam chrysopoeae ambiguo, et exitiali tot infelicibus examine —. Lubens etiam praetereo, quum hic tuto negligi posse credam, quae Auctores varii circa indolem terrarum metallicarum aliorumque principiorum adsumserunt; nam et hic gratis in medium prolata, et hypothetica plura video, quam experimentis genuinis, non fugacibus nixa; momentis legitime deductis, non ad genium systematis detortis, firmata. Inde et tantus sententiarum dissensus: sic v. c. *Cl. WALLERIUS* in ferro terram adesse dixit argillaceam, ab acido vitriolico, seu potius a materia electrica, in illa fixata, mutatam in terram genuinam martialem, alii terram inhaerentem statuerunt calcaream, Sulphure mutatam: *Cl. SCOPOLI* nuperrime in metallis adsumsit terram specificae indolis, alcalinam, ad terram aluminis proxime accedentem, et dum ab acido fuerit referata, ac penetrata in vitrum demum abeuntem; adsumsit praeterea principium salinum, idque volatile, ac acido muriatico fere analogum,

quo salium et metallorum catena invicem unitur. *Aquosum* in metallis nil unquam detectum fuit; nec *oleosum* quid illis inhaeret, si sub voce hac verum oleum, seu liquorem aquae non miscibilem, igne exardescentem intelligas; sub oleorum specie copiosum plerumque, observatoribus minus in rem, quam examini subjecerunt, attentis inposuit phlogistum, quod metallicaе diversae substantiae in sinu suo recondunt; uti ex Zinci, gradu fusionis in flammam exardescentis, tum et ferri limaturae, in candelae flamma vivacissime scintillantis instantia conficitur.

§. 71.

IPSORUM jam metallorum *nobilium*, seu *perfectorum*, *ignobilium* seu *imperfectorum*, ac *semimetallorum* demum examen chemicum adgrediamur; initio ab *au-ro* reliquorum omnium principe facto. Ordinem in primis eum sequi placuit, seu naturae magis congruum, ut praemittantur, quae circa substantiam quamvis mineralem notanda veniunt in genere, v. c. forma externa, color, pondus &c. tum, qua ratione sese habeat ad menstrua per naturam dispersa, aerem, aquam ignem

logum, a terrestri principio nunquam divellendum, tertio demum loco principium admisit inflammabile. Sequi praestat naturae operantis vestigia, ac in ejus, quacunque ratione demum licet, sese subducere penetralia, quam proponere rerum elementa; adfuit magis in gratiam thescos, quam re ipsa experimentis demonstrata; dubia; fors nunquam, aut non eadem saltim, uti proposita fuerunt ratione, existentia — Utilius longe est, ait Cl. CRONSTAEDT, metallorum dotes per experimenta indagare, quam eorum constitutivas partes abs fructu vocare sub examen.



ignem, et ad menstrua artificialia subjungatur; considerabuntur exin praecipitationes ex menstruis factae, relationes ad corpora metallica alia; et, quae demum his expositis adhuc supererunt, adnectentur reliqua.



A U R U M.

§. 72.

AURUM *) (☉) SOL, REX METALLORUM, *metallorum perfectorum*, seu *nobilium* perfectissimum est, ac nobilissimum.


§. 73.

INTER *proprietates* auri, quarum ex congerie auri definitio optime elicitur, omnium primo ejus considerandus venit *Color*. Est auro color, si in genere loqui velis, plus minusve flavus aut fulvus, eleganter nitens. Coloris hujus quam plurimi, ac vix definiendi cernuntur gradus. Memorat *Cl. WALLERIUS* aurum sese vidisse pallido adeo colore donatum, ut argentum prius dixisses, quam aurum. Observavit *Cl. MALOUIN*, Auditorum vultus illico exhilaratos, frontemque magis exporrectam fuisse, dum in lectionibus chemicis aurum speciminis gratia exponeretur.

§. 74.

AURUM corpora naturalia omnia *gravitate* superat: ad aquam, uti vulgo dicunt, sese habet uti 19, 636. aut,

*) ☉. perfectum, immutabile, simplicissimum. Tale aurum est; cui nil acris, nil peregrini adhaeret. *BOERHAAVIUS*.




aut, juxta aliorum Auctorum sententiam, inter quos et *Cl. WALLERIUM*, et *CRONSTAEDTIUM* video, uti 19, 640. ad 1000. *III. ELLICOT* AURUM uti 19, 207. *Cl. LEWIS* inter 19, 300. et 19, 400. ad 1000. sese habere per experimenta invenerunt. In tentaminibus *Muschenbroeckianis* inventum fuit aurum purissimum uti 19, 640, aliud fusum uti 19, 521. aliud fusum uti 19, 238, nativum de auro arenario guineensi eliquato residuum, pallidius, minus ductile, difficilius fusibile uti 16, 500. in aqua regia solutum, praecipitatum, et fusum uti 18, 948. ad 1000. aquae pluviae; praetereo hic gravitatem diversarum specierum monetae aureae. Monere tamen debeo, puritatem auri, diversum aquae calorem, aut frigus, tum et graviolem, leviolemque atmosphaeram considerari omnino debere. Aurum solum in vase argento vivo pleno ad fundum descendit.

§. 75.

DUCTILITAS auri stupenda sane est: granum unicum auri in filum extendi potest pedes quingentos exaequans: uncia una auri filum argenteum quadraginta quatuor milliarium exacte undique obducitur. Uncia auri una, verba sunt *Cl. WALLERII*, campum, cui decem modii seminis mandantur, perfecte obtegit. Ex calculis *III. REAUMUR*, et *Cl. LEWIS* efficitur, granum auri extendi posse ultra quadringentos pedes, in superficiem centum pollices quadratos exsuperantem, ac in eam usque tenuitatem, ut partem pollicis unius 492090mum aequet. Iuxta observata *Cl. GEOFFROY* aurum ductile adeo est, ut 651590cies ultra magnitudinem massae, aut voluminis expandatur.

§. 76.

SED et *tenacitas* auro insignis, eaque proprietas priori analogia est. Filum aureum decimam partem pol-



pollicis diametro exaequans pondus quingentarum librarum sustinet, priusquam rumpatur. Aestimavit *III. REAUMUR* crassitiem bracteolae aurcae tenuissimae filum argenteum obducentis partem pollicis unius $\frac{14}{1000000}$ mam; id ipsum tamen aureum tegmen arte adeo invicem cohaeret, ut, secundum experimenta *CL. HALLEY*, tubum constituat opacum, continuum, si pars fili talis inaurati aquae forti tepidae inponatur; cujus ope argentum latens dissolvitur; ac, si prudenter procedas, tubus aureus in fornicem quasi expansus, integerque remanet.

§. 77.

STATUUNT Chemici in genere, duritiem auri medio incedere tramite inter metalla dura, et mollia. *CL. SPIELMANNUS* hoc respectu aurum inter ferrum, et argentum collocat. Aurum obryzum, purissimum molle adeo est, ut hinc inde facile flecti, scindi, caelarique possit; hinc et plurimos in usus minus idoneum.

§. 78.

SUB malleo, ac inter angusta ferri transductorii foramina aurum majori donatur duritie, firmitate, ac elasticitate; non levem inibi ductilitatis prioris jacturam patitur; dotes tamen nunc dictae omnes auro conciliari denuo poterunt ope *ignitionis*. Idem et in aliis obtinet substantiis metallicis.

§. 79.

ELASTICITAS auro vix ulla est; sono etiam exiguo, obscuro gaudet.

§. 80.

§. 80.


AERI in aurum nulla est actio; rubigine, aut aerugine nulla obducitur, etsi per saecula aëri libero fuerit expositum; nec coloris ullum experitur detrimentum; uti statuae, aliaque auro obducta corpora atmosphaerae diu obiecta satis testantur: dos haec auri utilissima facta est, quum metalla alia auro vestita et elegantiora multo, magisque durabilia reddi queant; utrumque enim *inauratione* obtinemus. Quodsi etiam aurum post annos plurimos splendore, ac elegantiori colore minuatur, a sordibus id unice repeti debet, superficiei sensim adhaerentibus; auferantur hae, et nitebit splendore pristino rex metallorum.

§. 81.

Nec aquae magis, quam aëri, in aurum est imperium; instantia paulo ante proposita adsertum satis confirmat; corpora enim inaurata, aëri libero exposita, innumera vice perfunduntur pluviis. Ramenta insuper auri exilissima atomis analoga aquae immerfa nunquam ab ea adficiuntur; nulla rubigine exeduntur, non solvuntur, sed proprio semper splendore, ac nitore gaudent.

§. 82.

IAM, quid *ignis* in auro mutet, videamus. Aurum, *Cl. LEWIS* teste, calore sat moderato, et leniori funditur: interim tamen certum sane est, calorem non moderatum adeo, et lenem requiri; constat etenim ex observatis *Cl. MORTIMER*, gradu nonnisi millesimo tercentesimo aurum demum fundi, quum argentum gradu millesimo, regulus antimonii gradu octingentesimo decimo &c. jam fluant. Aurum insulae *Madagascar* lenis-



lenissimo igne, plumbi ad instar fluere *Cl. FLACOURT* dudum monuit. Fusum aurum colorem offert in superficie ex caeruleo viridescentem, thalassum: diu ante fusionem candescit; quamprimum ex albo candescit, in fusionem abit.

§. 83.

PROUT aurum sensim funditur, superficies ejus convexa magis redditur; dum ad pristinam redit consistentiam, denuo subsidet, et superficies ex convexa in subconcavam mutatur. Ob hanc proprietatem, uti bene monet *Cl. LEWIS*, aurum in diversas formas, seu prototypa fusum, exactam adeo nunquam refert formae impressionem, uti argentum, cuprum, aut stannum; haec etenim metalla non adeo subsident; magis adhuc cedit hac ratione ferro, ac Bismutho, nam haec magis adhuc expanduntur, dum ex forma fluida in solidam abeunt. Probe ad hoc respiciendum est in diversis operationibus mechanicis.

§. 84.

Si aurum diutius candens, aut fusum retineatur, nec pondere decrescit, nec in calcem abit, aut volatile factum avolat. Exposuit *GASTO CLAVEUS* unciam unam auri per menses binos integros in furno vitrario ibi loci, ubi vitrum nunquam non fluens manet; fusum mansit per dictum tempus aurum, nec tamen vel levissimam passum fuit mutationem: repetiit experimentum *KUNKELIUS*, et aurum per triginta hebdomadas fusioni subjecit; sed nec in hoc tentamine quid fuit decompositum. Confirmavit idem experimentis illustris Anglorum *Hermes, Robertus BOYLE*. Retulit *Cl. BAUME*, per annum integrum sese exposuisse bracteolas auri in subtilem pollinem contritos, et cur-

cucurbitae inclusos, igni, ac per totum hocce tempus pulverem dictum nunquam non fuisse candentem, nec minimam tamen auro accidisse mutationem, etsi aëri per orificium cucurbitae liber pateret aditus. Elucescit eo magis ex his omnibus antea data auri definitio.

§. 85.

DESCRIPSIT insignis aevi sui Chemicus HOMBERGII experimentum, in quo, mediante speculo caustico viribus aucto, aurum in superficie mutatum videbatur in speciem calcis subtilissimae; hanc vero confluxisse, addit, in vitrum violaceo colore donatum; versum sic fuisse totum aurum tum in calcem, tum in vitrum, tum demum avolasse sub specie vaporum. Bene tamen monuit Cl. KRAMER, in experimento hoc nec debitam adhibitam fuisse curam, nec diu satis id fuisse protractum. An purissimum illud fuerit aurum, quis dixerit? Nec, quid cum residuo factum fuerit, additur. Evidum potius fuit tentaminibus postea institutis, vitrificationem illam, et calcinationem spuriam adscribi unice deberi cineribus carbonis, cui inpositum fuerat aurum. Nemo, qui *Homborgianum* tentamen repetiit, ea videre hactenus potuit, quae ab illo fuerunt notata.

§. 86.

In publicum evulgavit ante paucos annos Cl. COMUS tentamen, in quo per *scintillam electricam* aurum in tenuissimas bracteolas tufum in pulverem mutaverat violaceum: idem tentamen eodem cum successu *Vindobonae* repetiit Ill. MEIDINGER, et *Parisiis* hoc anno denuo repetitum fuisse lego: sed ex hoc etiam pulvere calciformi pristinum denuo recuperari potest aurum.

Pars I.

D

§. 87.



§. 87.

FUSIBILITAS auri augetur additione borracis; pallidior tamen auri color exin redditur; praecavere hoc possumus addito nitro, aut sale ammoniaco. Borracis ope moleculae inprimis heterogeneae illae, auro adhaerentes, in fluxum cieri videntur, quae obstant, ne particulae minimae auri sub arctissimis contactus punctis invicem uniantur: manifestius hoc adparet, dum aurum in scobem minutissimam versum abs additione borracis fusioni exponitur. Ductilitas insuper auri per nitrum conservatur; per unionem cum aliis metallis, vapores metallicos, subitaneam auri fusi refrigerationem &c. magis minusve minuenda. Mercurius etiam sublimatus corrosivus posteriori sub respectu vices nitri obire valet; acidi enim muriatici interventu volatilia reddit, aut in scorias vertit metalla ignobilia auro forsan admista.

§. 88.

DUM aurum legitime fufum tranquille, ac pedetentim refrigerat, in superficie enascuntur superficieculae splendentes, latae, foliaceae. Enascuntur haec ex directione, posituque symmetrico, quo moleculae auri minimae invicem uniuntur, eadem ratione uti stella in superficie reguli antimonii enascitur.

§. 89.

ADSERI universim valet, *acidum vitrioli, nitri, et salis*, si purum quodvis fuerit, in sincerum aurum nullam vim exserere.

§. 90.

DETEXIT tamen Cl. BRAND, dari circumstantias, ubi aurum et ab *acido nitri* referatur. Aurum ab argen-



gento separaturus (cujus proportio ad illud uti sexdecim ad tria erat), miscelam hanc metallicam coxit *Cl.* VIR in aqua forti sensim fortiori, et sensim recens adfusa in cucurbita cum adposito alambico, ac excipulo: dum omne fere solutum videbatur argentum, solutionem ab auro separavit, adfusam denuo novam aquam fortem, ad siccitatem usque protracta coctione, evaporare curavit, recentemque superadfundit aquam fortem: elapso aliquo temporis intervallo, durante decoctione, fulvo tangebatur haec colore; vitro seorsim eandem infudit: invenit demum, in hac aqua forti majorem auri quam quidem argenti contentam fuisse partem, proportionem uti 19. ad 12. intercedente: obtinetur hinc ex data quantitate hujus menstrui, quod quatuor argenti partes resolvere valet, pars una auri, si solutio dicta instituitur methodo; seu acidum nitrosum hac sub operatione ultra quartam partem auri solvere aptum natum est, quam alias argenti referare solet. Experimentum dictum institutum fuit coram *Academia regia scientiarum Suecica* eodem cum successu repetitis vicibus: ubique ex aqua illa forti fulvo colore donata mediante argento purissimo, et ab omni auro libero massula auri spongiosa dejecta fuit: acidum nitrosum ex nitro puro parabatur, hinc aurum referatum fuit ab acido solo nitroso; confirmatur id ipsum eo magis, uti *Cl. LEWIS* observat, ex eo, quod, si acidum salis simul fuisset praesens, argentum non fuisset solutum. Phaenomenon vero hoc ipsum *Cl. LEWIS* exponit ex concentratione summa acidum nitrosi ad siccitatem usque evaporati, tum et aeris externi sententia. Expositio haec ingeniosa satis videtur, et instantia machinae *Papinianae* eo magis illustratur.



§. 91.

CAETERUM vero acida dicta, purissima, sive calida fumantur, sive frigida, debilia, aut meraciora, in purum aurum non agunt.

§. 92.

SED nec *alkalina salia fixa* aut *volatilia* in aurum, forma metallica donatum, vim exferunt. Sal tamen alkalinum fixum, cum auro fufum, colorem illi eripit.

§. 93.

IDEM et de *Sulphure* tenendum est: *hepar* vero *Sulphuris* aurum resolvit.

§. 94.

NOTUM satis est, *aquam* sic dictam *regiam* exfurgere, quotiescunque acidum muriaticum unitur cum acido nitroso: acidus hicce liquor compositus solus perficit, quod acido nitroso, et muriatico, seorsim sumtis, erat impossibile; et verum genuinumque auri constituit menstruum.

§. 95.

QUUM itaque *aqua regia* exsurgat, dum acidum nitri purissimum conjungitur cum acido purissimo muriatico; vel, dum in acido nitri puro solvitur sal medium acidum muriaticum recludens, v. c. sal commune, sal Sylvianum, sal ammoniacum &c., vel demum, dum acidum nitri supra unum ex adlatis salibus destillatione abstrahitur: manifestum est, liquores

hosce

hosce omnes acidos soluturos esse aurum, quum in omnibus bina illa acida, aquam regiam generantia, contineantur.

§. 96.

NOTANDUM tamen simul venit, non in quavis modo dictarum aquae fortis specierum aurum eadem cum facilitate dissolvi, eadem copia, aut iisdem exacte cum phaenomenis: purissima semper obtinetur ex unione immediata acidi nitrosi purissimi, cum acido purissimo muriatico. Repetitis experimentis constitit, aurum purum optime solvi in aqua regia, ex partibus binis acidi nitri parteque una acidi muriatici composita. Diversitas aquae regiae in praecipitationibus auri exin parandis magnarum praeterea est partium; uti, dum de *auro fulminante* sermo erit, latius demonstrabitur.

§. 97.

MULTUM insuper ad faciliorem, difficilioremve auri in menstruo suo solutionem facit major minorve acidi utriusque concentratio; si ab acido nitri salisque vulgari ad fumantia usque haecce acida miscelas instituire velis. Didici praeterea, repetitis experimentis, in eadem aqua regia diversitatem intercessisse quamdam, dum aurum purum, sed diversarum regionum solvebatur.

§. 98.

IN *aqua regis*, seu proprio suo menstruo, aurum exacte solvitur: Si calor lenis accedat, solutio promovebitur, aut faciliior reddetur: subin tamen satius est, nullum omnino in auxilium vocare calorem, et tranquillae solutioni aurum exponere. Plerumque ad so-



solutionem auri utuntur bracteolis tenuissimis auri, in aëre volitantibus, vel et auro in scobem limato. Praefero tamen bracteolas; nam et in his maxima superficies menstruo objicitur, et in limatura auri facile moleculae chalybis a lima abruptae adesse queunt: quum vero ferrum, uti aurum, ab aqua regia solvatur, solutio hinc deterior reddetur; et oriri exin posse incommoda, didici, dum purpuram mineralem talibus moleculis inquinatam ex proposito feceram; color enim in vasis murrhinis longe gratior a purpura purissima exoriebatur —. Ebullitio in solutione hac valida adeo non est, uti in solutionibus metallicis aliis esse plerumque adsolet.

§. 99.

Solutio nunc descripta auri limpida, diaphana, et eodem, cum auro, colore donata cernitur; saturatior tamen color in solutione auro ipsi adest, si aurum pallidius receptum fuerit, facere ad hoc quid poterit ipsius aquaeregiae color, ante solutionem jam flavens. Sapore caustico valde donatur, et adstringente; cutim tingit macula inter colorem purpureum, et violaceum ambiguo, epidermidis desquamatione solum delenda; eundem fere colorem excitat inducta ebori, pannis laneis, ligno, telis sericeis, linteis &c. marmor alte penetrat, et maculam producit purpuream.

§. 100.

Dum solutio haec debita methodo evaporationi committitur, ac tranquilla reponitur, enascuntur in ea crystalli exiguae, diaphanae, flavae, Topaziis non absimiles: sunt *crystalli auri*, seu *crystalli solares*, verum sal metallicum. Crystalli hae non eadem semper, et constanti gaudent figura: difficiliter obtinentur



ex solutione auri, facta in aqua regis, acido nitroso et muriatico purissimis constante, quam si aqua haec regis parata fuerit additione salis medii nitrosi ad acidum muriaticum, aut salis cujusdam acidum muriaticum vehentis ad acidum nitrosum. Statuit novissime *Cl. MONNET*, crystallos omnino nullas obtineri posse, nisi aqua regis ope salis ammoniaci facta foret.

§. 101.

OBTINENTUR etiam *solares crystalli*, si aurum solvatur in aqua regis pura, sola binorum acidorum miscela parata, solutio haec ultra dimidium evaporationis ope minuatur, tumque tantillum adjiciatur alkoholis rectificati. Quo saturatior fuerit solutio, eo rubicundiores exsurgent crystalli.

§. 102.

REFERT *Cl. LEWIS* aliam adhuc methodum *crystallos auri* conficiendi. Inspissetur hunc in finem auri solutio in aqua regia, (quae ope salis ammoniaci parata fuit,) facta, fere ad siccitatem usque, abstrahatur a residuo, repetitis vicibus adfusa recens aqua regis, augeatur velocius ignis, dum destillatio vix non finita est: mediante hac encheiresi acidum primo in excipulum transiens auri minorem partem secum abripit; major portio auri acido concentratissimo nexi, sub specie sublimati profunde rubentis in collum retortae adscendit, ibique tum crustam format salinam vitro arte adhaerentem, tum et crystallos longas tenuesque, retortae parum adeo adligatas, ut levissimo vasis concussu in fundum denuo relabantur. Crusta salina, aequae ac crystalli, aquae, et caloris lenioris beneficio solvitur; quin et in aëre libero in deliquium utraque ruunt. Totum aurum hac methodo sublime



reddi valet, si residuo major denuo aquae regis copia addatur, ac destillatio saepius repetatur. Quum crystalli hae sponte sua in deliquium abeant, simul adparet, qua ratione solutio auri omnium meracissima confici queat.

§. 104.

PULVERIS aurei sub titulo binae veniunt praeparationes: accipe *primam*. Immergantur saepius solutioni auri antea descriptae saturatae linteola pura, post quamvis immersionem exsiccentur, demum in crucibulo purissimo comburantur: pulvere hoc, sola frictione vasa argentea inaurari possunt: est gallorum *Or en chiffons*.

§. 105.

ACCIPERE alteram. Ad siccitatem usque deducatur auri solutio purissima; remanebit demum pulvis fulvo colore donatus, *pulvis auri*, vel, inepte licet, *calx solaris* dictus. Pulvis idem obtinebitur, si totum menstruum destillatione abstrahatur. Si pulvis solaris, solutione borrae in fluentem pastam redactus, vitro, vasis murrhinis, aut pseudomurrhinis adplicetur, tumque legitimus adhibeatur ignis gradus, litterae, aut figurae quaecumque aureae vasis arte nexae pingi poterunt.

§. 106.

Si vero pulvis uterque aureus fusioni exponatur, pristinum redibit aurum, nullam omnino proprietatum suarum jacturam passum: vel ex his jam adparet, aurum in aqua regis *solvi* quidem, non vero *decomponi*, multo minus *destrui*. Nec magis decomponetur, si centies sublimationi, refferatur, exponatur.

§. 107.

§. 107.

EXPONERE hic loci debeo *solutionem auri* adhuc aliam, eamque *spuriam* nominasse convenit. Obtinetur haec, si alumen, nitrum, sal commune, aurique bracteolae invicem misceantur, mistumque in vase clauso per aliquot horas candens retineatur. Tota haec operatio *Caementatione* absolvitur: theoria haec est: acidum salis communis, acidumque nitri ab acido vitriolico, in alumine contento, ex sede sua expelluntur, expulsa simul aquam regiam formant, atque sic aurum adgrediuntur. Pejus adhuc solutio haec succedit, si miscela antea dicta in aqua solum ad siccitatem decoquatur: hac methodo, ac subsequa calcinatione, ZWELFERUS *crocum* suum *solarem* paravit; magnoque molimine exigui momenti paravit productum.

§. 108.

SOLUTUM aurum per diversas substantias ex solutione *praeceptum dari* potest. Multae harum et substantias metallicas alias praecipitare solent, quum majorem colant adfinitatem cum acidis, quam acida cum metallis. Sunt tamen et nonnulla, quae aurum (ac platinam) seorsim adpetant, ac ex menstruo in sese rapiant; etsi quidem tum *praecipitatio*, genuino vocis usu, minus obtineat, quum ad vasis fundum nil deiciatur, sed solutum corpus solventis amplexibus solum eripiatur. Ordinar a praecipitatione per *liquorem silicum* facta.

§. 109.

DUM *liquor silicum* solutioni auri purae instillatur, ad fundum cadit pulvis luteus, qua sub forma aurum prius solutum latet: descendit simul pars me-



xima terrae vitrescibilis filicum; sal alkali, quod terram hancce in liquore filicum prius tenuerat suspensam, nubit acido aquae regis: remanet tamen, uti experimenta docuerunt, tantilla portio terrae vitrescibilis simul inmixta. Praecipitatum sic obtentum, igni candefactionis expositum purpurascit; eundem colorem largitur et vitro, aut encausto, si vel tuso vitro, vel *frittae* recenti admisceatur.

§. II.

PRAECIPITATIONEM hanc Spagyrici quidam abs omni haesitatione liquori tribuerunt filicum; an vero plus exposuerunt sic, quam si prorsum nil in medium adtulissent? Repetenda venit a sale alkalino, terram vitrescibilem suspensam prius tenente, eadem omnino ratione, uti praecipitatio per sal alkali nudum facta. Color purpureus colori a *purpura Cassiana* producto non multum subin cedit, etsi tamen posteriorem hunc elegantiores plerumque viderim. Monendum simul est, pseudogemmas hac ratione tinctas excolores plane ex furno nonnunquam redire; recuperant colorem calori leniori denuo expositae, *recoctae*, quod et in aliis experimentis fit.

§. III.

Ex adlatis nunc, et ex prius, ubi de colore pulveris auri, igne electrico facti, sermo erat, dictis, perspicere datur, colorem violaceum, aut purpurascentem auro ipsi esse proprium: Sententia haec nunc statuminata, latius exponetur, dum de *purpura Cassiana* sermo erit.

§. 112.

TERRAE etiam *calcareae* aurum praecipitant. Praecipitatum et hic flavens est; aëri tamen expositum sensim colore tingitur purpureo.

§. 113.

NUNC praecipitationes auri per *salia alkalina* veniunt examinandae. *Sal alkali vegetabile fixum* aurum sub forma pulveris obscure flavi praecipitat.

§. 114.

Quo vero praecipitatio haec facilis, perfecta, et expedita sit, momenta requiruntur nonnulla. Si aurum purum solvatur in aqua regia, ex acido salis nitrique purissimis facta, si solutioni huic instilletur solutio *salis alkalini fixi vegetabilis*, praecipitatio languida solum, et imperfecta succedet. Idem fere circa *sal alkali minerale* fuit notatum.

§. 115.

CITIOR multo erit, si aqua regis alkali volatile sal vehat: si nempe aut sal ammoniacum in acido nitri solutum fuerit aut acidum a sale ammoniaco per distillationem avocatum: optimo jure monet *III. MACQUERUS*, diversitatem hanc repetendam ex eo esse, quod in posteriori casu alkali volatile nitri ammoniacalis, in aqua regis hacce contenti, liberetur ope intervenientis alkalini salis ad praecipitationem adhibiti; hinc vero praecipitationem pulchre promoveri.

§. 116.



§. 116.

FACILIUS etiam praecipitatio fit, si solutio auri saturata adfusae aquae ope diluatur; tum et si solutio alkalina sensim nonnisi instilletur.

§. 117.

HIS tamen omnibus observatis licet praecipitatio auri per sal alkali fixum non aequè facile semper succedit. Viderunt hoc ipsum Chemici plures, nullas tamen exponendi phaenomeni detegere norunt semitas. Multum omnino interest, an sal alkali purissimum, an salibus adhaerentibus diversis mediis mistum, an majori terrae calcareae parte inquinatum, an paratum recens, fuerit; an ope aëris liberi in deliquium demum abierit; an nunc primum, in aqua, an in aqua destillata, vel fontana, vel lacustri, vel fluviatili, vel sellenitem, gypsum, argillamve vehente solutum fuerit. Si v. c. in alkalino sale muriaticum sal, aut sylvianum delitescat (et quoties non id evenit?) praecipitatio difficilior erit, quum nunc recens portio acidis salis in hisce salibus mediis haerentis solutioni auri admisceatur: a majore vero acidis salis copia praecipitationem retardari phaenomenon est, circa metalla etiam ignobilia, v. c. stannum, observandum; sive id repetatur ab arsenicali principio in acido salis hospitante, sive alteri, incognitae adhuc debetur rationi. Tum et multum interest, an aurum fuerit purissimum, an solutio meracior. Respexit demum *Cl. MONNET* ad aërem fixum, ut phaenomenon nostrum exponeret: addit tamen simul, suspicari sese, ex solutione saturata aurum facilius multo dejecti, quam ex diluiori.

§. 118.

PRAECIPITATIONEM vero *borracis* ope evenientem non tam *borraci*, quam *fali alkalino minerali*, alteri *borracis* principio adscribendam cenfeo.

§. 119.

PRAECIPITATUM aureum *falis alkalini* interventu ex menstruo dejectum ab *acidis*, quin et ab *acido vegetabili*, probe solvitur, etsi haec in aurum purum, forma metallica donatum, nil efficiant, uti antea dictum fuit. Solutio haec calore subin citius perficitur. Monuit *Cl. LEWIS*, acidum muriaticum, debile licet, praecipitatum hoc partim tamen solvere, aurumque tum non eadem ratione, uti ex acido nitroso dejici, sed per quoddam saltem tempus teneri suspensum. Fufius circa haec commentatus est *Cl. WESTENDORF*.

§. 120.

PRAECIPITATO hoc a salibus adhaerentibus exacte, elutriationis ope, liberato, exsiccato, ac in crucibulo mundo igni exposito, aurum denuo obtinetur prorsum immutatum, genuinum. Cavere tamen debet operator, ne in aqua regis ad solutionem sumpta alkali sal volatile contineatur, tum enim *aurum fulminans* enatum insignia producere posset pericula.

§. 121.

DIXERAM prius, aurum a sale alkalino fixo, et volatili non tangi; praecipitatum etiam aurum alkali volatile referat, non adeo adficit fixum: hinc *fali alkalino* fixo in aurum non esse imperium videretur; et adferere hoc ipsum licet, dum sal dictum in statu alkalino sincero versatur.

§. 122.



§. 122.

DETEXIT tamen III. MARGGRAFIUS encheiresin, qua et hoc ipsum perfici queat. Solvitur hunc in scopum aurum in suo menstruo, praecipitato exin factio additur *lixivium* sic dictum *phlogisticatum*, seu solutio salis alkalini fixi cum partibus duabus sanguinis bovini exsiccati misti, ignique moderato tamdiu expositi, donec flamma, fumusque nullus amplius ascendat; ignis tum eatenus intenditur, ut miscela tota aequaliter candeat; massa demum haec paucae solum aquae ope elixiviat. Liquor hic alkalinus phlogisto inpraegnatus auri praecipitatum optime solvit. Haud scio, qua fronte Cl. MACQUERUS culpare queat *Marggrafianam* hancce encheiresin, simulque adicere: methodum eam esse congruam, si quis praefixum scopum adtingere *nolit*. Calore solutioni huic applicato, et libero aëris accessu, aurum sensim extricatur, et ad fundum vasis descendit: mirum hoc minus videatur; et calore enim, et aëris liberi accessu principium phlogisticum pedetentim expellitur, tum vero solvitur simul, quod unionem prius conciliarat, vinculum. In experimentis Cl. MONNET lixivium phlogisticatum praecipitatum purpureum mox dimisit: idem jam Cl. MEYERUS notavit; caeruleum tamen praecipitati fuisse colorem addidit.

§. 123.

SUPEREST alia adhuc auri in *sale alkalino fixo* solutio; hic vero aurum nec forma metallica amplius gaudet, nec in praecipitatum adhuc abivit, sed menstruo suo innatans salis alkalini actionem experitur. Si solutionem hancce facere velis, solutioni meracae, puraeque salis alkalini fixi partem solutionis auri, tum ratione acidorum, tum ratione quantitatis metalli in-

hae-



haerentis debilem instilles: motu accedente fluidi solutione promovetur, acceleratur.

§. 124.

SAL *alkali volatile* aurum facile, et legitime praecipitat; idque inter praecipua auri praecipitantia locum mereri videtur; prius enim jam monitum fuit, praecipitationem per sal alkali fixum felicius multo succedere, si, quacumque demum sub forma sal alkali volatile simul praesens adsit.

§. 125.

PRÆCIPITATUM auri factum vel ope salis alkalinii volatilii ex solutione metalli hujus in aqua regia ex acido nitroso, et muriatico puris parata; vel et factum ope salis alkalinii fixi, sed ex solutione, in qua sal simul latet alkali volatile, (dum scilicet menstruum hoc ope salis ammoniaci confectum fuit), praecipitatum hoc, inquam, ob indolem suam singularem, calore, moderato licet, detonandi, unde et *aurum fulminans* dictum fuit, specialem etiam, fusiolemque meretur considerationem.

§. 126.

Quo melius succedat praecipitatio haec, auri solutio diluatur tripla aut quadrupla aquae portione; solutio etiam alkalina in uno, aut spiritus salis alkalinii volatilii in altero ante expositorum casuum, exigua semper dosi singulis vicibus instilletur; continuetur id tamdiu, donec nulla amplius subsequatur praecipitatio: dum enim operatio mediante sale alkalino volatili instituitur, et sub finem major hujus adfunditur copia, quam quae ad praecipitationem sit requisita, sal

VO-



volatile alkalinum superabundans adgreditur aurum ab aqua regis prius referatum; miscela flavo colore tingitur, et genuina succedit auri solutio in sale volatili.

§. 127.

COLOR praecipitato huic flavens, aut ex flavo fuscescens est, et praecipitatum ipsum sedimentum prius uliginosum, quam pulverem refert metallicum. Pondere superat aurum ad experimentum sumtum. Juxta *Cl. SPIELMANNUM* tertia parte plerumque increfcit pondere; ex drachma dimidia auri duo fere scrupuli auri fulminantis obtinentur secundum observata *Cl. WALLERII*; unam quartam ponderis partem assignarunt *LEMERY*, *KUNKELIUS*, *MACQUERUS*. *Cl. BAUME* cum *Wallerianis* tentaminibus, aliisque consentit, dum ex drachma auri scrupulos quatuor auri fulminantis obtineri notat; juxta *Cl. CARTHEUSERUM* ex auri uncia dimidia ordinario auri fulminantis uncia dimidia, drachma una, et scrupulus unus impetratur: c. f. p.

§. 128.

RATIO cur ad fundum dejiciatur aurum sat facile assignari potest. Ex antea dictis constat, aurum in aqua solum regis esse solubile; quodsi ergo addatur quidpiam, a quo illa mutetur, et aqua regis esse cessare debeat, aurum antea solutum et suspensum fundum petere omnino debet: hoc ipsum etiam accidit in praecipitatione per sal alkali fixum, et volatile, uti et in reliquis praecipitationibus omnibus.

§. 129.

SUB praecipitationis actu, tum pars aquae regis, tum salium ad praecipitationem adhibitorum, pulveri aureo
ad.



adhaerescit: explicatur inde passim et auctum auri fulminantis pondus; et ipsum detonationis phaenomenon ex hoc fonte interpretari voluerunt Auctores.

§. 130.

- IAM ad insignem praecipitati hujus proprietatem: *lenissimo etiam accedente calore detonandi, et repagula obposita summa vi disjiciendi.* Referam omnium primo phaenomena sub detonatione hac obvenientia, tum vias indicabo, quae dos haec auro fulminanti magis minusve eripi queat; adducam demum in compendio, quae prolatae fuerint explicationes, ac theoriae.

§. 131.

MONUI prius, vim detonandi aurum inprimis adquirere, dum illud vel per sal alkali volatile praecipitatur, vel sal hoc in aqua regia saltim delitescit, effi sal fixum receptum ad dejectionem fuerit; addendum his insuper venit, debiliorem in posteriori casu observari nonnihil detonationem: plurimum tamen simul dependet a copia salis volatilil in aqua regis antea contenti.

§. 132.

DUM paratur aqua regis ex acido nitri, acidoque salis purissimis, aurum in ea solvitur obryzum, solutum vero ope salis alkalini fixi puri dejicitur; vel dum acido nitri puro additur sal muriaticum, aut digestivum Sylvii, ut inde aqua regis enascatur, in hac aurum solvitur, et sale fixo praecipitatur; verbo, quotiescunque aurum ea ratione solvitur, solutumque praecipitatur, ut nec solutionis, nec praecipitationis

Pars I.

E

gra-



gratia sal alkali volatile quacumque demum sub forma recipiatur, praecipitata haecce omnia nec minima detonandi gaudent proprietate.

§. 133.

ADPARET hinc simul, cur praecipitatum auri salis alkalini fixi ope ex *menstruo* sic dicto *sine strepitu*, (quod cum descripta prius *solutione spuria* fere convenit) dejectum non omnino detonet; hic enim nec in *menstruo*, nec in praecipitante atomus latet alkali volatile. Si vero alkalini fixi salis loco alkali volatile recipiatur, praecipitatum, uti ETTMUELLERUS, et HOFFMANNUS jam legitime adnotavit, verum aurum erit fulminans.

§. 134.

AURUM ex *menstruo* suo in *aurum fulminans* praecipitatum dote itaque gaudet stupenda sane, BASILIO VALENTINO primo clarius exposita, calore lenissimo, tritu, frictu, tusione, aut compressione sese accendendi, tumque summa vi, enormi sub fragore detonandi. Vis auri fulminantis multis parasangis vincit vim *pulveris pyrii*, aut *pulveris* sic dicti *tonitruantis*, ex parte una sulphuris, partibus binis salis alkalini fixi, tribusque nitri compositi. "Granum semis auri fulminantis, CL. BAUME ait, in aëre libero fragorem multo majorem excitat, quam librae aliquot pulveris pyrii ex tormento bellico prorumpentis: tonitru etiam auri fulminantis acutiorem multo, altiusque penetrantem sonum excitat, quam pulvis accensus pyrius."

§. 135.

VERITATI sane haec omnia sunt consentanea. Sonus tamen a pulvere pyrio productus ad majorem propa-

pagatur distantiam, quam sonus auri fulminantis accendi. Ingeniose satis comparavit *Cl. LEWIS* fragorem auri fulminantis cum sono chordae musicae brevioris, intensae, fragorem vero pulveris pyrii cum sono chordae longioris, magis remissae.

§. 136.

INFLAMMABILITAS auri fulminantis tanta est, ut vel lenissimus tritus hunc in finem jam sufficiat: adfertum hoc manifeste demonstratur tristibus instantiis, quae in *Collectionibus Wratislaviensibus*, in *actis academiae naturae Curiosorum*, in scriptis *Cl. MACQUE-RI*, *Cl. BAUME &c.* enumerantur. Vidit similem casum tragicum *Cl. LEWIS*, et ego ipse testis alterius fui: in plerisque inflammatio, ac detonatio excitata fuit ab adritu atomorum quorundam auri fulminantis, inter collum lagenulae, et epistomium interceptorum: eadem ratione insigne infortunium ante quosdam annos *Parisis* expertus in se ipso fuit *Cl. ROUELLE* junior. Adparet ex his omnibus, quanta prudentia requiratur sub praeparatione, adservatione, usuque hujus producti. Vas, in quo adservatur, solis radiis, aut calori hypocausti nunquam fiat propinquum; et satius etiam est, si aurum fulminans in vase vitreo vellea tecto adservetur, quam si lagenulae includatur, hujusque orificium epistomio obturetur; pauci enim intercepti atomi summum producere possunt infortunium.

§. 137.

Dum aurum fulminans supra laminam metallicam, carbonibus vix ardentibus repleto foculo inpositam, detonationi exponitur, lamina, etsi pauca solum auri recepta fuerit portio, aut foramine perforatur, aut fovea saltim insignis remanet. Comparationis gratia in



lamina simili et aurum fulminans, et pulvis pyrius igni exponebatur; pulvis pyrius, etsi copia multo major fuerit, non adfecit laminam, quam perforavit minor longe nobilis praecipitati portio. Praeparavi simul pulverem tonitruantem optimae notae, posui partem supra lances plures aeneas, has inposui foculo; incensus fuit enormi adeo cum fragore pulvis, ut et mihi, et adstantibus per quoddam temporis interval- lum ereptus vix non fuerit auditus; examinans lances vidi in omnibus fundum effractum, oram earum an- nuli instar abruptum: haec eadem minori longe dosi, minori caloris gradu, majori cum fragore efficit aurum fulminans. *)

§. 138.

*) REFERAM hic simul per transfennam observationem numerosis experimentis a me confirmatam circa in- censionem pulveris tonitruantis. Dum scilicet pul- vis hic in minorem cumulum collectus laminae in- ponitur, aut lanci aeneae, huic carbones subji- ciuntur, et operator tamdiu expectat, donec una cum vapore sulphureo densior fumus ascendat, tumque, signo hoc praesente, accensam, longiorique bacillo adligatam chartulam pulveri admovet, accenditur hic majori cum tonitru, et viribus auctus magis, quam si accensio abs extraneo hoc igne fiat. Inpo- sui monetam argenteam crassiore acervulo pul- veris hujus: fragor multo major nunc erat, moneta calcem ex pariete ejecerat, nigerrimo tincta adpare- bat colore, carbones quaquavorsum jacebant disjecti, fundus lanci perforatus erat, et in foculi etiam fun- do foveolae inpressum vidi vestigium. Didici etiam auri fulminantis sic augeri posse detonationem: opus tamen est, ut prudenter pulvis tonitruans accenda- tur, et remotior semper maneat experimentum in- stituens.

E 3

fituens. Ejectus enim candens sal alkalinus summe causticus, ac hepar sulphuris per cutim in carnem exurere queunt foramen, aut oculum irreparabili damno adficere. Si minus animal lignee testulæ adligatum, filii ope supra pulverem tonitruantem lamina superne tectum suspendatur, ab explosio pulvere nunc occiditur, nunc, cubiculi superiori parti adflum contunditur; vivum raro emergit. Idem denuo citius ab auro fulminante perficitur.



faciem pessime laceratam, et ambustam; uti *Cl. ROUELLE Parisiis, Vindobonae* Pharmacopoeo cuidam accidit. Bene hinc observavit NEUMANNUS, agere aurum fulminans non deorsum solum, sed a centro potius ad peripheriam, per totam suam, sphaeroideam quasi, atmosphæram.

§. 139.

SONUM quod adinet, aut fragorem, ab explosione hac ortum, non abs ratione notat *Cl. LEWIS*, velocitatem, qua aurum fulminans accenditur, tantam fore esse, ut ab aëre, ceu a materie firma densaque resistantiam experiatur. Exponi simul, uti reor, posset, cur fragor explosionis hujus non procul adeo, uti ab exploso pulvere pyrio propagetur. Si in phaenomenis momentaneis *intervalla temporis* adsumere liceat, proponerem, sub incensione pulveris pyrii propulsionem aëris, et propagationem fragoris per excitatum motum undosum tremulum in atmosphæra tardiores tamen paulo fieri; ac fragorem primum seriem quamdam fragorum catervatorum sequi, ea tamen cum celeritate, ut interstitia detegere omnino nequeamus; quo pacto fragor longius propagabitur: in incensione vero auri fulminantis aër ab fragore post incensionem succedente omnium celerrimo adeo comprimitur, ut illius partes minimae cedere vix jam queant, sed extensioni aëque, ac propagationi soni ponant limites, eumque in vicinia suffocent. Sub incensione pulveris pyrii aër, juxta hanc theoriam, motu *undulatorio*, et obtusius multo in membranam tympani acustici agit; sub incensione auri fulminantis membranam hanc motu acutiori, *cuneiformi* quasi addicit, motusque undulatorii adeo inter semet compinguntur, ut sonus linea recta solidaque potius, quam tremula remissiori, velocitate infinita, et simul ac semel propellatur. Expositum

positum sic foret observatum circa diversitatem soni inter aurum fulminans, et pulverem pyrium, expositaque simul comparatio a *Cl. LEWIS* proposita.

§. 140.

Retulit *Cl. BIRCH* tentamina quaedam coram *Ill. Academia scientiarum Londinensi* instituta, quibus evincitur, aurum fulminans globo ferreo inclusum, ignique expositum nullum plane producere fragorem. Nuper etiam *Cl. TORBERN BERGMANN* scripsit: aurum fulminans in vasis metallicis sat robustis, et exacte clausis, abs fragore tranquille reduci; accessu aeris libero partim solum ablato agere fortius in obturacula; si haec robusta nimis sint, et rima exigua praedita, vaporem quidem penetrare, fragorem tamen, aut dislosionem non sequi. Inclusit etiam *Cl. BERGMANN* binis vicibus scrupulum semis auri fulminantis receptaculo aurichalceo, ostium cochleae firma munit: vapor tamen cum sufurro per spiras cochleae foras sensim sese subduxit. Satis itaque diversum aurum fulminans a pulvere pyrio hoc etiam respectuprehenditur.

§. 141.

SCINTILLAE electricae aurum fulminans expositum nec incendi lego, nec detonare, utrumque tamen fieri in *tentamine lugdunensi*. *Cl. LE ROY*, et *Cl. BAUME* aurum hoc, chartulae involutum, cerae ope conductori electrico adfixerunt, ut fluidi electrici promanans torrens aurum non diffaret: direxerunt tum scintillam in chartulam: granum dimidium auri violentum adeo excitavit fragorem, uti minor scelopos.



§. 142.

Si aurum fulminans gradui caloris minori paulo, quam qui ad ejus incensionem requisitus sit, prudenter exponatur, isque gradus diutius conservetur, dein cautissime augeatur, totam demum et incensionis, et detonationis dotem deperdit, ut novissime id evicit *Cl. BERGMANN*; remanet pulvis subnigrescens, nunquam amplius detonans. Inmisit etiam *Cl. BAUME* granum unum auri fulminantis in cochleari ferreo, idque inposuit vasi aqua ebulliente pleno. Cochlear orificium vasis exacte adeo claudebat, ut vapor nullus aurum ferire potuerit: etsi ultra dimidiam horam sic retentum, non tamen detonavit. Inposuit dein cochleare cineribus calidis; incendebantur sic plures miculae auri absque fragore, et scintillas spargebant ignitas, lucentes, fere uti in tentaminibus electricis fieri consuevit: tum demum totum tonitruans in auras volitabat, quod factum utique non fuisset, si cochleare diutius adhuc aquae calenti inpositum retinuisset.


§. 143.

PRIUSQUAM aurum fulminans incendatur, colorem induit sensim purpurascentem, et violaceum. Narra-
rat Cl. HELLOT, detonationem lenem solum exfurgere, si aurum hoc minima dosi dispergatur inter duplicatam chartam, eaque calori subjiciatur; pulverem inde remanere coloris purpurei, praecipitato abs alkali-
no volatili sale facto analogum.



§. 144.

SUSPICARI fors quis posset, mutationes insignes experturum fore aurum per tormenta nunc exposita. Verumtamen nullam exin labem patitur, aut destru-
ctio.



tionem; minime vero decompositionem. Veritas adfertur demonstrari facile potest, dummodo prudenter, cauteque procedas. Sumitur hunc in finem vitrea major campana, inponitur tantillae portioni auri fulminantis, atque hoc prunulae propinquae ope detonationi aptum redditur: incenditur sic, more solito, ac prout disjicitur, campana stellulis aureis hinc inde obsidetur, pars etiam in fundo sub campana splendore metallico pristino nitet: repeti experimentum saepius poterit, ut major auri reducti copia obtineatur; adparebit examinanti, nullam prorsus proprietatum suarum passum fuisse jacturam, sed ab adhaerentibus nonnisi liberatum nunc esse salibus. Occurrit et nonnunquam in fundo pulvis eleganter purpureus; est aurum a salibus ex integro nondum privatum, nec in formam metallicam adhuc reductum; eadem ex ratione pulvis hicce incenditur adhuc, et debiliori fragore detonat. Dum vero auro fulminanti moneta argentea nitida inponitur, atque tum detonatio, caloris ope excitatur, moneta aureo elegante obducitur colore, ubi a pulvere inprimis tactum fuit; idem et in cupro inposito notatur: florenum auro fulminanti inpositum ad sex ulnas in sublime jactum, et inauratum fuisse refert TEICHMEYERUS, qui experimentum hoc in collegiis publicis saepius instituit.

§. 145.

Nunc videamus *media*, quæ *proprietas auri fulminantis* hæctenus descripta magis minusve *infringi*, vel et omnino *tolli* queat.

§. 146.

A calore leniori, prudenter applicato, dotem hanc minui, et demi tandem, prius dictum fuit.

E 5

§. 147.



§. 147.

AN *mora* sola tollatur demum detonandi facultas vix adhuc adferere possum; id saltem scio, aurum fulminans ante viginti circiter annos paratum validissime adhuc detonare.

§. 148.

ABLUTIONE saepius repetita in *aqua*, vel et *decoctione* auro fulminanti vires suas sensim magis magisque eripi, plures monuerunt Chemici; *) et nuper adhuc *Cl. WALLERIUS* aurum fulminans per validiorem, ac diuturniorem decoctionem demum decomponi edixit. Contra omnes tamen statuit *Cl. BERGMANN*, vires detonantes auro hac via parum adeo eripi, ut potius abs edulcoratione ab adhaerentibus salibus debilius deprehendatur in experimentis hunc in finem institutis: decoxit etiam partem unam auri hujus cum sexcentis partibus aquae purae per horam integram, idque sequenti die denuo repetiit cum aqua recenti; incassum tamen decoxit; detonatio enim debilior nullatenus sequebatur. Aurum, addit, fulminans ex menstruo nunc dejectum, nec edulcoratum vix detonat; frigida ablutum detonat quidem, sed flamma volubilis adhuc est, fragorque debilis; crescunt omnia, dum copiosiori, vel bullienti aqua eluitur. Vis haec violenta exin per decoctionem cum aqua nec *minuitur*, nec intenditur: ut adeo actio aquae in augendo potius quam minuendo fragore extra dubium posita videatur. Praeter *Cl. BERGMANN BAUME* etiam vires detonantes aquae beneficio non minui monuit, addiditque in experi-

*) Vim detonandi crebra elutione in aqua calida infringi *Cl. LEWIS* monuit: *If aurum fulminans*, ait, *by washed with fresh portions of hot water, that as much as possible of the saline matter may be extracted, its fulminating quality will be greatly diminished.*

perimentis Auctorum, ubi minutae per decoctionem videbantur, rationem habendam esse selenitis in his aquis delitescens, a quo sub decoctione aurum decomponeretur. Monuit demum Cl. WESTENDORF, aurum fulminans in aqua coctum, iterumque exsiccatum, fulminantem vim omnimodo retinuisse. Venia Cl. BERGMANNI dixerò, decoctione *frequentissima* in aqua purissima virium tamen quid sensim decrefcere; potissimum dum decoctio in *machina Papiniana* instituitur; quam quidem methodum a nullo Chemicorum hactenus tentatam scio —.

§. 149.

DIXERAT Cl. SPIELMANNUS, vim detonandi auferri, si sal alkali fixum praecipitato nostro adfundatur, et supra illud exsicceetur: credebant dudum Chemicì, hac encheiresi dictam dotem cicurari optime posse; NEUMANNUS supersaturatione cum sale alkalino fixo aurum fulminans destrui prorsum rebatur, hujusque rei facilem esse assignatu rationem; Cl. WALTERIUS cum oleo tartari per deliquium digestum et decoctum aurum fulminans facultate fulgurandi exui docuit, *) e. f. p. Verumenimvero et hoc adsertum non abs examine ulteriori adsumi debere, Cl. BERGMANN interseruit. Spoliari aurum fulminans dote sua speciali, si cum sale alkalino fixo misceatur, largitur: disquirendum tamen nunc, qua ratione id accadat; trituravit hinc diu partes sex salis tartari cum parte una auri

*) Idem et Cl. LEWIS sustinuit, *If ground, pergit in ante citato textu, with oil of vitriol, which expels the nitrous acid, and unites with the volatile alkali, on boiled in a solution of fixt alkaline salt, which expels the volatile alkali, and unites with the nitrous acid, it no longer makes the least explosion.*



auri fulminantis, paucisque guttis aquae destillatae; adfusa dein copiosior aqua, demum vero fluidum omne calore *digestionis* abactum; sub hoc tentamine nullus adscendit odor urinosi salis; miscela probe edulcorata non solum detonavit, sed et multo validius solito detonavit. Decoxit altera vice partem unam auri fulminantis recentis cum partibus ducentis lixivii caustici per bihorium: sed et hic vis detonans aucta potius quam infracta.

§. 150.

Quo pacto itaque aurum fulminans dote fulminante privatur ope salis alkalini fixi? An revera sal hoc virtutem dictam exferit? Duplex ad quaesita haec responsio: auro fulminanti vis characteristica eripi potest, uti antea late demonstravi, dum calori moderato, nec ad incensionem sufficienti exponitur. Dixerat autem AUCTOR *aureae catenae Homeri*: si aurum fulminans, sicum prius redditum, decoquitur in aqua cum sale alkali fixo, v. c. oleo tartari per deliquium, cineribus clavellatis &c. vires detonandi illico perdit; fixum enim sal solvit reagens auro adhaerens, hac solutione tertium quoddam gignit, et fixitate salis alkalini reactio vincitur, ne aurum detonare amplius possit. *Recentiores* omnes effectum illum ab hoc experimento deducere autumat CL. BERGMANN: atque sic vim detonandi non tam *salis alkalini* ope, quam ope *caloris magni* lixivii dictorum salium destructam fuisse; ut hoc praecaveret, majorem copiam aquae CL. VIR adfudit, ne fluidum concentratius nimium incalesceret; hinc et vires aurum retinuit, et veritas thesicos: calore magis quam actione salis detonandi dotem tolli, simul fuit illustrata.



§. 151.

ALTERA responsio haec est : plures substantiae aurum fulminans viribus suis privant actione nulla alia, quam sola particularum interpositione mutua, qua impeditur, ne particulae auri in artos nimis ruere queant amplexus: atque id quidem et terrae faciunt, et salia media: hinc sal alkali fixum cum auro fulminante probe remistum vires dictas tollere potest, quin agat ut sal, sed sufficit, ut agat ceu corpus intermedium, *continuitatem*, ut ita dicam, particularum minimarum auri auferens, lacerans. Confirmatur id eo magis ex tentamine sequenti, quod hunc in finem excogitaram: mediante sale alkalino detonationis indole privatum aurum fulminans, in aqua diu saepiusque elutriatum, demum decoctum, fulminans denuo evadit: quae hujus phaenomeni ratio? Alia certe nulla occurrit, quam quod solutum sic fuerit interpositum sal alkali; atque restitutum amicum particularum auri commercium; quo restituto prior simul restituitur vires. Monere tamen debeo denuo, quod antea dixi, et in hoc casu decoctione diutissima, ac frequenti, imprimis in *machina Papiniana*, vires detonantes decrescere.

§. 152.

DIXERAT AUCTOR diatribes germanicae *sol sine veste*, ORSCHAL, adfudisse se acidum salis dulcificatum auro fulminanti; solvisse id, mediante calore, totum aurum, fulvoque adeo tinctum fuisse colore, uti auri solutio optima; evaporationi demum exposuit solutionem hanc, obtenturus inde nescio quam auri singularem calcem: ad finem vergebat jam operatio, ait, et succedere coepit miscela; nil certe minus suspicatus fuisset, quam latentem adhuc vim tonitruantem: experientia



rientia tamen jam monstrabat, quod credere fors non-
 luissem: fugata etenim humiditate omni, fragorem
 talem in cubiculo meo percepi, ac si tormentum bel-
 licum explosum fuisset maximum, quum tamen co-
 piam sat exiguam auri sumseram. Observavit hoc
 ORSCHAL, et prior CASSIUS, circa acidum dulcifica-
 tum salis; sed et eum acidis dulcificatis aliis idem con-
 tingit effectus.

§. 153.

SULPHUR auro fulminanti vires suas certius extor-
 quet. Experimentum omnium primo tentavit BASI-
 LIUS VALENTINUS. Sulphur in pulverem tustum, aut
 flores sulphuris plerumque hunc in scopum adhibue-
 runt; eique aequalem, aut dimidiam saltim auri ful-
 minantis portionem admiscuerunt; fusioni leniori mi-
 sceam primum exposuerunt, tum evaporatione, de-
 mum vero deflagratione denuo fugarunt, ut aurum pri-
 stinum recuperarent. Aptius vero monente CL. BERG-
 MANN res perficitur, si miscela auri et sulphuris in
 crucibulum ea ratione sensim ingeratur, ut sulphur il-
 lico inflammetur, etsi enim particulae quaedam deto-
 nent, nil tamen dispergitur: aptissime operatio succe-
 dit, dum sulphuri fuso jam aurum fulminans per
 paucas doses admiscetur.

§. 154.

PERDIT etiam vires suas, dum decoquitur cum
 oleo vitrioli, colorem primum purpureum induit, si
 igni exponatur, ut acidum abeat, atque tum demum
 cum splendore metallico in gratiam redit. Verumta-
 men et hic deperditionem fulminationis non tam ab
 acido, quam a calore ebullientis concentrati acidi de-
 pendere BERGMANNIANA docere videntur tentamina:
 dilu.

dilutum enim, ne nimium incalesceret, fuit acidum, aurum fulminans, per dimidiam horam in eo decoctum, demum edulcoratum, detonavit adhuc. Tritum, ac digestum cum acido vitrioli concentratissimo virium nullum experiebatur detrimentum. Convincens id magis adhuc videtur priori tentamine; obijcere enim quis posset ibi, concentrato praecise acido opus esse ad destructionem fulminantis auri. Aurum fulminans per lenem digestionem cum oleo vitrioli, denuo deinceps edulcoratum, et exsiccatum virtutem retinuit in experimentis *Cl. WESTENDORF*. An itaque erravit *Cl. LEWIS*, dum detonationem tolli terendo aurum fulminans cum oleo vitrioli statuit?

§. 155.

Cum *acido salis* et *acido nitri* decoctum aurum nostrum tamen detonat, etsi ne quidem edulcoratum fuerit: retulit *Cl. BERGMANN*, solutum ab acido salis aurum fulminans, et ope salis alkalini denuo exin dejectum fulminans aequae esse.

§. 156.

ENUMERABO nunc praecipuas circa aurum fulminans in medium propositas theorias. *Cl. BERGMANN* sub quatuor classes illas omnes apte redegit; vel enim ab *aëre fixo*, aut *principio salino*, aut *inflammabili*, aut *principiis his unitis* phaenomenon hoc deduci solet.

§. 157.

FIXUM *aërem* sub ipsa solutione auro eripi, per praecipitationem vero majori copia in illud denuo ingredi, atque hoc ipso praecipitati ponderis augmento



demonstrari; praecipitato calori exposito principium hoc aëreum abscedere; exitumque, particularum auri gravitate, salibusque ineditum, eo violentiorem, et cum fragore fieri dixerunt. Ex eorum sententia causticitas defectui aëris fixi deberetur, hinc aurum fulminans nullum exurgeret, praecipitatione per sal alkali volatile causticum facta. Usus hunc in finem *Cl.* *VIR* spiritu salis ammoniaci calcis ope acuati pro praecipitatione auri ex aqua regis abs sale ammoniaco parata: praecipitatum tamen hoc, probe edulcoratum, calori expositum, more solito detonavit, adfertumque simul fuit eversum.

§. 158.

Qui ad salinum principium confugiunt, vel digestivum sal adsumserunt, in igne decrepitans; sed hoc non in omni auro fulminante adeste poterit, si principia illius nec in menstruo, nec in praecipitante adsint; et aurum non detonat etsi adsit; uti evincitur auro per sal alkali fixum ex aqua regis acido salis et muriatico constante praecipitato; et fragor stupendus adeo haec ex causa exoriri nunquam posset, quod quidem, etsi *Cl. BERGMANNUS* non notaverit, notandum omnino venit. Vel *nitrum* in medium vocarunt commune; verum et hoc non ubique adest, et nitrum regeneratum, aut adjectum cum auri calce minime detonat; dixi praeterea ablutione vires praecipitati non infringi, nitrum autem, in aqua facile solubile, cito elueretur. Vel *nitrum* sic dictum *flammans* ut causa fuit adsignatum. Speciosa satis pro hoc militare videbantur argumenta; in omni hactenus auro fulminante aderat; et dote detonandi propria gaudet: et aurum fulminans acido vitriolico cicurari dixerunt, quum acido nitroso acidum calchanti fortius sit; adjecerunt his, ab alkali fixo sale aurum fulminans destrui, quum alkali vola-

volatile, alterum nitri flammantis principium, a sale hoc validiori expelleretur. Sententiam hanc NEUMANNUS, plurimique alii *Recentiorum* etiam fuerunt amplexi.

§. 159.

VERUMTAMEN ne haec quidem rem controversam dilucidat. Quid enim sal alkali fixum in aurum fulminans agat, antea expositum fuit. Acidi vitriolici in domanda vi detonante actionem etiam vidimus. Quod vero praesentiam nitri flammantis in omni auro fulminante concernit, primus demonstravit CL. BERGMANN, aurum fulminans genuinum parari posse, abs praesentia acidi nitrosi, hinc abs praesentia enati nitri flammantis. Calcis auri, seu referati potius auri, in igne non detonantis partem in acido vitriolico solvit; ut inde denuo dejiceretur, major portio spiritus salis ammoniaci caustici requirebatur; edulcoratum paucum sedimen in calore nihilosecius detonavit. Pars calcis antea dictae alia, in aqua forti praecipitata, soluta fuit solutione rubicunda, ad instar solutionis platinæ in aqua regis factae. Adjecta aqua pura calcem inde praecipitavit, quae cum spiritu salis ammoniaci caustico digesta, edulcorata dein, et siccata, denuo detonavit optime; idem cum spiritu sic dicto nitri successit experimentum. Partem demum tertiam solvit in acido salis; *) praecipitarum exin, dicta saepius ratione, aurum optime pariter calori expositum detonavit. Calcem insuper auri non detonantem

*) MIROR, qua ratione CL. BAUME, dum experimenta haec Bergmanniana recenset, *acetum destillatum* loco *acidi nitri* posuerit, quum tamen de aceto destillato nulla prorsum fiat mentio; parum sane exacta talis est Auctorum citatio - .



tem tritus, solutionis, digestionis, ac exsiccationis ope cum nitro flammante conjungere tentavit; pulvis obtentus fusurum solum, fragorem nullum supra carbones excitavit. Quae antea circa vires detonantes, aqua non eluendas fuerunt adlata, praesentiam nitri flammantis pariter refutant, quum sal hoc in aqua facillime liquecat. Concludit ex his omnibus *Cl. BERGMANN*, nitrum flammans, etsi producendis illis phaenomenis detonationis sufficeret, vix tamen, ac non in omni certe casu pro causa detonationis assignari posse, quum haec oriatur, etsi nil nitri ullius flammantis addit. Vix etiam dicere quis poterit, in calcibus illis non detonantibus, ad experimenta paulo ante dicta adhibitis, acidum nitrosum, (quod pro solutione primaria auri, ex qua calces hae per alkali fixum deinde fuerunt dejectae, una cum acido salis, utique erat requisitum) recte adeo auro adhaesisse, ut nec praecipitatione subsequa, nec edulcoratione inde avelli potuerit omne, sed aptum natum manserit, ut cum spiritu alkalino nitrum flammans denuo constitueret: unica certe haec superforet via pro illis, qui ab nitro flammante detonandi dotes repetere volunt; etsi et solubilitate nitri flammantis in aqua, et decompositione ejus ab alkali fixo, qua tamen detonatio certis solum sub circumstantiis aufertur, et plurimis aliis momentis cogitatio haec prorsum refellatur.

§. 160.

Qui ad *sulphur auri* confugiant, atque id, eadem fere ratione, uti in pulvere pyrio, aut pulvere tonitruante explosionem generare dicunt, parum adeo exponunt, et falsis adeo hypothesibus innituntur, ut refutatio ulterior omnino fiat supervacanea.

§. 161.

CL. BAUME ad expositionem nostri phaenomeni adsumserat prius *fulphur* quoddam *nitrosum*; genesin sulphuris huius deduxit ab unionem acidi nitrosi cum phlogisto; praecipitari fulphur nitrosum una cum auro, ei intime adhaerere, atque tonitru demum generare ratus fuit; exposuit simul phaenomenon: vim detonantem ab aqua non adeo minui, ex eo, quod et fulphur verum vitriolicum, et phosphorus in aqua non resolvantur; Sulphuri hinc nitroso eandem dotem competere lubens admisit. Verumenimvero et lixivium causticum, sulphur decomponens, aurum fulminans non mutans, et alkohol vini, sulphur vitriolicum, dum substantiae binae in vapores resolutae fuerint, penetrans, cum auro fulminante per octiduum digestum, nec tamen illud labefactans, et sulphuris nitrosi in auro fulminante adsumpta magis, quam per experimenta re ipsa demonstranda existentia, adsertum denuo refutanti.

§. 162.

EXAMINANDUM adhuc erat, an et sal alkali volatile exigui adeo, uti acida, momenti res foret, in praeparatione auri fulminantis. Constitit autem experimentis *Bergmannianis* praesentiam salis huius absolute requiri. Calx enim auri non detonans per horas aliquot cum spiritu alkalino volatili digesta, tum edulcorata, et exsiccata, pulchre detonavit: ut omnis tolleretur suspicio, an non fors pars quaedam aquae regis, non obstante edulcoratione, praecipitato adhaerit, aliam calcis non fulminantis partem CL. BERGMANN per horas viginti quatuor cum acido vitriolico digestionem exposuit, aqua probe tum edulcoravit, spiritui dein alkalino debiliore aquoso, spiritui alkalino vinoso, spirituique alkalino caustico immergit; ex omni-



bus hisce liquoribus exemptum aurum aequae detonavit. quin et sola calcis illius cum solutione salis ammoniaci vulgaris digestio detonandi dotem eidem tribuit, et si, uti monet *Cl. Vir*, in sale ammoniaco vulgari excessus adsit acidi salis, quum ejus solutio tincturam caeruleam rubefaciat. Miscuit dein inertem auri calcem cum solutione nitri flammantis, ubi alkali volatile cum acido nitri jungitur; miscuit et cum solutione salis ammoniaci secreti *Glauberi*, ubi alkali dictum nexum est acido vitriolico; in utroque casu alkali calcis nupit, et ex connubio aurum enatum est verum fulminans.

§. 163.

Etsi vero evictum nunc sane sit, sal alkali volatile requiri ad auri fulminantis genesis, mirum tamen simul est, singulari adeo more alkali dictum in hoc casu sese gerere; nam et decoctio cum alkalino fixo sale, et conjunctio cum acidis, et elotio accuratissima cum aqua vires auri fulminantis non infringunt; quod tamen, si communes leges consideres, contraria plane ratione contingere deberet. Intimam autem, et ultimam rationem detonationis auri fulminantis ex adlatis omnibus eruere, et adsignare nondum licet: ad tria tamen examinans ulterius productum hoc singulare advertat animum: *primum* ex his est: aurum fulminans nullum dari, in quo non adsit alkali volatile, etsi id minima copia adesse queat. *Alterum* est: alkali hoc ipsum mira adeo unione cum auro jungi, ut inimicarum omnium substantiarum eludere queat actionem, sic tamen ut alkali volatile arcto vocis sensu, et omnibus suis dotibus donatum, nec partim fors mutatum inibi lateat. *Tertium* demum est, probabile maxime videri, partes inprimis inflammabiles ad detonationem facere, uti vel ex eo adparet, quod aurum fulmi-

fulminans igni leniori expositum, viribus exui queat, quum hac ratione partes inflammabiles destruantur, aut abigantur. Bina potissimum circa hanc materiem Nepotibus solvenda erunt postulata: unum *Bergmanianum*; ut, quum certum sit, ad aurum fulminans alkali sal volatile requiri, demonstretur, quae constitutivae salis hujus partes, et qua demum ratione id efficiant: alterum *Bauméanum*; ut, quum vero videatur simillimum, detonationem a phlogisto inprimis dependere, sub examen revocetur, in quonam statu phlogiston hic constitutum sit, et an non sulphuris cujusdam speciem formet, ex unione phlogisti cum acido auri menstruo enati. Instituenda caeterum censeo tentamina cum calce auri in nullo prorsum menstruo reaserati, sed ignis v. c. electrici ope parata; quum in hoc omnis certe suspicio absit, acidi ullius, aut menstrui partis calci adhaerentis; eique demum diversa ratione sal alkali volatile admiscendum: illustrari sic posse non abs ratione spero, aliquatenus saltim, de qua tantae jam motae fuerunt lites, controversiam.

§. 164.

HACTENUS de praecipitationibus auri ex menstruo suo per *salia alkalina*, tum *fixum*, tum *volatile*. Praecipitatur vero, aut eripitur saltim, in quibusdam circumstantiis ex menstruo per corpora adhuc alia, ex ordine jam enumeranda.

§. 165.

ACETUM, vinum acidum, uti et solutio cremoris tartari aurum ex solutione deturbat, ac sub forma metallica, languide licet, illud ad fundum descendit.



§. 166.

OLEA aetherea cum solutione auri conquassata, aurum non tam praecipitant, quam in sublime, ad superficiem liquidi evehunt. Bene vero monet *Cl. LEWIS*, unionem hanc auri cum oleis diuturnam non esse; sensim etenim ex oleorum connubio denuo extricatur metallum, ac vitri, in quo miscela continetur, parietibus, sub forma pellicularum metallicarum, vasis concussu ad fundum dejiendarum adhaerescit.

§. 167.

VINUM alkohol languidissime in solutionem auri agit; solutio tamen auri evaporationi commissa in alkohole denuo solvitur: observat hic *Cl. LEWIS*, solutionem perfectam fieri, si aurum solutum fuerit in aqua regis ex acido nitri, et muriatico puro junctis, aut ex miscela aquae fortis cum sale ammoniaco facta; dum aqua regis constat solutione salis communis in aqua forti, aut nitri in acido salis, miscelae salium mediorum remanent insolutae, albae, et aurum solum alkohol subit. Extricatur tamen et hic aurum paulatim, et sub forma pelliculae subtilis superficiem petit.

§. 168.

AETHER vitriolicus solutioni auri admixtus innatat ejus superficiei, utpote multo levior; acidus liquor, aureo colore tinctus, colorem hunc aetheri sensim largitur, aether evadit aureus, menstruum ad proprium sibi colorem redit, ac aether, auro licet onustus, summa tamen tenet: mira sane adfinitas haec est auri cum aethere, ut magnetis instar illud ab hoc adtrahatur; citius res perficitur, si liquida ambo invicem quassentur. Aether auro oneratus, aëri libero expositus avolat more solito, et aurum relinquit liberum. Retulit vero *Cl. BRANDT*, quod, si aether ta-

lis auro gravidus per plures menses in vitro angusto, eaque ratione, ut aether paulatim solum avolare possit, obturato adservetur, aurum tunc in crystallos concreseat fulvas, diaphanas, longas, prismaticas, sapore acerbo donatas.

§. 169.

METALLA quae in aqua regia solvuntur, omnia, Platina solum excepta, aurum praecipitant. *Ferrum* tamen inprimis praecipitatum producit, si solutioni spiritus vinosus additus fuerit. Solutio auri in aqua regis vulgari, spiritu vini copioso diluta, ferri laminam immerksam aurea pellicula illico obduxit; solutio eadem abs vini spiritu adrofit, ac superficie scabrum reddidit ferrum in experimentis *Lewisianis*.

§. 170.

VITRIOLI *ferri purissimi solutio* aurum etiam praeceps dat. Praecipitationem hanc perfectissimam esse, ac purissimam *Cl. WALLERIUS* monuit, quod quidem admittere facile possumus, quum solutio vitrioli ferri nullam aliam, praeter aurum, metallicam substantiam ex aqua regis deturbet. Praecipitati color obscurus, ex fusco ruber est, *Cl. LEWIS*.

§. 171.

CUPRUM solutioni auri aqua dilutae immersum colore ex atro rubro donabatur in *Lewisianis* tentaminibus: dejectum tandem, elapso aliquo tempore fuit aurum splendore metallico, sed colore intensiori, ob inhaerentem cupri partem donatum. *Solutionem vitrioli caerulei* praecipitatum nullum produxisse vidit *Cl. LEWIS*; dejectur tamen exin aurum, sed lentissi-



me id fit; *Solutio* vero *aceruginis* aurum sub forma metallicarum pellicularum secrevit. Dixit quidem *Cl. WALLERIUS*, purissimam sic obtineri praecipitationem auri; inhaeret tamen eidem cupri quaedam portio; et aurum colore intensiori donari *Ipse* monuit —.

§. 172.

STANNUM praecipitando auro etiam inservit; atque haec quidem praecipitatio, colore purpureo donata, latius exponenda venit, quum per eam obtineatur nobilissimum, ac pulcherrimum pigmentum, sub titulo *purpurae mineralis*, *purpurae Cassianae*, aut *praecipitati Cassiani* notum; cujus insignis adeo in pictura encaustica vasorum murrhynorum, ac pseudo-murrhynorum, gemmarum artificialium, vitri colorati, et encaustorum fabricis est usus.

§. 173.

PRAEMITTERE lubet, aurum praecipitari diversis modis, interventu stanni, aut metallica forma donati, aut soluti, aut a spiritu fumante Libaviano reserati, posse.

§. 174.

ADDUCAM hic methodum, quam praescripsit *Cl. MACQUERUS*, et optimam prae reliquis sese deprehendisse addidit, parandae *purpurae mineralis*, a methodo *Kunkeliana* vix diversam. In aqua regis, partibus binis acidi nitrosi, parteque una acidi muriatici constante, atque aequali fere dosi aquae destillatae diluta*) solvatur frustillum stanni minimum, et nullum omni-

no

*) UNA quarta pars aquae pro dilutione hac sufficit.



no caloris accedat auxilium; quodsi frigidior aëris fuerit temperies, solutio longum requiret tempus, proficuum tamen id magis est, quam noxium; soluto hoc stanno alia molecula injiciatur, et eadem prorsus dissolvatur ratione, atque sic in opere pergatur, donec aqua regis colore flavo tincta sit, et nil jam stanni amplius solvat; tum a residuo metallo fors inhaerente decantationis ope liberetur. Solvatur et aurum purissimum viginti quatuor karatiorum in aqua regis composita ex partibus tribus acidi nitrosi, et parte una acidi muriatici: haec solutio tantas non exigit cautelas, uti prior, celerius perficere eandem licet, et, si lubeat, ope balnei arenae promoveri poterit.

S. 175.

Solutio stanni copia aquae magna dilui debet, adeo ut centum aquae partes ad unam partem solutionis recipiantur. Hoc facto solutionum ambarum sequenti ratione instituatur criterium. Sumatur portio exigua solutionis stanni aqua jam dilutae, in duas aequales distribuatur partes: adjiciatur uni harum partium aquae destillatae pars nova, cujus vero quantitas seorsim notetur; parti cuivis instilletur guttula solutionis auri, quae mox colorem excitabit purpureum. Si itaque in alterutra color adpareat elegantior, proportio antea notata dilutionis conservetur, et altera circiter parte minus de solutione auri instilletur, quam solutionis stanni fuerit quantitas: miscela bene permisceatur bacillo vitreo in vase amplo vitreo; totum colorem mox induet vinum rubrum eleganter aemulans; descendet ad fundum praecipitatum eodem colore donatum, et liquor supernatans denuo evadet limpidus, et excolor; instilletur dein gutta adhuc una alterave solutionis stanni, ut, an aurum omne jam dejectum fuerit, adpareat. Liquidum factum demum limpi-



diffimum decantetur prudenter a praecipitato; recens aqua destillata purissima superadfundatur, idque repetatur, ut praecipitatum sic debite edulcoretur.

§. 176.

PRAECIPITATUM hoc auri nomen suum indeptum fuit a CASSIO chemico, qui ejus praeparationem primum exactius descripsit, ac pro inventore passim habetur; etsi quidem et ORSCHAL, uti ex hujus opusculo, *sol sine veste* adparet, pro inventore eodem vix non jure, uti CASSIUS, haberi posset, et antiquiores Chemici ejusdem jam meminerint.

§. 177.

PRAEPARATIO haec, etsi cautissime instituatur, tot tamen diversitatibus exposita est, ut si decies institutur, vix ter vel quater idem praecise color obtineatur, quod quidem tum in ipsa jam solutione, tum et in pictura vasis murrhynis inducta, et ex furno redeunte, manifeste cernitur. Miratus saepe fui, colorem ex furno rediisse pulcherrime purpureum, etsi liquidum, in quo praecipitatio instituebatur, sat obscuri foret coloris, et periculum jam incuteret laboris irriti conatu suscepti: altera vice color pulcherrimus in latice picturam dedit foedo sane, subfuscente, aut evanido pigmento inductam. Scio quidem, plurimum ad hoc facere posse gradum ignis, qui adhibetur, ut pictura vasis nectatur, simul tamen et me non fugit, in ipso jam colore ingentem, ex interroganti vix indicandam, obtinere diversitatem.

§. 178.

REQUIRITUR inprimis, ut solutio stanni fiat tranquillissima; impetuosa enim stannum non solvit, sed la-



laecerat; atque tum pro solutione limpida crassum saepe obtinetur coagulum albicans, lactis densati adinstar. Requiritur insuper ut minimae stanni moleculae simul et semel injiciantur, ac tamdiu expectetur, donec prior soluta fuerit portio; alias enim nunc indicatum enascitur incommodum. Facit cautelarum harum cura, vel neglectus, tantum ad operationis successum, ut jam color enascatur elegantissimus, jam et sordidus nonnisi, fuscusque in conspectum demum prodeat. Dixit quidem CASSIUS, dependere successum perfectum totius operationis a certa quadam encheiresi, quam vero in publicum edere nolit; interim tamen pulcherrimus color centies obtentus fuit, etsi CASSIUS arcanum suum reticuerit, dummodo prudenter, ac abs festinatione instituatur tentamen, vasa omnia, aurum, et stannum sint purissima, menstrua legitime sint parata, requisitus addatur, dum propinquandis vasis color adhibetur, fluxus, et ignis demum sic regatur, ut nec excessu peccet nec defectu.

§. 179.

PURISSIMUM quidem menstruum obtinetur, si ex acido nitri, et acido salis conficiatur; hoc tamen non obstante optimae notae colorem saepissime factum vidi, et ipse feci, uniendo acidum nitrosum, cum sale ammoniaco depuratissimo; *Cl. ARCLAY de MONTAMY* parare sibi met artifices posse aquam regiam ait, unione partis unius salis ammoniaci cum partibus quatuor acidi nitrosi. Saturationis punctum in solutione auri illud statuit, dum, naribus admota, acidum vix jam eructat odorem: aptius tamen id ex eo detegitur, dum injectum aurum intactum manet. Alteram vero methodum ejusdem Auctoris, solutionem auri et aquam regiam conficiendi, postponendam omnibus censeo: voluit enim, ut acidum bonum salis infundatur vasi vitreo,



treo, injiciantur huic auri moleculae, adfundatur hi guttatim acidum nitrosum, donec solvi incipiat aurum, atque sic pergatur, donec requisita quantitas auri demum foret soluta. Ipse sub finem addit, oriri saepius ex hac solutione colores, ab aliis, ope aquae regiae antea indicatae productis, longe diversos.

§. 180.

UT etiam praecipitatio melius succedat, et color pulchrior enascatur, necesse est, ut solutionis in magna copia aquae fiat dilutio; stannum enim eo facilius aurum deicere potest, quum ob menstrui debilitatem ipsum jam in praecipitationem primum sit.

§. 181.

QUAESTIO jam occurrit, an aurum sub hac operatione vere praecipitetur; et an auro, vel stanno color purpureus debeat?

§. 182.

PRIOR quidem facile resolvi valet; collectum etenim praecipitatum hoc purpureum, ac fusioni expositum, aureum subpeditat regulum: praeterea ex menstruo aurum solutum tenente nil ultra praecipitatur, dum stanni ope praecipitatum purpureum omne expulsum fuit.

§. 183.

AURO colorem inprimis purpureum proprium esse, ex antea adlatis, ubi de pulvere auri, per electricum ignem parato, tum et de praecipitato auri per liquorem silicum facto agebatur, patuit: certum praeterea est,



est, aurum aut salibus referatum, aut quacumque demum ratione in minimas particulas divisum, purpureum nunquam non excitare colorem: solutionis auri meracae guttae paucae adfusae frittae crysalli elegantem purpureum colorem progignunt: largitus fuit KUNKELIUS ope partis unius auri frittae partibus 1280. colorem rubinum aemulantem, partibus vero frittae 1920. colorem rubentem adhuc. Sal commune ab auro eleganter purpureum vidit ORSCHAL; charta, aut lineae solutioni auri immersa, in aëre libero siccata, haud raro purpurascunt, quod ab adhaerente fors alkalino sale, aut calcarea terra aurum praecipitante oriri poterit.

§. 184.

PRAECEPTUM autem datur aurum stanni folius inventu, quum adfinitas metalli huius major sit cum aqua regia, seu acidis menstruum hoc efficientibus, quam quae aurum inter et liquidum nunc dictum intercedit: adfinitas haec tanta est, ut stannum, solutum licet jam ipsum fuerit ab aqua regis, deicere tamen nihilo secius queat, quod inhaerebat, aurum. Demonstratur id apertissime ex eo, quod praecipitatio succedat, dum tamen nil nisi stannum, solutum hoc tenens aqua regia, et aqua pura fuerunt superaddita solutioni regis metallorum: constat autem ab adfusa aqua pura, ab aqua regia superaddita praecipitationem nunquam oriri; constat simul tentaminibus extra omne dubium positis, centies institutis, colorem enasci purpureum, quamprimum solutioni auri in aqua regis aqua dilutae stanni bacillus fuerit immerfus, aut solutio haec bacillo tali saltim agitetur, etsi quidem purpurea haec pulchra adeo plerumque non sit, ac ea, quae methodo ante dicta fuit praeparata. Inferius paulo de hac re sermo recurret.

§. 185.



§. 185.

OBSERVAT demum *Cl. MACQUERUS*, stannum præ reliquis metallis facilius largiri phlogiston suum, adeo ut in acido nitroso puro solutum vix manere queat, quum ab acido hoc eodem prout solutio procedit, pars maxima phlogisti stanno eripiatur, atque hoc in calcem mutetur albam, fundum, quum inhaerere lactici ulterius nequeat, utique peturam; metalla enim in acidis suspensa manent inprimis beneficio phlogisti nexum perficientis; phlogiston etiam eo magis eripitur solvendo metallo, quo impetuosior fit solutio. Acidum quidem muriaticum, alteram aquae regiae partem constituens, violentiam acidi nitrosi phlogiston avidissime eripientis quadantenus refrænat; tueri tamen stannum ex integro nequit, quin, solutione inprimis velocius decurrente, insigniter phlogisto privetur, adeo ut sub calcis albae forma præceps ruere subinabeat necessum, portio autem residua exigua nimis sit, nec sufficientem inflammabilis principii copiam, ut acida solutionis auri debite agere in illud valeant, continet. Satis ex hoc adparet ratio, cur informis haud raro enascatur mineralis purpura, cur et solutio stanni lentissime debeat perfici. Stanni vero partem, una cum auro ad fundum ruere, etsi operatio ab initio ad finem usque prudentissime fuerit instituta, constitit experientis cum præcipitata purpura susceptis: recurreret de hac quoque materie inferius paulo sermo.


§. 186.

DIXERAT *Cl. GELLERTUS*, solutionem stanni ad genesin purpuræ mineralis aptam non esse, dum sub ipso solutionis actu incaluerit, et vapor flavescens ab ea recefferit, videri hinc, principium hoc flavescens volatile causis coloris rubri, quo præcipitatum tingitur,

tur, adnumerandum esse, veroque videri maxime consentaneum, vaporem dictum parte inflammabili stanni potissimum absolvi; ac ab eo in auro colorem purpureum eadem vix non ratione produci, uti in caeruleo berolinensi principii inflammabilis lixivii phlogisticati ope colore eleganter caeruleo ferrum pingitur. Ingeniosa satis haec videntur *Cl. GELLERTI* cogitata, et confirmari simul diceret ex phaenomeno antea adlato: colorem oriri aut deformem, aut nullum plane prodire, expulso nimium stanni phlogisto: verum tamen adtendi simul debet, colorem generari purpureum, etsi nullum omnino recipiatur stannum, uti ex calce auri fulmine electrico producta, aut praecipitato per liquorem filicum dejecto, frittae admistis fit evidens; quin et ex ipsis bracteolis auri in pulverem subtilissimum tritis, tumque frittae admistis, ac fusioni in furno, ubi vasa murrhyna excoquantur, subiectis, vitrum colore purpureo tingi posse, experimentis hunc in finem institutis didici. Praemisi tentamina haecce, quum partis phlogisticae nil accedat; in aliis enim, mox enarandis, ubi purpura mineralis per alias, quam per stannum, substantias deijcitur, dici fors posset, phlogisto harum phlogistum stanni deficiens compensari.*)

§. 187.

*) *MONENDUM* tamen et illud est, a stanno plures colores longe pulchriores reddi, etsi vix quidquam ex metallo hocce in illos ingredi demonstrari queat. Sic tum demum coccionellae fit elegantissimus color, dum in vase paratur stanneo; sic syrupus violarum gratus longe caerulefcit vasorum stanneorum ope confectus; sed et ab acidis non adeo tum adficitur, adeo ut ab eadem data quantitate acidi syrupus hic vix rubeat, dum alius jam est rubicundissimus; unde et in usus chemicos talis syrupus non adeo conveniat,



COMMUNICAVIT nuperrime cum orbe literario cogitata sua de *purpura minerali* Cl. ERXLEBEN, Gottingensis Professor. Addam hic ex illis praecipua, omissis, quae prius jam dixeram. Detegere sese in primis velle, praemisit, *qua ratione purpura mineralis optime perfici queat*, tum et indicare, *quid rei proprie sit*, et *quam ratione exoriatur*. Adducuntur sub initium varia, quae antea jam latius proposui, purissimum v. c. aurum, et stannum esse adhibendum, separatum quodvis solvendum, e. f. p. aquam regiam pro solutione auri optime parari, ait, si aquae fortis sensim addatur copia major acidi salis, aut salis communis, aut salis ammoniaci, donec bracteolam auri optime solvi conspiciamus: fixam proportionem minus probat, quum notum sit, aquam fortem non iisdem semper viribus esse instructam; non requiri ut pro purpura minerali auri solutio saturata sit —. In aqua regia, cujus ope stannum solvitur, exacta adsit acidorum proportio; acidum excedens nitrosum stannum in calcem vertit, excedens muriaticum crassa quasi nigricante stannum obducit, et insolubile sic reddit: phaenomenon hoc singulare esse monet Cl. ERXLEBEN, quum stannum ab acido muriatico solo, puro probe solvatur; Cl. VOGEL aqua regia pro solvendo stanno usum fuisse acido salis nimis cavete, quum dixerit, stannum

ab

veniat, ac in usus medicos, ubi gratia coloris inprimis requiritur. Etsi vero centum librae talis syrupi examinentur, nullum tamen inhaerens detegatur stannum; nec in vase ponderis observatur jactura. Phaenomenon hoc inter illa, haecenus saltem, repomendum erit, quae, etsi certissima sint, vix expositionem ullam admittere videntur.

ab ea in calcem nigram verti, et imperfecte solum resolvi. Ut vero hanc proportionem concinnam obtineat, recipit *Cl. Vir* partes quatuor aquae fortis, addit his partem unam Spiritus sic dicti salis vulgaris, injicit frustillum stanni puri; exacta erit proportio, si stannum hoc, abs ullius caloris auxilio perfecte fuerit solutum: si in calcem potius erodatur, menstruum hoc ab calce separat, et majorem dosin acidi nitri adjicit, dum colore nigro, acidi muriatici vero, dum colore albo calx tincta fuerit. Injicit his factis alterum stanni frustillum, exploraturus, an res melius succedat.

§. 128.

In omni solutione stanni exiguum partem pulveris nigri ad fundum ruere monet ex *Cl. Baume*, vix tamen sensibilem eam esse ab exigua adeo parte stanni, qua pro exploratione menstruorum adhibetur, ut oculos vix feriat. Superfluum vidit consilium Baumeanum, ut lagena, in qua solvitur stannum, frigidae aquae inponatur, tum praecipue, si solutio lentissime, et cum dosibus exiguis nonnisi instituitur; nec *Cl. Macquero* adstipulatur, praecipienti, ut aqua regia diluatur prius aqua pura, antequam stannum eidem injiciatur; (scio quidem, abs dilutione hac stannum solvi posse, interim tamen, solutionem sic nonnihil melius succedere, nec de-erosione stanni, aut calce illa alba aut nigra tantum metuendum esse, solutione diluta, experimentis didici, unde et in descriptione antea data ipsius operationis normam *Macquerianam* partim retinui. Diluendam aquam regiam suadet etiam *Cl. Gellertus*.) Non requiritur, ut stanni solutio saturata sit, pro deicienda purpura. Solutio stanni recens adhibenda est, quum alias purpura non enascatur; diutius tamen manet idonea, si majori copia in vase exactissime clauso fuerit adservata; color obscurior,



rior, aut dilutior bonam eam adhuc, vel destructam jam esse, sat secure indicat: mora effoeta facta scopo idonea reddi denuo valet, si exigua copia stanni fuerit superaddita.

§. 189.

CIRCA ipsam binarum solutionum miscelam varia *Cl. ERXLEBEN* instituit tentamina. Commiscuit ambas, prius non dilutas, enatum fuit coagulum nigrescens; rubrum adfusa enim aqua factum quidem, rubedine tamen, fuscescente potius, quam purpurea, tinctum. Inposuit solutioni auri non dilutae frustillum stanni, illico stannum obducebatur pulvere nigro, motu vasis deiciendo, mora tamen in granulos coeunte, aquae dilutione pulverem rubrum, non vero purpureum dimittente. Inposuit more *Glauberiano* bracteolam stanni in solutionem auri aqua copiosa destillata dilutam; deiciebatur pulvis lateritius magis, quam purpureus; unde methodum antea propositam, qua solutiones invicem remiscuntur, optimam adhuc esse, denuoprehendit.

§. 190.

RATIONE copiae aquae ad dilutionem requisitae ad solutionem auri non saturatam partes centum, ad saturatissimam partes ducentas aquae sufficere vidit: major copia nec meliorem, nec amoeniorem colorem dedit purpuram. Destillata aqua pro dilutione primas tenet, huic accedit aqua pluvia, cautelis ab *M. MARGGRAFIO* praescriptis, collecta; sequitur demum fluvialis, ex qua impuriora per quietem secesserunt ad fundum: pessima omnium aqua putealis vulgaris, partibus calcareis *Göttingae* adeo referta, ut a solutione stanni tota lactescat, et purpura ejus ope parata

violaceo satis colore tingatur. Phaenomenon, quod purpura saepe violacea evadat, vel ab solutione stanni non recente satis, vel ab admistis moleculis calcareis aquae inhaerentibus deduci potest. Ab excessu solutionis stanni adfusae violaceam magis reddi purpuram *Cl. MONTAMY* dixerat, *Cl. ERXLEBEN* fulcescentem potius exin obtinuit, addita, sub ipsa praecipitatione, majori paulo copia solutionis auri ad legitimum colorem denuo reducendum. Veritatem hic pro *ERXLEBENI* sententia stare, propriis, iisque copiosis satis experimentis didici. Quo citius in conspectum prodit, sub praecipitatione, purpura, eo et erit melior.

§. 191.

SOLVIT *Cl. Vir* stannum malaccense in aqua regis ex partibus binis acidi fumantis nitrosi, parte una acidi fumantis muriatici, partibusque tribus aquae composita: stannum citius disparuit solito, color solutionis, sub initium aurantius, fere sensim evanuit; solutio haec optimam largita fuit purpuram, solutioni auri aqua dilutae admista — .*) Admiscuit et liquorem fumantem Libavianum solutioni auri, purpura ad colorem tendens violaceum, paulatim non nisi extricabatur, et horis demum sex elapsis fundum vasis petierat.

G 2

Aquae

*) UT, an bona sit mineralis purpura, affirmari queat, non sufficit, eam deiecisse, ac de colore tum iudicasse; sed requiritur, ut congruo fluxu remissa vasis murrhynis, aut pseudomurrhynis inducatur; et quid ignis in laborem nostrum egerit, expectetur: ignem hic intelligo, legitime administratum: antea jam monui, quanta diversitas tum haud raro conspiciatur, collata purpura cruda cum ignem passa, seu encausica: an verò hac methodo usus fuit *Cl. ERXLEBEN*? Nil saltem addidit.



Aquae loco pro dilutione usus fuit alkohole, tum et aceto destillato; obtinuit cum aceto purpuram pulchram, paulatim praecipitatum; alkohol minus pulchram produxit.

§. 192.

EXAMINAT jam *Cl. ERXLEBEN* ortum purpurae mineralis, ejusque genesis. Stanno simul et auro eam componi *Cl. VOGEL*, stanni esse partem maximam, et purpuram stannum potius praecipitatum ab auro, quam aurum dejectum a stanno dici debere *Cl. BAUME* dixerat. Largitur *Cl. Vir* in purpura adesse aurum simul et stannum, fors et majorem adhuc auro stanni adesse copiam, colorem vero auro unice adscribendum ait; hunc in finem phaenomena varia, auri colorem purpureum excitantis adducit, quae omnia prius jam ex ordine recensui.

§. 193.

QUUM vero constet, purpurae colorem ab auro esse repetendum, recurrit quaestio, quis jam stanni sit usus adjecti ad praecipitandum aurum; quod tum demum purpureo colore conspicuum sit, quum admista fuerit solutio jovis, ad coloris genesis, uti viderur, utique facientis. Praemissa observatione communi, aurum a stanno praecipitari, *Cl. ERXLEBEN* sequi fenole, ait, receptam Chemicorum sententiam, qua statuitur, praecipitari aurum ideo, quod major sit adfinitas aquae regiae cum stanno, quam quidem cum auro: fieri potius ex eo, adferit, quod magna sit adfinitas auri cum stanno, (id evinci monet ex praesentia stanni una cum auro ex menstruo ruentis) hinc aurum ex menstruo secedere ob eandem adfinitatem stanni cum auro, non vero ob adfinitatem majorem stanni cum aqua



aqua regia. Ferrum aptum etiam natum est, ut praecipitare queat aurum; color praecipitato huic non purpureus est, sed auro proprius: fatetur quidem hic *Cl. Vir*, rationem esse repetendam ex adfinitate majori aquae regiae cum ferro; colorem vero metallicum enasci, ait, quod aurum hic adtenuatum satis non fit, uti adtenuatur, dum praecipitatio stanni ope fit. *) Stannum, et ferrum, ait, *eadem* sub

G 3

sub

- *) INTERROGARE jam liceat *Cl. ERXLEBEN*, an, si in diversa adtenuatione auri, coloris quaerenda sit diversitas, an, inquam, adtenuatio haec a solvente menstruo jam, an vero a praecipitante demum stanno repetenda sit? Si a menstruo repetenda est; cur non a ferro aequae ac a stanno color enascitur purpureus, dum aequalis hic adest adtenuatio, ante praecipitationem jam facta? Si a praecipitante stanno cum auro amicissimo, eique, ferro magis, adfini; cur obtinetur per alias etiam encheireses purpureus color, ubi nullum plane stannum fuit receptum, uti ex antea adlatis, et adferendis adhuc patet? Respondet, quia aurum aequae tum adtenuatum est, uti adtenuatur, dum per stannum fit praecipitatio. Responso hoc admisso, plura adhuc remanebunt quaesita, quae ex amicitia stanni cum auro non facile adeo resolvuntur: quae stanni in acidis jam refferati machinae, ut praecipitandum nunc, et ruens jam aurum mire adeo adtenuet? Notandum enim venit, aurum aquae regiae actioni prius jam esse expositum, et novam actionem adtenuantem stanno, substantiae metallicaee fore adscribendam; alia enim ratio est, dum v. c. argentum per acidum muriaticum praecipitatur in lunam corneam, ibi agit acidum, verum agit menstruum. Cur aurum omne praecipitatur, si tanta ei cum



sub forma dejectionis forent aurum, si deicerent *ratione eadem* illud; si deicerent ob solam ereptionem menstrui; contrarium tamen, pergit, fieri experimenta docent; aurum dejectum per stannum subtilius multo attenuatur, quam dum per ferrum praecipitatur; singularis hic subesse debet ratio, in praecipitatione per stan-

cum stanno intercedat necessitudo, quum tamen stannum, etsi pars auro adhaereat, non adhaereat totum? Si interpositionem particularum minimarum stanni adsumas; lubens concefferim; fieri enim haec potest, etsi adfinitas major aquae regiae cum stanno quam cum auro solummodo pro expositione advocetur; dices, inhaerere stannum praecipitato auro, hinc mutuum illum amorem evinci manifeste; et hoc admitto; moneo tamen, et in pluribus aliis operationibus evenire, ut praecipitans materies solutam aliam ex menstruo deturbet, simul tamen magnam partem una praeceps cadat, uti vel auri fulminantis docet instantia. Praecipitari ergo potest per stanni auxilium ex menstruo suo aurum; adhaerere potest stanni pars dejecto auro; et ad colorem, si et hoc velis, aliquid contribuere; amare se queunt fraterno amore haec bina metalla; fieri haec omnia possunt; et sufficere tamen simul valet expositioni phaenomeni praecipitationis auri per stannum ratio, dudum assignata, ex adfinitate majori aquae regiae cum stanno petita. Cur ad explicationem solius hujus phaenomeni nova adsumi deberet theoria, quum in caeteris omnibus sufficiat recepta; quum ea, quorum in gratiam nova expositio excogitata fuit, eveniant et in aliis casibus, ubi tamen prior ceu sufficiens admittitur; quum demum, si, quod res est, sateri velis, per novam theoriam phaenomenon exactius non exponatur, quam per veterem?



stannum unice praesens ; eam vero in nulla alia re, quam in arcta adfinitate stanni cum auro reponi reor.

§. 194.

ANIMUM hic denuo non advertisse videtur Cl. ERXLEBEN ad phaenomena nota varia ; sic aurum praeceps datur per mercurium , sed mercurius aurum concoquitur ; praeceps datur solutione aeruginis , aut vitrioli cyprii , sed cupri simul pars auro adhaerescit , ut ex intensiori colore liquati adparet, e. f. p. an ergo praecipitationes hae omnes fiunt per majorem adfinitatem praecipitantis cum menstruo , uti prius credideramus ? et, si hoc admittatur in hisce casibus ; cur non admitteretur in praecipitatione auri per stannum ? nil enim ob stare video ; aurum hic, uti ibi, praecipitatur ; auro praecipitato hic stannum, ibi mercurius, aut cuprum jungitur. — An vero fiunt praecipitationes hae omnes per adfinitatem intimam praecipitantis cum praecipitando , uti in praecipitatione auri per stannum fieri credere in posterum deberemus ? atque tum non video denuo , cur theoria illa consanguinitatis restringi deberet ad solum aurum et stannum, quum tamen tot sese obferant occasiones , ubi eam aut deberemus pariter adsumere ; aut convinci , admittendam nec in hisce casibus esse, nec esse in illo.

§. 195.

SINGULARIS autem videtur conclusio, quam Cl. ERXLEBEN prius deduxit : stannum et ferrum sub eadem forma dejectura fore aurum, si deicerent eadem ratione. — Mercurius ex suis menstruis per quodvis praecipitans alio praecipitatur colore, alia forma, ubique autem, uti et Cl. ERXLEBEN vix negabit, praecipitatur eadem ratione ; quod nempe major sit adfinitas



tas praecipitantis cum menstruo, quam menstruo cum soluto prius mercurio. De generali autem hic loquor praecipitationum illarum causa. Nec obponatur: mercurium ibi praecipitari *eadem* quidem *ratione*, ob adfinitatem scilicet maiorem menstrui cum praecipitante, sed praecipitari ab *alio* semper *corpore*; hic vero et dum *stannum*, et dum *ferrum* recipitur, praecipitationem semper fieri per *metallum* — Variam enim esse, quae circa *metalla* etiam, praecipitantium loco adhibita, obtinet, conditionem, et paulo prius monui, et ex phaenomenis numerosis ac examine praecipitationum metallicorum, diversissimorum sane, constat.

§. 196.

AUTUMAT, ex principiis suis, *Cl. Vir*, unitis invicem in solutionibus suis auro et stanno, metalla haecce bina adeo sese mutuo adtrahere, ut grumulos forment, grandes nimis, quam ut in menstruo suspendi jam queant, hinc ruere hos ad fundum vasis, colore tinctos, auro adtenuato maxime, ac subtiliter diviso nunquam non proprio. Exponit hinc, cur purpurae solutio stanni recens abs calore facta congrua solum sit; circa stannum enim idem obtinere ait, quod circa alia metalla obtinet, ut nempe vel solvantur abs decompositione, et menstrui subeant interstitia, vel ut terra solum metallica, expulsa parte phlogistica, menstruum ingrediatur. Purpura hinc vel cadet, vel non cadet; prout stannum aut lente solutum, indecompositum, aut violenter solutum ac in calcem versum, vel et ob diuturniorem adservationem phlogisto privatum, in aqua regia contentum fuerit — Admitti posteriora haec posse lubens fateor: percipere autem vellem rationem, cur, dum praecipitatur aurum per mercurium, cur, inquam, mercurius tum aurum, partim saltem, comitetur; an etiam ea ex ratione, quod metalla

§. 197.

§. 198.

G 5



quam illius in locum intercalare deberemus: uti ren-
 exactius pensitanti fors erit clarum. Sufficiat nobis in-
 terim, et ipsum *Cl. ERXLEBEN* admittere debere, ad-
 finitatem calcis stanni cum auro utique tantam non esse
 amplius, in solutione illa exposita igni, uti stanni
 ipsius. Adfinitas autem perfecta requiritur in theoria
Erxlebiana stanni cum auro, in nostra stanni cum aqua
 regia; aurum in illius theoria non praecipitatur a so-
 lutione statim dicta, quia calx non habet adfinitatem
 uti

*) *Adfinitas hic fracta, aut sublata non est — — —; Ad-
 finitas laesa tamen est; (id enim conficitur ex obser-
 vatione addita, calcem stanni non eam jam habere ad-
 finitatem cum auro, ac stannum ipsum). An haec
 optime cohaerent? Mutata scilicet foret adfinitas
 stannum inter ac aurum, in commodum theoriae
 Erxlebenianae; simul tamen mutata non foret stan-
 num inter et aquam regiam in damnum nostrae. Ut
 Cl. ERXLEBEN statuit: calcem metalli non eandem
 habere adfinitatem cum metallo alio, uti metallum
 ipsum: sic et dicere licet: calcem metalli non eam-
 dem habere adfinitatem cum menstruo, uti metallum
 ipsum: uti centum evincitur instantiis. Videtur ex
 his, quomodo idem phaenomenon ex binis theoriis
 possit exponi.*

MONENDUM denique venit, ex eo, quod solutio
 supra dicta diaphana manserit ac limpida, nondum
 sequi, adfinitatem fractam non fuisse stanni in calcem
 versi cum aqua regia: non stannum integrum, sed
 calcem inhaesisse illi, ipse *Cl. ERXLEBEN* ait; idem
 et non succedens praecipitatio purpurae demonstra-
 vit: quod diaphana manserit, seu potius, facta de-
 nuo in frigore fuerit, solum demonstrat, superesse
 adhuc vias, quibus metalla, parte licet phlogistica

uti metallum cum auro, in nostra, quia calx non eandem habet adfinitatem cum aqua regia uti habet metallum. Quivis videt, in illius theoria rem non facilius, non melius, non clarius exponi, ac in nostra; illam variis premi, quibus nostra non premitur; nostram naturalem magis videri communibus legibus, illam novitatis donari prerogativa, sed simul videri arcessitam. —

§. 199.

CONCLUDIT *Cl. ERXLEBEN* cogitata sua, observatione: purpurae mineralis nomine sese intelligere aurum, mediante aqua regis, et stanno in tenuem adeo pulverem redactum, simul etiam atomis stanni exacte adeo mistum et adtenuatum, ut pollinis auri cujusvis adinstar colorem exhibeat purpureum, et colore eodem vitra inficiat.

§. 200.

AURUM in purpura minerali esse adtenuatissimum, adtenuationi huic purpureum colorem deberi, simul et admistis stanni una dejecti moleculis tribui quid posse, admittere abs haesitatione licet; ratio vero ex majori adfinitate menstrui cum stanno melius exponi posse videtur, quam ex adfinitate majori stanni cum auro; uti fuscis satis prius dictum fuit. Optimum hic est,

insigniter (an enim omni phlogisto stannum privatum fuerit, quis dixerit?) privata, suspendi tamen in menstruis queant, ut nec ruere ad fundum illico debeant; etsi caeterum certissime constat, metallum jam non suspendi in illis integrum; etsi hujus ipsius veritas ex quamplurimis aliis phaenomenis demonstratur ad oculum. —



est, quod in utraque sententia purpura aequae bonae confici queat, nec res eadem ratione sese habeat, ut in praxi medica, ubi ex binis theoriis in pugnatibus morbus neutri saepe cedit, sed aegrum, ex theoriae naturalis legibus, enecat.

§. 201.

PRAETER descriptam antea methodum colore purpureo donatum encaustum variis adhuc aliis modis adquiritur. Sic ORSCHALL ope mercurii stanni in morrem soluti, eademque ratione, uti cum solutione stanni fit, solutioni auri commisti, purpuram deiecit elegantissimo colore tinctam, adeo ut purpuram vulgata methodo obtentam plurimum vinceret. Tentavi experimentum hoc saepius, vasa tamen purpureo colore pingere sic non potui, sed colorem hepaticum saltem, non vero purpureum obtinui, etsi ignis prudenter administratus, et vasa depicta in eum praecise locum furni exposita fuerint, ubi nec intensior, nec remissior regnabat calor, ut medium circiter caloris per totum furnum dispersi gradum experirentur.

§. 202.

OBTINUIT etiam ORSCHALL purpureum praecipitatum ex dejecto auro per sal tartari extemporaneum in deliquium resolutum; praecipitatum sic aurum floribus remistum sulphuris candescitiae in crucibulo exposuit; abiit in calcem ex rubro fuscam, eaque fluxui convenienti mista optimam pro pictura encaustica purpuram largita fuit.

SIMILEM calcem et per liquorem crystallorum obtinuit.

PULCHRUM demum purpureum colorem confecit ex auro ipso fulminante: atque STAHLIUS etiam dixerat,

sat, aurum fulminans pro colore encaustico adhiberi posse, si vires fulminantes ope sulphuris eidem prius fuerint erepta; et aurum salis alkalini volatilis ope dejectum, debite praeparatum ceu arcanum colorem pro vasis murrhynis quibusdam haberi, *Cl. DOSSIE* reliquit. *) Haec de *purpura minerali* dicta sint.

§. 203.

SOLUTIO argenti et plumbi aurum etiam praecipitat; etsi purum praecipitatum non cadat, luna sic in lunam corneam, saturnus in saturnum corneum vertitur.

§. 204.

MERCURIUS auri solutioni saturationi superadditus illud praecipit dat, atque una partim ipse ruit: solutiones etiam mercurii aurum ex menstrui amplexibus deturbant. (v. §. 200.)

§. 205.

EXAMINANDAE nunc veniunt *miscelae cum auro et metallis, semimetallisque* aliis institutae.

§. 206.

*) *AURUM* per stannum dejectum non adeo elegantem purpuram largiri, uti dejectum per sal alkali fixum, colorem illius ex caeruleo fuscescentem esse, hinc et praefereendam posteriorem esse, *Cl. BAUME* dixit; centies fors purpuram stanni ope factam vidi; ex caeruleo fuscescentis in pictura nil vidi. Subjungit tamen ipse, purpuram alkalini salis ope praecipitatum adhiberi pro pictura encaustica non posse, quum facile nimis reducatur.

ARGENTUM cum auro facile coit. Aurum argen-
to probe confundi, atque ab eo majoris fieri firmita-
tis; maximam firmitatem fuisse, quum ad duas auri
partes una argenti admista fuit, et misturae hujus fir-
mitatem ad firmitatem auri obryzi esse uti 57. ad 40.
Ill. MUSCHENBROECKIUS vidit. Gravitationem specifi-
cam parum solum augeri in miscela auri cum argento
Cl. GELLERTUS dixit. Color auri argento remissi pal-
lidior redditur, uti quidem conjici facile potest, quum
flavus albo diluatur magis. Mutatio jam ab una vi-
gesima parte argenti exurgit notabilis, quum tamen
argentum ab auro non cito adeo flavescat. Dixit qui-
dem *HOMBERGIUS*, in miscela auri cum argento, ubi
aequales metalli utriusque, adjecto nitro et sale com-
muni, receptae fuerunt partes, aurum secessisse ab ar-
gento, et fundum petiisse crucibuli, argenti tamen
sextam partem simul detraxisse. *) Verumtamen igne
validiori adhibito aut secessus hic nunquam fit, aut si
factus fuerit, metalla haec in mutuos denuo redeunt
amplexus, uti experimentis, hunc in finem institutis
evincitur, ut adeo methodus a *Cl. JUSTI* proposita pro
separatione auri ab argento solius fusionis ope, sub
qua aurum semper petiturum fore fundum edixerat,
laudes ab illo assignatas non mereatur. Iungere ta-
men hic debeo observationem *Cl. HELLOT*, quam
translationi splendidae operis *Schlütteriani* inseruit.
„ fusae fuerunt, ait, me praesente, quadraginta tres
„ marcae cum unciis sex, et drachmis quatuor argenti
„ auriferi; excepi cochleari aquae sub ipsa infusione
„ li-

*) ADDIDIT *HOMBERGIUS*, secessum hunc tum non-
nisi fieri, quum anatica auri et argenti mistae in-
vicem fuerint partes, et ignis determinatus quidam
gradus adhibeatur.



„ liquati metalli immerſo, ac torrenti hujus ſubdito,
„ exiguam partem granulorum ex ſuperficie crucibuli,
„ alteram ex medio crucibulo, tertiamque ex hujus
„ venientem fundo. Specimina haec notata fuerunt
„ numeris 1. 2. et 3. more ſolito examinatis conſtitit,
„ latuiſſe in No. 1. denarios auri tres et decem grana,
„ in No. 2. denarios tres et quinque grana; in No.
„ 3. demum denarios tres auri, et grana ſex.” Ut
aurum et argentum in fuſione ab invicem non recedant,
ignem adhibendum eſſe violentum ſatis, miſcelam ſi-
mul agitandam, hic monuiſſe non erit ſupervacuum. *)

§. 207.

*) SUBNECTAM hic ex Cl. SPIELMANNO rationem puri-
tatis auri in diverſis regionibus, diverſisque mone-
tarum ſpeciebus. Pro *ligatura* auri in monetis &c.
argentum et cuprum ſeliguntur, unde *ligatura alba*,
rubra, et *miſta* exſurgit.

Pro auri puritate indicanda, SPIELMANNUS in-
quit, excogitarunt *karatia*. *Puriſſimo auro* 24. *ka-*
ratia adſcribunt; *Galli karatium* in 32, *Germani* in
12. grana ſubdividunt. *Aurum ducatorum*, et *Sequin*
melitenſis eſt ad 23. ceratia, et 16. grana, ergo 48ma
ejus pars viliori metallo efformatur. — *Aurum Ca-*
rolinorum eſt ad 18. ceratia cum dimidio, hinc $\frac{1}{7}$ mas
partes *ligatura* habet — *Aurum Fridericiorum*, illis
exceptis, quibus anni 1752. et 1756. inpreſſi ſunt,
ejusdem valoris eſt cum *Ludovicis antiquioribus* —
Aurum Anglicum eſt ad 22. ceratia, ergo ejus duo-
decima pars metallo alio conſtituitur — *Aurum*, un-
de *monetae* 1709. *poſteriores* in *Gallia* cuduntur, eſt
ad 21 $\frac{2}{3}$ ceratia; *antiquiores* autem *Ludovici*, et qui-
bus *imago ſolis* inpreſſa eſt, ad 20. ceratia cum uno,
et 24. grana, hinc $\frac{1}{9}$ *ligaturae* habent — Id, unde
recent-



§. 207.

Miscelam auri cum PLATINA in *capite de PLATINA* adferam.

§. 208.

Ab auro *cuprum* non respuitur: miscela inde enata ductilis est; et color auri sic intenditur, fluxilitas etiam facilior nonnihil exin fit. Commiscuit *Cl. MUSEHENBROECKIUS* aurum obryzum cum sincero aere fulvo Sueciae; firmitatem auri sic multum increvisse vidit: maxima, ait, firmitas in misto fuit, quando septem partes auri cum una parte aeris miscentur; mi-

nor

recentiores monetae apud *Hispanos*, et *Crusade Lusitanorum* cuduntur, est ad 20. ceratia, cum uno, et 24. grana — Aurum, ex quo in *Gallia utensilia* parant, quae ferruminantur, est ad 20. ceratia; ex quo autem reliqua conficiuntur est 21. ceratia et 24. grana — Aurum, quo *aurifabri* utuntur, est in *Hispania* ad 22 ceratia cum quadrante, in *Sabaudia* ad 20 ceratia cum quadrante, in *Austria* ad 22 ceratia, in reliqua *Germania* ad novendecim ceratia cum dodrante, in *Helvetia* ad 18 ceratia, in *Lotharingia* ad 20. ceratia, apud nos (*Argentorati*) ad 18. ceratia et 4. grana — *Aureorum rhenensium* puritas est ad 18. ceratia, et 6 grana, hinc $\frac{11}{48}$ mae eorum partes aurum non sunt, quum aurum a *coronis* denominatum sit ad 18. karatia, hinc quarta ejus pars metallo, quod auro vilius est, constituitur — Apud *Romanos Albicratenſis* quod erat ad 22 ceratia, et 16. grana, reputabatur optimum. *Electrum* autem dixerunt aurum omne, quod 19 ceratia non excessit; *PLINIO*, *ISIDORO*, *STRABONE* testibus.

nor est firmitas, quando cum 6. 5. aut 4. partibus auri una pars aeris fuit mista, in his tamen firmitas aequalis, et maximae proxima. In auro Pistolettarum dicto, $\frac{10}{100}$ poll. crasso, firmitatem invenit lb. 460. si-
ve in crassitie $\frac{17}{100}$ poll. fuisset firmitas lb. 1329. Evi-
cit hinc tentaminibus suis, a cupro multo majorem
auro conciliari firmitatem, quam ab argento, quum
maxima, quam in auro excitavit argentum, fuerit mo-
do aequalis lb. 285. quae ab aere fuit lb. 550 :: 57.
ad 100 fere uti 1. ad 2. *) uti miscela argenti et cupri
specifice gravior redditur, sic miscelam cupri cum au-
ro specifice leviolem esse, Cl. GELLERTUS monuit.
Monni prius, ductilitatem auri a vaporibus carbonum
insigniter minui; cuprum auro junctum id boni huic
adfert, quod a carbonum vapore non facile adeo tum
adfici queat; idem emolumentum et in argentum ex-
serit, uti postea dicitur. **)

§. 209.

Ex dotibus, quas cuprum auro largitur, varias ar-
tifices deduxerunt utilitates: quum cupro mistum au-
rum

*) TILLET, addit Cl. MUSCHENBRÖCK supra adductis,
in *Dissertatione de ductilitate metallorum* tradidit, au-
ri 12. partes cum una parte aeris mistas fusasque in
modulo ferreo praebere metallum minus ductile mal-
leis, quam obryzum est; et si eadem mistura fuerit
in modulum ex arenis infusa, evadere metallum
durum, malleis fragile, nisi recoquatur, et ignitum
exstinguatur in aqua: id autem tantum in obryzo et
aere, non in aliis metallis observatur. Hoc verum
esse omnes periti fusores adfirmant.

**) V. Cap. de ARGENTO.

Pars I.

H



rum facilius in fluxum abeat, *ferrumina* exin paraverunt pro auro ea ratione, ut pro uniendis binis frustis auri purissimi adhibeant aurum exigua dosi cupri remistum; pro ferruminando auro cupro jam aucto recipiant aurum, cui major copia cupri addita fuerit: quo vero color ferruminationis a colore massae totius nimium non recedat, intensitatem cuprei argenti tantillo frangunt. Quum et aurum colorem saturationem ab admisto cupro adquirat, jusserunt varii, ut hoc scopo aerugo, vitriolum caeruleum, aliave praeparata venerea auro jungantur: actionem horum additorum *Cl. LEWIS* non tam in genuina exaltatione seu intensione coloris auri quaerendam esse ait; sed videri potius, tolli eorum ope *decolorationem* externam, quae in aurum ligatum ex igne redundat; id etiam non cupro, sed acido in praeparatis venereis contento fore tribuendum. Obstare tamen videntur *Lewisiana* huic sententiae varia; et experimentis certissimis evictum habetur, colorem auri intendi cupro admisto purissimo, etsi parva solum portio cupri fuerit adhibita et nullum adsit acidum; observavi vero, multum hic interesse, an aurum ex natura sua jam pallidius, aut fulvius cupromisceatur.

§. 210.

Quo auri color intendatur, jubent alii, ut auro tres, aut quatuor partes cupri ruberrimi fusione admisceantur, mistum in tenues tundatur braeteolas, aut in granula reducatur, tumque in aqua forti decoquatur, ut omne, quod haec solvere valet, tollatur cuprum; aurum residuum cum cupro novo confundatur, atque hoc repetatur aliquoties. Remansuram sic fore, ajunt, exiguum solum partem cupri in auro, hanc vero intime adeo inhaesuram, ut actioni acidorum, et aëris jam non sit obnoxia.

Aes pyropum Veterum componi miscela partium quatuor cupri cum parte una auri, BOCHARTUS notavit. Aurum cupro remissum in igne nigrescit.

§. 211.

FERRUM cum auro coit: in massam duram, fragiliorem demum abit: *Cl. Lewis* miscelas quasdam horum metallorum duras adeo firmasque esse monet, ut novaculae inde parari queant: partes aequales ferri, et auri massam griseum, partes tres vel quatuor ferri cum una parte auri mistae massam coloris fere argentei praebent, a magnete, uti *Cl. WALLERIUS* ait, adhuc attractilem. Aurum fusum ferro inmisso facile adhaerescit, atque id resolvit, quod Mechanicis diversis probe notandum. Instrumenta subtilia ferrea, aut chalybea, auri ope pulchre conferruminantur: ad quod quidem sufficit, si lamella auri partibus uniendis circumponatur, et cannulae ferruminatoriae ope flamma illuc adigatur: *Cl. GELLERTUS* hinc aurum, hoc scopo, praefendum esse cupro, bene monuit. In tentaminibus *Gellertianis* miscela auri cum ferro specificae levior deprehensa fuit.

§. 212.

AURUM stanno jungitur; sed massam una constituunt metalla haec fragilem adeo, ut in pulverem contrahi possit: colorem etiam aurum sic perdit, et albescit. Massa haec, *Cl. WALLERIUS* ait, in pulverem comminuta, calcinationi tum exposita nigrescit, dein cinerum aliorum in morem albescit, nec rubrum ullum, aut flavicantem offert colorem; optimis etiam microscopiis auri nil in calce detegitur, etiam calcinatio diutissime protrahatur; nec cum mercurio in amalgama abit, utut aurum aequae ac stannum, dum forma



gaudent metallica, in amalgamationem sint pronissima. In fluxum demum deducta calx tum in vitrum abit flavum auriferum, tum regulum dimittit, auro et stanno unitis compositum, uti *Cl. BRANDT* retulit. Dos haec stanni, auro ductilitatem eripiendi, tanta est, ut vel vapor fusi stanni jam sufficiat. Miscela auri et stanni rarior fit, ex tentaminibus *Kraftianis*.

§. 213.

AURUM cum anatica portione *plumbi* mistum ductile quidem adhuc manet, multum tamen ductilitatis deperdit, et colorem etiam longe alium, obscurum acquirit. Plumbum fusum suo vapore aurum fragile reddere, et, si apto forti vasculo superius in orificio auri lamina, seu ducatus superinponatur, ut halitu *plumbi* in fundo fluentis adfici queat, post horam circiter plane inducibilem, et friabilem pene fieri, praesertim si subinde invertatur, *JUNCKERUS* edixit. Miscela *plumbi* et auri specificae gravior fit.

§. 214.

CUM *mercurio* aurum jungi notissimum ex *amalgamatione* est; et adfinitas binarum harum substantiarum metallicarum tanta observatur, ut a levissimo contactu amalgamatis jam exfurgat species, uti ex nummis aureis maculis argenteis notatis satis adparet. Coniunctio vero auri et *mercurii* ut perficiatur, vel superaddi auro in minores moleculas redacto, et candenti *mercurio* potest; vel miscela instituitur solo tritu auri granulati, seu in bracteolas expansi cum *mercurio*; mistum hoc in crucibulum candens infunditur, et in igne tantisper retinetur; vel et abs ignis auxilio tritu producit^rur *amalgama*, inprimis dum portio *mercurii*
major

major, ratione ad aurum habita, fumitur. Ab auri parte una decem, duodecimve mercurii partes spissescere, a quinque, aut sex partibus auri massam sat duram exsurgere *Cl. WALLERIUS* notavit.

§. 215.

AMALGAMATE auri cum mercurio utuntur ad vasa cuprea, aut aurichalcea *) *deauranda*, seu potius *in-auranda*. Hunc in finem vasa arena pura, granulis minoribus composita omnium primo detergantur ab omnibus adhaerentibus fordibus, aut adnata fors aerugine; inmerguntur dein aquae forti debilissimae, eximuntur inde, et solutioni mercurii, aqua copiosa dilutae, inmittuntur, illico tamen extrahuntur, argentea quasi ab adhaerente, in superficiem deposito mercurio: obluuntur aqua pura, ut acidum adhaerens omne auferatur, et amalgama auri cum mercurio ope instrumenti muneri huic destinati illis inducitur. Hoc facto inponuntur carbonibus candentibus probe exustis fumum non eructantibus, ut mercurius vi ignis fugatur: idem labor repeti saepius poterit, si vasa crassiori auri tegmine obducere velimus. Quodsi inauratio splendens minus aut pallidior fuerit, vasa miscela quadam obducunt, cera, bolo armena, viridi aeris, et alumine composita; ignis actioni tamdiu vasa exponunt, donec inducta haec miscela exusta sit, quo facto ea detergant, ac poliunt, si splendorem majorem conciliare inaurationi toti, vel partibus quibusdam, velint.

H 3

Re-

*) **FERREA** vasa obduci auro etiam possunt; prius tamen induci debent pellicula cuprea, quod perficitur, si vitrioli caerulei solutioni aliquamdiu inmittantur, aut vitriolo hoc conminuto, madefacto fricentur.



RETULIT *Cl. Lewis*, loco misturae antea dictae optimo cum successu adhibitam fuisse sequentem, nitrum, sal ammoniacum, vitriolum ferri, et viride aeris anatica dosi, in pulverem subtilem prius contusa, miscentur invicem; pulvis, aqua madefactus, vasis inauratis illinitur, ea calefiunt tamdiu, donec vapores ascendant, tumque in lotio restinguuntur.

§. 216.

ANTIMONII regulus cum auro fusione jungitur; aquae cujusvis partes miscelam auro forma fere analogam producant; aurum ab addito hocce corpore fragile redditur.

§. 217.

ANTIMONIUM crudum auro cum in finem conjungitur, ut ejus ope hoc ab admixtis metallicis omnibus substantiis ignobilioribus depuretur, quum hae omnes antimonii actioni subjeculae sint; aurum vero lupo metallorum non omnino pateat. *)

§. 218.

ZINCUM massam cum auro constituit pallidiorem, malleo minus obtemperantem; miscela haec specificè gravior est. Observavit *Cl. Hellot* anaticas partes auri et zinci fusione junctas praebere metallicam substantiam fragilissimam, durissimam, politura maxime

*) INDICASSE hic sufficiat, metalla omnia reliqua ab antimonio, seu sulphure potius in antimonio crudo contenti, destrui: operationem vero, quum ad doximasiam proprie dictam pertineat, hic consulto neglexi.

me splendentem, hinc speculis pro telescopiis aptissimam, quum et aëris actioni non pateat: miscela haec in fractura densa est, granulis minimis distincta, albicans. Quodsi partes decem Zinci addantur ad partem unam auri, miscelaque crucibulo exponatur ea ratione, uti ad praeparationem florum Zinci requiritur, totum elevatur in flores, et aurum per Zincum sic volatile redditur; adscendentes flores lamina frigida metallica, aut cochleari majori obverso optime excipiuntur.

§. 219.

BISMUTHUM auro junctum fragilem constituit massam; fragilitas haec major minorve erit, pro ratione adhibitae quantitatis amborum: miscela bisinuthi et auri specificè gravior est.

§. 220.

COBALTI *regulus* cum auro massam subpeditat cobalti regulo ipsi non multum dissimilem: miscelam hanc, in pulverem subtilem redactam, calcinatam, in vitrum saturate cyaneum, auriferum abire monet *Cl. WALLERIUS*.

§. 221.

ARSENICUM auro nexum malleabilitatem huic eripit, fragile reddit, fractura subgrisea, sat tenera est: dixit KUNCKELIUS auro *animam eripi*, seu *album* reddi hoc posse, si saepius cum arsenico, et borrace fundatur; colorem satis hebetari sic instituta docuerunt experimenta.



§. 222.

NICCOLUM cum auro abit in massam albam, fragilem, teste Cl. CRONSTAEDT.

§. 223.

PURISSIMUM, et *obryzum* aurum esse demonstratur, si igni expositum non nigrescat; in lapide lydio sinceritatis notam relinquat, collatione cum diversimode misto et purissimo instituta; in cupella persistet nitidissimum; cum regulo antimonii mistum ab hoc non adficiatur, nec eo avolante minuatur pondere; in aqua regia solvatur exacte, quin sedimentum dimittat; ab aqua forti non tangatur; colore, gravitate, ductilitate integerrimis gaudeat; Cl. WALLERIUS.

§. 224.

ADDI haec de auro prolatis possent adhuc plurima circa *auri tinturas* varias, absurda illa sub specioso titulo latentia praeparata, *auri potabilis* diversae species, *projectiones chrysogonae*, aliaeque, ex Alchemicorum somniis petita: nisi piaculum foret, si Tyro-
num tempus futilibus hisce pessumdarem.



ARGENTUM.

§. 225.

ARGENTUM. (D) *) LUNA, DIANA, metallorum *nobilium* alterum, colore albo, *argenteo*, splendente, elegantissimo oculos ferit.

§. 226.

RATIONE coloris in argento non ea obtinet diversitas, uti in auro; illud enim nunc intensius nunc remissius flavet, in hoc vix ulla observari poterit diversitas, dum purissimum, nec metallo alteri nobili, aut ignobili junctum fuerit. Statuta in *Galliis* poena bis mille librarum est pro deceptoribus, qui argento colorem aureum, mediante fumigatione conciliant. Examine microscopico minores quam in auro grumulos, cavernulas autem numerosiores, ac majores, in argento detexit *Cl. TILLET*.

§. 227.

GRAVITATE argentum auro, platinae, mercurio, et plumbo cedit; ad aquam destillatam sese habet, uti 11,091. ad 1000.; argenti ex luna cornea reducti gravitatem invenit *III. MUSCHENBROECK* uti 10,5426. aliter uti 10,851, hollandici majoris valoris, uti 10,535, minoris uti 10,340. fusi uti 10,2538, tusi uti 10,5000. ad p. 1000. aquae pluviae. *BOERHAAVIUS* gravitatem argenti uti 10,535, vel uti 11,087. ad 1000.

*) D. Semiaurum; cujus intimum extrorsum versum facit aurum integrum, sine ullo peregrino, sine corrosivo; id in argento observant Alchemistae. *BOERHAAVIUS*.



1000. aquae antliae posuit. Pollex cubicus argenti, aestimatione communi 6. uncias pendit, pes cubicus libras 744, quum pes cubicus auri libras 1368. exaequet. Considerari et hic, et per decursum semper debet puritas metalli, aëris temperies et atmosphaerae status, dum de gravitate diversorum corporum sermo est, uti antea: de auro agens, monui. *)

§. 228.

DUCTILITAS argenti ingens est, ductilitati auri tamen cedens: instantiam ductilitatis in bracteolis omnium

*) Quantum haec circa gravitatem augendam minuendamve queant facere, et ex *Physicis* notum est, et ex *Cl. EISENSCHMIDII* tentaminibus optime evincitur. Speciminis loco adponere placuit tabulam *Cl. Viri*, etsi quidem corpora metallica, praeter mercurium, in ea non expressa fuerint, nec determinati caloris frigorisque gradus. Pondus itaque pollicis cubici parisiini

	AESTATE.			erat	HTEME.		
	3.	3.	gr.		3.	3.	gr.
Mercurii	7.	—	1. — 66.		7.	—	2. — 14.
Olei vitrioli	0.	—	7. — 59.		0.	—	7. — 71.
Spiritus vitrioli	0.	—	5. — 33.		0.	—	5. — 38.
— — nitri	0.	—	6. — 24.		0.	—	6. — 44.
— — salis	0.	—	5. — 49.		0.	—	5. — 55.
Aquae fortis	0.	—	6. — 23.		0.	—	6. — 35.
Aceti	0.	—	5. — 15.		0.	—	5. — 21.
— — destillati	0.	—	5. — 11.		0.	—	5. — 15.
Spiritus vini	0.	—	4. — 32.		0.	—	4. — 42.
Lactis bubuli	0.	—	5. — 20.		0.	—	5. — 25.
Aquae fluvialis	0.	—	5. — 10.		0.	—	5. — 13.
— — putealis	0.	—	5. — 11.		0.	—	5. — 14.
— — destillatae	0.	—	5. — 8.		0.	—	5. — 11.



um subtilissimis, et filis tenuissimis habemus. Ex argenti grano unico parari potest vasculum hemisphaericum, unciam unam aquae excipiens, et in filum 400. pedum extenditur.

§. 229.

TENACITATE argentum auro denuo cedit; filum argenteum unam decimam pollicis partem crassum libras tercentas septuaginta sustinet; hinc tenacitas auri multo major est, quum crassitie eadem praeditum filum aureum libras quingentas, antequam rumpatur, ferre queat.

§. 230.

DURITIES argenti, seu *firmitas* medio loco ferrum inter et aurum reponenda venit. Argentum durius esse auro, stanno et plumbo, mollius ferro et cupro, monuit Cl. WALLERIUS.

§. 231.

SUB malleo argentum durius ac firmitus fit; increfcit etiam, secundum *Muschenbroeckiana* tentamina, gravitate.

§. 232.

ELASTICITATE aurum ab argento vincitur, minus tamen hoc elasticum cupro est; *sono* acuto, tinniente gaudet.

§. 233.

Ab aëre argentum, si purum fuerit, non adfcitur, nec rubigine obducitur, nec splendorem deperdit, nisi
ab



ab impuritate in superficiem deposita: Si vero vaporibus phlogisticis aer inpraegnatus fuerit, superficies argenti opaca fit, et species iridis in ea enascuntur, ob adfinitatem magnam, quae metallum hoc inter et phlogiston intercedit; puriores tamen vapores mutationem hanc non adeo adferunt, uti crassiores, pingues, sulphurei.

§. 234.

Aqua argentum parum adeo ut aer adficit; limatura argenti purissimi ab adfusa aqua destillata nunquam solvitur.

§. 235.

CALOR argentum, uti et alia corpora naturalia rarefacit, in pyrometro *Ellicotiano* aurum gr. 73. argentum vero 103. rarefit; ex BOUGUERIANIS calculis pyrometricis, data longitudine hexapedae 33000. partium, dilatationes pro auro 31. pro argento 24. forent. Radii solares, uti *Cl. MÜSCHENBROECK* notat, in Peru extenderunt chalybeam hexapedam $\frac{40}{100}$ lineae, argenteam $\frac{62}{100}$: in genere notetur: ordine rarefactionis argentum sequi post plumbum demum ac stannum.

§. 236.

GRADU caloris millesimo therm. Fahrenheit: argentum, teste *Cl. MORTIMER* funditur. Ante fusionem candet. Fusum speculi adinstar splendet, et iridem obfert. Si lente refrigerat, dendritici ductus in superficie enascuntur.

§. 237.

§. 237.

IN igne fixissimum esse argentum, Chemici uno ore adseruerunt, et ob hanc inprimis dotem inter metalla nobilia, seu perfecta locum eidem assignarunt. Fixum, BOERHAAVIUS ait, adeo in igne argentum est, ut nihil fere perdat, si purissimum fuerit: bimestri spatio fufum in oculo furni vitrarii vix $\frac{1}{12}$ amisisse fertur; sed an et tum sincerum fuerat? JUNKERUS etiam, tentamen hoc ex KUNCKELIO referens, addidit, explorandum adhuc fore, an exile huiusmodi decrementum non potius a pauxillo ignobilis metalli, argento intermisti, quam a puro argento extiterit.

§. 238.

NARRAT Cl. BAUME experimenta novissima, quae circa hanc quaestionem *Celeberrimus d'ARCET Parisiis* instituit: argenti purissimi partem quamdam inclusit globo ex terra murrhyna facto, eumque furno commisit, in quo vasa murrhyna excoqui solent. Ruptos plerumque globos fuisse conatibus argenti, proripere sese nitentis, *) argentum vero ipsum in massam subspongiosam ex albo flaventem abiisse monet: mutationem hanc acido vitriolico in terra contenta Cl. BAUME adtribuit.

EXPOSUIT dein et ipse uncias quatuor argenti, non quidem depuratissimi, denis ex ordine repetitis vicibus furno simili; cupri quidem adhuc lentis partem in calcem abiisse, argentum vero ipsum, etsi ardentissimum furni calorem experiretur, ne minimam quidem labem passum

*) VIDIT etiam Cl. LEWIS argentum violentissimo igni expositum ebullisse quasi, atque sic partem illius fuisse deperditam.



passum fuisse dixit. — Refert demum JUNCKERUS, argentum *reverberatione hollandica* quodammodo praeparatum, pariter a mixtione sua fatiscere, verique calcinari, ac destrui in cinerem vitrescentem. Nec ipse Auctorem tentaminis citavit, nec a quonam repetitum fors fuisset, constat: varia tamen circa calcinationem adferri possent; nam quid cum cinere illo factum, an non reductioni expositus fuerit, an hanc non admiserit, nil additur: praeterea praeparatione praevia intricatum forsitan fuit substantiis, quarum vi mutabatur in speciem calcis; ex calce tamen hac, eadem ratione, uti ex luna v. c. cornea, in pristinum argentum denuo reducendum: ex adlato saltim tentamine argenti destructionem perfectam evincere nollem.

§. 239.

ELECTRICO igne argentum in pulverem bruno-nigrum *III* MEIDINGER vertit. Speculo caustico in vapores resolvit, partemque exiguum in vitrum flavescent, vernicem aemulans verti *Cl.* WALLERIUS perhibet; an ipse instituerit experimentum, additum non video.

§. 240.

MENSTRUUM diversam omnino in argentum actionem exferunt. Inter haec primo loco obcurrit *vitriolicum acidum*. Ut in hoc argentum solvatur, requiritur major acidi concentratio; tumque tres vel quatuor partes ad unam partem argenti, in subtiliaamenta limati, fumi debent; simul vero solutio decoctionis adminiculo promoveri: bene hinc monuit *Cl.* MACQUERUS, eadem ratione procedere debere operatorem, uti in praeparatione *turpethi mineralis* fieri solet, si argentum in hoc acido solvere velit. Acidum vitriolicum hac ratione volatile redditur, et phlogistica-

ratum, destillationis ope inde abigendum, dum solutio in retorta fuerit instituta. Ut vero perfectior obtineatur argenti in acido vitriolico solutio, novum et dilutius nunc adfundi poterit acidum: resolvitur sic, erosum magis quam solutum, ac sub forma pulveris albens in fundo vasis haerens argentum; verum cum hoc acido vitriolum lunare constituens.

§. 241.

ACIDUM *salis* argentum forma metallica donatum pariter non solvit, nisi concentratissimum, et in vapores redigatur, caloris intensioris ope; atque hac ratione argentum ab acido muriatico in *caementatione* sic dicta *regali* demum referatur: idem eadem ex ratione fit, dum argentum conjungitur cum mercurio sublimato corrolivo, atque miscela haec destillationi ex retorta exponitur; prodit sic in excipulum mercurius ab acido *salis* liberatus; acidum vero hoc argentum adgreditur, idque dissolvit.

§. 242.

OPTIMUM vero argenti menstruum *acidum nitrosum* constituit. Quo autem solutio argenti in acido hoc purissima reddatur, et faciliior, requiritur inprimis, ut acidum nitri nec debile nimium sit, nec justo magis concentratum; ut purum sit ab inhaerentibus acidis aliis, vitriolico scilicet, aut muriatico; quam ob causam et *aqua fortis praecipitata* dicta huic scopo satisfacit; ut proportio conveniens observetur solvens inter ac solvendum, seu ut duae tresve partes acidi ad unam partem argenti recipiantur; solutio demum caloris ope, sub initium saltem, redditur celerior. — Sub solutione hac vapores adscendunt plurimi rubentes, ebullitio accedit valida, et calor sentim enascitur



tur major: disparet demum argentum omne in acido; et pulvisculus solum nigricans ad fundum vasis descendit; est aurum purum, in acido nitri solvi inpos, argento saepe, etli non semper, uti BOERHAAVIUS edixerat, inhaerens.

§. 243.

ARGENTI in acido nitri solutio excolor est, nec, nisi cuprum in argento latuerit, caerulefcit; sub initium tamen viridescere solet, excolor dein futura. Sapore donatur austero maxime, amarissimo, caustico: cutim humanam macula nigricante tingere, Chemici omnes edixerunt, vidi autem in me ipso colorem hujus maculae, si solutio obiter solum illinatur, ad purpurefcentem magis accedere, et soli loco exposito, ac solutione meraciori, majorique copia inducta tum demum nigrescere; cutim non relinquit macula, nisi desquamatione epidermidis auferatur; solutio meracior cutim caustica indole rubefacit, exulcerat.

§. 244.

NOTAVIT pluribus inventis celebris DUFAY, ope solutionis argenti in acido nitroso factae figuras varias pingi posse, novosque characteres produci in achate albo: requiritur ad hoc, ut pictura, solutione hac lapidi inducta, exponatur solis radiis, utque siccus redditus lapis deportetur in locum humidum, solis jubari denuo exponendus; color sic enascetur mox ex bruno rubescens, saturatior futurus, reiterata pictura. Color idem griseus erit, si solutioni quarta pars, ratione ad pondus habita, fuliginis et tartari rubri adjiciatur; saturate violaceus, vel et nigricans redditur, addito solutioni alumine sic dicto plumoso. Methodo simili usus fuit *III. Princeps de SAN-SEVERO*, qui naturam in-

inventis suis nobilissimis acquavit saepe, saepe et longe superavit. Capilli colore rubro, aut vulpino praediti nigrescunt solutionis hujus beneficio, quem in finem a fucatoribus sub *aquae graecae* titulo adhibetur. Notavit *Cl. WALLERIUS*, vitriolum cupri a quibusdam adjici, ac solutionem hanc argenti nitrosam diluendam esse prius partibus sexdecim aquae, aut capillos lixivio abluendos constante uncia una cum dimidia salis alkalini fixi, in libra una aquae soluti.

§. 245.

SOLUTIO haec argenti meraca evaporationi lentiori exposita tandiu, donec una quarta circiter pars laticis abacta sit, aut spissescere in superficie incipiat, tum in locum frigidiorum deportata crystallos largitur, uti *BOERHAAVIUS* eas describit, lamellatas, planas, tenuissimas albas, invicem sibi adpositas, et incumbentes, quasi triangulatas, ex aciculis nitro finillimis factas: Crystalli hae albae sunt, ait *Cl. ROME* de *l'Isle*, tenues, foliaceae. Lamellae, quibus constant, jam hexagonae, jam et trigonae sunt. Si crystallisatio majori fiat copia, crystalli obtinentur compositae laminis tetragonis, aut quadrangulis rectangulis. Pyramides tetraedras complanatissimas dixit *Cl. MACQUERUS*. Exemptis, quae prima vice enatae fuerunt crystallis, liquidum evaporationi denuo exponi poterit, alteram, minorem, crystallorum messem producturum.

§. 246.

CRYSTALLI sic enatae, sapore amarissimo donatae, unde et *fellis metallorum* nomine fuerunt notatae, neca forma conservari vix queunt, quum in deliquium pronissima sint, atque sic *solutionem argenti in acido nitri meracissimam* generent.

Partes I.

I

§. 247.



§. 247.

IGNI vero expositae in crucibulo hassiaco, vaseve ad operationem hanc idoneo murrhyno, funduntur instar olei; lenis tamen adhiberi debet ignis, quum materies sub initium satis intumescat. Retineatur fusus hiece liquor in igne tantisper, tum effundatur in modulos cylindricos, huic muneri destinatos, sebo illitos, calentes: frigefacti bacilli externe nigricantes, interne ex centro ad peripheriam radiati, in vitro adserventur, epistomii vitrei ope exactissime clauso. Est praeparatum hoc *Lapis infernalis*; *cauterium lunare*; *causticum lunare* PHARMACIAE LONDINENSIS; *caustica lunaria* BOERHAAVII; *causticum perpetuum* LOVE MORLEY &c. causticum summum, carnes ad ossa erodens, Chirurgis pro destruendis fungosis excrescentiis usitatissimum.

§. 248.

CAUSTICUS lapis obtineri etiam potest, ab ipsa solutione argenti in acido nitri facta, aut destillationis, aut evaporationis ope, humiditate superflua abacta; residuo antea dicta ratione tractato.

§. 249.

SUB titulo *argenti ardentis* sequentem operationem BOERHAAVIUS descripsit, quae quidem nil nisi reductio est argenti ex lapide infernali; addere tamen hic potissimum loci eandem volui, ut quae circa causticum hoc forent notanda simul haberentur collecta. Praefecto, ait, sit pruna nitida, scintillans, pura, nullo modo amplius fumans, de cespite batavo perusta. Ponatur haec ita, ut superficies illius superior horizonti sit parallela plano suo. Tum formetur parva cavitas
in

in hac superficie media. In hanc cavitatem inpone drachmam lapidis infernalis ficcissimi, statim fundetur, ardebit, flammam vivam concipit, strepit, lucet quam vivacissime, omni modo refert nitrum. Postquam cessavit flamma, haeret in cavitate illa purum argentum eadem copia, qua fuerat dissolutum in componendo lapide; sicque inde tenaculo eximi, sine jactura ponderis, potest.

§. 250.

PRIUSQUAM de variis argenti praecipitationibus agam, considerasse prius juverit menstrua reliqua in illud plus minusve agentia; ea enim, quae in referatum prius ab aliis agunt, post expositam praecipitationem primo erunt considerata.

§. 251.

ACIDUM *vegetabile* in argentum forma metallica donatum non agit, quae in referatum illius fit actio, postea exponetur. *)

§. 252.

ALKALI *fixum*, et *alkali volatile* sicca via et humida, dicta sub conditione, argentum non adficiunt.

§. 253.

SULPHUR via sicca argentum adgreditur, et cum eo in massam nigricantem, colore et consistentia plumbo
I 2 fere

*) VIDIT vero Cl. WESTENDORF acidum aceti fortissimum tantillo acidi nitrosi acuatum argentum resol-
vere.



fere analogam cultro scindendam abit ; compositum hoc *argentum* dicitur *sulphuratum*, et *mineram* refert *argenti artificialem vitream*. Ut productum hoc exfurgat, argentum cum sulphure stratificari debet, ignisque per gradus pedetentim ad fusionem usque intendi: sulphur argenti fusionem faciliorem reddit.

§. 254.

SAL ammoniacum argentum purum nec via humida, nec via sicca adoritur. Sublimari tamen argenti quid, si, aut limac, aut granulationis ope, in exiguas massulas redactum misceatur cum salis ammoniaci quadam parte sub continua trituratione, adfusa per intervalla pauca aqua, tum vero sublimationi in cucurbita exponatur, *Cl. WALLERIUS* ex *Kunckelio* retulit. Sub caementatione solvi etiam argentum monet ab sale ammoniaco, cui una cum vitriolo admiscetur. Verum tamen non a sale ammoniaco, ceu sale medio, argentum sic solvitur, sed ab acido salis, vitrioli ope a basi volatili alkalina liberato, ac metallum hoc facto adgreddiente, referante.

§. 255.

SAL commune argentum pariter non solvit, sed acido muriatico idem denuo tribuendum est in regali caementatione.

§. 256.

NITRUM detonationem cum argento non excitat: sub caementatione non nitrum, sed acidum ejus lunam adgreditur.

§. 257.

§. 257.

HEPAR *sulphuris*, et *salia vitriolica*, additione phlogisti in carbonum pulvere contenti in illud mutata argentum vix sicca solvunt, in aqua solubile reddunt.

§. 258.

ACIDUM *phosphori* argentum non solvit in *Marggrafianis* tentaminibus.

§. 259.

SAL fusibile *microcosmi lunam* via humida omnino non, via sicca magis adgreditur, posteriori in casu scoriam diaphanam producit.

§. 260.

VIDEAMUS nunc *praecipitationes* argenti ex suo peculiari inprimis menstruo, acido scilicet nitroso; simul etiam quid praecipitatis exin factis, et diversa encheiresi cum novo menstruo junctis accadat, examinemus. Adferam autem ea non nisi, quae ob productum inde obtinendum, notatu digna maxime videbuntur.

§. 261.

Ex *acido vitriolico* deijcitur argentum solius aquae purae admissione, atque tum albescens, et verum *argenti vitriolum* ad fundum cadit. Ratio phaenomeni sit facilis expositu est: argentum in concentratissimo nonnisi vitrioli acore solvitur; hinc, dum acor aquae admistae interventu diluitur, solutum in sese retinere



amplius nequit metallum, sed ex amplexibus coactum dimittit: praecipitato tamen arte adhaerens.

§. 262.

REDUCITUR argentum in acido vitriolico solutum solo ignis beneficio quo acidum sensim abigitur, metallum denuo restituitur; quum tamen sub solutione argentum partem deperdiderit phlogisti, nunquam non aliquatenus damnosa haec est reductio; materie phlogistica adjecta evitatur iactura.

§. 263.

ACIDO *nitroso* solutum argentum dejicitur per corpora diversa; et praecipitationes illae omnes notatulus vel minus digna obferunt phaenomena: eripitur ei et acidum a causis aliis, quin praecipitans ullum sit requisitum; uti statim videbimus.

§. 264.

IGNIS *actio* sola jam apta nata est, ut argentum ab acido nitroso liberet, nam et destillatione ei potest eripi; et lapis infernalis protracta ignis actione in genuinum pristinumque denuo redit argentum; uti ex *argenti ardentis* antea data descriptione satis adparet.

§. 265.

SALIA *alkalina* argentum ex solutione sua praecipitant: *sale alkalino fixo* dejecta, et ab adhaerente menstruo edulcoratione liberata luna sub *magistri lunae* nomine nota est: remanet in menstruo lunae priori *nitrum* ex acidi nitrosi, et salis alkalini adjecti connubio *regeneratum*, quod *lunare* quibusdam dictum

Etum fuit; meliori jure sub *nitri lunaris* nomine ipsae veniunt crystalli lunares: manifestum enim est, quum acidi vitriolici nil prorsum recludant, *vitrioli argenti*, aut *vitrioli lunaris* nomen, quo a LEMERYO, et ipso etiam BOERHAAVIO condecoratae fuerunt, minime eas mereri. Praecipitatum hoc ipsum argenteum per sal alkali fixum productum in debili etiam acido vitriolico nunc solvitur, quum tamen tanta prius requirerentur molimina, ut acidum hoc concentratissimum licet argentum forma metallica donatum recluderet: observationem hanc, a CL. MONNETO nuper propositam veram esse scio, accedere tamen, si dilutius fuerit acidum, lenioris saltim caloris debet auxilium.

§. 266.

NEGAVIT quidem CL. BRANDT ullam omnino per sal alkali volatile lunae ex acido nitroso fieri praecipitationem; contrarium tamen III. MARGGRAFIUS evicit. Praecipitavit etenim ope spiritus salis ammoniaci aquosi argentum, idque a spiritu alkalino solvi denuo, et majori, quam aurum, copia solvi vidit. Solutio haec argenti in spiritu salis ammoniaci praecipitabatur denuo ab acido phosphorico, non mutabatur a sale fusibili urinae; a spiritu salis, tum et a solutione salis communis denuo sub colore albente praecipitabatur. Acidum vitriolicum in ea nil mutavit, etsi punctum completum fuerit saturationis; adfusa tamen solutione salis communis, aut acido adfuso salis, illico subsequuta nunquam non fuit praecipitatio. Vidit praeterea *Vir celeberrimus*, argenti solutionem in alkalino volatili sale aëri expositam, aut calori, non uti cum solutione auri fit, praecipitari sponte, sed abacto demum sale volatili superfluo in crystallos elegantes abire, post exsiccationem in spiritu vini rectificatissimo, caloris imprimis beneficio, magna copia solvendas, exin

I 4

vero



vero spiritu nunc supersaturato pulcherrime in frigore crystallifandas.

§. 267.

Dictum antea fuit, argentum in sale alkalino fixo non solvi, dum forma donatur metallica; detexit autem denuo Ill. MARGGRAFIUS methodum, qua *solutio argenti* fieri posset *alkalina*. Tentavit omnium primo, an adfuso *oleo tartari per deliquium* argentum ex solutione sua praecipitatum resolveretur; verum intactum perstitit praecipitatum argentum, etsi major adfusa fuerit salis alkalini copia: in usum dein vocavit *lixivium alkalinum*, sanguine bovino combusto redditum *phlogisticum*, praecipitavit hujus ope argentum, et dejectum denuo vidit solvi; major tamen in auro, quam argento solutio successit.

§. 268.

TERRAE absorbentes calcareae argentum ex solutione sua pariter praecipitant.

§. 269.

PRAECIPITATUR etiam argentum, si solutioni in acido nitroso factae instilletur *acidum vitriolicum*, illico solutio tota albescit, ac flocculis albis copiosissimis opaca redditur. Fit sic praecipitatio simul, et metallum nunc excussum ab acido excutiente denno solvitur, dum hoc majori copia superadditum fuerit. Enascitur tum genuinum *vitriolum argenti*, seu sal metallicus, acido constans vitrioli et argento invicem junctis. Vitriolum hoc lunare in crystallos minimas jam fere concrevit, priusquam fundum adhuc vasis attigerit. Idem oritur phaenomenon, instillata in solutionem

tionem argenti nitrosam solutione quacumque falis medii, acidum vitrioli continentis. Fiunt in hac praecipitatione decompositiones duae, binaeque simul novae compositiones; deponitur scilicet nitrum lunare, et argentum jungitur acido vitriolico, a basi sua alkalina secedente; deponitur quoque sal vitriolicum, ejus acidum lunam acido nitroso eripit: oritur autem *vitriolum lunare* ex connubio *acidi vitriolici* cum *argento*; et oritur praeterea sal novus medius ex unionem acidi nitrosi cum basi alkalina, quam acidum vitriolicum prius inhabitaverat; atque *nitrum* quidem oritur *regeneratum*, si tartarus receptus fuerit vitriolatus, aut *nitrum cubicum*, si sal in usum vocatum fuerit *mirabile Glauberi*: habemus itaque in eodem casu adfinitatis duplicis reciprocae instantiam.

§. 270.

EAMDEM, uti acidum vitriolicum, et *acidum muriaticum* exhibet phaenomenorum syndromen. Acidum enim *muriaticum* sive sit purum, sive basi cuiddam alkalinae prius nupserit, substantiae praeterea omnes aliae, acidum hoc recludentes, v. c. butyrum antimonii, spiritus Libavianus &c. argentum ex acido nitroso expellunt, atque acidum sese argento nunc adjungit. Novum productum sub *lunae corneae* nomine in scriptis chemicorum notum est; *lunae* quidem, quum partem ejus alteram luna constituat, *corneae* vero, quod uti cornu diaphanum, scissile, et flexile sit. Dicam prius, quid circa ipsam praecipitationem, tum quid circa praecipitatum, ejusque reductionem notatundignum praecipue occurrat.

§. 271.

Ut praecipitatio melius succedat, et nitrosum acidum, et argentum in eo solvendum ex aequo debent



esse purissima. Haec diluatur aquae destillatae partibus 6. vel 8, et praecipitatio demum fiat vel spiritu salis ipso, vel solutione salis communis, cujus pars una in partibus tribus aquae fuerit liquata: praecipitans per intervalla non nisi instillandum est, et tamdiu exacte insistendum, donec nulli amplius floeci ad fundum vasis ruant. Hoc facto quieti totum detur, decantetur demum supernatans liquidum, aut *nitrum regeneratum* verum, si pro praecipitatione sal digestivum Sylvii, aut *nitrum cubicum*, si sal commune eundem in scopum receptum fuerit, continens. Sedimentum denique aqua frigida, atque calida demum aliquoties abluatur.

§. 272.

PRÆCIPITATUM hoc ab aqua bulliente parum solvitur, et ex aqua, cujus ope decoctio instituta fuit, interventus salis alkalini fixi nil omnino dejici *Cl. WALLERIUS* habet. Pondere excedit argentum ad experimentum sumtum; *III. MARGGRAVIUS* ex uncis binis argenti purissimi cupellati uncias duas, drachmas quinque et grana quatuor praecipitati obtinuit; quod excedens pondus acido unice salis adhaerentis debetur; *) adeo, ut uncia una lunae corneae quartam circiter sui partem acidi salis concentrati recludat, et in uncia una lunae corneae drachmae sex cum paucis granis argenti purissimi inhaereant. Minus erit pondus, si argento admixtum inhaereat cuprum, quum unicum non nisi tum ad fundum cadat argentum; cuprum autem in liquore

*) DIXIT quidem olim *BOERHAAVIUS* de luna cornea agens, esse calcem argenti subtilem, sale marino praecipitatam ex spiritu nitri, vel aqua forti; pondus autem ejus esse majus quam argenti adhibiti, una ferme quinta parte adcreta de salibus hisce —.

quore supernatante solutum maneat; vel, si tamen levis portio praecipitato adhaeserit, copiose adfusa aqua denuo inde eluatur: suadet inprimis MARGGRAFIUS, ut pro edulcoratione aqua semper destillata recipiatur, quum aqua vulgaris fontana a particulis calcareis raro immunis ex integro sit, harum vero interventu cupri quid facile praecipitari possit.

§. 273.

PRÆCIPITATUM hoc argenteum acido salis intime mistum in igne facile funditur, sed et fugacissimum in eo est, adeo, ut tum per tigillum penetret; tum in auras una cum argento avolet, quod ab eo fugare volebamus, acidum muriaticum. Frigefactum inter diaphaneitatem et opacitatem ambigit; flexile praeterea est, ductilitate quadam donatur; et, uti antea jam dictum fuit, cultro scindi valet.

§. 274.

ELUCET vero ex adlatis circa volatilitatem lunae corneae, non ex facili adeo reductionem ejus perfici posse; et ad hoc non sufficiunt diversae a variis Auctoribus propositae methodi; quibus, etsi salis acidum ab argento separaretur, hujus tamen aut major simul sit jactura, aut concinne minus tota operatio instituitur: Proposuit v. c. KUNCKELIUS, ut luna cornea cum partibus tribus plumbi granulati remisceretur, fundetur miscela in retorta, tolleretur superior pars, reliquum per cupellationem redderetur purissimum; rejicit hanc normam MARGGRAFIUS, quod plumbum cupri rarius expers sit. Nec satisfacit scopo reductio cum stanno, et regulo antimonii, ac ferro; quum operatio nec sit nitidissima, nec metalla illa purissima abs exceptione sint.

§. 275.



§. 275.

NE oratio longe nimis evagetur, methodos alias, lunam corneam reducendi, per sal tartari, per borracem, per cinnabarin &c. plus minusve bonas, et ab *III. MARGGRAFIO* historice indicatas, pertransibo silentio: methodum vero ab *ILLO* excogitatam optimam ipsius maxime Auctoris verbis enarrabo.

§. 276.

MERCURIUS curreus genuinum, ait, lunae corneae reducens est, non tamen sibi soli relictus, sed sali alkalino urinoso, seu volatili junctus. Vidit a spiritu alkalino fortissimo, ex sale ammoniaco et minio parato, abs ullo caloris auxilio lunam corneam fuisse resolutam. Miscuit tum spiritum sic dictum salis ammoniaci aquosum, ex partibus binis salis alkalini fixi, parte una salis ammoniaci, librisque tribus aquae confectum, cum luna cornea, atque eundem denuo expertus fuit effectum. Adfusis namque uncis quatuor spiritus hujus ejusdem ad drachmam dimidiam lunae corneae praecipitatae, lenis digestionis auxilio ex integro soluta luna fuit, et in refrigerato liquido crystalli enascebantur tenues, exiguae, in aëre libero colore caerulecente tinctae. Addito huic solutioni mercurio ea proportionis lege, ut ad unam partem lunae corneae sex venirent partes mercurii, altera die pulcherrimam enatam vidit arborem *Dianae*. *) Elota haec, et in mortario vitreo trita optimam et purissimam lunae subpeditavit amalgamationem, ex qua, mercurio per destillationem evocato, argentum remansit omni nota sincerissimum.

§. 277.

*) QUID sub arboris *Dianae* nomine veniat Chemicis, mox, ubi de praecipitatione lunae per metalla sermo erit, fiet notum.

§. 277.

EN jam totam ab *III. MARGGRAFIO* praescriptam pro reductione lunae corneae encheiresin: ex operationibus pluribus aliis, amalgamatione, destillatione, fusione, compositam: ideo, uti bene monet *CL. SPIELMANNUS*, inprimis praeferendam reliquis hanc lunam reducendi modis, quod hujus ope mox argentum purum obtineatur, citra ullam necessitatem, illud demum ab heterogeneis substantiis, quas sub operatione accepit, depurandi: addi potuisset, quod argenti reductio haec simul abs eo dispendio perficiatur, quod sub aliis operationibus evitari nequit.

§. 278.

OMNIUM primo itaque reducatur, inquit, ope calcis vivae mercurius ex cinnabari pura, et meliori, methodo usitata. Eluatur mercurius obtentus ab impuris omnibus fors adhaerentibus tamdiu, donec nitidissime splendeat. Conficiatur praeterea sal volatile salis ammoniaci forma sicca conjunctione partis unius salis ammoniaci, partiumque binarum cinerum clavellatorum, superaddito simul tantillo spiritus vini rectificatissimi; obtentum sal in vase vitreo exacte clauso adservetur.

§. 279.

RECIPIATUR his praemissis uncia dimidia argenti purissimi, ne admistum cuprum errorem in conficiendo dein calculo producat; solvatur in aqua forti since-ra ex nitro per oleum vitrioli expulsa; et, ubi venalis fors recepta fuerit, more solito antea praecipitata, proportionem antea adlata, solutum argentum praeceptis de-tur ope solutionis muriatici salis; dejectum, uti prius dictum



dictum fuit, edulcoretur: siccata demum luna cornea drachmas quinque grana sexdecim pondere aequabit, hinc uncia dimidia granis septuaginta sex ponderosior reddita. Luna haec cornea remisceatur in mortario puro vitreo cum unciis una et dimidia salis antea descripti volatilis salis ammoniaci sicci; exacte invicem hae substantiae terantur, aquae parum adjiciatur, ut consistentia pulculae tenuioris enascatur; intumescet miscela parum, et effervescentiam fere excitabit. Tritus per quadrantem circiter horae producto, adjiciantur unciae tres mercurii antea dicti, ex cinnabari obtenti, purissimi, cum pauca denuo aquae copia; tritus continuetur uti prius: post mediam horam miscela priscum induet colorem, et argentum amalgamate jungitur cum mercurio; drachma dimidia salis volatilis adjici poterit, quum in auras pars diffletur; tritus autem per horas aliquot continuetur, et major sensim adjiciatur aquae copia: prodibit sic amalgama optimum lunae cum mercurio, probe nunc eluendum. Hunc in finem adfundatur plus aquae, tritus producat, et aqua turbida decantetur in vitrum cylindraceum, idque tamdiu fiat, donec limpidissima persistat aqua, et pulvis nullus amplius separetur albens. Siccatum amalgama pondere aequabit uncias tres cum drachma dimidia. Pulvis antea dictus albicans demum collectus, edulcoratus, siccat, drachmas quinque adpendet.

§. 280.

MERCURIUS ex amalgamate ut evocetur, in retortam vitream purissimam illud inmittatur, reponatur haec in catinum arena repletum, adponatur retortae rostro excipulum aquam continens, et destillatio instituitur, igne per gradus eousque intenso, ut retorta obscure demum candescat. Mercurius obtentus, in omnem scopum optimus, elotus, siccat, duas uncias,

cias, drachmas binas cum dimidia, et grana circiter quindecim efficiet: in fundo retortae remanebit argentum purissimum; nulla omnino labe infectum; abs omni additamento fufum hoc exacte uncias duas, minus quatuor granis, pendet. Verum et grana haec ipsa quatuor deperdita nondum sunt, sed pulveri antea dicto albo inhaerent; pulvis enim hic sublimationi ex retorta, igne gradatim aucto, expositus, pulverulenti quid post se relinquit; addito borrace, et pinguedinis tantillo colliquefactum hoc duo cum dimidio, vel tria grana argenti denuo subpeditat. Sublimatum retortae collum obsidens mercurio dulci maximam partem absolvitur: si tritus hic fuerit, calida edulcoratus aliquoties, et sublimationi expositus, argenti quid adhuc relinquet, fusione in unam massam redigendi; sublimatum novum aequabit dein drachmas duas, et grana quadraginta, atque mercurii dulcis indolem habet. Notandum adhuc venit, operam omnem perditurum fore, si quis pulverem album, antea dictum ablutione ab amalgamate separatim auferre nolle, ac una cum mercurio per destillationem avellendo educi posse crederet; tum enim argentum non reducitur, sed sub forma lunae corneae remanet; acidum enim salis, quod cum mercurio vivo in mercurium dulcem transiit, argentum adgreditur, et lunam corneam denuo generat.

§. 281.

COMPENDIUM laboris fieri potest, jacturaque salis volatilis praecaveri, si loco tritus in mortario luna cornea sub proportionem antea proposita misceatur cum sale volatili salis ammoniaci, immittatur miscela in retortam, addatur major copia aquae, et requisita mercurii portio, adponatur tum excipulum, juncturae vasorum probe firmentur luto, ac destillatio ex balneo arenae tamdiu protrahatur, donec sal volatile in excipulum



lum transferit. Mistum in retorta remanens, in amalgama cum mercurio nunc mutatum argentum, teri debet exacte in mortario vitreo, aliove, minime vero in metallico; pulvis albus, seu mercurius dulcis, exacte elui, mercurius demum ab argento retortae ope separari. Obtinebitur hac ratione argentum etiam purissimum, nec sal volatile deperdetur; destillatio in hoc labore vices tritus gerit; partes enim argenti hic eadem ratione acidum salis, et sal alkali volatile relinquunt, ut cum mercurio conjungantur in amalga-

§. 282.

MERCURIUM vero ad reductionem hanc requiri, nec salis volatilis solius ope rem perfici posse, patet, si crystalli supra descriptae ex solutione lunae corneae cum spiritu salis ammoniaci enatae abs additione mercurii tententur; adparebit enim reductionem hac ratione fieri nunquam posse: nec reducitur luna cornea, si pars illius cum partibus binis, aut pluribus salis volatilis salis ammoniaci sicci mista, et in retorta ad candescentiam usque vasis deducta fuerit. Digestioni insuper *Cl. MARGGRAFIUS* lunam corneam cum solutione salis tartari exposuit, ac miscelam lunae corneae salisque alkalini fixi cum aqua et mercurio trivit, argentum tamen sic reducere nullatenus potuit. Nec felicior eventus sequutus fuit, praecipitatis quibusdam mercurii cum luna cornea junctis, eaque, uti nunc dictum fuit, ratione tractatis: ut adeo et mercurium, et sal alkalinum volatile ad reductionem hanc requiri clarescat adpareat. — Haec, ipsis plerumque *MARGGRAFI* verbis adducta, circa reductionem argenti ex luna cornea sufficere sane *Tyronibus* poterunt.

§. 283.

LUNA cornea cum *fritta* remissa, aut vitro contuso puro, fusionis ope vitrum colore hyacinthino donatum largiri, *Cl. WALLERIUS* nuper denuo notavit.

§. 284.

INSERVIT demum luna cornea examini aquarum mineralium, aliorumve fluidorum, ut, an acidum salis iisdem inhaereat, detegatur. Quamprimum enim solutio argenti puri in acido nitroso facta, liquidis examinandis instillata, acidum salis invenerit, argentum illico sub forma consueta floccosa in lunam corneam praecipitabitur.

§. 285.

DIXI prius, *acidum vegetabile* in argentum, forma metallica donatum, non agere; supersunt tamen viae, quibus acidi hujus imperio subjici nihilo fecius possit luna. Easdem primus denuo, cui tanta in chemicis debemus, indicavit *Ill. MARGGRAFIUS* peculiari diatribe, quae *de methodo facili solvendi argentum in acidis vegetabilibus* inscripta est, ac *scriptorum chemicorum Tomo primo* inserta.

§. 286.

MONET primum *Cl. VIR*, Auctores plures quidem in scriptis suis complexos fuisse formulas, argentum in acido aceto solvendi, inter quos inprimis occurrunt *OSIANDER*, *BORRICHIVS*, *KESSLERUS*, et *HENCKELIVS*; verumtamen, aut methodo ab illis proposita argentum purissimum plane non solvitur, aut taediosissimus requiritur labor, ut tantillum forsan re-

Pars I.

K

sere-



feretur: e. f. p. Methodo autem *Marggrafiana* argentum solvitur non solum in *aceto*, verum et in *succo citri*, et in *vino rhenano*, et in *salis acetosellae solutione*: quae sane debiliora adhuc aceto sunt acida.

§. 287.

SOLVIT hunc in finem argentum purissimum in sufficienti quantitate acidi nitrosi praecipitati: solutionem dilutam aqua purissima partibus 3 — 4. praecipitavit in pulverem eleganter aurantio colore donatum ope salis urinae essentialis, phosphori fontis primarii, suo loco in hoc opere latius descripti, soluti pariter in partibus quatuor aquae destillatae. Praecipitati obtenti, aqua destillata fervida exactissime edulcorati, ficcati, drachmam in pulverem subtilem redegit, immisit vitro angustiori orificio donato, adfudit ei uncias quatuor aceti, frigore concentrati, destillati, in balneo arenae digestionem, tum ebullitionem exposuit, calens liquidum filtravit, residuo aceti sex denuo uncias adfudit, eadem, uti prius, ratione operationem perfecit, abstraxit demum ex retorta vitrea solutum omne ad unciam usque unam cum dimidia; residuum hoc nigricante tinctum erat colore; filtratione flavescens obtinuit liquidum. Pulverem residuum flavicantem edulcoravit aqua fervida, ficcavit, ponderavit, scrupulum unum paucaeque grana desiderari deprehendit. Solutioni vero argentum revera inhaesisse vidit ex eo, quod solutione salis muriatici instillata illico dejecta fuerit genuina luna cornea; quod et praecipitatum, olei tartari ope factum, edulcoratum, carboni inpositum, flammae candela cannulae ferruminatoriae ope subiectum legitimam praeberit argenti massulam; quod demum ab inposita cupri lamina argentum forma sua metalli- ca dejectum mox fuerit.

§. 288.

DEIECIT et lunam ex acido nitroso per spiritum salis ammoniaci aquosum; edulcoratum praecipitatum pulchre solutum in aceto fuit. Voluit autem, ut solutio saturatio foret, nec tamen aceti magna adeo requireretur copia. Solutionem itaque argenti nitrosam dilutam pura aqua praecipitavit solutione salis alkalinii fixi puri, ex sale tartari albiissimo parati: solutionem sic obtinuit argenti saturatam ea ratione, ut unciae quatuor aceti per decoctionem susceperint drachmam unam argenti, in frigido liquido eleganter crystallisandi.

§. 289.

PRAECIPITATUM idem solvit et *succus citri* calens, non tamen ebulliens (in ebulliente etenim solutio non feliciter adeo perficitur, et turbida simul manet,) uti cupri demonstravit lamina, solutionis hujus ope pulchre inargentata. Idem et *salis acetosellae* praestitit solutio, et *vinum* denique ipsum *rhenanum*.

§. 290.

VIDEAMUS jam, per quaenam corpora argentura ex solutione nitrosa praeceps dari adhuc queat; ea tamen observata et hic, uti per partes reliquas omnes, lege, ut, quae phaenomena singularia magis adferunt, inprimis notentur, aliis intactis.

§. 291.

SOLUTIONEM argenti *metalla* varia, et *semimetalla* praecipitant, dum vel solutioni tepefactae laminae metallicaee inmerguntur, vel vero referata prius,



aut in minimas moleculas redacta metallica corpora solutioni argenti admiscentur.

§. 292.

CUPRUM solutioni dictae immersum argentum praecipitat; ipsum argenti excussi loco solvitur, solutio sensim magis magisque viridescit, et laminae cupri praecipitati floccis argenteis elegantibus obducuntur; unde et laminae agitandae subin sunt, ut argentum decutiatur, et menstruo nova cupri superficies objiciatur. Praecipitatum hoc purum satis argentum praebet, etsi quidem ab omni cupri labe immune dici tamen vix queat, inprimis dum diutius protracta fuerit operatio: auferri tamen maximam partem cuprum de novo potest, si praecipitatum hoc saepissime aqua eluatur, donec limpidissima haec redeat. Argentum per cuprum praecipitatum aceto non solvitur, quum praecipitatum hoc omnes dotes metalli jam habeat, et fusione in unam massam reduci facile queat. Ratio, cur argentum sic praecipitatum forma metallica decidat, ex eo passim deducitur, quod cuprum argento, prout praecipitatio fit, phlogiston suum ab acido nitroso extortum largiatur. Utuntur hac encheiresi in plurimis officinis monetariis ac docimasticis, pro separando cupro ab argento.

§. 293.

Ex praecipitatione argenti per cuprum aliam insuper utilitatem elicere norunt artifices. Utuntur nempe argento sic dejecto ad *inargentationem* quam dicunt *frigidam*, quum absque ignis auxilio perficiatur. Sumunt in hunc finem praecipitatum argentum *) remiscunt

*) PRAECIPITATUM hoc a Cl. Wallerio, tum et a Cl. MONNET *calcem* dici mirum videtur, quum calcis nomen tribui argento sic dejecto omnino nequeat.

ſcent cum aequali copia ſalis ammoniaci et muriatici, aut ſalis muriatici et tartari, miſcela inde orta fricant vaſa quae argento obducere volunt: monet Cl. WALLERIUS, abs omni addito ſale, folius praecipitati ope, rem eandem perfici ex aequo poſſe. *)

K 3

S- 294.

*) Cl. NEUMANNUS praefcripſit, ut ſumantur drachmae quatuor calcis lunae (argenti ſcilicet per cuprum praecipitati ex acido nitroſo) drachmae duae ſalis ammoniaci, nitri, ſalisque communis, et exactiſſime haec invicem miſceantur; alios artifices braſteolas recipere argenti tenuiſſimas, easque cum aequali copia cremoris tartari, et ſalis communis in unam maſſam remiſcere, addidit. In *Colleſtaneis chemicis Leydenſibus* formulam hanc *Le Mortianam* invenio: Recipe foliorum lunae unciam unam, ſalis (communis ſcilicet) uncias duas, pulveriſentur ſimul, et poſtea in crucibulo calcinentur, donec ſal decrepitatum, (*decrepitatio vero haec ante miſcelam cum argento optius fieri poſſet*) et crucibulum parum candefactum fuerit. Tum recipe pulveris huius calcinati partes duas, tartari, vel ejus cryſtallorum, partem unam, aquae communis quantum ſatis; coquantur haec ſimul. Dein instrumenta cuprea, prius optime depurata ignitione, et poſt ignitionem cum ſabulo, inmittantur, et coquantur ſimul per horam dimidiam circiter, et deargentabitur cuprum. Mentitur hac ratione deargentatum cuprum deargentationem aliam, quam Galli *argent haché* dicunt, et quam poſtea exponam; interim tamen per *argent haché* diutius argento obductum cuprum manet, quam quod deargentatione frigida veſtitur.



§. 294.

PRÆCIPITATUR argentum etiam per *mercurium*. Atque haec quidem praecipitatio majorem paulo adtentionem meretur, quum ejus ope elegans illa vegetatio producat, quae sub *arboris Dianae*, *arboris lunae*, *arboris philosophicae*, aut *vegetationis argenteae* nomine et in Physicorum collegiis, ubi curiositatis gratia plerumque exponitur, nota est. Dixi paulo prius *III. MARGGRATIUM* elegantem arborem *Dianae* obtinuisse, dum lunam reducturus corneam, solutioni lunae hujus in spiritu salis ammoniaci aquoso factae mercurii proportionatam admisceret copiam. Subpetunt tamen et methodi adhuc aliae, quibus elegantes hae vegetationes metallicaе confici queant.

§. 295.

METHODUS *arborem Dianae* conficiendi *Lemeryana*, teste *Cl. MACQUERO* pulchre semper succedens haec est. Solvatur uncia una argenti purissimi in sufficienti quantitate acidi nitrosi puri, non tamen concentrati: solutio haec diluatur in vase majori vitreo cum unciiis circiter viginti aquae destillatae, adjiciantur unciae binae mercurii, ac totum reponatur; elapsis quadraginta in circa diebus exerceat in superficie mercurii species arbusculae argenteae, ramificationibus suis ad vegetationem naturalem proxime accedens. Quum tamen operatio haec longe adeo protrahi debeat, donec arbor demum enascatur, *HOMBERGIUS* breviorē encheiresin proposuit. Fieri hunc in scopum debet amalgamatio frigida ex drachmis quatuor limaturae argenti purissimi, aut, quod melius est, bracteolarum argentearum, et drachmis binis mercurii. Amalgama obtentum solvatur in unciiis quatuor, aut sufficienti demum copia, acidi nitrosi purissimi, nec nimium con-

centrati, nec dilutionis; solutio misceatur cum libra circiter una et dimidia aquae destillatae, miscela concutiat, et in lagena vitrea epistomio vitreo munita adservetur. Dum nunc uti eadem volumus, arborem producturi Dianae, uncia ejus una infundatur vitro in apicem angustiore inferius terminato, adjiciatur dein portio exigua ad instar pisi amalgamatis auri, vel argenti, butyri ad instar mollis, vas tradatur quieti. Elapso pauco temporis intervallo ex molecula amalgamatis filamenta enascuntur exigua, celeriter magnitudine augenda, ramulos undique propellentia, ac formam demum arbuscularum minorum induentia.

§. 296.

SUASIT CL. WALLERIUS, ut solutioni partis unius argenti in partibus tribus aquae fortis factae, et partibus 9 — 12. aquae purae, aceti destillati, aut alcoholis dilutae partes 2 — 4. mercurii adjiciantur, miscela agitetur, ac moderato calori exponatur. Inveni tamen, methodum *Homborgianam* successisse melius, et aquam destillatam purissimam aceto semper praefero. Vidi etiam, vegetationem totam turbari, si aqua selenitem secum vehens pro dilutione recipiatur. Viridescere solet arbuscula, si argentum a cupri labe immune non fuerit: adspersa tum pauca dosi aquae regiae, acidive salis albescit, ac nivis adinstar dilabitur.

§. 297.

TRIA imprimis ad felicem tentaminis successum requisita CL. MACQUERUS adnotavit. Ut *argentum*, *acidum nitrosum*, et *aqua* sint *purissima*; ut *solutio argenti* magna *diluatur* aquae copia; quo sic inpediatur formatio crystallorum lunarium, a vegetatione illa longe diversissimarum; quo et inpediatur cita nimis



praecipitatio argenti, hoc enim facto symmetrica vegetatio turbaretur omnino; tertio demum requiritur, ut ante dilutionem in aqua *solutio argenti sit saturata*; quum alias pars acidi libera argento aut mercurio saturaretur, antequam praecipitatio adhuc fieret, unde vero tentamen eo diutius produceretur, quo copiosiori aqua solutio dein foret diluta. Notavit *Cl. BAUME* circa vegetationem ipsam arbusculae enasci saepius aciculas longiores, splendentes, in apicem acutissimum terminatas: phaenomenon hoc vidi, sed tum nonnisi fieri didici, quum solutio argenti aqua non sufficienter diluta fuerit.

§. 298.

NOTATU digna in hoc tentamine occurrunt varia: amalgama argenti cum mercurio molle ac unctuosum quasi est, arboris autem Dianae compages firmior: basis, ex qua arbuscula enascitur, opaca fit, nec splendet, aut parum non nisi, arbuscula autem laete nitet. Symmetrica praeterea est, et a crystallisationibus salium diversa haecce vegetatio; etsi quidem addendum simul veniat, certae adeo legi eam non esse adstrictam: diversitas inprimis dependet vel a quantitate mercurii solutioni additi, vel a dilutione majori minorive solutionis, vel et a diverso concentrationis gradu, quo solutio haec ante dilutionem cum aqua gavisita fuit; calorem et frigus atmosphaerae facere huc etiam quid posse docuerunt instituta hunc in finem experimenta; consistit ex iis, calore vegetationem accelerari, frigore retardari.

§. 299.

QUUM major sit, quae mercurium inter, ac nitrosus acidum intercedit adfinitas, quam qua nectitur ar-

gen

gentum cum acido hoc eodem, ruere hoc ad fundum ex solutione sua utique debet vera praecipitatione: forma vero metallica praecipitatum hoc instruitur, quum praecipitatum per metallicam substantiam fiat, atque compensatio intercedat phlogisti deperditi, ac restituti: quum vero ratione argenti major adsit copia mercurii, unitur et hic, una cum argento deorsum ruens, metallo nunc dicto. Ex unione hac mercurii cum argento arbulcula dotes plures acquirit: volubilitas mercurii argento cicuratur, ut corpus producat solidius paulo; argentum praecipitatum primum reliquas in menstruo adhuc inhaerentes partes ad sese adtrahit; fere uti evenit, dum molecula butyri minor lagenulae includitur, huic lac generosum adfunditur, et lagenula valide concutitur, ubi partes etiam butyraceae a molecula illa, magnetica vix non dote, adtrahuntur, et in massam majorem coguntur. Homogeneas autem partes communi lege in mutos tendere contactus, tum ex hoc phaenomeno constat, tum et ex instantiis plurimis aliis dudum est evictum. — De alia arborem Dianae parandi methodo inferius recurret sermo.

§. 300.

EXAMINANDUM nunc venit, quae ex diversorum *metallorum* unione cum argento exsurgant substantiae.

§. 301.

AURUM argento facile jungitur: Videri de hac unione poterunt, quae in *capite de AURO* fuerunt adlata.

§. 302.

ARGENTI unionem cum *platina* in *capite de PLATINA* videbimus.



CUPRUM cum argento lubenter etiam coit: miscellam hanc densitate incrementum, *Cl. KRAFT* et *GELLERT* notarunt. Aes Japonicum argento non multo maiorem tribuit firmitatem, quam aes fulvum ex Suecia, observante *Ill. MUSCHENBROECKIO*. Firmitas argento adcrevit maxima, dum aeris subquintuplum fuerit admistum. Miscela cupri cum argento specificam gravitatem maiorem acquirit, uti *Cl. GELLERTUS* per experimenta didicit, quam ex metalli cuiusvis proportionem suspicari quis deberet: quum tamen miscela cupri cum auro minorem sistat specificam gravitatem. Cuprum argento admistum colorem huius non cito adeo mutat, uti in auro facere adsolet, etsi aequales fere cuiusvis partes ad miscellam fuerint receptae. Cuprum argento dotes plures largitur, quibus in usus varios evadit aptius. Firmius enim sic evadit, durius, sonorum, et elasticum magis; ductilitas tamen argenti decrevit, quum veneri fuerit remistum; etsi argentum id commodi denuo lucretur, ut a vaporibus carbonum ductilitatem non insigniter adeo deperdat, quam dum purum vaporibus hisce objicitur. In usus diversos mechanicos argentum cupro varia proportionem sociatum aptissime recipitur, quibus obryzum, ob mollietatem inprimis, aptum adeo nunquam foret: parantur ex eo tum vasa innumera, aliaque supellex, tum ornameto magis cedens, tum usui. Parantur inprimis monetae; atque in his varia valde observatur proportio argentum inter et cuprum, tum ratione monetae ipsius, tum et regionum diversarum in quibus cuditur. *)

§. 104.

*) INSERUISSE hic non oberit fragmentum ex *Cl. SPIELMANNO* circa diversam hanc argenti et cupri proportionem.



§. 304.

Ex miscela auri, cupri, et argenti *metallum* enascitur sic dictum *corinthiacum*, quum Corintho per flammam absumpta, metallis nobilibus ditissima, rivi fluxerint metallorum, ignis vi invicem liquatorum. Pro-

por-

tionem. Pro argento ponderando, inquit, proprium ponderis genus adsumere solent artifices; dimidiam nimirum libram *Marcam* dicunt; hanc *Galli* in 8. uncias, unciam in 8. drachmas, drachmam in 3. scrupulos, scrupulum in 24. grana dividunt. *Marca* *Coloniensis*, quæ in *Germania* obtinet, 8. unc., uncia 20. *Anglicos*, *Engels*, *Anglicus* 32. grana *As*, vel *Aes* habet. *Belgae* *Marcam* in 16. *semuncias*, *semunciam* in 4. *drachmas*, *drachmam* in 4. *minimos*, *Pfenning*, *Nummum* in 2. *Chalcos*, *Heller* subdividunt. Hoc ponderis genus *Marca Nummularia*, *Pfennig-Gewicht* dicitur. Sed pondera idealia quoque a Chemicis adsumuntur; utuntur eis ad indicandam argenti, aut auri puritatem. Argentum purissimum in *Gallia* duodecim Denariis, *Deniers*, *Denarius* 24 *granis* subponitur aequalis; quot igitur granis minus 288. pronuntiatur metallum nobile, tot vilioris metalli continere, indicatur. Argentum, ex quo cudentur *Ludovici*, est ad decem denarios, et viginti grana cum uno et dimidio; illud argentum, ex quo *vasa Parisiis* parant, et quod *Argent le Roi* dicitur, est ad undecim Denarios, et decem grana; id quod infra sex Denarios est, dicitur *Billon*. *Argentum Argentoratense* tres partes sedecimas metalli vilioris recepit. *Imperiales* sunt ad undecim Denarios, et undecim grana, hinc $\frac{13}{288}$ ligaturae habent. Argentum, ex quo *vasa* parant in *Hispania*, est ad decem

De-



portionem dictorum metallorum diversam valde esse posse, hinc et metallum corinthiacum exsurrecturum fore diverso colore, aliisque dotibus praeditum, facile patet.

§. 305.

FERRUM argento sociatum quale mistum constituat, haecenus prorsum desiderari, *Cl. BAUME* monuit. Interim tamen ex aequali copia ferri, et argenti invicem fusis miscelam oriri metallicam, colore argento fere analogam, rigidiores vero, satisque ductilem, ab magnete adtrahendam *Cl. WALLERIUS* habet; et chalybs argento conferruminatur, et in adfinitatum, seu solutionum tabula *Cl. GELLERTI* arctiorem

Denarios et duodecim grana; in *Sabaudia* vero ad undecim Denarios et octo grana; *Austriacum* unam octavam partem metalli vilioris, id autem, quo in *reliqua Germania et Helvetia* utuntur, quintam fere partem recipit; est enim ad novem Denarios, et octodecim grana; quo et *Lotharingicum* accedit. *Germani* argentum purissimum ad sedecim *Lothones* subponunt; *Lothonem* in octodecim grana, granum in quatuor *quartas* dividunt: iidem argentum, quod infra dimidium sui ponderis de metallo ignobili recepit, *Pay*, vel *Pagament* adpellant.

Ut perfectius Schema hoc habeatur, *Spielmannianis* hisce sequentia *Walleriana* jungam notata —. Argentum, ex quo *vasa* et *utensilia* parantur in *Suecia*, ex mandato regio $13\frac{1}{4}$ lothones argenti puri continere debet, ubi $\frac{1}{8}$. minus relinquatur tamen libera; hinc in argento utensilium omni lothones $2\frac{3}{4}$ cupri continentur in *marca* argenti.



rem argenti cum ferro amicitiam videre licet, quam cupri cum metallo hoc sit nexus.

§. 306.

STANNUM et argentum fragilem constituit massam, ad speciem accedentem semimetallicam, non obtemperantem malleo: ratio hujus ex eo maxime dependere videtur, quod ab stanno argentum penetretur, ac dissolvatur; nam si diutius continuetur ignis, calciformis prodit substantia, calcem stanni referens, nec argentum immistum prodens; cum mercurio tamen in amalgama abiens: dos haec stanni insignis adeo est, ut vel ab ejus vaporibus, aut minima copia admista argentum ductilitatem suam jam deperdat. A stanno Anglico argenti augeri firmitatem vidit *Cl. KRAFTIUS*, et *III. MUSCHENBROECKIUS*; qui simul notavit: ab admisto stanno ea proportionem, ut partibus argenti quatuor jungatur pars una stanni, firmitatem oriri vix minorem, quam quae ab addito aere ad stannum excitatur; majori copia stanni in argento firmitatem denuo minui; fractam miscelam exhibere superficiem granulata, sed cum parvis granis; ab admista demum copia majori stanni argentum adeo reddi fragile, ut vix limari, vixque fundi queat; nihilominus tandem firmitatem maximam esse, dum ad partes quatuor argenti pars una stanni adjicitur; quod cum stanno Anglico non minus quam cum stanno Malaccensi, et Indico *Bancas* verum est. Ex luna cornea stannum eripit acidum muriaticum. Ex adlatis caeterum patet, miscelam stanni cum argento nullum subpeditare productum, quod usibus mechanicis foret aptum.

§. 307.

PLUMBUM cum argento abs tergiversatione jungitur. Densorem reddi miscelam *Cl. KRAFT* monet:
Miscuit



Miscuit etiam *Cl. MUSCHENBROECKIUS* plumbum purum Scoticum, et argentum sincerum; ac deduxit ex tentaminibus, plumbum infirmare argenti firmitatem: atque ideo ambo haec metalla mista nequaquam roborari; hinc et argento nunquam adjiciendum esse plumbum in usum quemdam mechanicum, vel domesticum. Miscela haec ad plumbum potius quam ad argentum ratione coloris accedit; ductilitas hic, non uti a stanno, destruitur; tinnientem dotem argentum perdit eo magis, quo major plumbi admisti fuerit copia. Argento sulphurato plumbum sulphur eripit.

§. 308.

MERCURIUS argentum minime respuit: instantiam antea jam, ubi de *arbore Dianae* ac *reductione lunae corneae* fermo erat, vidimus; nunc de conjunctione mercurii cum argento, quae *via sicca* fit, inprimis agendum. Mercurius itaque argentum suscipit, aut in bracteolas tufum tenuissimas, quod optimum est, aut in ramenta exigua limae ope conminutum. Argenti hujus pars una in crucibulo ad candescentiam usque incalcescat, huic adjiciantur partes sex mercurii purissimi probe etiam calefacti, materies rutabulo agitetur, tum in mortario teratur, donec argentum omne cum mercurio in amalgama legitimum transferit. Amalgama etiam cum argento ex solutione per cuprum dejecto parari potest.

§. 309.

AMALGAMATIS hujus dotes *Cl. WALLERIUS* sequentes recenset. Colore argenteo, consistentia molli donatur: incalcescit, effervesceit quasi, et expanditur, si bracteolae argenti cum mercurio misceantur; quod ex *Cl. MARGGRAFIO* prius editi, et *KUNCKELIUS*, ac



HENCKELIUS dudum adnotarunt; gravius est argento et mercurio, quæis constat, ante miscelam ponderatis; calori moderato, leniori, æquali, per aliquod tempus expositum, in vegetationem pulchriorem ipsa arbore *Dianæ* abit; (*Arborem Dianæ* nasci in extremitate ramulorum globulos aureos, pomorum adinstar, ferentem, si amalgama auro simul ac argento constans fuerit receptum, sigilla etiam pulchre amalgamati huic inprimi posse, *Cl. WEIGEL* observat;) expositum aëri libero, aut frigori lapidis in morem indurescit; igni, aut carbonibus ardentibus inpositum non effervescebat, aut strepitat.

§. 310.

AMALGAMA vero hoc ipsum non solum specificè gravius esse, quam ex legibus unionis esse deberet, (quod *Cl. WALLERIUS* observarat, uti statim dixi,) sed et gravitatem hanc ipsam superare gravitatem mercurii, etsi argentum levius illo multo sit, uti ex antea adlatis de gravitate metallorum specifica perspicui facile poterit, *Cl. GELLERTUS* deprehendit; amalgama tale grama æquavit 1367. quum eadem copia mercurii grana æquaret 1355½, fundumque mercurii illico petiit.

REJICI merito debet, quum et dispendiosa, et periculi non omnino expers sit, methodus, quam artifices varii adhibent, argento fuso mercurium jungentes facturi amalgama.

AMALGAMATE argenti ad deargentanda varia corpora metallica uti possumus; atque hujus ope paratur a Gallis sic dictum *argent haché*.

§. 311.

ANTIMONII *regulus* argento unitus specificè graviores exhibuit massam in experimentis *Cl. GELLERTI*,



TI, quam ex aestimato separatorum pondere sperare licuisset. Miscela minus ductilis exin fit. *Antimonio crudo* argento adjuncto, tum pars sulphurea metallo nubit novo, tum pars regulina cum illo coit, hinc argentum bifariam discerpitur. Ex unione argenti cum antimonio crudo enascitur *regulus* sic dictus *antimonii lunaris Dispensatoriorum*, quo carere certissime dudum licuit.

§. 312.

ZINCUM et argentum ductilem parum massam simul juncta constituunt. Massa haec eadem specificè gravior est ex observatis *Gellertianis*; fractura granula exigua obfert; color ad regulum antimonii accedit: fracturam asperam, colorem rubescentem, fragilitatem magnam de miscela argenti cupellati cum Zinco Goslariensi *Cl. Muschenbroeckius* adnotavit. Si partes 10. Zinci misceantur cum parte una argenti, miscela exponatur in crucibulo actioni ignis, uti in operatione cum floribus Zinci fieri solet, argentum omne una cum Zinco sublimatur in flores, eadem fere ratione, uti evenit, dum antea dicta copia auri cum eadem Zinci igni subicitur; argentum autem per hanc sublimationem non omnino mutatur.

§. 313.

BISMUTHUM cum argento gravitatem auctam producit: fragilis miscela est, colore inter bismuthum et regulum antimonii dubio. Bismuthum cum argento intime coit, ut non facile sejungi queant. Miscela ex anaerica copia bismuthi et argenti facta in tentaminibus *Muschenbroeckianis* a libris 95. in crassitie $\frac{17}{100}$; gravitas specifica 10, 7097.

§. 314.

§. 314.

REGULUM *cobalti* fusione cum argento conjungi non posse, verum secedere in diversa ab invicem strata, plures dixerunt Chemicis. Addidit vero his *Cl. GELLERTUS*: Miscela facta ex p. 2. cobalti cum p. 1. argenti, argentum partem inferiorem tenere; fieri tamen fragilius, colore griseo magis tingi, cobaltum vero magis albescere.

§. 315.


ARSENICUM argento etiam jungitur, parum tamen hoc ex connubio in argentum redundat commodi; dutilitatem etenim multum exin perdit; massa enata externe subflavescens, interne obscure grisea est. Sub caementatione argentum ab arsenico exeditur; igni validiori expositum, volatile ab eo redditur.

§. 316.

NICCOLUM denique argentum omnino respuere, una cum eo fusum in se junctum stratum secedere, ac vel mallei ictu separari dein posse, retulit *Cl. CRONSTAEDT*: notavit simul, substantias hasce binas metallicas nonnunquam ex lateribus sese mutuo contingere, quum alias mutuo sibi incumbant: concludi ex phaenomeno hocce posse, argentum et niccolum eadem donari gravitate specifica, *Cl. BAUME* pronuntiavit; verum in ipsius *CRONSTAEDTII Mineralogia* gravitas specifica argenti uti 11,091: 1000. niccoli vero uti 8,5000: 1000. assignata prostat.

§. 317.

AN vero purum sit argentum, docebunt: *lapis lydius*, argenteam maculam aut purissimam, aut plus
Pars I. L mi-



minusve rubentem exhibens, tumque ope *acuum decimasticarum*, simul adfrictarum, quatenus ignobilioris metalli portio admista sit, ostendens: *digestio* diuturnior *cum spiritu salis ammoniaci*, qui ab adhaerente cupro colore cyaneo tingitur; citius experimentum succedit, si in tenues bracteolas reductum prius fuerit argentum, de cuius sinceritate dubium oritur: *fusio cum nitro et borace*; si enim cuprum adhaereat, scoriae enatae viriscenti tinctae adparebunt colore: cuprum etiam argento immistum esse adsumitur, si laminae ferreae purae, politae, candenti adfrictum, macula rubente, vel nigricante omnino tinctum redeat: *solutio in aqua regis*, ab inhaerente, soluto cupro virens.

§. 318.

TANGENDAE veniunt adhuc nonnullae praeparationes, quas argentum ingreditur; paucis haec nunc inter *Succedanea* complectar.

§. 319.

HYDRAGOGUM argentum BOYLEI, aut *ANGELI SALEE* dicitur connubium nitri cum crystallis argenti, quorum utrumque solvitur in aqua pura, solutiones invicem permiscuntur, miscela evaporationi, crystallisationi exponitur; crystalli obtentae ficcatae includuntur vasi vitreo hemisphaerico, vas leniori calori exponitur, ne materies unquam fluat, sed sicceat solum, et fumos emittat; moveri simul crystalli debent, ut ignis actionem undique experiantur, et acidum diffusetur; ignis demum intenditur magis, non tamen ad fusionem usque. Obtinetur sic argentum magna parte acidi privatum, non tamen omni: nam sapore adhucdum instructum est amarissimo; drastringe purgans est in mi-

nori

nori dosi, et, si illius paucillulum ulceribus adponitur, effectus praestare, ut lapis infernalis; longe tamen blandiores, ipse BOERHAAVIUS fassus fuit: bene hinc addidit: cavendum a nimio usu, a nimis larga dosi: rodit semper, et labefaciat, ventriculum imprimis. Praeterea id ex praeparato hocce redundat incommodi, quod, ex se ipso jam infidum, perniciosius facile reddi queat culpa operatoris, acido non expulso sufficienter, specie relicta lapidis infernalis. In formula Maëtisiana addi debere solutioni lunarium crystallorum solutionem nitri nil monetur, sed illas unice resolvendas esse in rore majali, aut aqua pluvia destillata, solutionem crystallisationi denuo exponendam, crystallos enatas, siccatas usui reservandas praescribitur. Addi tamen a quibusdam crystallis lunaribus sal prunellae ea proportionem, ut pondere argentum aequet, eum in finem, ut maxima ex parte corrosivum crystallorum infringatur, LOVE MORLEY monuit.

§. 320.

TINCTURAE sic dictae lunares, cupri potius dici debuissent *tincturae*, nam ubique limaturam lunae digerendam esse video cum sale volatili urinae, vel salis ammoniaci, vel cornu cervi &c. *) tamdiu, donec massa, aut liquidum, aut tinctura caerulea sit facta.

L 2

§. 321.

*) Scio probe identitatem horum omnium; attuli solum, quum jam hoc, jam illud a diversis *Dispensatoriis* praescribatur: sed in quonam Dispensatorio (exceptis solum recentissimis) quaerenda erat doctrinae chemicæ cognitio? Optandum foret, ut in novis etiam *remediorum quae vulgus imprimis expetit*, non tanta adeo haberetur ratio; quam excusationem in multis *Praefationibus* video --.



§. 321.

SOLVI argentum ab *acido vitriolico* ex KUNCKELIO Cl. WALLERIUS retulit, si argento in acido nitroso soluto, exin per cuprum dejecto, edulcorato, siccato, duplum olei adfundatur vitrioli, miscela exponatur balneo arenae, et ignis per gradus intendatur. Mirum sane hic nil video; nam argentum ab acore vitriolico concentrato, ope caloris resolvi, antea vidimus; et in argentum adeo adtenuatum, quale ex menstruo praeceps datur, eo facilior acidi potentissimi erit actio.

§. 322.

RETULIT et ex JUNCKERO ignis violenti ope sublimatum rubrum generari, si solutioni argenti, in aqua forti calenti adhuc, mercurius adjiciatur, et oleum vitrioli miscelaque destillationi subjiatur. Phaenomeni hujus ratio assignari etiam poterit, dummodo attendas, phlogiston hic adesse, acidum vitriolicum et mercurium; horum vero ex unione prodire primo sulphur, tum et cinnabarim, hanc vero in altum sub colore rubro tolli aliunde notum est.

§. 323.

DEARGENTATIONIS *frigidae* conficitur species, si solutioni saturatae lunae in acido nitri sal ammoniacum, et tartarus, in pulverem redacta, adjiciantur, donec pasta exin fiat; ex hac formentur globuli, aut pastilli, igne exsiccandi, pastillis hisce vas cupreum, vel aurichalceum, saliua madefactum fricetur, tum igniatur, exstinguatur, idque bis vel ter repetatur. Monendum vero simul est, vasis firmitatem hac encheiresi alterari.

§. 324.

§. 324.

PHOSPHORUS *Memlerianus* paratur, miscela limaturae ferri purissimae cum aequali copia auripigmenti; miscela haec sublimatur, sublimatum teritur in mortario lapideo cum decem partibus crySTALLORUM argenti. Massa haec accenditur, si supra chartam effundatur.

§. 325.

SCOLOPHORICUM SCHULZII obtinetur, si creta solvatur in solutione argenti nitrosa, evaporatione omne humidum abigatur, residuum calcinetur, donec vapor flavicans adscendat, tum in vitro exacte claudendum: soli expositum semper nigrescit.

§. 326.


BEZOARDICUM *lunare* ex solutione lunae, butyri antimonii ope praecipitata, tum vero eadem ratione, uti bezoardicum sic dictum minerale paratur, tractata confici optime posse NEUMANNUS dixit: rejiciendum omnino praeparatum —.

§. 327.


Ex crySTALLIS lunae cum mica panis remissis *pilulas* nonnulli pararunt *lunares*: ex antea dictis fatis apparet, qualenam de his judicium sit ferendum.

§. 328.

DEPURATUR argentum ab adhaerentibus in externa superficie sordibus, si tartarus et sal commune portione aenatica remisceantur, adfundatur aquae sufficiens copia, et in hac eadem vasa argentea decoquantur,
L 3 quam



quam operationem Germani *Weissfieden* dicunt; tolluntur sic simul impura, et atomi cupri, argento admisti, per superficiem magis expositi eroduntur, scopis postea eo melius auferendi; unde argentum pulchre hac methodo depuratur. Rationem NEUMANNUS acido tartari imprimis adscripsit cuprum erodenti: constat tamen ex *Ellerianis* tentaminibus grana viginticupri fuisse versa in aeruginem, dum unciae quatuor salis communis cum libris quinque aquae in lebetе cupreo fuissent decoctae.



F E R R U M.

§. 329.

FERRUM, MARS (♂) *) metallum ignobile quidem, si rationem adendas, qua ignem fert, vel a menstruis addicitur; nobile autem, et ipso auro, et argento nobilius, dum utilitatem respicis, quae in omnes omnino ex ferro redundat, ac praeparatorum utilissimorum copiam, colore donatum cernitur, si politum fuerit, ex obscuro caerulescente et cineritio mistum; qui tamen in aëre libero non diu persistens est, sed obnubilatur mox, demum vero rubigine obducitur.

*) ♂. quodem idem aurum intime, sed magnam quoque partem aeris rodentis, at modo dimidio altero acrimoniae: quum dimidium modo signi aeris habeat: quod Alchemistae docent, observant Medici. Sane *aurum vivum*, vel *Philosophorum*, in chalybe latere una fere adeptorum sententia habetur, hincque adeo medicinam metallicam petendam, non ex auro ipso. BOERHAAVE.

tur, uti postea latius patebit: colores caeterum ferrum, uti cuprum, varios obfert, variis resolutum menstruis, aut ex his denuo datum praeceptis: rubigine exesum rufescit, in solutione cum sale alkalino fixo lateritium adparet, igne reverberii exustum rubrum, in acido nitri solutum granatinum fere, in acido muriatico saturate flavum, sub initium viridescens, in praecipitato per alkali phlogisticatum caeruleum, cum decoctis vegetabilium adstringentium nigrum, aut si proprie loqui velis, adeo saturate caeruleum, ut nigrum potius dici queat; in *coloribus encausticis* jam rubrum, jam fuscescens, jam et nigerrimum arte redditur. Praemittendum vero hic est, in subsequentibus, nisi contrarium expresse monitum fuerit, sermonem semper fore de ferro puro, quod vocatur *ferrum cusum*, *malleabile*: differentia siquidem intercedit inter ferrum *fusum*, *) ex minera sua eliquatum, sub malleo adhuc fragile, ferrum *cusum*, **) ductile jam et malleabile, ferrum *fragile candescens* ***) quod cusum candescens rumpitur, et ferrum *fragile frigans* ****) quod frigidum incudi inpositum malleum non fert. Ferrum autem ipsum *cusum*, jam fragile candescens, jam fragile frigans, jam et ductile ac malleabile erit, prout ab inhaerentibus heterogeneis minus, magisque depuratum, minus magisque bene reductum fuerit.

S. 330.

FERRUM bonum, malleabile in fractura colorem subgriseum, splendentem obfert, et particulis inter fibrosas, et granulofas dubiis quasi donatur. In exa-

L 4

mine

*) *Gusseisen.***) *Geschmiedetes Eisen, Stangeneisen.****) *Rothbrüchiges Eisen.*****) *Kaltbrüchiges Eisen.*



mine microscopico ferri *Cl. TILLET* porosum id magis adhuc esse cupro vidit, et cavernulis donari pluribus. Ferrum fufum in sua substantia particulis minimis, pyramidalibus, quatuor lateribus instructis praeditum esse, dixit *ZANICHELLI*, easque in tabula etiam expressit. Vidi, *SWEDENBORG* ait, ferrum, quod diu, et, ut putem, ultra septuaginta annos, sub terra in loco humidiori jacuerat reconditum, exesum, et fragilissimum, quumque frangeretur, in fractura instar marcasitae aquaticae adpareret, cum tessulis, et colore flavo nitente. Videantur, quae mox de *sulphuris* in ferrum actione dicentur.

S. 331.

GRAVITAS ferri *specifica* uti 7852. ad 1000. aquae passim adsignatur. Pluvialis aqua, *SWEDENBORG* refert, ad ferrum malleatum ponderat, uti 1000. ad 7817. alii vero per experimenta facta differentiam ponderum adinvenerunt ut 1000. ad 7645: alii ut 1000 ad 7914; alii ut 1000. ad 8000., alii ut 1000 ad 8166. quae diversitas tam aquis, quam ipsimet ferro, quod varii generis et ponderis est, adscribenda venit. *) In tentaminibus *Muschenbroeckianis* sequentes observatae fuerunt specificae gravitatis ferri et chalybis rationes: Chalybs laudatissimus probe emollitus uti 7, 7679., idem diu et valde cusus 7, 8955., idem mollis 7, 738., durissimus 7, 704. elasticissimus 7, 809. Ferrum cusum *Osemont* 7, 7633., emollitum 7, 6000., idem cusum diu frigide 7, 875., laudatissimum Germanicum insignitum (L) 7, 8076., Germanicum insignitum (B. R.) 7, 7876., Leodienfe 7, 6896., aliud Leodienfe 7, 6450., ex Suecia 7, 7653.

*) VIDERI poterunt, quae in *capite de AURO* circa materiem hanc monui.

7653., nudum tessulatum octaëdram 4, 333., cubicum idem 4, 4579., ferrum vetustate temporis in magnetem versum 4, 0451. Notandum enim est, non in ferro solum, sed et in reliquis metallis addendum simul esse, de quanam specie loquamur, dum metallum hac vel illa gravitate specifica donari adferimus; nec sufficit addidisse, de *purissimo* nos loqui, quum et in *purissimis* obtineat *diversitas*, prout ex hac vel illa orbis parte petita fuerint; patet hoc imprimis ex comparata gravitate diversarum specierum cupri. *Vide caput de CUPRO.* Pes cubicus ferri cusi ad libras quingentas octoginta communiter aestimatur; sed et hic obtinet *diversitas*, ex illico dictis facile perspicienda.

§. 332.


DUCTILITAS ferri magna est, uti ex chordis musicis ferreis, tum et ex ipsis capillitiis, quae ex huius metalli filis fabrefacta fuerunt, satis evincitur.

§. 333.

TENACITAS ferro ea est, ut filum unam decimam pollicis rhenensis crassum libras quadringentas quinquaginta sustineat, antequam rumpatur; communefato. In tentaminibus, cum machina *Muschenbroeckiana* klastica institutis, fracta fuerunt parallelepipedo tenuiora, quorum omnium crassities erat $\frac{1}{10}$ poll. rhenoland: ea ratione, uti in ferro suecico firmitas media, ex tentaminibus deducta, fuerit librarum 726. in ferro Osemont librarum 700., in ferro germanico librarum 755., in ferro germanico optimo librarum 740., in ferro germanico vulgari librarum 676., in ferro leodiensi librarum 723., in ferro hispanico autem ex Andalusia prope Ronda petita librarum 800. Quoniam, MUSCHENBROECKIUS ait, inter nonnullos

L 5

in-



increſcebat opinio, ferrum, quod clavis infervit, quibus ferreae ſoleae adſiguntur ungulis equorum, firmitatem majorem adipiſci in ungulis, ut poſtea ex his clavis firmiora fieri queant inſtrumenta, clavos ex ungulis extractos dedi fabro ferrario, qui ex iis confeſcit ſolida parallelepipedâ, quorum craſſities $\frac{1}{10}$. poll. uti quae ſuperius explorata fuerunt: firmitas unius fuit, ut modo fracta ſit a libris 780., alterum fractum a libris 650. comparans has firmitates cum prioribus, non invenio ſoliditatem increviſſe, et ideo inter ſabellas rumor eſt habendus, ferrum in ungulis equorum firmius, aut praeſtantius fieri. *) Tentavit MUSCHENBROECKIUS et firmitatem *Chalybis*: parallelepipedorum ad pericula haecce adhibitorum craſſities denuo fuit $\frac{1}{10}$. poll. rhenolandi: rumpebatur chalybs nobiliſſimus mollis a libris 1190., mediae bonitatis mollis a libris 1240., vulgaris mollis a libris 1080., optimus induratiſſimus a libris 1120., idem temperatus ut novacula a libris 1500., idem temperatus ut cultri vulgares a libris 1350. pericula tamen haec omnium rudiffima eſſe, ſubjicit *III* AUCTOR, ex eo, quod artifices celare ſoleant modos et artes, quibus in conſciendo chalybe utuntur, hinc addi non licuerit, qualisnam chalybs in uſum fuerit vocatus. Patet ex his, quid de *tenacitate* ſimul et *firmitate* ferri, aut chalybis adferri queat.

§. 334.

*) ADDUXI conſulto haec ipſis *III*. MUSCHENBROECKII verbis, quum et *Vindobonae*, et in *Sileſia* interplures artifices, fabrosque ferrarios errorem hunc adhuc vigere ſciam. Sic v. c. catenam pro adliganda bellua majoris aeſtimant ex clavis, ſoleisque ipſis ferreis equorum fabrefactam, quam quidem aliam, rationem obtexentes, quod *durabilior* futura illa ſit.

§. 334.

SUB malleo ferrum durius, firmitus, gravius, quin et magneticum redditur.

§. 335.

ELASTICITATE ferrum gaudet, multo vero major *chalybi* competit, atque dote hac substantias metallicas omnes longe superat; unde et omnium horologiorum, machinarumque spirales laminae, et elateres ex chalybe conficiuntur. Chalybis igne temperati densitatem, hinc diversam elasticitatem, respectu chalybis mollis uti 7809. ad 7738. III. MUSCHENBROECKIUS invenit.

§. 336.

A *magnete* inter omnia reliqua corpora naturalia ferrum solum adtrahitur, et magnetem ipsam denuo adtrahit: cujus dotis ope substantiis aliis intermixtum haerens ferrum facile detegitur. Miscelam ex parte una ferri, et partibus binis cupri adtractilem esse a magnete HENCKELIUS ait; quin et quadraginta octo partibus cupri partem unam ferri admixtam leges magnetis adhuc sequi in *novis Commentariis Petropolitanis*, Cl. LEHMANN retulit. Dixit quidem Cl. KHEIME in *Dissertatione de ferro*, hoc fors nimium dictum videri, interim vero experimenta instituta veritatem *Lehmannianae* thesios comprobarunt. A magnete adtrahitur miscela ex parte una ferri, et partibus tribus plumbi, observante Cl. WALLERIO. e. f. p.

§. 337.

ELECTRICITATI quoque tum propagandae, tum suscipiendae, ferrum adprime inservit, id quod limatura



tura ferri, qua actio electrica pulchre excipitur, et conductores, in summitate aedificiorum erectae perticae, ut ignis coelestis ex fractis nubibus in eas descendat, aedificiumque a fulmine praeservetur, pulchre confirmant.

§. 338.

FILUM ferreum, licet pro parte jacuerit in humido gramine, in sepibus, in solo recentemente arato, et 5700. pedes longum, electrico fluido breviori tempore quam $\frac{1}{4}$ minuti secundi penetratur, observante Cl. WATSON. Notavit autem MUSCHENBROECK virga ferrea ab igne ita candescere, ut scintillet, ne quidem tempore duorum, vel trium minutorum secundorum electricitatem in tubo vitreo, ad quinque vel sex pollices distante, relinqui superstitem. Rationes magnetismi acubus chalybeis electrico igne conciliati exposuit optime Cl. FRANKLIN in *supplemental experiments, &c. on electricity Part II.* ubi in epistola prima ad Cl. COLLINSON rem totam late exponit. *)

§. 339.

FERRUM aëris actioni expositum splendorem perdit, opacatur, *rubigine*, seu *ferrugine* sensim obducitur. Ferrugo haec altius semper ferrum penetrat; demum vero totum exeditur, et in massam, colore inter fuscum nigricantem et rubentem medio donatam, friabilem, dote metallica exutam, *crocus Martis* dictam, vertitur. Metamorphosis haec ferri in ferro, quod

*) REFERTUR ibi simul, navarchum WADDELIUM vidisse, fulmine polos acus magneticae ita fuisse turbatos, ut apex acus septentrionalis meridiei nunc obverteretur.

quod fragile candens est, citius, quam in aliis speciebus obvenit; limatura etiam citius, quam lamina ferrugine exeditur, quum in illa superficies maximae aëris actioni exponatur. Caeteris vero paribus ferrum in loco vaporibus humidis, acidis imprimis, referto, ocysime obducitur ferrugine. Narravit *Cl. HELL, Wardøhusi* vix brevissimo temporis intervallo aëri libero exponere sese potuisse instrumenta expeditioni litterariae dicata, quin rubigine et aerugine adficerentur; quum tota atmosphaera *Wardøhusiis* vaporibus muriaticis referta sit. Monnit *Cl. ELLIS* rubiginem ferri, quo in aere libero hoc obducitur, non tam aëri, aut vaporum humido, quam particulis salinis per atmosphaeram dispersis deberi, atque hac ex ratione rubiginosum celerrime reddi martem in insula *Barbados*, aliisque sub *Linea* positis locis: subiecit quidem, ferrum in locis ad septentrionem magis vergentibus non adficiendum adeo esse a rubigine, quum particulae illae ascendere in auras ibi loci adeo nequeant; observatio tamen *Cl. HELL* obpositum evincit. In genere tenendum est, aërem maritimum citius producere ferruginem, tum et aeruginem, quam quidem aërem telluris continentis, etsi posterior humidus etiam fuerit, quod et exemplo aëris *Ispahanensis* magis confirmatur, qui, notante *KAEMFFERO*, mitis adeo est, ut ferrum, madefactum licet, non obducatur ferrugine. Intercedere tamen queunt rationes, quibus et in aëre continentis mox enascatur ferrugo et aerugo; instantiam viciniae salinarum praebent. *)

§. 340.

- *) *SUSPENS*A addistantiam pedis unius supra nicotianam humentem lamina polita ferrea elapsis horis 36. rubigine obducta fuit. Exposita alia in cella, ubi centenaria bina fere sodae hispanicae in vase ligneo amplo, non oblecto haerebant; rubiginosa etiam intra paucos dies facta fuit.



§. 340.

PARARE solebant olim specioso sub titulo *croci martialis aëre*, aut *rore majali parati*, vel et *croci Martis aperientis*, aut *aperitivi*, ferri puram putam rubiginem. Lamina ferrea, LEMERY dixerat, si per multum tempus auræ roriferæ, vel humori roris matutini exponatur, exinde in ferruginem paulatimabit; ferrugine abrafa, lamina illa ferri iterum exponatur rori, quod continuetur, dum copia croci, siye ferruginis, sit collecta, quæ præparatio reliquis præferatur. Alii exponunt ferrum aquæ pluviae. — OBTINUERUNT sic labore diuturno præparatum, quod faciliori longe methodo acquirere, quo et carere in integrum tuto poterant.

§. 341.

COMMUNICAVIT cum Publico tentamina sua in *Philosophical Transactions Vol. LIX. No. 30. Cl. LANE* sub forma *epistolæ ad Cl. CAVENDISH*, circa solubilitatem ferri in aqua ope aëris fixi. Verumtamen, ut ferrum solvi sic certum est, sic et rationem solutionis non aëri fixo tribui debet, sed acido, cujus ope aër fixus ex aliis substantiis extricatur, una cum aëre in sublime raptò, aquæ communicato, uti *Cl. WEIGEL* bene monuit, et *Cl. FONTANÆ* tentamina, in dissertationibus de *aëre nitroso, dephlogisticato*, et *fixo* (quas nuper in germanicum ex gallico et italico traduxi) demonstrant: non abs jure hinc addiderunt *Cl. Auctores Commentariorum de rebus in scientia naturali et Medicina gestis Vol. XVIII.* recensionem suam: Monemus tamen, inter illa experimenta quaedam esse, in qui-

quibus solutio ferri acido forte subtili, ex materiis fermentescentibus exhalanti, adscribenda est. *)

§. 342.

QUODSI aqua ferrum saepius humefiat, ficeetur, aqua perfundendum denuo, in calcem ex rubro fuscam exsolvitur, uti paulo ante dictum fuit. Citius hoc fit, dum aqua salibus inpraegnata fuerit. Enascitur sic denuo ferri rubigo, *crocus Martis per irrorationem* dicta, a praecedenti nullatenus diversa.

§. 343.

ALIAM vero methodum excogitarunt, ferrum solvendi per aquam; ubi tamen *adenuatio* potius quam *solutio* ferri obtinet. Quodsi enim ferri limatura, non rubiginosa, fervetur in lagena exacte clausa, aqua destillata purissima ad aliquot digitorum eminentiam superadfusa, ferrum non quidem in crocum destruitur, sed liquidum nigrescit magis magisque; atque, si per longius tempus hac ratione adservatum fuerit, tota aqua concussa nigrescit atramenti adinstar, ob summe adenuatam ferri limaturam: adenuatio haec perficitur conquassatione violenta liquidi: adenuatum sic ferrum concussu vasis liquorem colore atro tingit, in quiete vero totum ad fundum denuo subsidet. Praeparatum hoc sub nomine *aethiopis martialis* in officinis notum est. Ferrum est, in minimas atomos divisum, proprietatibus tamen suis pristinis non spoliatum; adtrahitur

*) VIDERI etiam poterit Diatribe Cl. John PRIESTLEY, *Directions for impregnating water with fixed air, so as to give it the peculiar spirit, and virtues of Pyrmont-water, and other Mineralwater of similar nature* LOND. 1774.



hitur enim a magnete, ac in acidis pulchre resolvitur, quum verus crocus non in omni acido dispareat: ratio, cur ferrum in crocum hic mutatum non fuerit, ex eo dependet, quod aquae ope ab aëris contactu manferit immune, qui ad exactiorem destructionem metalli omnino requiritur.

§. 344.

PROPOSUIT autem nuperrime Cl. LE GENDRE methodum aliam parandi *aethiopem martialem*, eamque in *Gazette salulaire* Nro. X. 1777. ac in *Esprit des JOURNAUX* inferi curavit. Recipiatur, ait, pro lubitu quantitas limaturae et chalybis (*acier*,) lavetur exacte, ut fordes omnes adhaerentes, aut rubiginosae moleculae auferantur; injiciatur tum in mortarium ferreum, eique instillantur guttae duae tresve olei amygdalarum dulcium; miscela teratur per horam integram, adfundatur dein ea aquae purae copia, ut supra limaturam digitum unum transversum emineat. Hoc facto limatura teratur per plures dies abs interruptione ope pistilli ferrei: quodsi aqua triturationis ope nigro fiat colore tincta fuerit, adfundatur alia recens; si requisitum id sit, aqua ter, quaterve mutari poterit, pro ut majori minorive copia aethiopis cernatur gravior: adtendendum ad hoc probe est, si velis, ut operatio bene succedat; nam si triturationis diu nimis protrahatur, pulvis adeo dividitur, ut ferrum demum destruat, et nil nisi rubigo remaneat; detegitur hoc ex iride, quae in superficie aquae decantatae formatur.

§. 345.

PRAECIPITATA haecce omnia colligantur in recipiens majus vitrum, collo longiori donatum, ibique aqua parum superemineat pulverem, ut sic aëris arceatur

tur contactus interea temporis, dum novus paratur aethiops. Quum demum praecipitata omnia in uno vase collecta fuerint, et fundum petierint, aqua decantetur, eaque solum illius relinquatur quantitas, quae requiritur, ut in capsulam vitream effundi totum queat: inponatur haec balneo arenae, pro evaporatione, isque admoveatur ignis gradus, qui tangens capsulam digitos non offendat. Notandum praeterea est, adspergi debere praecipitatis, ex recipiente effusis, duas aut tres guttas olei amygdalarum dulcium pro quibusvis quatuor uncis; plures, si major pulveris fuerit copia. Additio haec olei prorsum necessaria est, ut sic ab adrosione rubiginosa aethiops praeservetur, dum sensim ad siccitatem usque deducitur; abs cautela hac, aër in pulverem hunc agere poterit, isque colore fusco, rubiginoso tingitur. Moveri, aut agitari materies, durante exsiccatione, non debet, quum oleum per totam illius superficiem expansum actionem aëris ab aethiope arceat.

§. 346.

COMPENDIOSIOR multo per hanc encheiresin red-
ditur praeparatio aethiopis martialis, quam per eam,
quae in *curso chemico* LEMERYO descripta fuit; et ob-
tinemus hac ratione spatio dierum quatuor majorem
aethiopis copiam, quam *Lemeryana* methodo intra sex
menses obtinere potuissemus. Aethiops noster easdem
omnino, uti priori ratione paratus, dotes habet; a
magnete adtrahitur, solvitur in menstruic acidis; et
exacte adeo, uti aethiops *Lemeryanus*, divisus ad-
tenuatusque est. *)

§. 347.

*) REMEDIUM hoc, AUCTORES *Gazette salulaire* sub-
jungunt, excellens nimium praë reliquis praeparatis

Pars I.

M

mar-



NOTATU digna observatio legitur in *Actis Academiae regiae scientiarum Suecicae*, Vol. XVII. circa metamorphosin, quam ferrum, in mari diutiusmersum, expertum fuit. Clavi enim ita fuerunt mutati, ac si filis tenuibus chalybeis forent contexti; ferri substantia rudiori erosa ex interstitiis, ac fluctuum ope elota, filamenta illa ferri mollioris firmitatem prae se ferebant, ac lima tentata speciem argenti mentiebantur; spata ferrea autem, argilla undique obducta, nullatenus fuerat mutata. In *Diario litterario Gottingensi* relatum pariter fuit, globos majores bellicos, plumbi adinstar emollos in mari fuisse. Ferrum in undis marinis abire

martialibus est, quam ut in publicum evulgari confestim non debeat; crocis martialibus praeferrere meretur, quorum ope curatio morborum saepius non perficitur; nidulantur illi haud infrequenter ob pondus, quo gaudent, in gyris intestinorum plicisque; tum vero aut producunt tormina, aut sensationem, saepe molestant, gravitatis ibi loci excitant. Rationibus his AUCTORUM *Gazette salutaire* addi debet alia insuper, eaque non exigui omnino momenti. Constat ex Chemicis, crocos martis, omni phlogisto destitutos, in acido vegetabili, quin et in acido nitroso, non solvi; sed acido demum muriatico melius patere: quo igitur pacto sperare possumus in corpore solutum iri; an fors adsumere deberemus habitans in recessibus viscerum acidum muriaticum, refractarium ferri crocum domans? qua fiducia exhibetur calx phlogisto privata omni, una cum mucro ventriculi, ac intestinorum in gravitantem abitura saburram, et malum subin auctura potius, quam levatura? —

abire in speciem molybdaenae *Cl. WALLERIUS* adnotavit.

§. 348.

CALORE ferrum *rarefcit* plurimum. In pyrometro novae inventionis vidit *Cl. MUSCHENBROECKIUS* fila metallica, tantum fusa, 6. pollices longa, in aqua ebulliente longiora evafisse hoc modo: Plumbum 164. gr., stannum 124., aes fulvum japanense 84. gr., aes fulvum barbaricum 81. gr., aurichalcum 92. gr., ferrum 73., chalybem 67.; quum vero metalla fuerant tracta per idem foramen, rarefactiones in aqua ebulliente fuerunt in aere fulvo 94., in aurichalco 106., in ferro 73., in plumbo 154., in argento 81. Expansionem ferri ad eam cupri *CASSINUS* invenit uti 10. ad 17., vel uti 27. ad 46., posito eodem calore. *Nob. Georgius JUAN* fequentia corpora, *MUSCHENBROECKIUS* ait, *) tres pedes longa, eodem tempore solis radiis in *Peru* expofuit, et mercurio in thermometro *Reaumurii* adfcendente decem gradibus, corpora extenta hifce fuerunt partibus, quarum centum efficiunt lineam pollicis: ferrum $13\frac{1}{4}$, chalybs $12\frac{1}{3}$, aes $19\frac{1}{4}$, aurichalcum 20. vitrum $3\frac{1}{4}$, lapis 2. Adjecit demum his omnibus *Muschenbroeckius*, inter metalla citiffime rarefieri stannum, fequi plumbum, tum argentum, aurichalcum, aes fulvum, tardiffime ferrum —. Quum vero haec omnia pendeant a varia figura pororum, et fabrica partium, quibus corpora facilius, vel difficil提高 ignem admittunt, eumque adtrahunt, vel repellunt; tum et a varia partium firmitate, cohaerentia; conformatione, porofitate, magnitudine, facile patet, in quavis etiam ejusdem metalli specie aliam

M 2

obfer-

*) ADDERE hic loci fimul haec omnia malui, in fequentibus capitibus ea folum citaturus.



observari debere ab eodem igne extensionem, incallescantiam, ductilitatem, fragilitatem e. f. p.

§. 349.

SUMSIT BOERHAAVIUS, ut resciret, an ferrum ignitum pondere augetur, parallelepipedon ex ferro optimo, libras quinque cum unciiis octo ponderis Austriacensis adaequans, dum frigeret adhuc. Posuit in foco carbonibus fossilibus large instructo, quos folle incendit eoque, ut ferrum, his ardentibus impositum, undique ignitum penitus candesceret. Ferrum hoc, sic fulgens ab igne, bene excusso omni pulvere, in bilancem exactam posuit, adpositoque ad alteram lancem pondere requisito ad aequilibrium, exacte libras denuo quinque, et uncias octo obtinuit; reliquit in bilance, donec frigeret prorsum: postquam autem viginti et quatuor horis ita reliquerat, reperit pondus igniti et refrigerati ferri, in tanta mole nihil prorsus auctum iuvinutumve fuisse. *)

§. 350.

FUNDITUR ferrum, notante *Cl. MORTIMER*, gradu caloris 1600. ut adeo summum, inter metalla reliqua, ignem requirat, quo fundatur. Incallescere autem, ex tentaminibus *Ill. BOYLE*, et instantiis quotidianis, sola percussione ferrum ita potest, ut frustum sulphuris accendere optime queat. In *actis medicis Vratislaviensibus* refertur, artificem quemdam artem calluisse, per quinque, vel sex percussiones mallei ferrum candefaciendi. Ferrum, *SWEDENBORG* ait, per mallei percussiones facile candescit, si in formam quadr-

*) REPETIT, eodem successu sequente, experimentum cum massa ferrea octo librarum ponderis.

dratam percutiatur, et super incudem percussiones fiant super latitudinem ejus, non vero super angulum aliquem; unde et illi quam optime facere hoc possunt, qui huic rei adfuerunt, ut fabri ferrarii.

§. 351.

Dum ferrum politum calori majori sensim, ac per gradus exiguos ad maximum usque incrementi exponitur, varii etiam colores in superficie enascuntur, inter quos caeruleus, indicus, aurantius inprimis eminent. Limatura ferri carbonibus candentibus, vel et flammæ candelæ inspersa vivacissimas scintillas spargit, *) quales et ex concussu chalybis cum pyromacho filice oriuntur, decidunt in posteriori experimento sphaerulae scoriformes; redigi sic ferrum in vitrescentem substantiam passim, et bene quidem dicitur, notandum vero, in scoriiis hisce non solum ferrum, sed et particulas, chalybis ope a filice abreptas, simul fusas contineri. Ferrum, ad candescentiæ albensis gradum deductum scintillas etiam emittit, crepitando abscedentes.

§. 352.

Quodsi aëris accessus a ferro candente arceatur, non mutatum sat diu persistit: aëre autem accedente, et in minores partes inprimis divisum, phlogistica parte privatur, in calcem exurit, quæ, pro diversa ignis actione, colores varios: rufescentes, rubros, subfuscis, nigricantes, nigros exhibet, atque hac ex ratione lateres cocti, argilla ferrum continente compositi, noto tinguntur colore. A ferro candente eadem ex

M 3

ratio-

*) Hanc ob dotem in ignibus ludicris ferri limatura aptissime adhibetur.



ratione uti a cupro (vid. *cap. de Cupro*) squamae calcis exustae abscedunt, quas nomine *balliturae ferreae*, aut *squamarum martialium* notarunt; squamae hae colorem nigricantem, in pollinem tritae dilutius nonnihil fuscescentem offerunt. Ignis varios gradus experta calx haec varios etiam indipiscitur colores. Dum a ferro nunc abscedunt, phlogiston omnem nondum deperdiderunt, quum a magnete partim adtrahantur. Exposuit *Cl. BAUME* cylindros tres ferreos, ex diversis tribus ferrariis officinis petitos, igni violento eidem. Primus calcem dedit, squamarum nigrarum speciem exhibentem; alter vertebatur in calcem dilutius fuscescentem, a tertio calcem obtinuit pulchre rubram, carmino, uti saltim ait, analogam.

§. 353.

Ex limatura ferri, calore ignis reverberii, paratur olim *crocum* sic dictum *Martis per reverberationem*, seu *crocum martis adstringentem*, pondere, uti plures chemici adnotarunt, auctum. Crocus hic, si exustus, uti a praescribentibus exigitur, satis fuerit, calcem sistit ferri, seu terram, ex qua et phlogisto ferrum componitur; in humoribus humanis non resolvendam —.

§. 354.

FERRUM malleabile sola fusione in ferrum fragile mutatur, nisi cussione denuo emendetur, cujus ope calx exusta pellitur ex interstitiis, et partes metallicaes in arctiores coguntur amplexus. Fusione ferrum pondere satis decrescit, quum nunquam non in calcem, et scorias pars abeat. Monuit autem *Cl. BRANDT* in *Actis acad. reg. scient. Suec. Vol. XII.* limaturam ferri, aut fluxu in docimasia ferri usitato, aut fluxu alio con-

convenienti, remissam, granum praebere inductile, ubi simul partes octodecim pro centumpondio deperduntur; hinc non exactissime scripsit JUNCKERUS, ferrum, quo saepius per carbones recte fundatur, eo melius ac tenacius fieri.

§. 355.

In igne violentissimo speculorum causticorum ferrum non persistit. Ante speculum causticum Leodiense solum clavum ferreum spatio triginta minutorum secundorum SWEDENBORG retulit. Frustum ferri, *Cl. BAUME* ait, vi speculi boni caustici funditur, ac intra minutum secundum vitrificatur in scoriam nigram; oblitus tamen fuit additionis, qualenam, aut quam ponderosum frustum adhibendum sit, ut intra determinatum illud tempus effectus dictus sequatur. In *actis Lipsiensibus a. 1697.* monetur, ferrum igni caustico subjiciendum esse debere tenue; sic enim braetam ferream excandescere momento, et parvo tempore a cono radioso quasi perterebrari, ut foramina plurima adquirat.

§. 356.

FERRUM ignitum, aquae frigidae immersam, durum rigidumque fit. Aquae contactum candens ferrum probe fert, atque hinc a cupro maxime distinguitur. *V. Cap. de Cupro.*

§. 357.

SOLVITUR ferrum in menstruis notis omnibus facilius, aut aegrius, hinc diversa nonnihil in quibusdam requiritur encheiresis. Videamus omnium primo solutionem ferri in *acore vitriolico*. Si acidum



vitriolicum concentratum, seu oleum sic dictum vitrioli ferri limaturae adfundatur, parum, aut vix aget acidum in metallum. Quodsi vero dilutum aqua recipiatur acidum, et calor simul accedat, vivacior jam exurgit solutio, menstruum valde incalescit, et vapores suffocantes, sulphurei, maxime elastici expelluntur. *) Vapores hi verum sulphur vehunt, ex unione acidi vitriolici, et partis phlogisticae ferri enatum.

Ad

*) NARRAVIT *Ill. de JACQUIN*, universitatis Vindobonensis decus, insequentem notatu omnino dignam historiam. Demonstrabat *Ill. Vir*, dum *Schemmizii* adhuc res chemicas publice profitebatur, auditoribus ferri in acido vitriolico solutionem; in vase vitreo colli longioris angustiorisque miscelam instituebat; emissum ex vase vaporem abs minimo periculo, sed debitis adhibitis cautelis, iterato accendebat. Finita sic demonstratione, vase, in quo solutio adhuc procedebat, candelaque sepositis, amanuensis (*Laborant*) vas clam sumsit, vaporum incensionem, detonationem imitatus fuit: quum vero, parum cautus, facta incensione orificium non sat cito pollice clausisset, vapores majori copia collecti simul et semel incensi, vas ipsum impetu maximo, horrendo fragore in millena frustra disjecerunt. Vestis *JACQUINII* a tergo ex integro ambusta fuit: vasis fragmina supra capita adhucdum praesentium (finitum enim jam fuerat collegium) quin tamen ullum laeserint, per fenestras volitarunt. Insigniter exin omnibus terrefactis videre placuit, an nullum in Laboratorio remanserit vasis vestigium; sed ne unicum quidem poterat ullibi inveniri: collum ejus firmiter manibus tenebat in angulo collegii stans, terrore vix non mortuus, pallidus, infelix experimenti imitator.

Ad flammam candelae accendi queunt; ac, si obturato valis orificio majori paulo copia colligantur, tumque remoto digito emittantur vicina candela, detonatio una cum inflammatione fat magna oritur. Vapores hi in vesica madida colligi, vesicae expansae fistula tabacariae cannulae adligari, atque hujus ope trans candelae flammam adigi possunt, ubi torrentem continuum igneum, non injucundo, sed securo, spectaculo exhibent; nam etsi, quod factum jam in experimentis *Cl. Esquire MAUD* fuit, ipsi accendantur in vesica contenti vapores per communicationem cum ardentibus extimis, et vesica ipsa tum disrumpatur, nullum tamen, praeter terrorem fors oriundum, instat periculum. Etsi vapores egredientes sulphur manifeste oleant, dicere tamen maluit *Cl. BAUME*, eos odorem singularem metallicum spargere, incensionem etiam phlogisticae parti ferri, sub solutione extricatae, non vero, Chemicorum aliorum in morem, sulphuri enato, adscripsit.

§. 358.

SOLUTIO ferri in acido vitriolico sub initium turbide flavescit, exin virescit, ac exposita calori in fuscum magis colorem tendit. Ad fundum plerumque valis deponitur sedimentum nigricans, quod, quum in prunis inflammetur, vaporem sulphureum spargat, et cum hydrargyro mistum cinnabarin generet, sulphur maximam partem esse, adseri poterit.

§. 359.

SOLUTIO haec aqua nonnihil diluta, per filtrum missa, ac evaporationi eousque exposita, donec ex nascentibus crystallulis aquae sufficientem copiam abactam esse constet, in crystallos concrevit eleganter

M 5.

viri-



virides, cubis, describente *Cl. DE L'ISLE*, compositas obliquangulis: aut cubis quorum sex latera aequales rhombos exhibent. Est *ferri vitriolum*, aut *vitriolum Martis*, aut *vitriolum viride* purissimum; ac *vitriolo ferri vulgari*, quale in *officinis* prostat, tum *vitriolo* sic dicto *hungarico* longe purius, quum in his vix non semper cupri labes admista haereat; hinc *vitriolum* hoc artificiale in usus chemicos, aliosque, ubi omni nota purissimum requiritur, eligendum, ac reliquis omnibus praeferendum omnino erit. Amplior, de *vitriolo martis*, et ad hoc spectantibus, mentio in *capite de VITRIOLO* habetur.

§. 360.

Acidum nitrosum pariter ferrum resolvit; solutio haec violenter satis perficitur, et vapores ruberrimi expelluntur, elastici adeo, ut vas obturatum in sexcentas partes mox disjiciant; quin et globus ferreus, in quo, firmiter clauso, solutio fuerit inclusa, vaporum horum vi disrupti, uti a pulvere pyrio, passim dicitur. Quodsi probam habere velis et limpidam solutionem ferri in acido nitroso, parcior, quavis vice, ferri copia erit injicienda, et nova non addenda, donec prior fuerit soluta, ferrum enim alias eroditur magis, quam solvitur, ac magnam calcis copiam ad fundum deponit.

§. 361.

In experimentis *Cl. MUSCHENBROECKIUS* in solutione ferri per *acidum nitrosum* calor a gradu quadragesimo sexto ad centesimum quadragesimum quintum usque ascendit, massam vero specie pultis nigrescentis obtinuit, ex quo adparet utique, solutionem violenter nimis fuisse peractam: adfudit etiam limaturae ferri

ferri in vacuo posita acidum nitri; ebullitio exorta est, fumis densis flavisque stipata, calor hic increvit a gradu quadragesimo sexto ad centesimum vigesimum usque, miscela autem rubiginosa, spissa, spumosa describitur. Vapores adscendentes elasticitate praediti erant ea, ut mercurium ad $4\frac{1}{2}$ pollices deorsum pellerent, in solutione ferri cum spiritu nitri Glauberiano caloris gradus determinari non potuit, quum thermometer illico dissiliat.

§. 362.

Solutio haec ferri in acido nitri sub initium, dum ferrum paucum adhuc solutum est, viret; saturata vero colore granatino saturato tingitur, et tenuis olei consistentiam fere acquirit. Ferri, aut potius terrae ferri pars, ex ea sensim extricatur, et ad fundum descendit, quod et adfusionem aquae efficitur. Singulare satis circa nitrosi aëoris in ferrum actionem illud occurrit, quod acidum hoc saturari Marte vix queat, dum enim solutioni jam factae novum ferrum additur, et hoc resolvitur, ac solutum prius croci sub forma excutitur, ut adeo *ferrum per ferrum praecipitatum* queat obtineri.

§. 363.

VAPORES exsurgentes ex dicta nunc solutione inflammabiles hactenus deprehensi non fuerunt, etsi vapores ex solutione ferri in acido vitriolico elasticitate aequent, si non superent: in solutione tamen vitriolica verum generatur sulphur inflammabilitati utique aptissimum; in solutione nitrosa phlogiston mutari sic videtur, ut incensionem aptum natum non sit. Crystallisationem solutio haec non recipit, sed in magma demum abit salinum, unctuosum, humidum ex aëre
in



in sese trahens : crystallos inde natus nondum vidi dixit tamen *Cl. ROME DE L'ISLE*, oriri crystallulos aciculares, sese invicem decussantes, adproximatas, Citatur in opere *de l'Isliano Cl. WALLERIUS*, eumque describere crystallos irregulariter quadrangulares ex nitrosa solutione obtinendas adferitur; expressis tamen verbis *WALLERIUS* dixit, crystallos exin obtineri *nullas* —.

§. 364.

NOTARI adhuc meretur, acidum nitri fortissimum parari posse, si ex ferro soluto deuo evocetur. Si limatura Martis, *HOFFMANNUS* ait, in aqua forti solvatur, et solutio dein ad siccum evaporetur, et materia, in retortam missa, igne primum leni expellatur phlegma, dein vero intensior adhibeatur, ascendit spiritus, qui aequae urens ac fortis est, ac oleum vitrioli. Acidum tamen hoc non ex solo sale ferri nitroso, sed et ex aliis metallorum in acido nitri solutionibus inspissatis adquiri valet.

§. 365.

In *acido salis* ferrum solutionem exhibet ex flavo viridem. Solutio haec vapores etiam expellit, multo tamen minores, quam qui in solutione vitriolica, vel nitrosa prodeunt. Adfudit *Cl. MUSCHENBROECKIUS* drachmas tres spiritus marini salis ad limaturae ferri drachmam unam; exiguum vidit, conspicuam tamen, effervescentiam calidam, solutio fiebat turbida, opaca, successu temporis subsedit metallum relicto spiritu satis limpidum; increvit calor a gradu quadragesimo septimo ad quinquagesimum septimum. Repetiit hoc experimentum in vacuo cum aequalibus eorundem corporum quantitibus; dedit tum ferrum magnam, et spu-

spumescentem effervescentiam, diu durantem, et multo plus metalli solventem, quam antea solutum fuerat; solutio nunc opaca, nigrescens erat; calor auctus etiam fuit, a gradu quadragesimo septimo ad septuagesimum adscendens, mercurius tamen, durante tota solutione non mutabatur. — Vapores ex solutione ferri muriatica adscendentes inflammabiles esse, ex *Actis Acad. reg. scient. Paris. Cl. BAUME* retulit. Secedit ex hac solutione, *Cl. WALLERIUS* ait, materies levis, indolis sulphureae, ferro pauco remissa; collecta haec, et aëri exposita flavescit; adfuso salis recente acido, in calore solvitur, ac solutionem ex rubro fuscā largitur, deponitur ex hac, intenso magis igne, elapsis horis aliquot, materies flavofusca; solutio ipsa sub initium flavens est, ac in acidum nitrosum partim convertitur. *MONUIT* etiam *GLAUBERUS*, ad formam olei abstracta solutione, et cum butyro antimonii permista, tum ex retorta loricata vitrea destillationi exposita, transire primo phlegma, et butyrum album, seorsim excipiendum, sequi flavum, et igne fortiori expelli rubicundum, foecibus residuis cum spiritu salis denuo solutis, ac solutione dicta methodo cum butyro illo albo tractata, tincturae coloratae rectificationibus ad majorem subtilitatem evehuntur.

§. 366.

SOLUTIO ferri muriatica cryсталlos veras non largitur, sed sal subvirescens in aëre deliquescent, in alkohole solubile sistit. Quodsi sal hoc ferri, ait *Cl. DE L' ISLE*, opē acidi muriatici concentratissimi conficiatur, uniendo nimirum partes aequales ferri, ac salis ammoniaci, miscelamque sublimationi exponendo; in ventre retortae massa remanet salina foliacea alba, vel ex lamellis exiguis, tetragonis, diaphanis, in aëre
Libe.



libero fufcescentibus, ac in deliquium abeuntibus compofita. *)

§. 367.

Aqua regis ferrum folvit; color folutionis flavefcens plerumque eft; ad fundum hic nunquam non praecipitatum quoddam ruit. Retulit *Cl. ZIMMERMANN* obfervata fingularia, circa folutionem ferri in aqua regia, fequentia: aqua haec regia compofita erat libra una fpiritus nitri, ac folutione unciarum binarum falis ammoniaci depurati, foluti in unciiis circiter duodecim aquae purae. Mifcela in retortam infufa reponebatur in locum frigidiorum, et ea folum ferri limati copia injiciebatur, quae abs incalcfcencia, ac effervcfcentia refolvi, ac excipi cuspide cultri poterat. Per duos fere dies protracta fic folutio, ac uncia folum una cum dimidia injecta fuit, exigua tamen quantitate in fundo remanente irrefoluta. Agitato tum vafe mifcela, feu folutio haec nonnihil effervcfcere coepit, atque eam ob rationem calori expofita illico fuit; fequebatur hoc faflo fpecies fermentationis, per diem circiter durans; fpiffior facla fuit folutio, nil tamen ad fundum dejectum. Per filtrum bis miffa reliquit terram ex albo flaventem, quae una cum carbonum pulvere igni expofita a magnete dein adtrahebatur; reli-

*) *MASSA* haec a *Cl. VOGEL* fic defcripta fuit: fubftantia, ait, in fundo remanens, colorem fufco-nigricantem obtinet, et loco frigido repofita, ex parte in liquorem fubfufcum, et adstringentem valde, refolvitur, quem *Oleum Martis* vulgo dicunt. *VOGEL Juff. Chemic. §. 566.* Subftantia haec eadem liquor *Martis ftypticus*, vel et *lixivium Martis* ab aliis dicta fuit; latiore descriptionem *V. in cap. de SALE AMMONIACO.*

liquum solutionis, quod filtrum transferat, limpidum, rubicundum erat, in vase vitreo aperto reponebatur, odorem gratum exhalavit; aqua tum dilutum, ac denuo repositum, idque per annos binos continuatum fuit; secessit sic ad fundum calx alba; aqua in auras acta pleraque remansit materies, oleosam, subresinosam obfrens consistentiam, in aqua non ulterius resolvenda.

§. 368.

SOLUTIO ferri in aqua regis crystallisationem non recipit, in sal cogitur, humiditatem ex aëre in se ferapiens.

§. 369.

SOLVITUR ferrum et in *acidis vegetabilibus* accedente calore. Inmisit Cl. BRANDT unciam semis limaturae ferri in uncias decem *spiritus aceti*, solutionem obtinuit coloris rubre brunei. Ferri limati, BOERHAAVIUS ait, recentis unctiae aceti stillarum accerrimi viginti uncias in phiala alta chemica adfunde, ebulliant simul in furnulo ligneo, spatio viginti quatuor horarum. Habebitur, postquam frigescentia quieverunt, liquor ruberrimus, valde stypticus, ingrate subdulcis, et simul spissior solutione cum vino facta. Haec colata, depurata, *Tinctura Martis adstringens*, ipsa vitra, quibus servatur, indelebiter fere tingit. Si residuae scobi novum, simile, acetum adfunditur, iterum tincti quid educitur, minori quidem copia, coloreque magis diluto, attamen ferratum. Tandem linquitur pars satis magna metallica in aceti liquore, porro dissolvi negans.

§. 370.



Ex Martis per acetum solutione crystallos dulces enasci jam JUNCERUS tradidit. Observavit circa solubilitatem ferri in aceto fortissimo concentrato *Cl. WESTENDORF* sequentia: limaturae martis purissimae drachmis duabus aceti concentrati unciae duae superfundebantur; in loco frigido bullulae jamjam adscendebant, et acetum colore subflavo tingebatur, absque ulla tamen incallescencia. Cucurbita ignis calori admota, motus internus vehementior reddebatur; et quum esset fortissimus, vapores adscendentes flamma candelae admota accendebantur, flammamque edebant subcaerulescentem, intra cucurbitam, usque ad materiae superficiem, penetrantem; nulla tamen crepitatione subsequente, verumtamen istud phaenomenon in loco solum obscuriori observari potest. Quamprimum acetum vim suam non amplius exserere visum est, istud separabatur. Solutio colore suo privata ferrum in forma lamellarum rubrarum ad fundum dimisit; quae microscopii ope crystallos repraesentabant, in aqua solubiles, eamque sanguinis rubore inficientes. Acetum, ob defectum aquae marte nondum saturatum, residuo ferri cum duplo aquae denuo superfundebatur; post digestionem frigidam per tres dies continuatam, ferrum praeter perpauillam terrae subflavae quantitatem, ex toto solutum erat. Solutio dulci gaudet sapore, verum non adeo adstringente, quo solutio acido minerali facta instructa est; color ab initio subflavus post aliquot horas rubicundissimus enascebatur, sed tamen pellucidus. Temporis spatio aliquid in forma supra dicta crystallina fundum petiit, colore tamen liquoris inminuto.

§. 371.

SOLUTIONE ferri in aceto utuntur et varii Mechanici: sic fabri lignarii, et coriarii hujus, et gallarum, aliorumve adstringentium ope colorem nigrum parant, aceto etiam ferrum disponunt, ut stanno eo melius tum obduci queat. Ut ergo Cl. BAUME gratis denuo dixerit, solutionem hanc non multum notam adhuc esse.

§. 372.

SOLVITUR etiam ferrum ab aceto, dum acetum evocatur ex cucurbita, cui alambicus cum inhaerentibus ferri bracteolis inponitur; acetum in excipulum ferrum solutum, uti ex colore flavo rubescente ac praecipitatione patet, transvehit.

§. 373.

FERRUM cum cremoris tartari saturata solutione decoctum solvitur, imprimis dum tenuissima ferri limatura fuerit adhibita; effervescencia hic non insignis adeo est, et solutio spissescit. Ex solutione hac filtrata cremor tartari partim secedit, notante Cl. WALLERIO, secedit autem non omnis, quum solutionis reliquum ex flavo virescat, et saporem vitriolicum linguae inprimat.

§. 374.

Ex solutione ferri per tartarum *tincturae* parantur officinarum *martiales tartarificatae*; *tartarus Martialis*, aut *Mars solubilis*; et *bullae*, seu *globuli martiales*. Ordine quodvis horum praeparatorum recensabo.



S. 375.

TINCTURA *Martis tartarifata* paratur sequenti ratione. *) Recipiantur vitrioli Martis, cremoris tartari, ana unciae quatuor, aquae communis librae sex; coquantur in vase ferreo sub agitatione continua ad magmatis spissioris consistentiam. Id tandem, aquae cinnamomi simplicis unciis sex dilutum, inmittatur in cucurbitam vitream, et suffundantur spiritus vini rectificati unciae octo. Digestione dein per aliquot dies peracta, filtretur et servetur Tinctura.

S. 376.

In codice medicamentario Parisino simplicior praescribitur norma, tincturam nunc dictam conficiendi. Recipiendae sunt unciae sex limaturae ferri non rubiginosae, libraque una tartari albi in pulverem comminuti; remiscantur haec invicem in vase ferreo, miscela humescit aquae sufficienti copia, ut massa exurgat, quae per horas viginti quatuor quieti exponitur, ut acidum tartari sic adoriri ferrum queat; adfunduntur dein pintae sex aquae purissimae, et liquidum per duas ad minimum horas ebullitioni committitur, agitando illud saepius, et aquam novam adfundendo, ut

evapo-

*) ADDO hic praescriptum *Pharmacopoeae Austriaco-provincialis*, cum quo convenit formula *Pharmacopoeae Danicae*; nisi quod illa coctionem ad magmatis spissioris consistentiam, haec ad siccitatem fere (quod sane vix non idem est) coctionem protrahendam iubeat: pro dilutione etiam illa uncias sex aquae cinnamomi, haec uncias quatuor exigit. Monetur deum in *Pharmacopoea Danica*, praestare, si loco spiritus vini adhibeatur liquor anodynus mineralis. Caeterum et verba conveniunt.

evaporatione abacta refarciatur: reponitur demum liquor, filtratur, et ad consistentiam syrupi tenuioris evaporatur; sub finem adjicitur uncia una alcoholis, ut arceatur mucor, quo alias facile obducitur. Monet *Cl. MACQUERUS*, majorem copiam limaturae ferri recipiendam fore, si tartarum saturatum prorsus Marte habere velimus; quo quidem et laboris totius fit compendium —. Singulare hoc in miscela hac ferri cum tartaro est, valde adeo in solubilitatem pronam esse, ut in aëre deliquescat, si ad siccitatem usque evaporata fuerit, quum tamen substantiae, quibus componitur, ambae in aqua parum certe sint solubiles.

§. 377.

TARTARUS martialis, Extractum Martis, Mars solubilis, ferrum solubile, aut *Tartarus chalybeatus* est ipsa in consistentiam spissiore, evaporationis ope, redacta solutio Martis per tartarum; colore subnigro donata, in aëre facillime deliquescent, et cum decocto gallarum, theae, aliorumve adstringentium, colorem producens nigrum. Donatur tamen hoc nomine et sal in crystallos concrefcens viridescens, aëremque magis ferentes, cujus praeparationem *Cl. SPIELMANNUS* addfert sequentem: tartari crudi partes quatuor, et limaturae ferri pars una coquuntur cum largiori aquae quantitate, per aliquot horas, in lebetè ferreo, liquor per filtrum trajectus, leni calore ad cuticulam evaporatur, et ad crystallisationem reponitur. Cum hac tartari et ferri miscela si digeritur spiritus vini, surgit *Tinctura Martis aperiens tartarifata* *ROLFINCII*; *LUDOVICI* autem pro sua tinctura limaturae ferri, *Martis vitriolum* substituit. Monet simul *Cl. SPIELMANNUS*, qui tartarum chalybeatum copiosiori ferro instructum desiderant, eos non male eundem inspifando



sando potius, quam crySTALLIFANDO parare debere: prius enim jam adtuli, partem tartari a solutione secedere. CrySTALLI illae a forma crySTALLORUM tartari non magnopere differunt, nisi quod viridescerent; componuntur siquidem ipso tartaro, intermistam ferri, phlogiston non omnino privatam, *) calcem vehente.

§. 378.

BULLAE, seu globuli martiales, boules de Mars GALLORUM, miscelam denuo designant limaturae martis cum cremore tartari, in consistentiam solidam redactam, et figura globulorum variae magnitudinis donatam: recipiuntur, praecipiente Cl. MACQUERO, partes binæ cremoris tartari in pulverem triti, ac remiscerentur cum parte una limaturae ferri non rubiginosae; miscerentur substantiae binæ exacte invicem; mistae immittuntur in vas terreum, aut ferreum, additur aqua, ut pastae tenuioris exsurgat species: agitur haec miscela nonnunquam, caeterum relinquitur, donec sicca fere facta fuerit; additur denuo aqua, et, uti prior vice, instituitur operatio, atque hoc tamdiu protrahitur, donec consistentiam et tenacitatem, sicca vix non facta, resinae mollioris exhibeat miscela; in formam dein redigitur sphaericam; globuli hi linteo includuntur; et dum iisdem uti volumus, in aqua tamdiu retinentur, donec fulvescentem haec indepta fuerit colorem —. Ex descriptione tota satis adparet, enasum hic speciem tartari martialis solubilis, a genuino tartaro martiali solubili ex eo capite solum diversam, quod diversa proportionem cremor tartari, et limatura martis hic recipiantur; quod vero requiritur, ut massa consisten-

*) Hoc vel solo colore crySTALLORUM virente jam comprobatur; cur ergo Cl. WALLERIUS crySTALLOS haec, tartarum ferrugine mistum desinivit?

stantiam retinere queat solidam, in deliquium alias
mox abitura.

§. 379.

Succi vegetabiles acescentes, et acidi alii Martem
solvere pariter queunt. Ferrum a *vino rhenensi* re-
cludi BOERHAAVIUS experimento demonstravit: ferri
communis, ait, recentis, nullo modo rubiginosi, sub-
tiliter limati, uncias duabus, in phiala alta chemica
admisce vini rhenani generosissimi uncias viginti qua-
tuor. In furno ligneo digerantur simul calore 200.
graduum, per tres quatuorve dies, saepe concutien-
do. Dein requiescant viginti quatuor horis. Super-
natans vinum nigrescens percoletur; erit sapore atra-
menti subdulcis, styptici. Residuo novum vinum,
eodem modo tractandum, adfundatur. Proditur qui-
dem ferratum vinum, at nullo modo conferendum
praecedenti: brevi enim id singulare ferro deest, abla-
tum per vinum separando potius, quam totum me-
talli corpus solvendo; est tincturae, non solutionis,
species.

§. 380.

TINCTURA Martis pomata, cydoniata officina-
rum huc etiam referenda est. *Tincturae cum succo*
pomorum, seu pomatae in Pharmacopoea provinciali
Austriaca haec habetur praescriptio: Recipe limaturae
martis partem unam, succi pomorum acidulorum par-
tes tres, stent per aliquot dies in digestionem, misce-
lam saepius agitando. Liquor tinctus per subtile lin-
teum coletur, et novus limaturae restanti adfundatur
succus, digestionem, ut prius, exponendus; hac ope-
ratione eousque pergatur, donec nil amplius de Mar-
te solvatur. Tandem omnes commisceantur liquores



Marte inpraegnati, evaporent ad medietatem et ultra, ut tinctura concentratior evadat. Tum recipiantur hujus tincturae partes sex, spiritus vini pars una; commista digerantur parumper, tandem filtretur et servetur tinctura.

§. 381.

EXTRACTUM autem *Martis cum succo pomorum* ut fiat, tinctura nunc descripta evaporet ante spiritus vini additionem in debitam extracti consistentiam, quod sic servatur usui. Plures aliae similes tincturae Martis cum succis diversorum fructuum eadem lege parari poterunt.

§. 382.

FERRUM ab *sale muriatico* solvi, ex iis jam notum est, quae antea, dum de *solutione ferri in aqua marina* et in aëre maritimo fermo erat, fuerunt adlata: instrumenta ferrea quaevis, sali communi immersa, rubigine facillime obducuntur.

§. 383.

SAL *ammoniacum* ferrum solvit tum *via humida*, tum et *via sicca*. Solutio siquidem salis hujus merca decocta cum ferri limatura colorem offert ex fusco rubentem, et sapore adstringentissimo donatur; manifestis ferri soluti indiciiis.

§. 384.

VIA *sicca* ferrum denuo solvitur. In hunc finem miscela ex salis ammoniaci, et limaturae ferri partibus aequalibus, exponitur sublimationi eadem ratione, uti,
dum

dum sal ammoniacum purum sublimatur, fieri solet; obtinetur sic sublimatum coloris crocei, ac ex flavo ad rubrum tendentis; obtinentur veri *flores ammoniaci salis martiales*: notandum vero, quod simul sub initium prodeat liquidi flavescentis, alkalini, volatilis pars, quae ipsa mero spiritu salis ammoniaci, ferro leviter inquinato absolvitur. Prout major calor adhibetur, tincti etiam saturatius flores adscendunt: colores pulchriores etiam plerumque enascuntur, dum minera ferri, quam dum ferrum ipsum ad experimentum recipitur: unde et lapis haematites pro conficiendis floribus ammoniaci salis martialibus maximam partem recipitur. *) Flores obtenti vase siccò, probe claudendo, illico excipi debent, alias enim confluunt, adtracto ex aëre humido, in liquorem flavum, subpinguem, austerum, *oleum Martis* dictum, ex quo insignis portio ferri denuo subsidet, in tale unctuosum liquidum confluit et caput mortuum in fundo vasis remanens, ex fusco rubram, saporis austerissimi; liquamen hoc autem saeculenti magnam partem simul vehit, quod una cum sale et subtiliori parte metalli raptum in sublimine non fuerat.

N 4

§. 385.

- *) In *Pharmacopoea Austriaco-provinciali* florum horum praeparatio sic praescribitur: Recipe salis ammoniaci, lapidis haematitae partes aequales; tusa in pulverem commisceantur, inmittantur in cucurbitam vitream, et inposito capitello instituat sublimatio in balneo arenae. In principio prodit parva portio liquoris alkalini volatilis; qui, si lubet, lagenula ad rostrum capitelli adpena excipi potest. Sequuntur flores varie flaventes, qui, frigefacto adparatu, tollantur, et in vitro exacte clauso servantur.



§. 385.

CUR autem in sublimatione falis ammoniaci cum ferro simul et obtineatur alkalinum fal volatile, non adeo patet; propter adfinitatem quidem fieri minus videtur, quae intercederet major inter acidum falis et ferrum, quam inter acidum hoc ipsum et alkali fal volatile; cur enim non decomponeretur fal ammoniacum totum? sufficiens utique huic effectui praestando adforet metalli copia. An subtilior solum pars metalli jungitur fali ammoniaco, et reliqua, magis terrea, fugando partim alkalino fali inpenditur?

§. 386.

FLORES ammoniaci falis martiales ficcissimi, cum alkohole puro digesti, tincturam, BOERHAAVIUS ait, dabunt satis largam, auream, metallico sulphuream: faex vero residua, alkoholi nupta, similem exhibet.

§. 387.

NITRUM candens cum injecta ferri limatura vivide scintillat: quam ob rationem et in ignibus ludicris limatura ferri adhibetur. Sub detonatione hac nitrum vertitur in fal alkali, atque sic resolvit ferrum; hinc ferrum non tam per ipsum nitrum, ceu fal medium, sed per fal alkalinum ex fale medio nunc enatum solvit. Si partes aequales nitri, JUNCERUS refert, et ferri limaturae in tigillum candens inmittantur, et facta detonatione massa cito excepta elutrietur, aqua adfusa haec saturate violaceo colore tingitur. Si massa statim, ubi detonatio quieverit, in mortario calefacto teratur in pulverem crassiusculum, et loco humido, ut aequaliter humescat, exponatur, tum elutriatio violacei

lacei coloris felicius succedit. An non violaceus color hic debetur particulis tenuissimis rubris croci ferri, quae cum particulis caeruleis ferri in speciem caerulei berolinensis, (alkalino sale phlogistica parte dotato, et ferro ipso constantis) mutati, uniuntur, atque sic eadem vix non ratione colorem violaceum constituunt, uti fieri solet, dum purpura mineralis cum colore caeruleo smaltae conjungitur? favere videtur conjecturae, quod massa facta detonatione cito excipi debeat, ne scilicet phlogiston illud destruat: certum sane est, quod color caeruleus, aut violaceus, producat nullo, dum calcinatio nimium fuerit protrahita.

§. 388.

FERRI per *sulphur* solutiones optime descripsit BOERHAAVIUS. En ejus verba: Limaturae ferri, florum sulphuris recipe ana unciam unam; adcurate, diutere in mortario vitreo, quo diutius, eo rectius; calefcent, olebunt. Dein pollinem subtilem coque in aqua, spatio semihorii, decoctam aquam effunde, cola, serva. Residuum iterum sic tractato. Aquas omnes collectas, atque atramentosi quid sapientes, inspissa. Reperietur aliquid vitrioli ferri purissimi.

§. 389.

ALIAM talem ferri sulphurisque miscelam, rite paratam, ad uncias octo, cum aqua depse, ut pasta fiat crassa. Hanc in vase fictili arte comprime. Repone. Incipit brevi, sponte, calere, aestuare, fervere, emitte fumos, tandem et saepe ignem concipere, Ubi deferbuit impetus, reperies mutatam materiem, inque massam conversam aequabilem. Hanc, adcurate contritam, coque cum aqua, ut in priori casu, elicies



cies vitriolum ferri quam purissimum, pulchre medicatum.

§. 390.

SULPHURI ad ignem fuso intinge virgam ferream aliquamdiu, evadet calcinata, friabilis, pars immixta. Si eidem fuso sulphuris limati ferri tantumdem inspergis, calcem obtines ferri. quae trita dein fere similia dabit.

§. 391.

FERRO ignito illitum sulphur facit stillare mox guttas metallicas calcinatas, quae contritae similes calcem dant.

§. 392.

PATET itaque ex his abunde, sulphur quavis ratione cum ferro conjungi, hoc resolvere, atque cum resoluto vitriolum largiri optimum: patet hinc, cur ferrum, lithanthracum, sulphur majore copia vehementius, igni expositum, insigniter destruat.

§. 393.

FERRUM cum acore vitriolico junctum aestum magnum producere, vapores adscendentes inflammabiles esse, et verum sulphur gigni, antea dixi, dum de *solutione ferri in acore vitriolico* egi; mirum hinc non est, calorem, intumescantiam, explosionem, si miscelae talis major copia sub terram defossa fuerit, et ipsum vivum ignem produci. Tentamine hoc ipso usus fuit *Cl. LEMERY*, ut exponeret genesin terraemotuum. Ollam majorem tempore aestatis miscela pastacea sulphu-

phuris conminuti, limaturae ferri, et aquae librarum quinque replevit; ollam hanc linteo contextit, in terram infodit, et superingessit terram ad altitudinem ulnae dimidia, elapso octo vel novem horarum spatio, intumescere coepit humus et incallescere; prodierunt simul non modo vapores sulphurei, sed et flammae igneae, quae rimam prius factam dilatarunt, ac terram pulvere flavo nigricante notarunt: terra sic satis diu incaluit; quum effoderetur rursus olla, reperiatur pulvis iterum niger: experimentum succedere melius tempore aestatis, quam tempore hyemis HENCKELIUS monuit.

§. 394.

CROCUS, qui ex caementatione ferri cum sulphure exurgit, speciali nomine *crocus Martis sulphuratus* dictus fuit.

§. 395.

HEPAR *sulphuris* ferrum etiam resolvit; cum hepate hoc ferrum fusum pars in scorias recipitur ab hepate soluta, major autem sub scoriis in unum colligitur; ut adeo sulphur ipsum majorem vim in ferrum exferere videatur.

§. 396.

OXYGALA, *lotium* ferrum rubigine inficiunt, si diutius eidem adhaerere cogantur.

§. 397.

OLEA ferrum non adeo, ut cuprum adficiunt; sed a rubigine potius praeservant, quum vernicis adinstar illud



illud obducant, et ab aëris liberi accessu tucantur. Ut scloporum, qui diutius adservantur, superficies interior a rubigine praeservetur, tubum totum sebo vervecino liquefacto replendum esse cum successu suadetur.

§. 398.

VIDEAMUS nunc ferri solutiones in *salibus alkalinis*.

Si ferri limatura remisceatur cum *sale alkalino fixo vegetabili*, pars resolvitur, atque id jam antea patuit, ubi ex *Cl. BRANDT* retuli, jacturam fuisse factam sat insignem, dum ferrum cum sale alkalino repetito fundetur. Abit ferrum sic in formam scoriarum, quae in aqua sunt solubiles.

Si limatura ferri, *Cl. WALLERIUS* ait, humectetur oleo tartari per deliquium, calori dein exponatur, donec siccetur, oleo tartari tum denuo humectetur, exsicanda denuo, atque hoc repetatur saepius, massa demum decoquatur in aqua, obtinebitur *ferri per sal alkali fixum solutio*.

§. 399.

ALIAM autem methodum excogitavit *STAHLIUS* ferrum solvendi per dictum sal. Hanc ex *STAHLIO* ipso referre lubet. Recipe cineres clavellatos, adfunde illis tantum aquae calidae, ut solum dimidia illorum pars solvatur; quod clarum est, filtretur. Verbo: sit solutio alcalina saturata. Iam solvatur ferri parum una vice in bona aqua forti, cui per vices iterum inponatur pauxillum, donec placida hujusmodi solutione aqua fortis saturetur, et ultimam portionem, v. g. fili chalybei, intactam relinquat. De hac solu-

tione

tione instillentur aliquot guttae liquori illi alkalino; cadent hae ad fundum, sed mox spumescendo, nempe congressu acidi cum alkali, ad superficiem emergent: ubi agitatione in latifundium liquoris alkalini repulsae statim efficient, ut illae ab acido per aliquas particulas alkalinas depulsae particulae ferri a reliquo alkali solvantur. Quae itaque instillatio et coagitatio tamdiu continuari potest, donec alkali illud tanta quantitate ferri saturatum sit, ut saturatissimum sanguineum colorem inde contraxerit. Sic igitur liquor hic duplicem substantiam continebit; videlicet nitrum, ex aquae fortis et alkali sufficiente portione regeneratum; et alkali, quod desertum ab aqua forti nunc ferrum inhibet. Unde quoque, si aqua fortis concentratior adhibita sit, aut de solutione ferri aliquid exhalaverit, et inprimis inhibitio in alkali frigido tempore fiat, aut statim in locum frigidum reponatur; coalescit mox bona portio nitri in crystallos, sed propter saturatum reliquum liquamen teneras, quae tamen deinde in pura aqua solutae, et de novo crystallifatae alius nitri more, spissiores evadunt. Caeterum hinc etiam sincerior erit solutio ferri alkalina.

§. 400.

OBTINETUR itaque dicta nunc methodo *tinctura martis alkalina* STAHLII. Observavit autem circa tincturam hanc Cl. MACQUERUS, tum et Cl. BAUME, melius longe, quin certissime fere, fieri solutionem hanc ferri per sal alkali, dum solutio ferri in acido nitroso recipitur non saturata adhuc, sed levius non nisi viridescens, et superabundanti nitroso acido constans. Monet tamen ipse Cl. MACQUERUS, plurimum dependere successum tentaminis a diversis circumstantiis una concurrentibus, v. c. a diversa conditione ferri in acido nitroso resoluti, a majori aut minori copia phlogisti



phlogisti, quo gaudet alkali sal, ac fors ab aliis rebus plurimis, nondum detectis: monstravit enim *Cl. MACQUERO Cl. MARGES*, solutionem ferri in acido nitroso saturatissimam, profundo colore donatam, cujus ferrum optime solvebatur ab alkalino sale, quin ullus accederet calor; siue solutio infunderetur alkalino sali, siue sal alkali instillaretur solutioni dictae.

§. 401.

DEJICITUR ferrum hoc solutum in acido nitroso, ereptum huic, ac denuo solutum in sale alkalino, demum sub forma croci, dum tinctura alkalina saturatur sensim acido quocunque; aut, dum quieti reponitur, ubi ferri copia haud pauca sponte subsidet; promissime vero solvitur praecipitatum ab acidis; adeo, ut, nisi exacte observetur punctum saturationis alkalinae solutionis, denuo solvatur ab instillato superabundante acido. Crocus ex tinctura Martis alkalina *Stahl* proprio denuo titulo vocatur *crocus martis aperitivus STAHLII*: sal medium lixivio alkalino inhaerens aut *nitrum regeneratum*, aut *tartarus vitriolatus*, aut *sal digestivum Sylvii* erit, prout vel acidum *nitrosum*, vel *vitriolicum*, vel *muriaticum* demum ad praecipitandum ferrum fuerit adhibitum.

§. 402.

LIXIVIVM alkalinum phlogisticatum ferrum pariter dejecit, solutum prius ab acore vitriolico, sub forma *caerulei berolinensis*: *) dum vero copia major, quam quae ad praecipitationem requisita fuerit, additur, cae-

ru-

*) HISTORIAM praeparationis *caerulei berolinensis* v. in cap. de VITRIOLO; ubi aptius collocari videtur, quam quidem in capite praesenti.



ruleum praecipitatum denuo solvitur; hinc aliam habemus speciem saltem ferri solutionis in sale alkalino fixo. Retulit hoc *Cl. WALLERIUS*: negavit *Cl. BAUME*.

§. 403.

SAL alkali volatile aptum pariter est resolvendo ferro: in crocum sic mutatur subflavescentem, dum spiritus ammoniaci salis additus fuerit. Dum vero infillatur hic solutioni ferri nitrosae, spissescit primo miscela, dein limpiditas et resolutio paulatim subsequitur, major tamen spiritus alkalini copia requiritur.

§. 404.

PRAECIPITATIONES ferri quod adinet, notandum primum venit, plures fieri *spontaneas*; dum scilicet ferrum ex solutione abs ullo additamento magnam partem ad fundum vasis descendit: acceleratur descensus hic, dum aqua fuerit addita, cujus interventu acidorum vis infringitur; aut solutio calori exposita, quo phlogiston simul magis dissipatur.

§. 405.

PRAECIPITATIONEM per sal alkali fixum, notatu magis dignam, paulo antea vidimus.

Ex praecipitato ferro, in acido nitroso resoluto, per oleum tartari per deliquium, enascitur vegetatio metallica, quam *Cl. LEMERY* sub nomine *arboris-Martis* in *actis Academ. regiae scientiarum Parisinae* descripsit: monet vero, vitrum ad hoc recipiendum esse, quod inferne angustius contrahatur, tum additionem olei tartari non magna nimis copia fieri debere, felicius denique tentamen succedere, si acidum partim fuerit abstractum.

§. 406.

CIRCA praecipitationem per sal alkali fixum, phlogisto inbutum, notandum adhuc venit, praecipitatum sic ferrum colore magis minusve olivaceo, aut nigricante donari; in acidis esse maxime solubile, et hinc speciem *aethiopsis martialis* constituere, aethiopi martiali, *Lemeryana* methodo, solius aquae ope parato, praefereendam: notat vero optime Cl. MACQUER, praecipitatum hoc in vase clauso, adparatu destillatorio, esse siccandum, quo sic phlogisti dissipatio praecaveatur.

ALIAM denuo *aethiopsis martialis* praeparationem Cl. MAJAUULT descripsit, ac in *Journal de Medecine Tom. VI.* inferi curavit, ex quo recensio inserta fuit in *Tomum VII. Commentar. de rebus in scientia &c.* Praeparatio *Majaultiana* sequens est. Vitriolum ferri aqua solvitur, ac inhaerens forsan cuprum in vitriolo admistum addita lamina ferri praeceps datur. Solutio dein oleo tartari per deliquium praecipitatur et filtratur, postea calida aliquoties per filtrum trajicitur, quo omnis tartarus vitriolatus, sub operatione natus, eluatur, puraque ferri calx tandem exsiccanda remaneat. Quum vero eadem phlogisto sit destituta, haec igitur in cochleare ferreum inditur, et cum olivarum oleo miscetur, quod super eam igne subposito deflagratur, et aliquoties repetitur. Quo facto pulvis niger obtinetur, qui, Cl. MAJAUULT teste, omnes ferri proprietates habet, eosque omnino effectus praestat, quod quidem concedere facile possumus, dum ad totam hanc encheiresin, ac phlogisticae partis, prius deperditae, additionem novam adtendimus.

§. 408.

IN praecipitatis ferri ex acido muriatico dejectis major adhuc portio latet phlogisti, quam in iis, quae ex vitriolico, aut nitroso acore praecipitantur.

§. 409.

DUM in solutionem florum salis ammoniaci mar-
tialium aquosam sal alkali fixum solutum instillatur,
praecipitatum cadit, quod *martem diaphoreticum* di-
xerunt.

§. 410.

PRAECIPITATUM ex aqua regia cum sale ammonia-
co facta, parce et leniter instillato oleo tartari per de-
liquium, crocus obtinetur, JUNCKERUS ait, subinde
fulminans. Videri hic poterit locus, quem antea, in
capite de AURO ex STAHLIO circa detonationem calcis
ferri adduxi.

§. 411.

TERRAE *absorbentes* ferrum ex acidis dejiciunt,
quum adfinitas illarum cum acidis major sit, quam
acidorum cum ferro.

§. 412.

DECOCTUM *gallarum*, malicorii, theae, aliorum-
que adstringentium; colore nigro, seu potius caeruleo
saturatissimo ex menstribus ferrum deturbant, atque
haec est ratio geneseos atramenti. *Atramentum* ipsum
in *capite de VITRIOLO* exactius considerabitur.



§. 413.

METALLA quod adtinet, pauca sane ferrum praecipitant, quum adfinitas minor adsit, quam quae in aliorum metallorum solutionibus intercedit metalla praecipitantia inter ac acida: Zincum tamen ferrum sat bene deorsum pellit.

§. 414.

NUNC, quas ferrum ad *metallica corpora* relationes habeat, videamus. Ferri miscelam cum *auro* in *capite de Auro* exposui.

§. 415.

FERRUM cum *argento* mistum in *capite de ARGENTO* vidimus.

§. 416.

FERRI relatio ad *platinam* in *capite de PLATINA* exponitur.

§. 417.

CUPRUM cum *ferro* fusione difficulter jungitur, et, prout major fuerit ferri portio, fluxile minus, subgriseum, ac minus ductile evadit. Pars, quae sub fusione cum cupro jungi non poterat, in separato strato cupri regulo valide adhaeret. Retulit *Cl. BAUME*, fusioni in crucibulo sese exposuisse uncias binas cupri cum uncia dimidia ferri, invicem non coisse metalla haecce, etsi ignis adhibitus fuerit, quo ferrum in fluxum deduceretur: subiit, ait, cuprum, quin tamen cum eo jungeretur.

§. 418.



§. 418.

Cum *stanno* ferrum in fusione non bene miscetur, *Cl. MUSCHENBROECKIUS* ait, metallum praebet durissimum, non limandum, coloris albi ferrei, valde fragile, cujus firmitatem explorare non potui. Ferri partes tres, stanni pars una habent gravitatem specificam 7, 0909. Chalybs tamen non respuit stannum, sed probe miscetur.

STANNUM ferro sonorius redditur in omnibus tentaminibus.

STANNUM et ferrum, ex tentaminibus *Cl. WALLERII*, metallum praebent in fractura subgriseum, sub malleo nonnihil ductile, a magnete adtractile, si ea jungantur ratione, ut partibus binis stanni pars addatur una ferri. His tamen omnibus non obstantibus, *Cl. BAUME* dicere poterat, nondum constare, quid exsurgat ex confusis una ferro ac stanno, nec notum esse hactenus, an bina haecce metalla uniri fusione queant.

INCRUSTATIONEM ferri cum *stanno* in capite de STANNO adducam.

§. 419.

PLUMBO cum ferro inimicitiam intercedere vix non omnes fatentur. Ferrum, ait *JUNCKERUS*, per se plumbo non commiscetur fluxu, sed perpetuo eidem supernatat, ob nimis crassam, ut verosimile est, consistentiam, subtiliori fluxui metallico magis ineptam, et nimiam insuper prae plumbo levitatem.

In tentaminibus *Cl. MUSCHENBROECKII* ferri grana quadringenta mista cum plumbi Scotici puri granis



centum triginta quatuor dederunt metallum durum quod in crassitie quadrati $\frac{1}{10}$. poll. fractum fuit a libris ducentis viginti quinque. Ferri partes decem, plumbi pars una, habuerunt gravitatem specificam 4, 250.

FERRUM cum plumbo misceri non posse, sed semper supernatare, denuo SWEDENBORG habet, an vero instituit experimentum?

OBSERVAT demum et *Cl. GELLERTUS*, ferrum cum plumbo non coire, hinc ferri ope plumbum separari posse a metallis reliquis omnibus, dummodo metallum, a quo divellere illud volumus, non facilius jungatur plumbo, quam quidem ferro. Certum sane est, subiungit *Cl. MACQUERUS*, plumbum ipsum pro intermedio recipi posse pro separando ferro a metallis reliquis, v. c. ab argento; quodsi enim fusioni subiiciatur copia sufficiens plumbi una cum argento ferrum admistum tenente, plumbum facillime argentum in amplexus suos rapit, et a ferro liberat, quod nunc superficiei binorum horum metallorum innatat.

§. 420.

MERCURIUS ferro commisceri nequit, rotunda, sed vera, sententia SWEDENBORG pronuntiavit, inprimis dum ad amalgamationem ferri puri cum mercurio, haecenus nondum possibilem, adtendimus, atque hanc ob rationem ferrum auro obducturi, inponere illud prius debent artifices solutioni vitrioli caerulei, aut vitrioli huius pulvere madefacto fricare, ut sic obducatur lamina cuprea, ab excussa ex solutione sua venere enata, et aptum reddatur ferendo amalgamati auri cum mercurio. Speciem amalgamatis ferri cum mercurio perficere sic docet *Cl. WALLERIUS*: re-
cipia

apiatur, ait, limatura martis purissima, addatur huic, in vitro aut mortario vitreo contentae, copia minor vitrioli caerulei aqua soluti; agitetur totum, ac tandem relinquatur, donec pelliculam cupri ferro videamus adhaerentem; adjungatur dein tripla, vel et major parum hydrargyri copia, ac miscela bene conquissetur; hac ratione enascitur amalgamatio, quae tritu debito, ac elotione vitrioli per aquam puram perfectior reddi valet. Diu tamen persistens amalgama hoc non est; dum enim per tres aut quatuor dies paratum reponitur, ac denuo teritur, omnis mercurius a ferro abscedit, atque hoc sub specie ferruginis, seu croci excutitur; crocus hic nulla arte mercurio jungi, aut ejus actioni subjici jam potest.

SOLUTIONE octo partium vitrioli viridis in aqua miscelae mercurii, et limaturae martis addita, tritu accedente, amalgama quoddam generari RESPURIUS habet.

§. 421.

ETSI vero mercurius ferro non jungatur, corrodere tamen illud videtur: monuit enim BORRICHIVS, chalybem purum immersum hydrargyro rubigine obduci; idem in filo ferreo in vase vitreo sic firmato, ut mercurio prorsum cingeretur, ipse vidi, et laminam ferri tenuem, si mercurio inpressa per aliquot dies teneatur, fragilem fieri a subtili quadam penetratione, JUNCKERUS edixit.

IN miscela ferri cum mercurio sublimato corrosivo, et Calomeli acidum salis ferrum adgreditur, atque mercurius redditur liber.

REGULUS antimonii ferro nubit. Miscela indu-tilis est, a magnete, (uti HENCKELIUS jam adnotavit,) non adtractilis, ferrum fusum referens, WALLERIVS. Ferrum cum dimidia parte misturae, quae fit e regulo antimonii et stanno, funditur promptius, narrante JVNCKERO, et in durissimam, fragilem massam coalescit, quae cum nitro instar ligni succenditur. Firmitatem maximam enatam vidit MVSCHENBROECKIVS, dum remisceret aeris fulvi grana quingenta, aurichalci gr. quadraginta, stanni grana quinquaginta; miscela rumpebatur in crassitie $\frac{1}{16}$. poll. a libris 507. et 520.

§. 423.

Ex ferri miscela cum *antimonio crudo regulus* conficitur sic dictus *antimonii martialis*, una cum adjunctis praeparatis diversis aliis. Sumatur ex praescripto *Pharmacopoeae Austriaco-provincialis*, clavorum ferreorum non rubiginosorum libra una, candefiant in crucibulo, eisque successive injiciantur antimonii crudi in pulverem redacti librae duae; optime fusi addatur nitri pulverisati libra semis. Igne forti bene fluant omnia, tunc statim effundantur in conum fusorium calefactum et sebo illitum. Frigefacta de in massa e cono tollatur; separetur regulus in fundo haerens a scoriis, et servetur. Hic regulus, qui parum aut nihil de marte habet, inservire potest pro parando *sibio diaphoretico*, vulgo *Antimonii cerussa* dicto. E scoriis fieri potest *Crocus martis aperitivus* STAHLII sequenti modo: Recipe scoriarum dictarum quantum placet; in pulverem tusae injiciantur vasi terreo, et adfusa sufficiente quantitate aquae purae elutriantur ita, ut pars subtilior una cum aqua in aliud

vas

vas decantetur. Pergitur eodem modo cum nova adfusa aqua in elutriatione partis reliquae, donec omnis materies subtilis sic decantata fuerit. Conmixtae aquae dantur quieti, ut dicta materies fundum petat; ubi aqua clara decantatur, reliqua ope filtri chartacei a sedimento separatur, pulvis vero in filtro remanens exsiccat. Recipe hujus pulveris partem unam, nitri pulverisati partes tres, mista deflagrent in crucibulo candente, et porro tractentur ut *Antimonium diaphoreticum ablutum*. Pulvis ita obtentus servatur sub titulo *croci martis aperitivi* STAHLII.

§. 424.

EXPOSITA quidem sic operationis historia, nondum tamen ejusdem exposita ratio. Antimonium crudum componitur parte regulina semimetallica ipsius antimonii, et sulphure partem hanc mineralisante, a sulphure vulgari nullatenus diverso: major autem est adfinitas sulphuris cum ferro, quam quidem cum regulo antimonii; dum itaque misceo antimonium crudum cum ferro, sulphur, regulinae parti prius nexum, hanc deserit, et coit cum ferro; illa in regulum unitur, ad fundum coni fusorii descendantem, ferrum autem sulphure solutum scoriis regulo supernatantibus inhaeret, versum in crocum. Vera hinc fit separatio reguli antimonii a mineralisante sulphure per ferrum, vera fit praecipitatio metallica via sicca.

§. 425.

CLAVI ferrei recipi vix non semper solent, quod, ferri haec species mollior, et in fusionem sit pronior et sulphuris actioni magis pateat. Nitrum ex eo capite additur, quod requisitum sit, ut regulus obtineatur legitimus, fusio omnium perfectissima, tenera;

O 4

quum



quum vero ad hanc igne opus sit violentissimo, hinc nitrum vocatur in auxilium: detonat hoc, uti saepe dictum, cum phlogisticis substantiis, hinc et facilius redditur fusio, et nitrum in sal alkali versum, ab sulphure antimonii dein mutatum in hepar sulphuris, fluxum teneriorem reddit, scoriarum hinc regulinae partes praecipitari, coire tanto melius poterunt.

§. 426.

Ut regulum eo puriorem acquirerent; praescripserunt varii, inter quos eminet LEMERY, ut trinis adhuc vicibus ex ordine sibi succedentibus, funderetur regulus obtentus; adderetur vero prima vice pars octava antimonii crudi cum aequali copia nitri, uti in fusione prima; reliquis binis vicibus nil nisi nitrum adiceretur solum. Perficere sic voluerunt operose, quod obtineri potest, dum proportionata quantitas ferri ac antimonii recipitur; quodli vero omnium purissimum antimonii regulum quis desideret, unica saltim repetita fusio cum adjecto antimonio crudo et nitro rem secure non minus terminabit.

§. 427.

SCORIAE, quae regulo huic antimonii sub secunda potissimum fusione incumbunt, a colore suo, ac diaphaneitatis quodam gradu, *scoriae antimonii succineae* dictae fuerunt.

§. 428.

CROCUS, quem *Pharmac. Austr. provinc. crocum Martis aperitivum* STAHLII dixit, dum repetitam calcinationem cum nitro nondum subiit, *crocus Martis antimonialis* dicitur, atque nomine hoc notari poterit,

rit, si quis distinguere enim velit a *croco genuino martis aperitivo* STAHLII, antea, dum de solutione ferri per sal alkali fixum agebatur, descripto. Ex lixivio decoctionis filtrato, aceto aliove acido, sensim instillato remisto, *fulphur auratum antimonii* deorsum ruere CL. WALLERIUS monuit. Ex regulo antimonii martiali, a ferro non omnino adhuc libero, paratur *antimonium martiale diaphoreticum*, cum *stomachico* POTERII vix non idem, si regulus hic cum tripla parte nitri detonationi in crucibulo exponatur. Ferri partem cum regulo hoc mistum esse posse evincitur ex eo, quod cum sulphure mistus non ex integro in antimonium crudum revertatur.

§. 429.

Si remisceantur, ait CL. WALLERIUS, binæ partes antimonii crudi cum parte una limaturae ferri, et miscela abs additione ulla alkalini salis aut nitri fusione uniatur, regulus antimonii martialis pariter obtinetur, majorem ferri copiam continens. Ex scoriis in pulverem redactis adfusionem acidum vitrioli vitriolum ferri generatur, sulphur autem purum secedit, ab alio sulphure nullatenus diversum. Dum vero limatura ferri ac antimonium crudum anatica portione confunduntur, ac sub fusione rutabulo probe agitantur, ne regulus deponi queat, sed totum in scorias abire cogatur, obtinetur ex scoriis hisce, in pulverem redactis, ac cum nitri quantitate tripla detonationi subiectis, massa coloris hepatici, quae in pulverem tusa, edulcorata, ac elutriata *crocum antimoniale Martis*, seu *bezoardicum martiale flavum*, aut *antimonium martiale cachecticum*, quae unius rei sunt synonyma, denuo largitur.



S. 430.

STELLAM, quae reguli antimonii martialis, uti reguli antimonii simplicis nonnunquam insidet superficiei, BECHERUS et BOYLEVS miscelae antimonii cum ferro adtribuerunt, LANGIVS a concussu coni fusorii deduxit; fusioni demum violentae STAHLIVS adscript, neutri tamen causae deberi CL. WALLERIVS optimo jure advertit; nam adest et in regulo antimonii simplici, ubi nil certe ferri adejus genesin concurrere potest; elegantior fit, dum conus non movetur, non ergo concussioni deberi poterit; partium antimonii solum debetur symmetricae directioni, uti ductus foliacei, vel dendritici, quos in superficie aliorum metallorum observamus, demonstrant. Vidi autem, requiri solum, si stella haec elegantior fieri debeat, ut antimonii regulus sit purissimus; ut fluxu tenerrimo fundatur; ut demum lentissime et abs ulla concussione vasis, aut venti adflatu refrigescat. Cautelis hisce probe observatis stellam semper obtineo. Unicum id solum addere debeo, et in ipso antimonio, quod ad experimentum adhibetur, quamdam intercedere diversitatem; nam, positis caeteris omnibus iisdem, stellam obtinui pulchriorem, Kermes minerale lactiori colore donatum, ac in fusione antimonii diaphoretici cum fluxu borracis colorem elegantius flaventem *) enasci vidi, dum antimonium optimum Hungaricum ad experimenta recepi, quam dum aliae antimonii species fuerunt adhibitae; sed de his alio loco recurret sermo.

S. 431.

ZINCUM cum ferro haud exacte miscetur, uti varia docuerunt tentamina. Uniturus metallicas hasce sub-

*) TENTAMEN hoc latius descriptum vide in capite de
ANTIMONIO.

substantias *Cl. MALONIN* vidit, Zincum superficiei ferri incrustationis adinstar adhaerescere, illudque sic, stanni adinstar, a ferrugine tueri. Dubitavit hinc *Cl. BAUME*, an Zincum et ferrum uniri unquam possint. Ratio quidem in promptu satis est, ait *Cl. WALLERIUS*, cur unio haec fieri minus queat; ferrum, ut fundatur, calorem requirit ingentem mille sexcentorum graduum; Zincum vero, antequam gradum hunc adtigerit, dudum destructum, ac florum sub forma in auras fugatum est, pace tamen *Viri Clarissimi* dixerim, non certe opus esse, ut ferrum cum Zinco juncturus, binæ hæcque metallica corpora illico in crucibulum ponat, alias enim Zincum utique comburitur, antequam ferrum candens adhuc ex integro sit; subjungit nunc citatus *Auctor*, partem tamen Zinci ferri amplexus ingredi, atque hoc solutionibus ac præcipitationibus detegi posse.

§. 432.

BISMUTHUM cum ferro jungi non posse, suspicatur *Cl. BAUME*, quod bismuthum analogiam cum plumbo habeat magnam, plumbum vero cum ferro non uniatur. Dudum autem *HENCKELIUS* dixerat, ferrum optime intrare in bismuthum, et regulum constituere fragilem, adtrahi etiam a magnete, etsi partes tres quartae bismuthi contentae fuerint in miscela. *Cl. MUSCHENBROECKIUS* observavit, ferrum cum bismutho pari copia sumtum non bene misceri; metallum exsurgere fragillimum, hinc inde, ubi bismuthum non exacte mistum est, mollius. Firmitatem hinc indagare non potuit nisi in duobus exemplis; latus quodlibet parallelepipedum $\frac{1}{15}$ poll. denuo fuit; miscela itaque granorum 400. ferri cum granis 20. bismuthi fracta fuit a libris 151.; miscela autem granorum ferri 400. cum granis bismuthi 300. metallum dedit in medio



dio cavum, quod fractum a libris 35. Miscelam bismuthi cum ferro specificè leviorē dederunt experimenta *Gellertiana*. Adparet hinc, non opus fuisse, ut suspicaretur *Cl. BAUME* an miscela haec possibilis foret; res factae enim possibiles utique sunt.

§. 433.

COBALTI regulus cum ferro bene jungitur. Ponderis nullam fieri jacturam, si fusio cum fluxu nigro et carbonum pulvere facta fuerit, *Cl. WALLERIUS* notat, ac subjungit, miscelam a magnete adtrahi, etsi unica solum ferri pars cum partibus tribus reguli cobalti misceatur. Drachmam dimidiam limaturae chalybis, drachmas duas reguli cobalti, eandemque copiam salis communis fusioni exposuit in crucibulo *Cl. BAUME*: obtinuit miscelam metallicam, pondere drachmas duas cum duodecim granis aequantem, compactam, granulis exiguis donatam, chalybi specie fere analogam, durissimam, fragilem. Scoriae colorem exhibuerunt superficialem roseum.

§. 434.

ARSENICVM ferrum inductile reddit, ac fragile, ac albescens, uti *Cl. GELLERTVS* observavit, pluresque Chemici alii. Limatura ferri arsenico remissa, ait *Cl. WALLERIUS*, in sale alkalino prius resoluto ac fuso, nonnihil scintillat, solvitur tamen in massam nigram salinam. Dum autem ferrum cum arsenico puro fusionē jungitur, adjecto simul fluxu nigro, regulus obtinebitur, a magnete non adtractilis, ob regulum tamen arsenici cum per fluxum nigrum, tum per phlogiston ipsius ferri reductum facile fluxilis. Idem obtinetur, dum arsenicum fixum ferro candenti in crucibulo additur, crucibulumque illico tegitur: dum
etiam



etiam ferrum cum arsenico caementatur, volatile arsenicum a ferro coercetur, et massa exurgit albescens, pyritem arsenicalem album referens. Addidit hisce *Wallerianis Cl. WEIGEL*, ob dotem fluxilitatis faciliorem, quam arsenicum ferro largitur, miscelam hanc componi pro conficiendis fibulis, horologiorum catenulis, aliisque: fragile quidem sic fieri ferrum, simul tamen polituram recipere elegantiolem, splendenter.

§. 435.

NICCOLVM denique ferro jungitur optime, ac maximam cum metallo hoc eodem amicitiam colere videtur; male et *Cl. CRONSTAEDT* adfinitatem ferri cum niccolo primo loco posuit, unionem sulphuris ope imprimis fieri, monuit.

§. 436.

EXPOSITA hactenus historia ferri, videndus nunc et *chalybs* foret, a ferro puritate inprimis, tum vero et dotibus pluribus aliis distinctus, etsi ex ferro conficiatur, et pro ferri specie nobiliori haberi debeat. Quum tamen ejus examen *Docimasiam* magis, quam *Chemiā*, concernat, hinc totam chalybis historiam sicco transibo pede, ejusque tum praeparatio, tum indoles aliis ex fontibus erit petenda.

§. 437.

INTER SVCCEDANEA hocce caput primo statim loco magna sane copia *praeparatorum pharmaceuticorum* adferri posset: adducam hic solum pauca, quae in usum medicum aptiora videntur.

Ex.



EXTRACTVM *Martis a Pharmacopoea Batheana* sic praefcribitur: Recipe succi oxalidis depurati libras quatuor, tamarindorum unciam unam, coque parum, et clarifica; in hoc macera tepidae limaturae martis uncias quinque per dies quatuor, saepe agitando, deinceps, et in balneo maris inspissa ad consistentiam extracti.

S. 438.

LAPIS *medicamentosus*, seu *lapis mirabilis*, seu *lapis salutis* LEMERY, paratur sequenti ratione: Recipe limaturae martis, haematitidis pulverisati ana uncias tres, tartari uncias sex; fiat cum sufficiente quantitate vini pasta, quae digeritur et siccatur; labor hic semper adfuso vino iteretur, donec ferrum non amplius adpareat. Ex hac massa fiat pulvis subtilis, cui adde mastichis in lacrymis, croci pulverisati ana unciam semis; aloes et myrrhae in vino solutae ana unciam unam, digere saepius agitando, evaporet donec massa sicca sit, et fiant cum sufficiente quantitate vini globuli.

S. 439.

MARS *saccharatus Pharmaciae Edinburgensis*: recipe limaturae martis mundatae quantum vis, inmittatur cacabo aeneo suspensio supra focum lenissimum; adfunde paulatim sacchari albi, ad tabulati consistentiam cocti, pondus duplum, cui inmixta fuerit, pro unaquaque libra, amyli triti uncia una; agita cacabum adfidue, ut limatura saccharo incrustetur; cavendo ne in massulas coeat.

S. 440.

SYRUPUS *chalybis* SYDENHAMI; infunditur chalybis, aut ferri limatura in vino rhenano frigide, donec
vinum

vinum satis inpraegnatum fuerit marte; facto hoc co-
latur, et cū sufficienti quantitate sacchari in syrupum
coquatur.

§. 441.

*TINCTURA martis aurea Pharmaciae Londinen-
sis*, limaturae Martis libra semis stet sine calore in spi-
ritus salis Glauberi libris quatuor quamdiu solvitur;
saecibus depositis evaporet ad remanentiam unciam
sexdecim, et ad residuum adfundantur spiritus vini li-
brae quinque: in *Pharmacia Edinburgensi* spiritus sa-
lis dulcis praescribitur.

§. 442.

TINCTURA Martis roborans BOERHAAVII; lima-
turae martis uncia, aceti stillatitii acerrimi unciae de-
cem, sacchari unciae tres, ebulliant in phiala alta che-
mica leniter spatio horarum viginti quatuor; filtratus
liquor adservetur vase clauso.

§. 443.

*TINCTURA Martis belleborata Dispensatorii
Vindobonensis*; recipe tincturae martis tartarifatae un-
cias sex, extracti hellebori nigri drachmas sex; misce,
digere, et filtra.

§. 444.

VINUM chalybeatum BOERHAAVII, recipe lima-
turae ferri non rubiginosae, corticis peruviani et ma-
gellanici ana uncias duas, radiceis rhei exsiccatæ un-
ciam semis, vini rhenani generosissimi libras duas;
fiat lege artis vinum medicatum.

§. 445.



§. 445.

VINUM *chalybeatum Pharmaciae Edinburgensis*:
 recipe limaturae martis uncias tres, coccinellae drach-
 mam semis, vini albi rhenani libras duas, digere spa-
 tio dierum viginti in phiala, saepe conquassando, et
 filtra.

§. 446.

VINUM *chalybeatum Pharmacopoeae Danicae*,
 recipe limaturae ferri uncias quatuor, cinnamomi,
 macis ana semunciam, vini rhenani libras quatuor;
 per mensem sub frequenti agitatione macerata, colen-
 tur.

§. 447.

CIRCA *ferruminationem ferri* pauca solum ad-
 duxisse sufficiat. Ferrumen ferri *Cl. MUSCHENBROE-*
CKIUS ait, est aurichalcum, attamen ferrum cum fer-
 ro feliciter ferruminatur, adliniendo tantum pastam sa-
 ctam ex arena bruxellensi cum aqua. Ferrum, notan-
 te *Cl. SPIELMANN*, cupro, argento, borace, et auro
 ferruminatur; id autem, quod stanno obductum est,
 metallo ex plumbo et stanno constante. Refert de-
 mum *SWEDENBORG* sequentes rationes idem perficien-
 di: in officinis, ait, utuntur sabulo, five arena plu-
 viatili subtiliore, quae bene liquecit, et in vitrum,
 aut scorias in igne solvitur. Tum si frustra ferri am-
 bo bene candesciant, et superinfernatur vitrum vene-
 tum pulverisatum, quod in ipsa fractura vel loco com-
 binationis paene liquecat; fieri etiam posse traditur,
 per duas semuncias aurichalci, et duas lithargyrii, e.
 f. p.

§. 448.



§. 448.

FERRVM a rubigine praeservandi quatuordecim congeffit methodos SWEDENBORG; adducam hic ex illis unam alteramve. Tigilla, in quibus argentum saepe fufum est, pulveriscentur, et pulvis cribretur; triginta duae semunciae hujus pulveris fumantur, sexaginta quatuor smyridis calcinati et praeparati; venae argenti triginta duae; quae si non adsit, perinde erit; pulverisata bene cribrentur, et cribrata misceantur cum semunciis nonaginta sex ramentorum ferri; inde paratus pulvis quum usurpandus est, linteum oleo praeparato illiniendum, et insuper sternendus pulvis, cujus ope ferrum terendum erit, quum rubiginem velis abigere; hujus etiam ope conservabitur ferrum, ne rubigine cito inquinetur. Quod smyridem adinet, ille caleinabitur, ac in igne candeschet, eximetur, ac pulverisabitur.

VEL accipiatur oleum, in quo saepe exstinctum sit plumbum; pinguedo ovina, et cera cum oleo hoc solvatur, et misceatur, qua miscela obliniatur ferrum.

VEL haematites in olla tecta reponatur, et olla furno figulino committatur, ut sic calcinatione haematites fiat fragilis, qui dein saxis molaribus (vel tussione) per aquam in pulverem inpalpabilem conminuatur: relinquatur dein in vase, ut ad fundum subsidat pulvis, aqua dein per inclinationem effundatur, pulvis relictus siccetur, sicque praeparatus erit: cum hoc pulvere ferri et chalybis utensilia quam optime poliri, et a rubigine conservari poterunt.

VEL demum oleum, pulvis cinnabarinus, et haematites (qui solus abs cinnabari sufficit) commisceantur, quibus mistis teratur ferrum.



§. 449.

CROCOS Martis in usum vitriariorum conficiendi methodos varias praeferipsit *Cl. NERI*; optimam dixit sequentem; solvatur limatura chalybis, aut ferri, in vase vitreo clauso *), aqua regia, additione salis ammoniaci, ut moris est, facta, fervetur per triduum, et quotidie bene agitur, advertendo, ut sensim limaturam addas, quum valde intumescat: exacto triduo aqua ad lenem ignem evaporet, atque in fundo haerebit crocus Martis nobilissimus, quo vitra stupendum in modum tinguntur.

§. 450.

PROPOSUIT autem KUNCKELIUS methodum aliam, ubi nulla plane menstrui cujusdam additio fit, sed ferum sola reverberatione in crocum mutatur. Limatura martis, aut, vel chalybis, in ollam fictilem inmittitur, ad unius tamen digiti solum altitudinem; olla in fornace calcinatoria, vel in calore, adque flammam reponatur: exinde, profequitur, intumescit pulvis, optime rubescens, in altitudinem; adeo, ut non repleatur modo olla, sed etiam operculum excutiat: pars haec eximenda est; sed pars ferri fundo adglutinata adhuc remaneat, quae, rursus ollae immissa, intumescit ut prius; fieri hoc poterit, donec sufficiens quantitas croci obtenta fuerit.

§. 451.

PROPOSUIT *Cl. d' Arclais de MONTAMY* singularem encheiresin crocum martis conficiendi, eamque in *epistola* ad *Cl. Roux* descripsit. Recipi debet color
thar

*) Superflua haec est admonitio.


thar vitrioli, a destillatione olei vitrioli residuum, aqua ebulliente probe edulcoretur, denuo decantanda, dum crocus ad fundum subsederit. Edulcoratione hac sufficienti praemissa, quae ex defectu omnis saporis detegitur, humidum omne ope panni lanei tollatur; crocus siccatus catillo inditus ponatur sub testudine infurnum docimasticum, ut ex integro candescat. Tum refrigeratus denuo remisceatur cum duplo salis muriatici, miscela in mortario ferreo probe contundatur, ac tubo sclopi, epistomiis ferreis binis ex utraque parte probe obturando, inmittatur. Tubi extremitates obducantur ex integro pasta ex argilla refractaria, siccatoluto cineribus primum calidis, dein vero carbonibus ardentibus per quatuor horas obruatutubus, ut ex integro candeat: ex tubo frige factocrocus in grumulos nigricantes collectus eximatur; teratur in mortario, ac in vase vitreo, aut terreo incrustato, aquae ferventis ope eluatur tamdiu, donec aqua non amplius coloretur, ac insipida ex integro sit. Crocum hunc *Cl. de MONTAMY* per tres horas igni violentissimo sub testudine exposuit; frige factus a magnete probe adtrahatur, qua quidem re a croco martis *LEMERYANO* maxime distingui monet. Solvitur etiam in acidis omnibus, tum vegetabilibus, tum mineralibus.

§. 452.

CONFICIUNTUR ex crocis martis *pseudogemmae* variae, ac *encausta*. Sic *Sapphirus* fit ex uncia una pyromachorum calcinatorum, unciis tribus minii, croci martis granis quatuor aut quinque, aequalique copia magnesia vitriariorum praeparatae, quae demum adduntur grana duodecim cobalti ustulati; miscela per decem, aut duodecim horas, in crucibulo fluat. *Hya-cinthus* flavidior paratus unione granorum quinque vel sex croci martis per reverberationem parati cum



uncia una frittae; obscurior erit, dum grana croci martis decem cum eadem quantitate frittae miscentur. e. f. p.



CUPRUM.

§. 453.

CUPRUM, (♀), *) VENUS, AES, METALLORUM MERETRIX, colore ex luteo, aut roseo rubro donatur. Cuprum *Japanicum*, caeteris omnibus cupri speciebus nobiliss, colore subroseo nitet in externa facie; interne aurum fere admistum mentitur: vidi sane cuprum *Japanicum*, quod diffractum vix distinguere minus periti poterant ab alio, cui aurum additum fuerat, ut *aeris pyropi* **) artificiale haberetur specimen. Cuprum *Hungaricum Neosoliense* pulchrum satis exhibet colorem; *Suecicum* caeteris relinquit palmam. In fractura satis splendet, ac grana, si purissimum, *Japanicum* fuerit, minora obfert. Cl. TILLET cuprum microscopio examinans notavit, exhibere id minores grumulos quam aurum et argentum, innumeris vero donari poris et cavernulis.

§. 454.

*) ♀. notat partem praecipuam aurum esse; sed adhaerescere illi, partemque magnam facere crudum, acre, corrodens, quo inde ablato, reliquum auri habet proprietates. Sed et hoc Adepti profitentur. BOERHAAVIUS.

**) QUID *aes pyropum* sit, in capite de AURO dixi.

§. 454.

GRAVITATEM cupri *specificam* quod adinet, relatione ad aquam sumta, in cupro Japanico uti 9, 000., in Suecico uti 8, 784. aut 8, 843. ad 1000. assignatur a Cl. CRONSTAEDTIO. Aes Japanicum cufum uti 9, 0000., fufum uti 8, 7267., Hispalenfe ex Andalusia fufum uti 7, 9598, cufum uti 8, 43396, Chilense fufum uti 8, 64197. cufum uti 8, 7685, barbaricum cufum uti 7, 8520, fufum uti 8, 5945, Suecicum cufum uti 8, 7840., fufum uti 8, 3333. &c. Cl. MÜSCHENBROECKIUS deprehendit. Pollex cubicus aeris, communi effato, ad uncias quinque aestimatur.

§. 455.

DUCTILITATE cuprum insigni gaudet; extendi siquidem in fila tenuissima, in bracteolas aëre vehendas, potest.

§. 456.

TENACITATE etiam haud exigua praeditum deprehenditur cuprum; filum cupreum unam decimam partem pollicis rhenensis crassum libras ducentas nonaginta novem cum uncis quatuor sustinet, antequam rumpatur.

§. 457.

FIRMITAS cupri firmitati ferri proxima statuitur a Cl. WALLERIO. Sonorum cuprum purum est, argento tamen minus tinniens: chorda cuprea sonora magis est chorda ferrea, eadem longitudine et crassitie donata.



§. 458.

Sub malleo durius, firmitus, gravius fit.

§. 459.

ELASTICITATE argentum superat.

§. 460.

CUPRUM aëri expositum aliter sese, quam aurum et argentum gerit. Lamina cuprea polita, maxime splendens aëri exposita sensim splendore minuitur, obnubilatur; oblique si spectetur, iridis colores conspiciuntur; demum levissima obsidetur *aerugine* ex caeruleo viridescente, quae profundius demum penetrat; erosio tamen cupri perfecta ab aerugine longum satis temporis requirit intervallum, uti turrium summa, cupro vestita, satis testantur. Aëri tamen ipsi mutatio haec adscribi minus potest, quam humiditati per atmosphaeram dispersae, ac diversa salinarum substantiarum specie inquinatae. Confirmatur hoc ex eo, quod cuprum jam tardius, jam citius aerugine obducatur, prout aëri puro magis minusve fuerit expositum; inveni etiam, exacte in hanc rem intentus, non eundem per omnia aerugini fuisse colorem; jam enim ex caeruleo virebat magis, jam ex viridi in caeruleum potius tendebat colorem; obscuriorem, et in flavum nonnihil tendentem, vidi illis in locis, ubi exhalationes phlogisticae rodentibus magis erant intermistae.

§. 461.

NOTANDUM etiam hic venit, quum locus commodior non recurrat, cuprum validius frictum odorem specialem non gratum exhalare, imprimis dum pinguedine quadam fuerit conspurcatum; qua dote a metallis

tallis nobilibus recedit, et metallis ignobilibus, ac semimetallis variis adpropinquat; in lingua etiam *saporis* ingrati, nauseosi, subausteri, amaricantis, nonnihil styptici sensum excitat; qui et hinc *saporis aeruginosi* sub nomine venire solet.

§. 462.

QUAE de aëre dixi, ea et de *aqua* teneri possunt. Cuprum ab aqua adficitur, et aerugine sensim obducitur; verumtamen aliter forsitan sese habitura res foret, si aqua omnium possibilium purissima reciperetur ad experimentum. Nam aqua destillata pura quidem satis est, non tamen ea ratione pura, ut purior fieri jam non possit. Vidi ab aqua destillata limaturam cupri aerugine viridi obduci, exedi, aquam inde magis magisque virescere, demum limaturam omnem in talem aeruginem resolvi. Adscripserunt phaenomenon hoc Chemicorum plurimi salino cuidam principio, quod, juxta illorum sententiam, inter reliqua veneris principia obtineret locum. His tamen non obstantibus actio menstruorum, aut horum vices obeuntium substantiarum in cuprum sufficiens est, me judice, exponendis illis omnibus, quorum in gratiam principium salinum in venere adsumtum potius fuit, quam demonstratum. Cuprum ab aqua frigida magis quam a calida adfici monuit SWEDENBORG.

§. 463.

CALORE cuprum *rarefit*; rationes rarefactionis vide in *cap.* de FERRO.

§. 464.

INSTITUERUNT clarissimi *Academiae del Cimento* socii circa extensionem cupri elegans experimentum.



Fundi curarunt armillam aeneam, ita dein tornatam ut ejus lumen exacte congrueret ejusdem metalli cono conico; armillam igni per parvum temporis spatium inposuerunt; quum vero eam ita calentem suo cono inponerent, viderunt, notabiliter eam fluctuasse, a colore fuisse dilatam, pristinae quidem figurae similem, sed tanto majorem, ut superficiei concavae dilatatio fuerit $\frac{9}{100}$ partium suae diametri. Manente armilla aliquo tempore supra conum, atque hoc ab illius calore calefacto, ab hujus expansione, et armillae successiva constrictione, quam haec refrigerando acquireret, non modo ad arctum, ut ante, redirent contactum, sed ita se invicem complecterentur, ut etiam antequam omnino refrigerata forent, non nisi vi maxima ab invicem removeri potuerint. Contrarium evenit dum armilla et conus maximo glaciei frigori exponerentur.

S. 465.

CALORIS gradu millesimo quadringentesimo quinquagesimo thermometri Fahrenheitiani, teste CL. MORRIMER, funditur. Ante fusionem candet. A gradu caloris lenissimo ad candescantiam usque coloribus diversis sat elegantibus, citreo, aurantio, subcaeruleo, cyaneo pingitur; atque hac ratione parantur bracteolae illae minimae Sprengmetall dictae, quibus ludicra varia infantum, glutine prius obducta, conspergi solent. Si cuprum candens diutius retineatur, nec ad fusionem ipsam deducatur, superficies exurit, calcinatur, et a frigefacto squamulae abscedunt, quas *bal-litarae cupri*, aut *squamulae cupri* titulo insignire solent. *) Ignis in quo cuprum fluit, aut in quem li-

matu-

*) RATIO hujus phaenomeni ex eo dependet, quod cuprum candens plurimum expandatur, uti antea demon-

matura cupri injecta fuit, aut solutio in acido nitroso, vel sale alkalino volatili infusa colore eleganti *viridescente* lucet, (quem cur Cl. BAUME *violaceum* dixerit, non video), avolante sic parte cupri phlogistica cum terrae specificae parte levissima violentia flammæ in sublime rapta. *Flores cupri* obtinentur, injecta prunis cupri limatura, et adscendente halitu obverso huic rei apto instrumento excepto. Igne reverberatorio vexata cupri limatura diutius in crocum abit rufescentem, hepaticum, et si sanguineum colorem eidem tribuerit JUNKERUS. Cuprum fusum aquae adactum non fert, sed ab una alterave guttula ingens copia vi maxima, et summo adstantium cum periculo exploditur: fit hoc inprimis, dum aqua perpendiculariter instillatur; obliquam enim, ac horizontalem fere adfusionem magis fert, atque hac ratione cuprum liquatum in discos efformatur: qui cuprum fusum in formas argillaceas infundunt, probe adtendant, ut formae sint siccissimae, alias enim idem contingit eventus, quem de aquae illapsu illico retuli. Cuprum legitime fusum, paulatim refrigeratum, foliaceos ductus in superficie exhibet.

§. 466.

Ex *squamis cupri*, aut *cinere* sic dicto *cupri*, confici posse cuprum, quod in aëre rubiginosum non adeo cito fiat, uti cuprum vulgare, atque ad hoc requiri, ut

P 5

cum

monstravi, simul vero in superficie externa calcinetur; frigesactum jam cuprum de novo contrahitur, crusta externa sequi massam reliquam nequit, hinc squamularum sub forma dissilit. Promovetur hoc, immittendo cuprum candens in aquam frigidam. Squamulae illae collectae, siccatae, venduntur sub nomine *cineris cupri*, *Kupfersche*.



cum fluxu reductivo, aut materie phlogistica, pauco-
que adjecto sale alkalino fixo fundatur, plures perhi-
bent Auctores; obtinetur certe sic defoecatum magis
cuprum. Cuprum repetitis vicibus fufum, *cuius de
rossette* dictum, purius etiam est, et injuriis aëris non
adeo patulum.

§. 467.

Dixit quidem *Cl. WALLERIUS* impossibile fere esse,
ut cinis cupri in vitrum abs fluxu addito reducatur,
fateri tamen possum, perfecisse me hoc in furno fu-
sorio, ubi crucibulum carbonibus ea ratione inpositum
erat, ut ex lateribus ultra pedem dimidium, superne
et inferne pedes duos cum aliquot pollicibus carbo-
num stratum aequaret: perfeci et idem in parva quan-
titate, dum crucibulum loco calidissimo furni, in quo
vasa pseuomurrhyna excoquantur, et ubi vasa haec,
encausto nondum inducta, in scoriformem massam flue-
bant, exponerem. Dicunt quidem Chemici, vitrum
cupri ex fusco rubrum esse; clarius tamen hoc debe-
rent exponere. Vitrum cupri forma externa hepati-
cum, ochraceum, aut rubricae fabrili analogum sae-
pe obfert colorem, fluxu tamen addito, vasis murr-
hynis inductum colorem elegantissime viridem produ-
cit. Agam de his in *succedaneis* ad hoc caput.

§. 468.

INCLUSIT *Cl. d^r ARCET* globo ex pasta pro vasis
murrhynis facto paucam cupri quantitatem, atque
globum hunc ignis violenti actioni subiecit; in calcem
sic mutabatur cuprum, excepto solum exiguo grano.
Contentus nondum tentamine hocce *Cl. BAUME*, et
calcinationis eventum aquae, aëri, et acido vitrioli-
eo, in pasta illa contentis, adtribuens, cuprum inclu-
sit

fit crucibulo exactissime undique firmato; crucibulum igni valido inposuit: fluxit cuprum, non tamen in calcem abiit.

§. 469.

CUPRUM scintilla electrica in calcem nigram *Cl.* COMUS vertit. In speculo caustico Leodiensi cuprum intra 42. secunda temporis fundi potuisse, retulit SWEDENBORG. Experimentum, ait, factum est in furno vitriario Holmienti, quod cuprum in urnam vitriariam mitteretur, et inibi per tres quadrantes anni detineretur, post quorum elapsum quum eximeretur, nec fustum, nec in vitrum conversum adparuisse, sed remansisse integrum, cum illa tantum alteratione, quod flavesceret magis.

§. 470.

MENSTRUUM nullum est, a quo cuprum non offenderetur, atque eam ob rationem, quod cujusvis obvii actioni pateat, *meretricis metallorum* nomine donatum fuit. *Vitriolicum acidum* ut cuprum resolvat, requiritur concentratio hujus acidi, et calor. Hunc in finem cuprum in minores moleculas reductum granulatione, aut in lamellas tenuiores expansum, dissecissum, inmittatur in cucurbitam, duplum *) circiter adfundatur acidi vitriolici concentratissimi, seu olei sic dicti

*) *Cl.* GELLERTUS alterum tantum, *Cl.* BAUME triplum aut quadruplum, *Cl.* WALLERIUS eandem uti *Cl.* GELLERTUS quantitatem recipiendam vult: cur quadruplum sumi debeat, non video, quum requiratur, ut ad ficcitatem fere evaporetur miscela, hinc abs necessitate diutius tempus teritur, et sero demum fit, quod citius fieri poterat.



dicti vitrioli; vas miscelam continens inponatur balneo arenae, atque ignis administretur gradus, quo ad ebullitionem totum deducatur. Ebullitio haec tamdiu continuetur, donec massa exsurgat subgrisea, aut albescent, sicca fere, nec bullae amplius exsurgant. Adfundatur dein aqua calida, agitetur vas, ut eo melius resolvatur sal metallicum; caeruleo eleganter colore liquidum, sapore styptico, nauseoso donatum illico tingetur: filtretur hoc, evaporetur ad cuticulae adparationem, reponatur ad crystallisandum, enascentur sic crystalli elegantes rhomboideae caeruleae, diaphanae, verum *vitriolum cupri*, *vitriolum veneris*, *vitriolum caeruleum*, aut *vitriolum cyprium*.

S. 471.

ALIAM methodum KUNCKELIUS praescripserat. Inmittendum in cucurbitam oleum vitrioli esse, aut addendum huic dimidium pondus cupri in lamellas ducti, instituendam destillationem; prodituum fore spiritum vitrioli, reliquum tantum cupri solutum; signum finitae operationis fore, dum nulla amplius ebullitio comparuerit: refrigeratae massae adfundendam aquam, filtrandam solutionem, crystallisationi exponendam, prodituras et sic fore crystallos pulcherrimas: liquido residuo, non amplius in crystallos coeunti, rursus cuprum lamellatum inmittendum esse, ac instituendam, uti prius, destillationem; sic acidum residuum correpturum fore euprum, nec ullam olei partem perituram.

S. 472.

ACIDUM vitrioli debilius, seu *spiritus* sic dictus vitrioli cuprum non referat. Solvit tamen venerem praecipitatum ex menstruis aliis. Remanere plerumque

que solet in filtro, per quod solutio ante dicta transmittitur, pulvis ex fusco niger; pulverem hunc sulphur esse, ex acido vitriolico et phlogisto cupri enatum, *Cl. BAUME* dixit; verum quidem est, quod carbonibus injectus flammam subcaeruleam, et vaporem suffocantem exhalet, simul tamen terram, seu calcem relinquit; hinc itaque purum sulphur non censeo, sed sulphur saltim, ochra cupri, ab acido erosa, inquinatum. *)

§. 473.

ACIDUM salis caloris etiam requirit auxilium, ut venerem exactius recludat. Acidum salis cupro adfusum in cucurbita balneo arenae inponitur, atque calore eo adhibito, quo solutionem optime procedere videmus, cuprum demum solvitur: color solutionis sub initium fuscescens est, abit dein in colorem saturate viridem, et ex solutione pulvis albus ad fundum cadit; etsi dicat *Cl. BAUME* in solutione cupri per acidum salis metallum hoc prorsus non calcinari, et hinc novo denuo argumento demonstrari, quam exigua sit actio acidi muriatici in substantias phlogisticas, et hoc ipsum fors rationem esse, cur acidum salis cuprum segnius adoriatur, quam acidum nitri. Pulverem illum album enim ipsi acido salis tribuendum esse, vix ipse dixerit. **) Solutio cupri in acido muriatico in
cry-

*) *VITRIOLI cyprii* examen in speciali capite de *VITRIOLO* occurret; praecipitationes cupri ex menstribus suis, notatu digniores, expositis solutionibus recensere, quum ordinis ratio, ut solutiones ordine sese excipiant, petere videatur.

**) *FAVERE* tamen *BAUME* videtur adnotatio *Cl. WALLERII*, calcem hanc deberi acido vitriolico, in acido salis latitanti, et cuprum sic erosum deji-
cienti.



crystallos aegre cogitur, crystallos jam lanceolatae, jam tetragonae ab aliis adsignantur, quas posteriores hactenus nondum vidi: in aëre facile deliqueſcunt, etſi BAUMEUS eas perſiſtentes dicat. *Cl. MONNET* ex ſolutione cupri in acido muriatico crystallos obtineri, contra *Cl. POTT* et *BRANDT* edixit, (vera dixiſſe, propria experientia didici) in deliquium autem pronas pariter deprehendit. Monuit ſimul, ex deſtillatione harum crystalloꝝ ſpiritum caeruleum, qualem Auctores nonnulli exin prodire dixerant, non obtineri.

ACIDUM ſalis cupri calcem, et dejectum ex menſtris cuprum reſolvit, et ſolutionem virentem demum, ſub initium verò albentem, conſtituit, teſte *Cl. WALLERIO*.

S. 474.

VIVACISSIME autem cuprum diſcerpitur ab *acido nitroſo*. Vapores ſub hac ſolutione extruduntur ruberrimi, aut ſi debilius demum fuerit acidum, flavicantes, et calor ſat magnus exoritur. Solutio haec, ſi pura ſit, caeruleum gratum exhibet colorem; turbida tamen plerumque redditur ab eroſa in calcem cupri parte, ſub forma pulveris ex albo virentis fundum ſenſim petente. Circa cryſtalliſationem ſolutionis cupri in acido nitri Auctores non conſentiunt. *Cl. BAUME* illam crystallos nullas largiri, ſed in magna abire humiditatem ex aëre avidè trahens, et aquae adinſtar deliqueſcens, ait. Sal oriri valde deliqueſcens, *Cl. MACQUERUS* monuit. Enaſci crystallos caeruleas, diaphanas, regulares, homœdras, quadrangulares, columnares *Cl. WALLERIUS* habet. *Cl. de JACQUIN* narravit, obtinuiſſe ſe olim crystallos ex reſoſita ſolutione veneris in acido nitroſo; pluribus verò vicibus, dum parare eas vellet, obtinere nil potuiſſe.

Ego

Ego fortuito casu aciculares vidi, quas non dare poterat industria, in aëre mox pereuntes: et in novissimo opusculo *Cl. MONNET* habetur, crystallos ex solutione hac optime posse obtineri pulcherrimas, exiguas, oblongas, quadrangulares, caeruleas, dummodo solutio depuratissima fuerit recepta: subjecit simul, crystallos has easdem humiditatem ex atmosphaera avide in se trahere, tumque in deliquium abire; solvietiam optime in vini rectificatissimo spiritu.

§. 475.

PROPOSUIT *Cl. HIGGINS* in *Philosophical Transactions Vol. LXIII. P. I.* observationes circa detonationem, quae producitur per contactum mutuum bractearum stanni cum sale neutro metallico, ex cupro et acido nitri composito. Solvitur in hunc finem, praecipiente *Cl. HIGGINS*, cuprum in acido nitroso eo usque, donec saturata satis obtineatur solutio; ex hac obtinetur, ait, sal in crystallis concretum, coloris caerulei subviridescentis; sal hoc ipsum facile deliquescit *) et in vase vitreo exactissime clauso adservari debet. Dum sal hoc parum humidum involvitur bractee tenui stanni, pars ejus in liquorem acidum deliquescit, stannum adgredientem, hinc et alio colore tingendum: calefieri tum sal incipit, plurimumque vaporem acidi nitrosi expellit; calor eatenus increfcit, ut manum laederet; sal demum cum explosione incen-

*) In hoc omnes consentiunt, quicumque crystallos et sal ex solutione hac obtineri adserunt, praeter solum *Cl. BAUME*: sed haec non sola instantia est, ubi *BAUMEUS* rem vidit, quam Chemici reliqui omnes videre non poterant: observationem hanc ipsi Gallorum Chemici dudum fecerunt: ne fors durius loqui videar.



cenditur; si bracteola stanni, in quo sal involutum haeret, tenuior fuerit, ab explosione hac hinc inde laceratur — . Phaenomenon hoc *Cl. HIGGINS* per dotem exponit, qua sal nitrosum basi cuprea gaudet, mediante calore lenissimo detonandi. Dum ficcum probe est, sufficit ad salis hujus inflammationem, si calori exponatur, a quo manus nondum laeditur. Ab humiditate itaque adtracta portio salis in liquorem acidum resolvitur; acidum hoc agit in stannum eo violentius, quum magna sit superficies stanni, quam in hoc tentamine offendit; unionem contrahens cum stanno nitrosum acidum incalefcit; et calori huic eidem inflammatio subsequens salis, ac detonatio, omnium vix non salium nitroforum inflammationis comes, adtribuenda erit.

CHARTA repetitis vicibus solutioni cupri immerfa ea ratione, ut post quamvis immersionem denuo siccescat, etiam inflammatur ope caloris, manum non multum adficientis. Ex hac expositione satis adparet, quas adhibere debeamus cautelas ad hoc, ut bene succedat experimentum, quae etiam essentiales maxime, observatuque necessariae sint circumstantiae. Quum vero sal inflammari nequeat, nisi aquoso latice adhaerente privatum fuerit, notatu dignum est, aquam illam in hoc experimento velociter adeo dissipari; multum enim abest, quin calor major, et per longius tempus etiam protractus sal hoc tam cito ficcum reddat, quam quidem et hic, et in universum, ubi cum stanni bracteis contactum alit, evenire solet. Interrogat, qui observationem hanc in *Journal litteraire de Berlin* inferuit, an, quum sal nitrosum cum basi stannea humiditatem avide in sese rapiat, cita haec exsiccatio salis nitrosi cum basi cuprea inde exponi non posset, si adsumere velimus, quod sal hoc ultimum, quum humiditatem minus avide adtrahat, a sale nitroso cum basi stannea aqua adhaerente privetur?

\$. 476.

CIRCA inflammationem salis cupri STAHLIUS dum notavit, cupro in aqua forti soluto, et *spiritu urinoso addito*, sub initium adfusionis praecipitatum album cadere, adfuso autem sensim spiritu urinoso, denuo id resolvi, et colore sapphirino intenso tingi; evaporatione ad spissio rem usque consistentiam protrahita, et massa hac salina calori candescentiae fere exposita, explosionem subsequi, auri fulminantis in morem. Retinuisse hic STAHLIUM quaedam, suspicatus fuit CL. BERGMANN, quum res tentanti non successerit.

S. 477.

Aqua regis, ratione intermedia inter acidum salis et acidum nitri, cuprum solvit; solutio caloris ope vivacior exurgit, etsi et abs hujus auxilio queat perfici. Color inter caeruleum et viridem dubius est, in saturata solutione virens manifestius est. Ex solutione hac nullas obtineri crystallos *Cl. BAUME*, irregulares, opacas, subalbicantes ex ea nasci *Cl. WALLERIUS* dixit. Sal metallicum informe obtineri potest, aciculis interspersis minimis constans, in aëre libero non satis persistens.

§. 478.

Acetum resolvit cuprum, caloris et decoctionis ope; acetum viridi colore inde tingitur. Partes acetum decem ad unam partem cupri requiri, Cl. WALLERIUS monet. Cuprum in lamellas tenuissimas redactum, aut limatura demum cupri ad solutionem hanc recipi debet, ut acetum solvere, ob adaucta contactuum puncta, metallum eo melius queat. Ex caeruleo viridescens crystallus ex hac solutione nasci, adductus modo

Pars I. Q. Au.

Q

Au-



AUCTOR ex JUNCKERO retulit, virides tamen abs caerulei nota vidi, dum adhuc erant integrae; caeruleescebant, dum in calcem abiturae jam videbantur. Crystallos haec, quas rhomboideas dixit BAUME, solutas, ac in solutionem auri aqua dilutam instillatas, aurum pulcherrimo nitido colore praecipitare, JUNCKERUS notavit. *vid. cap. de AURO. Aeruginem rasilem* Vetteres parabant ex madefactis aceto cupri lamellis, et aerugine iis adnata, abrafa.

§. 479.

VINUM pariter resolvit cuprum, atque hujus operari solet optime sal illud metallicum, quod sub nomine *viridis aeris* in officinis notum est. Tradidit latissime viridis aeris, uti *Montispeffuli* paratur, historiam Cl. MONTET, in Dissertationibus binis, in *Memoires de l'Acad. royale des sc. de Paris* 1750. et 1753. insertis. Excerptis inde juverit praecipua rei capita. *)

§. 480.

CUPRUM, quod *Monspeliis* adhibetur, Suecicum omnium est praestantissimum, quod Ill. MUSCHENBROECKIUS etiam notavit; ratio in faciliiori solubilitate speciei hujus in aceto reposita videtur; experimenta liquidem docuerunt, quod in eadem copia aceri major pars cupri Suecici, quam quidem cupri Japonici resolvatur. Cuprum hoc in laminis ferreis circularibus

*) SEQUITUR hic inprimis fui compendium hujus distribit *Comment. de rebus in scientia nat. et Medicina gestis T. IV.* insertum; adjectis tamen, quae notatu digna, et in compendio hoc omissa fuerant, variis.

bus viginti digitorum transversorum diametri, et quatuor ad sex librarum pondere adfertur, utiliterque adhibetur: leviores enim nimis tenues sunt, nec aeruginis formationi inserviunt. In minores autem partes forfice dividuntur laminae, et malleo percussae poliuntur. Sunt qui eas recentes, nondumque ad usum adhibitas, praeparant, quod fit, dum trium quatuorve dierum spatio eas in viridi aeris recondunt; siquidem aliquam acidi partem adtrahunt, in superficie jam exduntur, et solutioni faciliori inde patent. Vasa, in quae induntur, ex argilla, urnarum forma parantur, et per octo circiter dies vino, ad parandam aeruginem jam adhibito, humectantur, absque hoc enim adminiculo liquida transmittunt. Vinum, quod ad hanc operationem adhibetur, praeter acidam, inflammabilem etiam partem contineat necesse est. A vino vero ipso viridis aeris perfectionem plurimum dependere, vel ex eo satis patet, quod in pluribus aliis regionibus, quin et in ipsa Gallia eodem ex cupro Suecico, eadem exactissime observata methodo viride aeris parare voluerint, nunquam tamen possibile fuerit, bonum adeo conficere, uti Montispeffulanum per experimenta omnia deprehenditur. Monuit in publicis Praelectionibus Cl. de JACQUIN spem adfulgere, fore ut in *Bonnat* res bono cum successu tentari possit, quum climatis par sit ratio, uti Monspeli.

S. 481.

RACEMI vitis, seu pedunculi uvarum, quibus involvitur cuprum, praeparatione aliqua etiam indigent; debent enim prius exsiccare, tum vero vino humectari; sedulo tamen cavendum est, ne oleum inmiscetur, quod maxime aeruginis formationi resistit, quum cupri laminae vernice pingui obducatur, et acidi vires obtundat. Racemi sic parati, sicci, vino aut recenti, aut



jam ad simile opus adhibito, quod *vinasse* vocant, macerandi per duos dies, in glomeres componendi, et fermentationi exponendi sunt, quae suum dicitur consequuta fuisse terminum, si lamina cuprea percalefacta inposita ab acido vini adrodatur. Aestate octo circiter diebus absolvitur, hyeme longiori tempore indiget; totum vero negotium in cellis subterraneis perficitur. Tunc vinum effunditur, et racemi laminaeque cupreae calefactae in vasa per strata succedentia sibi invicem disponuntur; ea tamen observata lege, ut infimum stratum ac supremum semper ex racemis fiat; totum tegitur operculo, et cuprum actioni acetosi acidi, in racemis contenti, expositum manet tamdiu, donec albicantia in laminarum superficiebus appareant puncta; per tres plerumque, aut quatuor dies operatio haec prima durat: reponuntur tum in locum quemdam, quo exsiccantur; interea temporis aliquoties vino, vel *vinasse*, vel, quod pejus est, aqua humectantur, denuoque exsiccantur, simulque musci instar materies viridis efflorescit, quae *aerugo* est, et abraditur. Exsiccatae laminae ad eundem denuo adhibentur usum, donec demum tenues adeo evaserint, ut radi amplius nequeant. Aerugo in vasis collecta, exsiccataque in majores massas abit, optime tunc aliquantum, antea quam prorsus exsiccantur, liquore ex *vinasse* destillato, qui subtilius acetum vini sistit, irrorantur.

§. 482.

Est itaque *aerugo* verum sal metallicum, ex conjunctis cum acido, et inflammabili principio vini, particulis cupreis efformatum, quibus et aquosae molecule accefferunt. Cuprum quidem ab omnibus fere succis, salibus, oleisque solvitur, praestat vero in hac operatione solvendi vi vinum, acida parte cum inflammabili mista. Acidum fermentatione incipiente exsolvitur, ea tamen perfecta inflammabile principium

diss.

diffipatur. Hinc omnium vinorum usum non competere, clarum est; nimis acida vero pauca spiritus vini portione addita corriguntur. Optime conveniunt vina *Perolensia* (*vins de Perols*) quae forte, ad mare dum crescunt, aliquam salis marini copiam tenent, quum alii marino sale addito praeparationem aeruginis juvare soleant. Ad fermentationem gradum caloris thermometri Reaumuriani decimum, aut decimum octavum demum esse sufficientem observavit *Cl. MONTET*. Inmissarum laminarum cuprearum superficies ab acido adroduntur, et dissolutae molecule phlogisti partem perdunt, atque ex mutata superficie colorem reflectunt viridem. Phlogiston autem perire ex eo clarum est, quod aerugo absque fluxu nigro addito in cuprum reduci non possit. Efflorescunt puncta albicantia, si integre phlogiston fuerit exsolutum; constituunt autem sal metallicum, quod primo observavit *Cl. MONTET*, subdulce, sacchari saturni adinstar; crystallorum tamen figura variat, vel stellulas, vel ventilabra effingunt, nec non sali volatili animalium accedunt. Repositae autem laminae, et a *vina* exsiccatae, novoque acido quasi nutritae, perfectam demum aeruginem efformant, quae acris et inutilis evadit, phlogisto nimis dissipato; hoc enim unctuositatem quasi addens, ut a laminis separari possit aerugo, efficit: *) unctuositatem etiam hanc in aerugine ad picturam esse requisitam, bene monet *Cl. MACQUERUS*. Invenit demum *Cl. MONTET*, octo uncias rite praeparatae aeruginis, aëri expositas, dimidiam ponderis partem amisisse; destillatio inde separavit

Q 3

*) TENTAMINE hoc confirmavit *Cl. MONTETUS*; cuprum etenim, in urina suspensum, exhalante alcali volatili solvitur, et in viride aeris convertitur, sed adeo firmiter adcrescens, ut vix inde separari poterit.



ravit duas et dimidiam unciam spiritus acidi, fortis et ingrati odoris; restitit in fundo vasis materies grisea unius et dimidia unciae ponderis, quae commista aequali ponderi fluxus nigri, et per horam igni exposita, optimi cupri unciam duasque drachmas dedit. Haecenus compendiaria diatribes Cl. MONTETI recensio.

§. 483.

AERUGO sic parata colore donatur pallide viridi; in acido vitriolico, acido muriatico, aceto probe solvitur. Ex solutione aeruginis in aceto paratur *aerugo* absurde sic dicta *destillata*, destillatio enim hic nulla omnino adhibetur; *aerugo crystallina*, *aerugo depuratissima* in *crystallos redacta*, aut *sal* demum *cupri acetosum crystallinum* aptius vocanda. Solvitur in hunc finem *aerugo* Montpelienensis in aceto vini generoso, donec acetum aerugine omnino saturatum sit, quae solutio in cucurbita, balneo arenae moderate calenti inposita optime perficitur. Acetum tingitur sic colore viridissimo, aut subin ad caeruleum nonnihil tendente, quo in statu *tingiturae veneris* nomine ab auctoribus quibusdam donatum fuit, etsi *solutio cupri acetosameraca* melius longe diceretur. Solutio haec a residuo viridi aeris non ultra solvendo decantatur, filtratur, evaporationi et crystallisationi exponitur, dispositis, si lubet, per vas, in quo continetur, bacillis ligneis, tenuissimis. Enascuntur sic crystalli pulcherrimae virides, in caeruleum hinc inde tendentes, obliquangulae, homaedrae, tetraedrae, prismaticae, uti Cl. de l'Isle eas descripsit, et figura expressit.


§. 484.

CRYSTALLI nunc descriptae, in spiritu vini solutae, chartaeque inhibitae, verba JUNCKERI sunt, incun-

duntur, et cum viridi flamma subtiles cupri atomos secum in auras rapiunt: si vero destillentur, reddunt *acetum valde concentratum*, cujus pars instar spiritus vini ardet, pars altera valde acida, et tamen aliquantum volatilis est, unde pene integra a solutis corporibus iterum abstrahi potest, quod a vulgari aceto vix ita expectandum erit. Quapropter ZWELFERUS ipsum *Alkabeſti* titulo insignit, et forte idem, vel non plane abſimilis huic est decantatus ille SIGERO WEIDENFELDIO *spiritus vini philosophicus*. Ut acetum hoc, quod *spiritus cupri*, *aceti eſurini*, *aceti radicalis* &c. nominibus auctores insigniverunt, obtineatur, aut cryſtalli veneris, aut aerugo Monſpeliensis inmittitur in retortam ea lege, ut tertia pars vasis maneat vacua, colulum retortae aerugine non conſpurcetur, quem in finem ope infundibuli inmitti poterit, cujus tubus in ventrem usque retortae pertingat, et aerugo, aut cryſtalli prius conminuantur: ignis lenior sub initium adhibeatur, et prout intenditur, exiens acetum ſeorſim adſervetur, ut ſic phlegmatica pars dirimatur a meraciori: finita erit operatio, dum, retorta jam jam candente, nil ultra prodierit.

S. 485.

OBTECTUM ſic acetum odore penetrante, pungente nares, tuſſim excitante, ac vitriolico acido phlogiſticato fere analogo, ſuffocandi dote, gaudet. Purum a cupri labe obtinetur, dummodo non ad ultima usque protrahatur operatio: a venere immune eſſe demonſtratur limpiditate perfectiſſima, nec virore ullo oculos feriente. Obſervat Ill. Comes de LAURAGAIS, acetum hoc, in vaſe latiori igni expoſitum, incendi, ac, alcoholis adinſtar, totum abs reliquo deſlagrare, quo, in aceto alcohol deliteſcere, ſatis omnino demonſtrari ait Cl. MACQUER. Vidit et Ill. Comes de LAURAGAIS,



tum et *Marchio de COURTENVAUX*, spiritum hunc veneris concentratissimum abs ullo addito solidam formam per se accipere, ac in crystallos condensari. Huius et alkoholis unione *aether* constituitur *acetosus*, alibi expositus. Monendum adhuc ex crystallis veneris majorem longe copiam obtineri, quam si aerugo simplex recepta fuerit.

§. 486.

PERACTA operatione in retorta invenitur cuprum in pulverem erosum nigricantem, massularum friabili-um sub forma cohaerentem, carbonaceum, ex quo cuprum, addito fluxu nigro, facile recuperari potest; ait tamen *Cl. WALLERIUS*, obtineri ex residuo solutae in aceto aeruginis, cum fluxu nigro igni commisso, metallum pallidum, fragile, aes campanum referens; lutea aliisque substantiis admistis, metallum coloris aurei, ductile nunc praebiturum.

§. 487.

VIRIDE *aeris* in pulverem tritum, nitro remistum in igne detonat, magma relinquit, in aëre deliques-
cens, *oleum viridis aeris* dictum. Cum sale ammo-
niaco, cum sale communi, ac lateribus, cum mercu-
rio sublimato destillationi expositum, in primo casu
largitur *spiritum viridis aeris* virentem, ac *ens*, seu
flores veneris, in altero casu *spiritum* subtilem grada-
torium obtineri BECHERUS dixit, in tertio demum ca-
su liquorem prodire gravem, clarum, mobilem in-
star mercurii vivi, continue fumantem, JUNCKERUS
refulit. Cum mercurio currente tritum, addita aqua,
amalgama constituit, mercurio venerem in complexus
suos rapiente. *Mercurium* venere *coagulatum* obti-
neri ait *Cl. WALLERIUS*, si partes sex viridis aeris cum
ana-

anatica dosi falis communis misceantur, miscela coquatur in vase ferreo, addito duplo aut triplo aquae, aceto remistae; solutioni huic nunc ebullienti injiciantur partes quatuor mercurii, coctio continuetur, et miscela tota probe agitetur spatula, donec tum spatulae, tum vasis fundo adhaereat massa subflava. Effundi de in aqua debet, massaeque flava in mortario addita aqua pura, saepius renovanda, tamdiu teri, donec color enatus in illa fuerit splens. Obtinetur vero hic nil nisi purum putum amalgama cupri cum mercurio, in aëre firmam adsumens consistentiam.

§. 488.

SOLVITUR cuprum et in *oleis* ob latens in his principium salinum. Sumsi cupri lamellas tenues, adfudi oleum olivarum purissimum, recens, elapso vix non mense, oleum viridissimo jam tinctum erat colore, in cupri lamellis hinc inde flosculi propullulabant aeruginis: oleum injectum igni flamma viridi deflagrabat. Ab oleis aethereis acrioribus cuprum eo citius adroditur; patet hinc, quantae cautelae adhiberi debeant, dum olea haec ex vasis destillantur, ubi cupro venire queunt obviam: patet simul, examinandum probe esse, dum oleum essentiale viridi colore tinctum prodit, an color hic natus oleo inhaereat, qualis v. c. in oleo salviae, absinthii &c. deprehenditur, an vero vasi debeatur, ex quo evocatum oleum fuerat, uti v. c. in oleo Copaivae *Cl. KIRSTENIUS*, in oleo baccarum juniperi *Cl. VOGEL* adnotarunt.

§. 489.

TARTARVS cum cupro decoctus, solutionem praebet viridem, uti *GLAUBERVS* jam adnotavit.



§. 490.

Succus *citri*, *aurantiorum*, *berberum*, *ribium*, alique vegetantium succi acescentes, aut sapidi solum, innumeri cuprum solvunt, et virides varias solutiones producunt. Saccharum, cum cupri lamellis, aut exili limatura metalli hujus mistum, levissime humefactum, magna mox producit virens.

§. 491.

LAC aeruginem excitat, *oxygala*, *serum lactis* cuprum solvit. A sudore solvi cuprum, exinde jam satis adparet, ait *Cl. WALLERIUS*, quod acus capitatae, corpori viciniore, virescant. Observatur id imprimis in illis, qui crinibus pectinem aurichalceum, aut crinales acus cupreas, vel aurichalceas, insigunt; viridi colore in his tinguntur instrumenta haec, et capilli ipsi virides demum redduntur. *Lotium* etiam cuprum in calcem viridem, subalbentem erodit. Veteres *aeruginem Scolecciam*, vel *chrysocollam*, fibrosam adpectu, pararunt terendo lotium, aut nitrum, seu natron potius in mortario cupreo ope pistilli ex hoc eodem metallo fabrefacti.

§. 492.

SAL *alkali fixum* cuprum solvit: salis hujus concentratius lixivium cum limatura cupri per aliquod temporis spatium decoctum, tum refrigerio expositum, obducitur aerugine viridi: si solutio alkalina saepius cum cupro ad inspissationem usque decoquatur, solvatur, evaporanda denuo, obtinetur demum solutio caerulea cupri in sale alkalino. Citius resolvitur ope salis alkalini caustici, vel si, una cum sale hoc remistum igni violento exponatur, et massa residua aqua ebul-

ebulliente solvatur. Ex solutione cupri in sale alkalinom minerali sal hoc abs ullo adhaerente cupro crystallatione demum extricari *Cl. MONNET* retulit.

§. 493.

SAL alkali volatile cuprum etiam penetrat. Sal hoc partibus oleosis mistum, uti v. c. spiritus cornu cervi est, solutionem saturate sapphirinam, sal veropurum solutionem eleganter cyaneam producunt. Lenta vero solutio cupri in sale hoc est, quum ob volatilitatem alkalini salis calor major, quo solutio redderetur facilior, admoveri nequeat. Phaenomenon singulare in solutione hac plurimi adnotarunt Chemicici; ajunt enim solutionem hanc pulcherrime cyaneam excolorem prorsus reddi, vase clauso, et per aliquot dies non aperto. Sequentia ego ipse observavi; solvi cuprum in bracteolas tenuissimas expansum in spiritu salis ammoniaci optimo, solutionem obtinui saturate cyaneo colore praeditam; fieri tum jussi globum vitreum in tubum quatuor pollices longum productum, apex tubi foraminulo minimo patebat, et lumen totius tubi vix $\frac{1}{2}$. lineam aequabat: calefeci globum supra flammam candelaee, ut aer inde expelleretur; immisi tum apicem tubi in solutionem prius filtratam; illico impetu maximo introrsum rapiebatur solutio: hoc facto apicem tubi ope cannulae ferruminatoriae hermetice clausi: vidi tamen mensibus novem elapsis nec minimam adhuc in colore accidisse mutationem. Globum hunc pluribus monstravi, qui solutionem in vase clauso excolorem fieri dixerant.

§. 494.

SOLUTIONE cupri in sale alkalino volatili aëri exposita, salis pars maxima in auras avolat: oriuntur
sub



sub finem crystalli caeruleae, demum, uti *Cl. BAUME* dixit, viridi colore tingendae: crystallorum figuram non determinavit. Crystallos nullas enasci, nisi acidum quoddam fuerit superadditum, *Cl. MONNET* statuit. Dos cupri, qua minima sui parte sal alkali volatile colore cyaneo tingit, inservit explorandis diversis liquidis, an cuprum in iis contentum sit.

§. 495.

NITRO cum limatura cupri misto et in crucibulo igni exposito, aut limatura haec eadem nitro, in crucibulo fluenti, injecta, cuprum in calcem exeditur: alkalifatum nitrum elixiviatione tolli a calcinata venere valet. Detonatio hic vegeta illa non obtinet, quam in miscela nitri cum limatura ferri observamus. Si pars una cupri misceatur cum partibus binis nitri, operatio instituaturs dicta prius ratione, et tinctura ope alkoholis extrahatur, obtinetur sic *tinctura veneris DEMOCRITI*.

§. 496.

A salis communis unciiis octo cum libris quinque aquae in lebetè cupreo decoctis grana cupri viginti in aeruginem fuisse erosa, *Cl. ELLERUS* notavit. Cuprum ait *Cl. WALLERIUS*, si cum sale communi fundatur, et massa dein aëri exponatur, cuprum aequè ac sal commune aerugine obducitur.

§. 497.

SALIS ammoniaci saturata in aqua solutio cuprum resolvit, si bracteolarum tenuissimarum sub forma solutioni committatur, et solutio, uti saepius observavi, sapphirina obtinetur, etsi colore ex caeruleo viridi tin-

tinctam esse *Cl.* WALLERIUS adseruerit : vidi vero simul, cuprum solutum denuo sensim excuti pellicularum tenuium terrestrium, colore viridis montani praedictarum, summitem solutionis obsidentium sub forma, fere uti in excussa ex aqua calcis calce obtinet: pelliculae hae probe elotae, ficcatae, in pollinem laevigatae, tumque fluxu congruo remistae, elegantem dederunt colorem viridem, vasis murrhynis et psevdomurrhynis inductae; etsi quidem, taediosam hanc fore coloris praeparationem, si quis majori copia facere eum vellet, moneri omnino debeat.

§. 498.

CRYSTALLI venerae obtinentur uniendo partem unam limaturae cupri cum partibus tribus salis ammoniaci, miscelam decoquendo in quadrupla quantitate aquae, donec siccescat massa, aëri exponenda, ut in deliquium abeat, tumque exsiccanda, aërique exponenda denuo. Ex destillatione vero limaturae cupri mistae sali ammoniaco, ac superaddito oleo vitrioli *spiritum veneris* prodire notavit denuo *Cl.* WALLERIUS.

§. 499.

SALIA vitriolica pulveri carbonum mista, et sic in hepar sulphuris mutata cuprum pariter solvunt.

§. 500.

SULPHUR cuprum penitus resolvit; stratificato cum sulphure cupro, atque igni exposito, massa obtinetur nigricans, fragilis, *aeris usti* sub nomine veniens, (etsi quidem *aer ustum* etiam ex residuo a destillatione viridis aeris, atque ex caementatione cupri cum sale communi et nitro adquiri possit.) Massa illa in aquam ebul-



ebullientem injecta, elota, aquam totam vitriolicam reddit, atque vitriolum crystallisatione potest obtineri verum cyprium, uti alio loco descriptum latius habetur. Quodsi cupro fuso sulphuris fragmina successively adjiciantur, obtinetur exin *lapis cupri purus* (Spurstein) colore griseo donatus, fragilis; injectae calenti massae guttae aquae violenter rejiciuntur, simul vero cupri pars in formam capillarem surgit, ut cuprum nativum capillare satis aemuletur.

§. 501.

ACIDUM *Phosphoricum* in cuprum vivide agit, observante Ill. MARGGRAFIO.

§. 502.

SAL *fusibile microcosmi*, via *humida* parum, via *secca* melius cuprum solvit.

§. 503.

ACIDUM *formicarum* cuprum ipsum levissime, melius vero calces cupri solvit, ac in crystallos pulcherrimas, virides, firmas concrefcit.

§. 504.

EXAMINANDAE nunc veniunt cupri ex solutionibus suis et menstuis *praecipitationes* variae. Notandum hic in genere venit, cuprum ex menstuis suis, aliarum substantiarum metallicarum in morem, *salibus alkalinis*, *terris absorbentibus*, *corporibus metallicis*, imprimis ferro et Zinco &c. praeceptis dari: adducam recepta lege notatu digniora.

§. 505.



§. 505.

Ex *vitriolico acido* cuprum dejicitur per *sal alkali fixum* in *sulphur*, sic ineptissime dictum, *vitrioli veneris fixum*: ferri ope dejicitur sub forma metallica in *cuprum praecipitatum* per excellentiam dictum. Praecipitatio haec celeberrima est, quum insignis hujus ope utilitas obtineri possit. Dantur siquidem variis in locis, imprimis in fodinis Hungaricis *Neosoliensibus*, *Schemnizensibus*, *Carpathicis*, *Fahlunensibus Sueciae* &c. aquae subterraneae vitriolicae cupreae, ex lapideo pariete sponte profluentes, quae considerari queunt, cœu solutiones vitrioli cupri naturales: resolvunt enim revera vitriolum venereum illis in locis per quae transierunt: aquae hae, si vitriolo ditiores fuerint, caeruleae satis sunt, in foveis fodinarum collectae cuprum quod secum vehunt, deponunt atomorum exilium sub forma in varia corpora; unde differentia enata est *cupri praecipitati sine basi*, praecipitati *basi ferrea*, *basi lapidea*, *basi terrea*, et *basi vegetabili*, pro diversitate rei, in quam deponitur; quas species CL. CRONSTAEDT uno titulo *cupri nativi, particulis conglomeratis, distinctis* complexus est. Solent vero imprimis *aquis* hisce *vitriolicis* quas Germani *Cämentwasser* dicunt, inponere ferrum, supra quod cuprum optime praecipitatur; cuprum tale vocant *cuprum caementatum*, probe tamen distinguendum a cupro caementato paulo ante dicto.

§. 506.

REI minus gnari putarunt mutari sic ferrum in cuprum, atque vasa ex cupro tali fabrefacta miraculi quasi in gratiam auro interne inducta inter cimelia reposituerunt: verumenimvero miraculi plane nil hic intercedit, sed res tota exin dependet, quod major adfini-



finitas intercedat vitriolico acido cum ferro, quam quidem cum cupro, hinc vera praecipitatione cuprum ex priori menstruo praeceptus datur, et aqua caementitia ex venerea in martialem abit, adeo, ut vitriolum ferri elicere ex ea dein possis. Praecipitatur autem cuprum hic sub forma metallica, uti plerumque evenit, dum metallum unum ex menstruo suo praeceptus datur per metallum aliud. Cuprum tale purissimum est; monet verissime *Cl. CRONSTAEDT*, vix forsitan dari cuprum nativum, nisi ubi aquae caementitiae confluxus olim fuerit.

§. 507.

RETULIT *Cl. BACKER*, qua ratione ex cupro in acido nitri soluto *vegetatio* elegans *metallica* obtineri queat. Inponi debet lamina cupri polita in unciam unam cum dimidia aquae fortis; elapsis horis duodecim denuo eximatur, et solutioni cupri addatur portio quaedam solutionis spissioris albicantis *) mercurii, ope aquae fortis paratae; adjiciatur et pars minor salis ammoniaci in pulverem subtilem triti, agitetur miscela, donec liquatum sal fuerit, addatur ammoniacum sal novum, liquidum agitetur denuo, idque repetatur tandiu, donec enascatur color dilute caeruleus, et solutio tenax quodammodo evadat; immittatur ferrum politum, pollicem longitudine exaequans, dum cupreum exhibet colorem denuo eximatur, inponatur tabulae vitreae, illiniantur guttae binae vel tres solutionis, quae prius agitanda probe erit plumula ex late-

*) QUA ratione spissa et alba haec solutio parari debeat, nil additum video; solutio certe mercurii in acido nitroso legitima nec spissa, nec alba est. Nil etiam circa haec *Cl. WALLERIUS* addidit, qui observationem hanc *Backerianam* refert.



lateribus tenuiter adeo, ut vitrum diaphanum maneat, reponatur totum in situm horizontalem. Vegetatione ad finem perducta, ferrum tenaculo aufertur, locus, cui incumbibat, charta emporctica siccat, vitrum vegetationem sustinens caute aquae immergitur, ac ope alterius vitri, frustillis nonnullis suberis utrique vitro interjectis, incumbentis exsiccat.

§. 508.

CUPRUM ex solutione sua nitrosa praecipitatur per *sal alkali fixum* colore viridescente: ubi fuerunt nonnulli praecipitatione tali per cineres clavellatos facta, ut imitarentur, quod a natura praecipitatum invenitur in fodinis nomine *viridis montani*, seu *ochrae cupri viridis*. Obtinuerunt quidem praecipitatum hoc artificiale simillimum illi naturali; discrimen tamen in eo erat, quod, dum praecipitatum artificiale adhiberetur in arte tinctoria, non adeo constanter colorem suum servaret, sed mutaretur in fuscum; ubi contraria ratione viride montanum verum colorem suum sat constanter retinere solet.

§. 509.

SOLUTIO cupri in acido nitroso ab *instillato spiritu urinoso* colorem cyaneum induit: resoluta sic venere, ab addito *sale communi* flavescit.

§. 510.

Ex *solutione muriatica* praecipitatur cuprum forma metallica per *ferrum*, calciformi viridi per *sal alkali fixum*. *Sal urinosum* colorem caeruleum producit.

Pars I.

R

§. 511.



§. 511.

VIDEAMUS nunc *miscelas veneris cum substantiis metallicis ac semimetallicis.*

CUPRI cum *auro* miscelam in *capite de Auro* exposui.

§. 512.

CUPRUM cum *argento* mistum vidimus in *capite de ARGENTO.*

§. 513.

CUPRUM cum *platina* mistum vide in *capite de PLATINA.*

§. 514.

CUPRUM cum *ferro* mistum vide in *capite de FERRO.*

§. 515.

Cum *stanno* cuprum facile coit, atque miscela haec in variis artibus utilissima deprehensa fuit. Quum stannum metalla omnia ductilitate magis minusve privet, dotem hanc et in cupro exferit; cuprum hinc fragilius evadit, durius, minus ductile, magisque sonorum. Experimentis *Muschenbroeckianis* constat, *) aes maximam adquirere firmitatem, quando ad partes quinque vel sex adjicitur una pars stanni: quo plus stanni

*) MONUIT simul *Ill. Vir*, non omne aes fulvum aequè bene recipi a stanno, quod interdum difficultatem stannariis parit, dum in aliquos usus duritiem stanno inducere nituntur.

stanni admistum fuerit, eo fragiliorem durio remque fieri massam, ut tractari amplius nequeat, limamque respuat, pallefcere tum, et speculis inservire. Adparet hinc, pergit *MUSCHENBROECKIUS*, *tormentis bellicis* convenire ad aeris partes quinque vel sex addidisse partem unam stanni, quia tum metallum firmissimum, durum, et admodum elasticum fit: est quidem aurichalcum firmitus, et ideo ratione firmitatis praestaret; sed regulum, qui est in lapide calaminari, aer brevi tempore exest, nec aurichalcum aeris injuriis diu resistit, ideo *tormentis bellicis*, et *subdialibus* instrumentis non convenit. Caeteroquin *CRAMERUS* dixit, si cupri decem partibus una stanni addatur, et simul aurichalci, vel Zinci pauxillum, nascitur inde *aes campanarum*, vel *tormentorum bellicorum*, fragile, et maxime sonorum. Ideo nonnulli aeris libris centum-stanni libras decem, aurichalci libras octo, adjiciunt: alii ad aeris libras centum addunt stanni libras decem, aurichalci libras quinque, et plumbi libras decem. Aucta hujus misti metalli firmitas manifesto ostendit, stannum inter partes aeris interfusum, munere glutinis fungi, et partes partibus copulare, quumque poros aeris adcuratius implet, stannum densitatem aeris quoque auget, adeo, ut majoris gravitatis specifica evadat, nam gravitas specifica paris copiae aeris et stanni oportebat esse 7, 7384. quum fuerit 8, 62500. quae multo major quam in solo aere est.

§. 516.

INSTITUIT *MUSCHENBROECKIUS* tentamina plurima cum diversis cupri et stanni speciebus. Quum a pari copia aeris Japanensis et stanni Bancas gravitas specifica esse debuisset 7, 9776. experientia dedit 8, 6362. Aes Japanense mistum cum stanno Bancas majoris est firmitatis, quam aes barbaricum mistum cum

R 2

stanno



stanno anglico: maxima enim firmitas misti aeris barbarici cum stanno anglico fuit librar. 1190. quum aeris Japanensis et stanni Bancas fuerit firmitas librar. 1662. fere uti 2. ad 3. sed minus. Notandum simul, aes Japanicum ignitum cudi non posse, veluti aliae aeris species, sed cudi frigidum, quumque induruerit, igniendum esse, ut mollescat, quo facto in quamlibet denuo effigiem formari potest. Haec debentur MUSCHENBROECKIO, longior experimentorum enarratio apud ipsum *Cl. Auctorem* videri omnino debet.

S. 517.

DIVERSA nonnihil retulit *Cl. WALLERIUS*. Si, ait, centum partibus cupri, partes duodecim stanni, quod octavam circiter constituit partem, jungantur, fusionis ope exsurgit metallum mistum durum, flavicans, quod *metallum tormentorum* dicitur; inprimis hoc succedit, dum exigua copia aurichalci fuerit superaddita: plerumque tamen stanni loco plumbum recipiunt, sub mutata nonnihil proportionem. Dum vero centum partes cupri junguntur cum partibus viginti stanni, (quod quintam constituit partem, etsi alii partem tertiam, aut plus adhuc, uti v. c. in *Suecia* ad partes 16. cupri partes 4. stanni cum additione aurichalci, aut Zinci recipiant) miscela enascitur tinniens, sonora, pallide flavescens, campanis idonea, atque hinc *metallum campanarum*, aut *aes caldarium* dicta, *speculis causticis* etiam idonea. Adhibent nunc plerumque plumbum stanni loco, ex qua additione sonus longe alius, forma, magnitudineque campanae iisdem positis, producitur. *PLINIUS* ad aes caldarium exigebat centum partes cupri, et quatuor partes stanni; *Veteres* centum partibus cupri duodecim partes stanni cum una dimidia adiciebant.

S. 518.

§. 518.

Ex miscela partium trium stanni cum parte una cupri, paucoque arsenico, adjecto fluxu nigro, aut nitro ac sulphure, queis arsenicum figitur, ac metallum conservatur, massa obtinetur metallica firma, dura, colore *chalybeo* praedita, speculis causticis aptissima, metallum *chalybeum* dicta. *Indorum* metallum album *cancham*, aut *vongalam* dictum, octo partibus cupri, binisque partibus stanni componi, GERBERTUS retulit. *Stannum* demum *induratum*, et *resplendens* obtinetur unione partium duodecim stanni cum parte una reguli antimonii, et $\frac{1}{48}$ a parte cupri, ut adeo drachmae duae ad uncias duodecim veniant.

§. 519.

MISCELAM pro tormentis bellicis Galliae SWEDENBORG retulit sequentem: miscentur, ait, centum librae cupri purificati cum duodecim, vel quindecim libris stanni vetusti, quae simul funduntur; quum tenetur hoc in fusione, quod *balneum* vocatur, frustra, vel fragmenta campanarum, tormentorum, mortariorum, et utensilium misceri possunt; quoque plus stanni adponitur, eo fragilius redditur.

§. 520.

EL. SAVARY ad tormenta bellica decem duodecimve libras stanni adjungi centum libris cupri, pro aere campanarum vero ad centum libras cupri addi viginti, aut viginti quatuor libras stanni, et, ut sonus fiat eo gravior, binas simul libras antimonii illis adjici, indicavit.



§. 521.

IN *Anglia*, SWEDENBORG ait, ubi parantur *tormenta bellica*, recipiuntur centum quinquaginta librae stanni, et 2000. librae cupri, seu $7\frac{1}{2}$ Pc., quum 1. Ton, seu $7\frac{1}{2}$ pondo nautica sumenda sunt, requiruntur 16. tonnae carbonum fossilium; estque jactura metalli, quod in scorias abit, 400. librarum; sed scoriae rursus funduntur, ex quibus conflatur metallum tam stanni quam cupri potens, divenditur hoc *Londini* ad fusores, qui ex eo metallum album praeparant, quod vocatur *bell metall*; hoc continere solet 400. libras stanni, et 1600. cupri.

§. 522.

PRO *speculis metallicis*, ceu miscelam optimam KUNCKELIUS retulit sequentem; jungantur 3. librae stanni purissimi, et libra una cupri, fulis addantur 12. semunciae tartari rubri, et parum calcinati, 3. semunciae salis petrae, $1\frac{1}{2}$. aluminis, et 4. arsenici, quae primum bene defument, tum in typum effundantur. CARDANUS hunc in usum partes tres cupri, unam stanni et argenti, et $\frac{1}{8}$ antimonii jungenda esse voluit. BECHERUS miscelam ex partibus octo cupri, parte una stanni, et partibus quinque bismuthi praescripsit. Miscelam pro *speculis in quibus sunt lucernae* sequentem adnotavit SWEDENBORG *). Accipiantur duae librae cupri Japanici, fluant bene, immittatur dein libra semis aurichalci, quumque bene mista sint, adponatur libra semis Zinci Goslariensis, vel libra semis stanni anglicani, ultimo adjiciantur octo semunciae salis tartari, agitentur bene, quumque aliquam partem pingue-

*) COPIOSAE aliae compositiones apud *Auctorem* hunc occurrunt.

guedinis in miseris, effundatur in figuram, quam desideres; metallum dein poliatur.

§. 523.

OCTO tentamina instituit *Cl. BAUME* circa miscellam variam cupri cum stanno, adjecto etiam in quibusdam arsenico. Ex illis omnibus deduxit, cupro ductilitatem eripi a stanno magis aut minus, prout major minorve addita fuerit copia; tum et, ab arsenico cupro colorem eripi. *)

INCRUSTATIONEM cupri cum stanno in *capite de* STANNO adferam.

§. 524.

PLUMBUM cupro fusionis ope conjunctum substantiam metallicam constituit, ductilem satis, colore plumbeo donatam, si plumbum majori copia admistum fuerit. Rarior miscela haec deprehensa fuit in experimentis *Cl. KRAFTII*. Plumbum ex miscela hac sola eliquatione obtineri denno potest, quum cuprum majorem longe calorem requirat, ut in fluxum deducatur, quam quo ad liquationem plumbi opus est. Ex miscela plumbi et cupri, adjecto antimonio, characteres typographici passim funduntur. Proportionem quod adtinet, *Cl. SAVARY* centum libras plumbi ad libras viginti, aut viginti quinque cupri recipiendas esse tradidit. Alias miscelas alio loco adferam.

R 4

§. 525.

*) MONUIT vero egregius *TILLET*, colorem cupri a stanno prorsum suffocari, etsi cupri quantitas quantitatem stanni quater in miscela metallica excesserit; quo quidem phaenomeno mutua penetratio metallorum amborum satis omnino evincitur.



§. 525.

MERCURIUS cum cupro diversa ratione in amalgamatione jungitur. Vel enim teri possunt bracteolae tenuissimae cupri cum mercurio, quod inprimis succedit, dum cuprum, aceto aut sale communi addito prius, contritum fuerit; vel jungi tritu poterit mercurius cum cupro, dum ille in acido nitroso referatus prius, tum vero limaturae cupri adfusus, novusque mercurius additus fuerit, ubi dein aquae purae ope acidum omne eluitur, ac tritus tamdiu continuatur, donec amalgamatio fuerit perfecta; vel cuprum solvitur in acido nitri, deijcitur ex solutione diluta ferri ope, dejectum tritu unitur cum mercurio currente. Amalgama hoc decomponitur caloris ope, adeo ut mercurius per retortam avocari a cupro queat: in aëre libero autem lapideam fere duritiem demum adsumit.

§. 526.

REGULUS *antimonii* cum cupro abit in miscelam fragilem, coloris fere plumbei, aut, secundum *Cl. WALLERIUM*, in violaceum nonnihil tendentis. Miscela haec specificè major est, ex tentaminibus *Cl. GELLERTII*. Regulum *antimonii* miscelis variis metallicis adjici, antea dixi, et per decursum denuo adparebit. In fractura foliaceam exhibet texturam. Ex unione reguli *antimonii* cum anatica dosi cupri *regulum antimonii* pararunt olim *venereum*, inutilem diu officinarum sarcinam. Ex unito per fusionem regulo *antimonii* martiali stellato cum regulo *antimonii* *venereo* regulus oritur mistus, cupro, ferro, et *antimonii* ipsius reguli constans, in superficie retiformes ductus exhibens, qui *rete Vulcani* dicti fuerunt ab Alchemicis.

§. 527.

§. 527.

ZINCUM cupro facile nubit; atque hinc plurimae denuo utilitates redundant in diversas artes, latius mox exponendae. Ex anatica quantitate aeris fulvi et Zinci obtinuit *Cl. MVSCHENBROECK* metallum pulcri coloris aurei, frangendum in parallelepipedo quadrangulari $\frac{1}{10}$. poll. rhenoland. a lib. 108. et 148. grav. specif. 8, 0476.; aeris pars 1., Zinci pars $\frac{1}{2}$. dederunt metallum pallide aurei coloris, bene limam ferens;*) aeris pars 1. Zinci p. $\frac{3}{4}$. dant metallum pulchrum, quod bene potest limari, solutum, aurei coloris; aeris demum pars 1. Zinci p. $\frac{1}{4}$. dat metallum, pulchrioris flavi coloris, quam aurichalcum. Miscelam cupri cum Zinco specificè graviolem vidit *Cl. GELLERTUS*. Ductile adhuc nonnihil cuprum observavit *Cl. WALTERIUS*, dum partibus hujus quinque partes tres Zinci forent remissae.

§. 528.

PROUT jam diversa ratione cuprum cum Zinco jungitur, diversa etiam exsurgunt corpora metallica, suis quaeque nominibus notata, diversisque dicata usibus. Huc referuntur *aurichalcum*, metallum *Roberti principis*, *Pincheback*, metallum *Tombacinum* seu *Tomback*, *Similor*.

§. 529.

AURICHALCUM ut paretur, stratificatur cuprum cum lapide calaminari, vera Zinci matrice, **) et car-

R 5

bonum

*) OMITTAM in sequentibus grav. specif. et rationes fracturae, compendii gratia, omisi et miscelas ex cupro, Zinco, et ferro.

**) LAPIDIS calaminaris in locum cadmiam fornacum, vel et pseudogalenam ustulatam nonnunquam adhibent.



bonum pulvere, phlogiston requisitum subpeditante, mistum igni exponitur, atque hujus actione cuprum fluit, Zincum in minera latens expellitur, et carbonum pulvere in metallicam formam reducitur, cupro obviam factum illud forma vere metallica, non vero, uti NEUMANNUS cum multis aliis ratus fuit, terrestri, aut calciformi subit, et colore flavo magis minusve, pro diversa proportionem mutua, tingit: in genere tenendum est, colorem eo dilutiorem esse, quo major Zinci in cuprum absorpta fuerit copia: ductilitas aurichalco vix non eadem est ac aeri fulvo. Miscelas aurichalci cum Zinco et bismutho, apud *III. MUSCHENBROECKIUM* late videri queunt. Dixerunt nonnulli, aurichalcum a magnete adtrahi, aut acum magneticam versus, unum capsulae latus magis accedere; verumtamen rei minus periti pronuntiare hoc poterunt; et adtractio illa tum non nisi locum habebit, quando in aurichalco ferrum latuerit, quod revera in lapide calaminari, ochra ferri remisso, nonnunquam latet. Interim tamen *Cl. BAUME* Mineralogiam tum certe haud optime novit, quando ferrum et *Zincum* a magnete adtrahi scripserat.

§. 530.

OMISSIS, quum haec ad *docimasum* magis pertineant, fusioribus aurichalcum conficiendi descriptionibus, monuisse hic solum sufficiat, non eadem ubique parari methodo, et non eandem etiam constitutivorum corporum adsumi proportionem. In Galliis recipiunt, referente *Cl. GALLON* in *l'art de convertir le cuivre rouge en laiton*, libras triginta quinque aurichalci vetusti, aequam portionem cupri, et libras sexaginta lapidis calaminaris, cum adjectis libris viginti, aut viginti quinque pulveris carbonum: lapis calaminaris et carbones in pulverem reducuntur, trajiciuntur per cri-

cribrum, et aqua madefiunt: distribuitur dein totum per tigilla octo; igne per duodecim horas administrato, aurichalceus discus obtinetur, libras 85 — 87. pondere exaequans. Quodsi jam a rota summa miscelae librae viginti pro carbonum pulvere detrahantur, librae quadraginta lapidis calaminaris remanebunt, cui augmentum ponderis librarum quindecim debetur, quum quindecim et septuaginta efficiant octoginta quinque, seu pondus disci; etsi pondus hoc assignatum ex minimis adhuc sit. Lapis calaminaris hinc ultra tertiam partem ponderis sui aurichalcum enatum auget. Sub hac operatione in camino adfigitur *tutia*, seu *cadmia fornacum*, Zinci sublimata calce maximam partem constans, ac parando aurichaleo, uti prius dixi, pariter hinc idonea.

§. 531.

In fabricis *Goslariensibus*, notante SWEDENBORG, pro parando aurichalco miscelam faciunt ex libris triginta cupri, libris 40 — 45. lapidis calaminaris, et dupla portione pulveris carbonum. Ignis administratur per novem duodecimve horas. Centumpondium ibi loci augetur libris $32\frac{6}{7}$. Augeri libras quinquaginta quinque cupri libris triginta quinque LOEHNEISIUS de fabricis *Bündheimensibus*, et *Isenburgen-sibus* jam notavit. In fabricis *Suecicis* pro quovis tigillo adhibent libras quadraginta sex lapidis calaminaris, libras triginta cupri, et libras 20 — 30. aurichalci vetusti; aut libras sexaginta lapidis calaminaris, libr. triginta aurichalci vetusti, et libr. quadraginta cupri: aurichalcum autem aut vetustum, aut novum addi debet, ut massa exfurgens pallide flavum colorem adquirat, rubicunda alias nimium futura. Centum librae cupri augentur sic libris viginti, vel et libris quadraginta, pro diversitate ratione bonitatis adhibiti
lapi-



lapidis calaminaris, majorem, vel minorem Zinci copiam recludentis; sic lapis calaminaris Goslariensis ditior multis aliis passim depraedicatur. Uti Cl. MUSENEROECK advertit, non omne cuprum cum stanno aequè facile coire, sic et SWEDENBORG *) observat, non omne cuprum aequè aptum esse pro conficiendo aurichalco, quum respuere quasi videatur saepius metallum ex lapide calaminari obtinendum: in universum tenendum est, cuprum purum, et ab admistis partibus heterogeneis liberum ad hanc operationem requiri.

§. 532.

INSTITUIT Cl. BAUME tentamina circa compositionem aurichalci. Expofuit uncias duas aurichalci venalis per horam integram cum quadrante adioni ignis violenti. Zincum omne florum sub forma aufugit; remansit in crucibulo cuprum fulvum, drachmas quatuor pondere exaequans, ductilitate propria praeditum. Miscuit et cupri drachmas quatuor cum drachmis duodecim Zinci; fusioni ambo metalla exposuit; obtinuit aurichalcum, venali aurichalco analogum, eadem ductilitate dotatum.

§. 533.

UT vero aurichalcum dotibus legitime instruatur, novae subjicitur caementationi, cum lapide calaminari, et carbonum pulvere, cujus ope ductilitatem demum insignem acquirit. Aurichalcum sic recoctum *Aurichalcum purum* (Suecis *munderad massing*,) illud

*) APPENDICEM etenim, quam Cl. DU HAMEL operi Galloniano adjecit, verbotenus ex *Swedenborgiano de cupro et aurichalco* libro excerptit, eumque ex latino, in Gallicum Cl. BARON transfudit.

lud vero *aurichalcum crudum*, aut *inpurum* (*Arco*) dicitur.

§. 534.

METALLUM Robertianum, *metallum principis*, aut *metallum principis ROBERTI*, species aurichalci est, colore maxime et ductilitate ab aurichalco legitimo diversum: ductilitas enim, seu malleabilitas in aurichalco major est; colore autem intensiori *metallum Robertianum* donatur. Variæ denuo massam hanc metallicam conficiendi circumferuntur formulae, et artifex quilibet fere pro hac aeque, ac reliquis miscelis, specialem possidet ac arcanam, ideo tamen nullatenus meliorem. *Cl. WALLERIUS* metallum hoc enasci, ait in *Mineralogia*, ab additis partibus 4 — 6. cupri ad partem unam Zinci. Drachmae octo aurichalci cum aequali quantitate cupri probe uniebantur in metallum satis ductile, colore pallide aureo donatum in experimentis *Baumeanis*. In *Chemia physica* *WALLERIUS* praescripsit partem 1., aut $1\frac{1}{2}$. ad partes 6. aut 8. cupri; alii anaticam partem Zinci et cupri sumunt. Monuit autem *Cl. Lewis*, miscelam tenaciorem semper adquiri, granulisque minoribus in textura praeditam, dum partes 4. 5. 8., vel 12. cupri fuerint receptae; fragilem autem exurgere, colore saturationi praeditam, fibrosam interne, dum proportio cupri ad Zincum media parte, aut duabus tertiis minuta fuerit. Partes cupri duas ad partem unam Zinci recipiendas esse pro conficiendo metallo *Principis* *Cl. KLINGHAMMER* adnotavit.

§. 535.

PINCHEBACK altera aurichalci species est, eaque plurimum sententia cum metallica compositione *Similior dicta*,





dicta, eadem; unde utramque simul miscelam pro una hic lubet considerare. Plurimae circa hanc compositionem pariter inveniuntur formulae, quarum tamen nonnullae, v. c. illae, quas *Cl. JUSTI* proposuit, emendationem utique requirunt, aliae aperte sunt absurdae, atque has ne nominabo quidem. In genere notandum est, hic, si ullibi, et cuprum et Zincum requiri depuratissima. Partes duae Zinci ad partes quinque cupri metallum coloris pallide aurei praebent; *) color hic intensior fit, si pars una Zinci ad partes 4. aut quinque cupri recipiatur. *TESSARI* cupri partes octo, Zinci tres cum dimidia postulat. Ex unciiis duabus cupri, et drachmis quinque aurichalci *Pincheback* oriri, in aëre tamen rubiginosum futurum, *Cl. WALLERIUS* habet; communicavit ei *Cl. SUEN RINMANN* methodum sequentem, ceu per experimenta comprobata optimam. Laminae cupreae candescant in igne, candentes restinguantur in latice, composito unciiis quatuor nitri, unciiis tribus cum dimidia salis ammoniaci, unciiis tribus viridis aeris, unciiis quatuor aluminis, unciiis quatuor salis communis: haec in pulverem terantur omnia, et adfundatur urinae cantharus, aceti vini cantharus dimidius, eademque copia aquae purae. Ignitio laminarum, et subsequens restinctio tandem repetitur, donec scoriarum cupri sufficiens obtenta fuerit copia. Scoriae hae reducuntur additamento partium trium nitri, partisque unius tartari. Cupro sic reducto, fuso, additur Zincum ea ratione, ut ad uncias octo cupri recipiantur $\frac{7}{8}$. semunciae Zinci, agitur miscela, ac in igne retineatur, donec Zincum in flammam exardere incipiat; illico tum effundatur totum in

*) *VARIAE* adeo occurrunt formulae, ut, quam hic pro *Pincheback*, aut *Tombach* praescribit, eam alter pro metallo principis, vel et aurichalco ipso, in minori quantitate parando, recipiendam dicat.

in modulum sebo illitum. Ex massa hac metallica fabricatae res poliantur pulvere, qui componitur unciiis quatuor antimonii, unciiis tribus terrae tripolitanæ, $\frac{1}{16}$ semunc. sulphuris, et drachmis duabus cornu cervi calcinati, in pulverem inpalabilem simul tritis. Paratur etiam *Pincheback* et *Similor* ex miscela partis unius tutiae, cum partibus octo vel duodecim viridis aeris, quæ oleo aut pinguedine in pastam reducuntur, et fusioni demum exponuntur. Monet vero, qui hoc refert, *Cl. KLINGHAMMER*, non abs ratione, abs addita aerugine aequè bonum *Pincheback* parari etiam posse, ea solum intercedente diversitate, quod carum adeo non sit, ac illud, ob ipsam aeruginem majori longe pretio venundandum. Compositio *Lewisiana* metalli auro similis est: recipe partes 8. viridis aeris depurati, partes 4. tutiae alexandrinae, partes 2. nitri, partem 1. borraeis, oleo redigantur in pastam, fundantur in crucibulo, demum effundantur in conum fusorium prius bene calefactum. Qui ingentem compositionum substantiae hujus metallicaee numerum legere cupit, adire poterit *SWEDENBORGII* librum *de cupro et aurichalco*.

§. 536.

TOMBACK, *Similor*, et *Pincheback* fere analogum est, et *Cl. WALLERIUS* *Tomback* idem prorsus cum *Pincheback* esse dixit, ac posterius nomine solum, ab inventore Anglo adsumto, ab illo distingui. Si tamen diversitatem statuere velimus, dicendum erit, *Tomback* cuprum esse minima dosi Zinci remissum, cui stanni parvam quantitatem artifices nonnulli adjicere solent. Praescriptio *Cl. RINMANN* sequens est: unciiis tribus cum dimidia cupri vetusti, quod in tectis actioni solis diu expositum fuerat, adjiciantur unciae duæ cum dimidia



midia aurichalci, *) fusione haec invicem jungantur, addatur drachma dimidia stanni purissimi anglicani; atque proportio haec semper servetur, ut ad unciam unam cum dimidia aurichalci drachma dimidia recipiatur stanni.

§. 537.

Dictum antea fuit, aurichalcum ductile satis esse, tenendum tamen est, ductilitatem, aut malleabilitatem potius, in candente aurichalco non adeo obtinere; tum enim aut sub malleo rumpitur, aut, si calens nimium fuerit, dissilit, et quaquavorsum spargitur. Phaenomenon hoc ex ipsa aurichalci compositione exponendum venit. Constat, uti ante dictum fuit, aurichalcum cupro et Zinco invicem mistis; cuprum autem, uti vehementiorem longe ignis gradum requirit, ut in fluxum abeat, sic et citius multo solidatur, quam Zincum: quodsi itaque aurichalcum candens malleo percutiatur, malleus agit in corpus solidum, in cuius interstitiis delitescit fluidum, fere uti aqua inhaeret cavernulis spongiae; rumpet hinc Zincum compressum cupri repagula, et orietur antea dictus effectus.

§. 538.

*) NOTANDUM hic est, non idem compositum metallum fore proditurum, si quis, tum in hoc, tum in praecedentibus experimentis, aurichalcum reliquis substitutiis adjecerit: quum non eadem ubique ipsius aurichalci fiat praeparatio; hinc si eandem obtinere vellemus massam; determinari prius deberet ipsa aurichalcum conficiendi methodus, ut sic de eventu esse possemus certissimi.

§. 538.

BISMUTHUM cum cupro constituit massam fragilem, pallide rubentem, si aequales utriusque doses fuerint receptae, pistillo contundendam. Miscuit *Cl. GELLERTUS* grana sexcenta octoginta sex cupri cum granis octingentis nonaginta octo bismuthi, obtinuit massam metallicam, quae granis viginti tribus pondere decreverat. Fragilissima erat, ex rubro albescens, in fractura cuboideas fere exhibens facieculas. Densitas ejus correspondebat densitati, quae ab ambobus metallis una junctis expectari poterat. In experimentis *Muschenbroeckianis* aeris fulvi uncia 1. bismuthi grana 20. dederunt massam flexilem adhuc, sed fragilem, rumpendam a libris 150.; aucta semel bismuthi copia, metallum fragilius, additis, eidem semper quantitati cupri, granis bismuthi 60. metallum rubens, fragilius denuo, additis bismuthi drachmis tribus, metallum fragilissimum, rumpendum a lib. 71. et 72. addita uncia dimidia, metallum rubens, pallidius, frangendum a libris 71. et 76., mista demum copia aequali cupri et bismuthi, metallum pallens, vix cohaerens, frangendum a libris 26. gravitas hujus specifica fuit 8. 7207. Qui *fibulas* fabricant artifices nonnulli miscelae, quae ad *tombac* fere accedit, bismuthi portionem minimam nonnunquam solent adjicere, quod et in massa metallica, ex qua *cochlearia* fabricant, faciunt: non vero video, quid additione hac lucrentur, et ipsi rationem sufficientem adlegare nequeunt.

§. 539.

COBALTI *regulus* cupro remistus massam, si aquae portiones receptae fuerint, cobalto ipsi fragilitate analogam, textura interna a cobalti textura non multum abludentem, exhibet.

Pars I.

.S

§. 540.



§. 540.

ARSENICI *regulus* cupro mistus massam metallicam magis minusve albentem constituit, ex qua varia fabricari solent, addito simul Zinco, aliisque substantiis metallicis. *Cuprum* sic dictum *album*, seu *album Tomback*, varia ratione confici solet. *Cl. WALLERIUS* formulam sequentem adtulit; recipiantur cupri, et arsenici fixi cujusvis partes octo, argenti pars $\frac{1}{16}$ a, fluant haec in vase clauso. Vel recipe aurichalci libram unam, stanni unciam unam, arsenici fixi libram semis, fluxus nigri uncias duas, mista inmittantur in crucibulum, et ad duos digitos obducantur sale communi, aut vitro in pulverem conminuto; massa inde exurgens malleum aliquatenus ferre poterit. Albescens talis massa paratur etiam, si arsenicum confundatur cum limatura cupri, addito simul fluxu nigro, et instrato vitro conminuto. Obtinuit *Cl. BAUME* massam pallidam fragilem, uniendo drachmas sex cupri fulvi cum uncia dimidia arsenici, et aequali copia salis alkalini fixi. Miscuit et cuprum cum sale arsenicali *Macqueriano* more parato, atque fusionem drachmarum sex cupri cum uncia una salis arsenicalis sex ordine vicibus instituit: perdidit cuprum sic omnem suum colorem, argenteum adquisivit, sed fragilissimum sub malleo, et minime ductile evasit: ignis actione malleabilitatem quidem restituit illi, colorem tamen restituere non potuit. Cuprum hoc in acido nitroso caerulea solvebatur solutione. Aurichalci drachmae quatuor, mistae cum drachma dimidia arsenici et drachmis quatuor salis alkalini fixi, dederunt massam, aurichalco ductilitate analogam, colore flavidiori, magisque splendente donatam. Drachmae quatuor aurichalci, drachmae duae arsenici, et aequalis copia salis alkalini fixi, dederunt massam fragilissimam, non obtemperantem malleo, granulis exiguis donatam, colore obscuriorem;

cuprum

cuprum drachmas duas cum dimidia pondere deperdidit.

§. 541.

PLURIMA tentamina circa materiem hanc instituit BECHERUS, ex quo unum solum, aut alterum experimentum adducam. Sulphuris, arsenici fixi, et tartari calcinati partes aequales in farinam pulverisatam in tigillo perlutando cum cupro stratificentur, et octo horis caemententur, leniter primis quatuor, fortiori igne quatuor reliquis, fluant dein cum sale fuso et vitro, pulverisatis et mistis. Vel octo semunciae salis ammoniaci, et octo arsenici albi pulverisatam, et mistam, inmittantur in libram unam cupri fusi, ea lege, ut ultra semunciam unam pulveris dicti, qualibet vice, non inmittatur; circumagitata in igne per horam relinquantur, nec adhibendus est ventus, ne arsenicum et sal ammoniacum dissipetur; fortior dein admoveatur ignis, dum cuprum pelliculam trahat; tunc iterum inmittatur semuncia una pulveris dicti, quae per horam defumet, repetatur hoc 16. vicibus; exinde obtinebitur libra una cum dimidia cupri albi, et malleabilis adinstar argenti. Ingentem hujus farinae formularum copiam *Swedenborg* collegit.

ALBUM demum cuprum proditurum fore ex miscela unciae unius cum dimidia et binis drachmis stanni anglici, unciae unius *Tuttanego*, *) drachma una cum dimidia *Tomback Cl.* WALLERIUS in *Mineralogia* retulit.

*) QUID *Tuttanego* sit, in capite de STANNO videatur.



§. 542.

SUPEREST *Niccolum*. Coit hoc cum venere in metallicam massam albam, duram, indutilem, ab aëre facilius exedendam. Monuit *Cl. CRONSTAEDT*, in miscelis variis, quas cum hisce substantiis metallicis instituerat, cuprum semper colore virenti, aut subfusco, quo vitrum borracis tinxerat, sese manifestasse.

§. 543.

ENUMERABO nunc SUCCEDANEORUM sub titulo praeparata quaedam, quae cuprum recipiunt, notatu magis digna. Occurrit inter haec primo loco *Cuprum gummiatosum*, quod miscela partis unius cupri cum partibus tribus mercurii sublimati corrosivi destillationi subiecta exsurgit; residuum enim, expulso in excipulum mercurio, in igne facile fluit, flammamque viridem spargit; nil nisi cuprum est, in concentratissimo falis acido resolutum; inepto sane nomine notatum.

§. 544.

AQUA *Sapphirina ophtbalmica* paratur, si aqua calcis recens facta infundatur in vas cupreum stanno non obductum, et addatur simul sal depuratum ammoniacum. Obtinetur sic solutio veneris in sale alkalino volatili, calcis ope ab acido falis, altero falis ammoniaci principio, partim liberato.

§. 545.

TINCTURA *caerulea*, seu *cyanea antepileptica* BOERHAAVII est ipsa, suo loco jam exposita, veneris ope falis ammoniaci facta solutio. BOERHAAVIUS operatio-

rationem sic describit, *) limaturae aeris purissimi admisce salis ammoniaci partes tres, superadfunde aquae purae partes quatuor, in cucurbita abscissa, igne moderato exsicca pastam, iterumque in aëre sine resolvi; quod si hanc exsiccationem et resolutionem reciproces aliquoties, obtinebis tandem solutionem fere integram aeris. Dein misturam coque cum aqua. Cola, inspissa paulum, erit *Tinctura caerulea*, famosum illud antepilepticum puerorum. Haecenus BOERHAAVIUS. Praeferenda autem meo quidem iudicio tincturae huic tinctura est alia, ope salis alkalini volatilis facta, quam BOERHAAVIUS tantis laudibus in hydrope extollit. Operationem antea jam decripsi.

S. 546.

TINCTURA Veneris HELVETII paratur sequenti ratione; **) vitrioli caerulei uncia dimidia, et salis ammoniaci uncia una pulveriscentur, misceantur, in crucibulo leni igne fundantur, donec massa, filo ferreo subinde agitata, ex viridi nigricantem colorem obferat. Huic massae, illico, post aliquam refrigerationem in pulverem redactae, adfundatur spiritus salis ammoniaci vinosus, et tinctura pulchre caerulea, aut dilutior violacea extrahatur. Carere tuto licet et hac tinctura.

S 3

S. 547.

*) ADDIDI eam ideo solum, ut, si quis forte remedium hoc facere velit, Boerhaavianam formulam imitari queat.

**) FORMULAM ex Cl. CARTHEUSERI *Pharmacologia* depromsi: ponitur vero ibi, *vitrioli cyprii, vel crystallorum veneris*: omisi ultimum, quum, uti antea patuit, variae dentur crystalli veneris, praeter eas, quas verum vitriolum cyprium subpeditat.

CIRCA colorum mutationes in solutionibus, ac praecipitatis veneris Cl. HIAERNE sequentia adtulit, scitu non injucunda, in Physicis tentaminibus inprimis utilia. Solutio lunae, ait, cum cupro aqua forti soluto dat colorem opalinum subviridem, vel tantillum viridescentem. Vitriolum cyprium cum lixivio ex ostreis calcinatis parato dat opalinum ad colorem thalassinum, seu aeruginosum vergentem. Scorinae reguli antimonii cum venere calcinatae, una cum calce viva et cineribus clavellatis, dant aqueum dilutum subflavum. Aurichalcum nitro fufum, et aqua solutum cum solutione lunae dat colorem pullum, seu fuscum, subnigrum. Vitriolum veneris cum rore majali destillato dat viridem subflavum. Solutio veneris cum tartaro nitrato, seu sale Dresdensi, dat aeruginosum instar viridis aeris. Salia fixa cum vitriolo veneris thalassinum, seu venetum. Vitriolum veneris cum saccharo saturni colorem prasinum obscuriorem. Sal anethi cum vitriolo veneris viridem ingratum. Sal tartari cum eodem vitriolo cyaneum clarum. Omnia salia pure volatilia cum vitriolo veneris colorem Indicum, sive cyaneum, ad purpureum inclinantem. Vitriolum veneris cum nitro fixo colorem venetum subcaeruleum. Vitriolum veneris cum sale fumarinae caeruleum subviridem.

CALCES cupri, tum ex menstruis diversis dejectae, tum et ignis ope exustae, addito congruo fluxu igni expositae, elegantissimos praebent colores, qui in pictura encaustica vasorum murrhynorum, et pseudo-murrhynorum adhibentur; tingendis incrustationibus vasorum fictilium viliorum inserviunt: et pseudogem-

marum

marum etiam compositiones varias ingrediuntur. Incommodum tamen, si majori imprimis quantitate calcibus his uti velimus, illud adnatum est, quod, quam non nisi menstruo omnino privatae adhiberi queant; id vero vel elixiviatione, vel reverberatione fugari solum possit: reverberatio adhaerens menstruum, aut praecipitantis partem adnexam quidem destruat, sed calci simul pulchre virentem dotem eripiat, et nigriorem colorem excitet. Elixivatio autem, seu elotio cuprum denuo resolvit copia majori, vel minori, prout salium major, aut minor adhaeserit copia. Monuit hinc Editor Diatribes *Cl. d' ARCLAIS DE MONT-AMY de coloribus, qui in pictura encaustica adhibentur*, colorem viridem componi debere ex caeruleo et flavo invicem simul unitis; dilutiorem reddi tum posse, aut obscuriorem, addito colore vel albo, vel fusco. Vera haec esse deprehendi; adferere tamen possum, ex cinere sic dicto cupri, limatura subtilissima cupri, viridi et caeruleo montano, ac limatura aurichalci *) pulcherrimos me obtinuisse colores virides, diversa intensitate donatos.

S 4


§. 549.

- *) SELIGERE hanc prae caeteris artifices solent; etsi quidem praerogativam prae limatura cupri purissimi non magnam mereatur. Tanto enim igne, cui colores tales sub fusione exponuntur, Zincum inhaerens aurichaleo dudum est destructum; tum vero nil nisi cuprum remanere quivis, ex dictis prius, facile videbit. Rationem quidem facti assignant bonam, quam tamen ipsi non intelligunt: rationem siquidem desideranti responderunt: ab addita limatura aurichalci colorem gratiorem, magisque dilutum (*Lichtgrün*) exsurgere. Verum hoc sane est; ratio autem in eo reponitur; quod, dum illi certo sub pondere limaturam



S. 549.

EADEM ex materie colorante, uti colores encaustici, parantur et fluores sic dicti *metallici*, *Smaltæ*, *amausa*, et *pseudogemmae*. Fusæ horum omnium descriptiones in opere KUNCKELIANO *de arte vitriaria*, cui et MERETTI, et NERII circa idem objectum libelli adnexi sunt, videri poterunt. Adducam hic in gratiam exempli unam alteramve compositionem, quam cuprum ingreditur. *Pseudosmaragdus* parari potest ex uncis duabus purissimorum filicum, in pulverem redactorum, uncis sex lithargyrii, et uncia semis viridis aeris crystallini. Fluor smaragdinus colore saturatior exigit uncias duas vitri albisimi, scoriae, aut cineris cupri grana decem, vel uncias quatuor minii, et grana quadraginta octo calcis cupri; dilutior exigit vitri albisimi libram unam, aeris usti drachmam unam.



STAN-

turam cupri, ac limaturam aurichalci recipiunt, minor longe portio cupri massæ coloris admisceatur, limatura in usum vocata aurichalci, quam, ex regulis suis alias immiscerent; quum de pondere adhibitæ limaturæ pondus Zincî, per ignem destruendi, detrahi debeat. Dilutior hinc utique prodibit color, non ob dotem, uti illi existimant, specialem aurichalci, sed ob minorem copiam colorantis cupri, totius massæ coloris encaustici quantitati eidem datae admisti. Adparet ex his denuo, quod *Mechanici* in suis operationibus bona quidem sæpenumero sequantur principia, quorum tamen rationes ipsi nullatenus perspiciunt.

STANNUM.

§. 450.

STANNUM, JUPITER (4) *), metallum ignobile, colore gaudet, si purum ac politum, aut torno nunc elaboratum fuerit, argenteo fere, paulo magis tamen subcaerulefcente; unde et Veteres stannum *plumbi albi*, plumbum vero ipsum *plumbi nigri* nomine nonnunquam donarunt. Optimum simul et pulcherrimum stannum *Malaccense*, ex Indiis orientalibus adlatum est. Colores metallum hoc non adeo multos, uti reliqua subpeditat; ad album, et varie flavicantem potissimum reduci queunt; nam colorem purpureum auri per stannum ex menstruo suo dejecti auro ipsi deberi, antea in *capite de Auro*, ubi de *purpura minerali* egi, satis evictum fuit. In examine microscopico stanni Cl. TILLET grumulos uniores, cavernulas arctiores invenit.

§. 451.

GRAVITAS stanni *specific*a inter reliqua metalla minima est, in Chemicis compendiis uti 7, 200, vel uti 7, 321. ad 1000. assignatur. In tentaminibus *Muschenbroeckianis* rationes insequentes adnotatae habentur: stannum purum 7, 320., aliud 7, 3645., Anglicum purissimum 7, 295., purum nigrum 7, 3218.

S 5

aliud

*) 4. Dimidiatam stanni partem argentum esse, alteram crudam, rodenti acrimoniam; id vero omni fere docinaestae exploratum: cupella quippe ad finem argento fixitatem, et sulphuris crudi copiam demonstrat, bene notam Alchemistis. BOERHAAVE.



aliud 7, 065., aliud 7, 3167., aliud 7, 471., aliud 7, 550., aliud 7, 180., purissimum ex Malacca 7, 331., aliud 6, 1256., Indicum Bancas 7, 2165., rosae dictum 7, 300., cantharorum 7, 650., Malaccae fusum 7, 500., idem diu cusum 7, 1951., Anglicum fusum 7, 6388., idem diu cusum 7, 1951., Bancas modo fusum 7, 6250., idem diu cusum 6, 7481. Pollex cubicus stanni ad uncias quatuor vulgari calculo aestimatur.

§. 552.

BRACTEOLAE tenues, in quas stannum expandi valet, ductilitatem hujus demonstrant.

§. 553.

TENACITATIS stanni ea passim additur instantia, quod filum unam decimam pollicis rhenensis crassum libras quadraginta novem cum dimidia sustineat, antequam rumpatur. Circa tenacitatem et firmitatem stanni numerosa denuo tentamina instituit *Cl. MUSENBROECKIUS*: stanni Malaccensis sinceri rumpi vidit parallelepipedon $\frac{17}{100}$. poll. rhenoland. a libris centum, stanni sinceri Anglicani a libris centum quinquaginta. Stannum Malaccense, ait, mollissimum est, admodum ductile, et tenax, nec pars a parte abrum-pitur simplici fractura, sed postquam tota massa longior evasit, tumque pars ex parte extrahitur. Stanni Anglici pars una, Malaccensis pars una simul fusa cum colophonia habuerunt firmitatem librarum quadraginta quinque; fractura exhibuit lamellas granulosas valde latas, et asperas. In miscela partium quinque stanni Malaccensis cum parte una stanni Anglicani maxima firmitas observata fuit librarum centum novemdecim in crassitie $\frac{17}{100}$. pollic.; grav. specifica erat 7, 2851.

§. 554.

S. 554.

EXPLORAVIT praeterea MUSCHENBROECKIUS, quantum stanni Indici Bancas firmitas et densitas increset, quum traheretur idem cylindrus stanneus perforamen rotundum in lamella chalybea variis vicibus: post quamlibet tractionem abscindebatur pars, ex qua deinde formabatur parallelepipedon: crassities cujuslibet parallelepipedi, in quod post tractionem reducebatur in medio, ut ab utroque extremo crassiora capita formarentur pro exploranda firmitate, fuit $\frac{17}{100}$. pollicis; una vice tracti firmitas erat lb. 126., grav. specif. 7, 2346., octo autem vicibus tracti firmitas lb. 106., grav. specifica 7, 2234.; in tenuitatem majorem trahi non potuit, quin rumperetur; potest tamen tenuius adhuc filum confici tractione, si aliquoties in igne laxetur, modo parum minus calcat, quam in refusione opus est. Quia, subnectit his MUSCHENBROECKIUS, stanni Indici Bancas modo fusi firmitas est aequalis lb. 104. et grav. specif. aequalis 7, 1265. patet, stannum hoc semel ductum per foramen angustum evasisse firmitus et densius; potuit enim gestare lb. 126., et grav. specifica est 7, 2356. quamvis autem repetitis ductibus evaserit aliquantum densius, ut 7, 2500., non tamen increvit firmitate, quum tantum lb. 116. gestaverit: quando in majorem tenuitatem ducitur, multum indurefcit decrefcitque firmitate, et gravitate specifica; adeo, ut stanni Bancas partes non patiantur magnam mutationem densitatis, firmitatisve.

S. 555.

DECEM et novem tentamina instituit MUSCHENBROECKIUS, stannum Indicum Bancas miscendo cum stanno Anglicano ea ratione, ut quantitates cujusvis metalli alternatim decrefcere, ac insurgerent: addu-
cam,



cam, compendii gratia, primum solum, ac ultimum,
 (crassities cujusvis lateris parallelepipedo fuit $1\frac{1}{2}$. poll.
¹⁰⁰
 rhenoland. stanni Bancas firmitas erat lb. 111. grav.
 specif. 7, 2165. et fractura in omnibus novemdecim
 experimentis desinebat in cuspidem:) stanni Bancas ita-
 que partes decem mistae cum stanni Anglici parte una
 dederunt firmitatem librar. 101., et gravit. specif. 7,
 3786., stanni vero Bancas pars una mista cum parti-
 bus decem stanni Anglici dedit firmitatem librar. 151.
 175., gravit. specific. 7, 3557.

§. 556.

NOVEMDECIM denique miscelas instituit cum stan-
 no Bancas, et stanno Malaccensi: partes decem stanni
 Bancas mistae cum parte una stanni Malaccensis dede-
 runt firmitatem librar. 81, gravit. specif. 7, 3301.,
 pars autem una stanni Bancas mista cum partibus de-
 cem stanni Malaccensis dedit firmitatem librar. 85.,
 gravitat. specif. 7, 3057.; stanni, ad haecce tentamina
 sumti Malaccensis grav. specif. erat 7, 3461., firmi-
 tas autem librarum 98., fractura et hic desinebat in
 cuspidem.

§. 557.

PATET simul ex adlatis, quales mutationes stan-
 num ab ictibus mallei experiatur.

§. 558.

ELASTICITATE reliquis metallis cedit, solum fa-
 turnum dote hac tantillum superat.

§. 559.

§. 559.

STANNUM purissimum sonorum est, etsi quidem proprietas haec insignis adeo non sit, uti in aliis, argento potissimum cuprove deprehenditur: repetitis tentaminibus didici, sonorum tum maxime esse, quum in cochleari oblongo funditur, ac in eodem refrigerio abs concussu exponitur, ut ex uno latere planum, ex altero convexum sit, eadem ratione, uti cum plumbo fieri hoc ipsum deberi, si sonorum reddere velis, *Ill.* REAUMURIUS praeceperat, *v. cap. de PLUMBO.* Dentibus morsum, aut hinc inde flexum, specialem sonum stannum edit, quem sub nomine *stridoris stanni* artifices designant; experti magis ex morso flexove stanno de hujus puritate sat justum judicium ferre queunt.

§. 560.

SAPOREM quemdam in lingua stannum excitat, qui sentiri melius, quam describi, uti sapes alii plurimi, potest: *odorem* etiam frictum exhalat suballiacum; rationem hujus mox intelliges, ubi dum in stanno puro etiam arsenicum latere ex *Marggrafianis* tentaminibus retulero; odor hic magis adhuc sentitur, dum pinguedine quadam, aut oleo obductum per aliquod tempus stannum fuit.

§. 561.

IN aëre stannum sat illibarum persistit: splendor quidem politi fusive aliquantum obnubilatur, caeterum vero, ab aliorum metallorum consortio prorsus liberum, rubigine non obducitur: alia tamen ratio est,

*) GALLI stridorem hunc *cri de l'étain*, Germani *das Kirren des Zinns* dicunt.



est, dum aëri, vaporibus rodentibus ac phlogisticis repleto, diutius haeret expositum, ubi specie favillae subgriseae in superficie conspurcatur.

§. 562.

IN *aqua* etiam purissima stannum nec solvitur, nec rubiginosum fit: aqua salibus, selenite v. c. inquinata stannum adrodit.

§. 563.

STANNUM in calore expanditur; rationes expansionis videantur in *capite de Ferro*: in igne cito funditur, calore quadringentesimo vigesimo thermometri Fahrenheitiani, notante *Cl. MORTIMER*, et *Cl. KRAFFT*. Funditur hinc diu, antequam candeat; immaturam stanni flamma candelae fusam flammam caeruleam spargere, ac odorem sulphuris, et alii odore fere similem *Cl. WALLERIUS* notat. Stannum ac plumbum liquatum, in vas paulo frigidius effusum, ipsum pulverem pyrium non accendere *JUNCKERUS* monuit: calor tamen hic abunde sufficit pro detonatione excitanda auri fulminantis, uti hunc in scopum instituta tentamina docuerunt.

§. 564.

STANNUM fusum in *calcem*, non tamen cito adeo ac plumbum, abit. Observavit *Cl. GEOFFROY* pelli-
culam calciformem, qua stannum fusum sensim obducitur, hinc inde repetitis vicibus elevari, ac flammulas profilire albicantes, lucentes adeo, uti flamma, quae accensum Zincum comitatur; elevatur sic pars sub *florum* nomine, vase objecto frigido excipiendorum; flores hos arsenicalis indolis esse *GEOFFROY* pronuntiavit. Cal.

Calcinatio stanni magis promovetur, dum violentiori igne fufum abs intermissione rutabulo agitatur.

§. 565.

CALX haec stanni nigrescens, repetita, aut protrahita diutius calcinatione albissima redditur; stannum ad experimentum sumtum pondere superat. Excessum hunc ad viginti quinque libras pro centum libris jovis *Cl. WALLERIUS* produxit, ut adeo ipsa plumbi calce, sub eadem data quantitate utriusque metalli, foret ponderosior, qualem excessum ego nunquam reperi. *BOYLEUS* etiam adnotavit calcem augeri drachmis binis, cum granis quinquaginta septem pro uncis binis stanni purissimi. Calcem stanni, *Cl. WALLERIUS* ait, acida mineralia, muriaticum inprimis, et aqua regia promte, et stanno ipso promptius, solvunt; quod et a vegetabilibus acidis fit: a salibus alkalinis, et spiritu salis ammoniaci, calcis vivae ope parato, pariter solvitur; in subsequis calcinationibus albescit semper magis, qua quidem re a calce saturnina maxime distinguitur (*vid. vero, quae in capite de PLUMBO, ubi de praeparatione minii agitur, adlata habentur;*) igne violento solum funditur in vitrum colophonio colore analogum (*colorem huius ad rubinum accedentem dixit Cl. BAUME, uti mox latius enarrabitur;*) tegmen vasorum album, et encaustum calcis jovialis et saturninae ope parari, in *capite de PLUMBO* fufius referam: *) in stannum demum reduci potest, additione phlogisti; hoc vero ipsum cum calce hac igne violento diutissime exusta aegerrime perficitur.

§. 566.

*) CALCE stanni pro poliendis vitris specularibus uti solent.



§. 566.

REFERENTE *Cl. WALLERIO* stannum, actioni speculi caustici objectum, vaporem exhalat densum *arborescentem*, floresve albos, ac in calcem albam primum abit, quae in crystallulos exiguas, aut arbusculas, addito pingui in stannum pristinum denuo reducendas, abeat. Adparet ex hac descriptione, tentamen hoc non institutum fuisse cum speculo caustico fortius agente, aut non diu satis protractum. Stannum *Cl. COMUS* igne electrico in calcem vertit griseo-cineream.

§. 567.

REFERAM nunc notatu magis digna tentamina alia, quae Viri clarissimi circa stannum, ignis diverso gradui ac vario adparatu objectum, litteris mandarunt. Exposuit *Cl. MACQUERUS* stannum purissimum, abs omni addita alia substantia, igni vivaci, ac adeo violento, uti ignis furni vitrarii esse solet, per duas horas, in testa aperta sub testudine: deprehendit demum, stannum hoc calce albissima in vegetationem quamdam concreta testum; sub calce hac haerebat calx alia rubicunda, vitrum diaphanum coloris hyacinthini, et regulus stanni non mutati, fundum testae occupans; eodem cum successu tentamen hoc saepius repetiit.

§. 568.

EXPOSUIT etiam *Cl. BAUME* stannum Malaccense in crucibulo sub testudine igni violentissimo per duas horas. Crucibuli parti superiori adcreverunt stanni flores nive candidiores, adinstar acicularum splendentium ex ordine dispositi. Sub floribus hisce conspiciebatur vegetatio, brassicam cauliflorem referens, colore lateritio donata, dura. Haesit sub vegetatione hac stanni calx

calx albiſſima ſub forma pulveris, tegens vitrum, colore pulcherrimo rubineo, ſeu granatino tinctum. In fundo crucibuli manſit ſtannum, ob acceſſum aëri libero denegatum in calcem nondum verſum, tigillo adhaerens, vitro autem nullatenus nexum.

§. 569.

INCLUSIT *Cl. d'ARCET* ſtannum globis ex paſta vaſorū murrhynorum fabrefactis. In calcem abiit ſtannum, et globi colore viridi tincti fuerunt, ac ſi cuprum incluſum iisdem fuiſſet, vitrum exin enatum hinc inde maculis tinctum cernebatur violaceis. In alio tamen experimento obtinuit vitrum coloris aurei, diaphanum, ſuſpicatur hinc *BAUME*, ſtannum fors puriſſimum non fuiſſe, quod ad experimentum *Cl. d'ARCET* ſelegerat; rationem vero calcinationis globis hiſce incluſi metalli eadem ex ratione deducit, quae antea, dum de calcinatione cupri ſimili ſermo erat, adlata fuit; vide *caput de CUPRO*. Incluiſit ipſe *BAUMBUS* ſtannum crucibulo firmiter clauſo, expoſuit igni violento, mutatum tamen nullatenus fuit, ſed pellicula ſolum tenuiſſima teſtum, quae aëris in crucibulo contenti, uti vero videtur ſimile, debebatur actioni.

§. 570.

ADDENDA his adhuc ſunt experimenta *Cl. MARGRAFII*, notatu ſane digniſſima. Inmiſit in retortam terream probe loricatam, unciaſum duodecim aquae circiter capacem, uncias duas limaturae ſtanni Anglici omnium puriſſimi, adplicuit excipulum, adaptatum inpoſuit furno, in quo phosphorum conficere ſolebat, ac ignis violentiſſimus excitari poterat; ignem per gradus ad candefcentiam uſque auxit. Adminiſtravit demum ignem, quem potuit, ſummum, eumque

Part I.

T

per



per tres horas produxit, quibus elapsis adparatum refrigerio demum reliquit. Invenit, soluto illo, in collo retortae sublimatum album superficiale (angeschmaucht,) quod tamen examinare seorsim, ob exiguam nimis copiam, non poterat. Stannum ipsum in retorta haerebat pulcherrimum, splendens, colliquefactum in massam unam, fovea in medio donatam; ex lateribus adhaerebat substantia saturate hyacinthinum colorem exhibens, stanni massam cingens; bilance stannum hoc examinans, deprehendit grana desiderari viginti; sublimatum antea dictum arsenicalis indolis hyacinthinam autem scoriam a particulis minimis ferri, stanno intermixtis, oriri *Cl. Vir* monuit.

§. 571.

INMISIT praeterea *Cl. MARGGRAFIUS* uncias duas alias stanni Anglicani purissimi crucibulo Hassiaco, inposuit huic alterum, et juncturas firmissime clausit, adparatum furno fusorio commisit. Hic eadem, quae in praecedenti, observavit phaenomena, eo solum excepto, quod nullum nunc sublimatum deprehenderit.

§. 572.

STANNI ejusdem limaturae unciam unam remisit cum anatica dosi pulveris carbonum, miscelam inclusit retortae terreae probe loricatae, caeterum eadem, uti prius, processit via: nec in hoc tentamine sublimatum ullum adnatum vidit. Stannum etiam nunc in unam massam fusum non erat, etsi violentissimum expertum fuisset ignem, sed nigricantem, pulverulentam exhibuit formam; carbonibus aqua elotis, stannum in granula minima divisum denuo recuperavit.

§. 573.

UNCIAM unam stanni subtiliter limati crucibulo Hassiaco indidit, quod lamina cuprea, pollice circiter a stanno distante, textit, aliudque inposuit. Iuncturis optime clausis adparatum sic instructum igni forti per horam unam cum dimidia subjecit; refrigeratis valis cuprum non mutatum, politura solum minori donatum, sublimato nullo tinctum, stannum vero pellicula alba, friabili, floribus Zinci per omnia simili tectum reperit. Suspendit quidem circa pelliculae hujus indolem judicium suum Cl. VIR, interim tamen arsenicum ex stanno extractum illam esse ideo minus credit, quod ignem sat fortem sustinuerit, textus lanuginosus Zinci calcem magis prodiderit; tum demum, quod cupri lamina dealbata non fuerit, quod tamen ab arsenico facile fieri adfolet. Monuit praeterea Cl. HENCKEL, ex stanno, abs ulla lapidis calaminaris, Zinci, aut cadmiae fornacum additione, substantiam quamdam Zinceam educi posse; ut adeo pro Zinci sublimata calce pellicula dicta interim haberi posset.

§. 574.

STRIDOREM *) vero stanni purissimi ab arsenico inhaerente, et intermixtis fusione moleculis martialibus

T 2

Cl.

*) IN *Commentariorum de rebus in scientia naturali et Medicina gestis* tomo VII. pag. 714. ubi MARGGRAFIANA haec tentamina recensentur, pro *stridore* ponitur: *splendor quem stanno fracto inesse deprehendunt*; error hic an a *typotheta*, an a *recensore* ipso provenit, dijudicare sane non licet; etsi quidem et hoc pro *typotheta* facere videatur, quod MARGGRAFIUS ipse de *flexo* solum, non de *fracto* stanno, *stridorem* illum



Cl. MARGGRAFIUS adtribuit. Tentavit hinc an proprietas haec ipsa demi stanno nequiret: sumsit in hunc finem *) uncias binas stanni Anglicani purissimi, aequalisque dosin salis tartari pariter depuratissimi. Stratificatione substantias hasce binas invicem miscuit in crucibulo, inposuit huic alterum, adparatum luto firmissime clausit, et fusorio igni per horam exposuit. Fracto refrigerato crucibulo invenit stannum pulchre splendens, in superficie scoria ex albo viridescente obiectum. Separavit hanc, et stannum denuo fusioni subiecit lenioris ignis ope, fusum infudit cono fusorio: pondere aequavit nunc unciam unam, drachmas quinque, et grana quindecim, hinc inminutum pondus fuit drachmis binis cum dimidia et granis quindecim. Stridorem non deperdidit; in fractura tamen mutatum satis videbatur.

§. 575.

RELATIS haecenus, quae stannum igni varie commissum experitur, videamus nunc, quae *menstruorum* in metallum hoc ipsum sit actio. *Acidum vitriolicum* stannum solvit, quin major effervescencia solutionem hanc comitetur. Optime vero solutio tum fit, quando eadem methodo, uti prius *de Cupro* dictum fuit, insti-

illum edente, loquutus fuerit. Monere haec volui, ne MARGGRAFIANA experimenta, non ex MARGGRAFIO ipso, sed ex *Commentariis* legens, in errorem inducatur, aut ILLUSTRIS AUCTORI expressiorem pro crimine vertat, de qua nunquam cogitaverat.

*) EXPERIMENTUM hoc totum, in *Commentariis* nunc adductis, non nisi verbis: *experimento confirmatus* *Cl. AUCTOR* adserit, indicatur.

stituitur, hac solum intercedente diversitate, quod acidum vitriolicum concentratissimum hic non requiratur. Partes quatuor olei vitrioli concentratissimi, parte una aquae purissimae destillatae dilutae, adfunduntur parti uni stanni optimi Anglicani, aut Malaccensis, aut, quod melius paulo solvi experimenta docuerunt, stanni Bancas limati, aut in granula minima redacti, et in cucurbita contenti. Cucurbita inponitur balneo maris, atque igne admoto liquidum ad eum caloris gradum deducitur, quo nondum ebulliat. Adgreditur tum acidum vitriolicum stannum, disparet sensim forma metallica limaturae, aut granulorum, vapores extricantur odore sulphureo praediti: solutio alba, spissa magis magisque evadit, si calor adhibeatur major, quo liquidissima pars diffletur; et, si liquidum abigetur omne, remanet demum materies subtenax, lateribus vasis maximam partem adcreta. Adfusa materiei huic refrigeratae aqua pura, miscela calori denuo exposita, vera demum, *Cl. WALLERIUS* ait, succedit solutio, remanente tamen substantia mucilaginea, seu gelatinosa quadam, more nunc dicto pariter solvenda. Interim tamen monendum est, et abs hac encheiresi solutionem stanni in acore vitriolico fieri posse diaphanam, ex flavo fuscescentem, dummodo stannum minima dosi singulis vicibus injiciatur, expectetur tandiu, donec injectum omne solutum sit, et acidum non meracissimum, nec vero aqua nimium debilitatum adhibeatur. Descriptionem, quam *Cl. WALLERIUS* adtulit circa solutionem hanc, iisdem verbis tradidit *KUNCKELIUS*, et ex hoc excerptit *JUNCKERUS*.

§. 576.

NOTANDUM adhuc est, sub solutione stanni in acore vitriolico enasci verum sulphur ex connubio acidi cum parte phlogistica stanni: supernatat hoc solu-



tioni adhuc tepidae, demum vero ad fundum magis descendit sub forma globulorum. Solutio stanni haec probe licet facta decomponitur, si calori denuo exponatur, imprimis majori; exposuit *Cl. BAUME* solutionem talem per horas aliquot balneo arenae, donec omnem perderet colorem: stannum, dicit, hac expositione erosum ab acore fuit in calcem, ac sedimentum dimisit album, adeo ut nullum fere in solutione remaneret; paucum vero illud laxè adeo cohaerebat cum acido, ut aquae adfusionem in calcem dejectum fuerit, non amplius resolyendam.

MORA sola stannum etiam magnam partem ex solutionibus diu adservatis excutitur; praecipitatum hoc adeo erosum, ac omni phlogisto privatum est, ut solvi amplius renuat. Calcem similem refractariam obtinuit *Cl. MONNET* ex evaporata prorsum solutione stanni in hoc eodem acido.

§. 577.

SOLUTIO etiam stanni obtinetur, dum crystalli minerales stanni (*Zinngruppen*) solvuntur in acore vitriolico optimo; solutio, monente *Cl. WALLERIO*, effervescentia stipatur; dum solutioni huic aqua calida pura adfunditur, et miscela bacillo vitreo agitata, per filtrum missa, evaporationi more debito exponitur, enascuntur *crystalli jovis*, *) verum *vitriolum joviale*, aut *vitriolum stanni*.

§. 578.

OBTINENTUR etiam crystalli vitriolicae stanni, antea descriptae, diaphanae: salis hujus, seu *vitrioli stanni*

*) QUALI forma crystalli donentur, *Cl. WALLERIUS* non addidit.

ni exactam descriptionem ratione formae crystallorum Auctores, qui de eo egerunt, nondum assignarunt; quae crystallorum harum figura sit, *Cl. ROME DE L'ISLE* interrogat.

S. 579.

ACIDUM nitrosum stannum erodit potius, quam legitime solvit; et ipse impetus, quo metallum hoc adoritur, calcinationem promovet. Monet hinc *Cl. MONNET*, solutionem stanni in acido nitroso meliorem tum primum sese perficere potuisse, quum metallo in aqua regia soluto, per sal alkali fixum inde excusso, acidum nitrosum dilutum adfunderet. Caeterum vero solutio haec in albidissimum coagulum, lac coagulatum referens, abit, quae quidem phaenomena ab excussa stanni alba calce facile exponuntur. Acidum nitrosum avide adeo stannum adgreditur, ut solutio novi injecti ad erosum prius tamdiu procedat, ac ulla fere pars acidi superest; vapores etiam rubri nunquam non simul expelluntur. Dum vero in acidum nitrosum omnium purissimum, aqua pariter purissima dilutum, stanni dosi minima injiciatur, ac novum non addatur, donec solutum prius fuerit: solutio tamen adquiritur diaphana, quae ob ante dictas rationes saturari, uti aliae metallorum solutiones, nequit. Solutionem talem diu adservavi, quin ulla stanni calx ad fundum dejecta, aut solutio magis turbata fuerit. Demonstratur hinc, *Cl. BAUME* non omnes notas fuisse encheireses, quibus stannum in acido hoc abs calcinatione illa solvi queat, alias non confidenter adeo pronuntiaffet, fieri hoc non posse: *BAUME* auctoritatem sequutus *Cl. WEIGEL* pariter dixerat, nunquam perfecte solvi posse stannum ab acido nitroso puro. Crystallus ex hac solutione nondum obtinere potui; dum enim solutio evaporationi, lenissimae licet exponitur,



nitur, stannum calcinatum nunc ad fundum sensim ruit, et acidum solum fere remanet.

§. 580.

IN *acido muriatico* stannum præ reliquis menstruis aptius resolvitur, si lenior simul accedat calor; acido enim hoc phlogiston a terra metallica non adeo divellitur, hinc metallum non adeo, uti ab acido nitroso, calcinatur. Solutio hæc flavet eo magis, quo concentratius fuerit acidum. Acidum muriaticum fumans pro solutione hac adhibitum nullos amplius emittere vapores, sub solutione foetorem magnum albiaceum, arsenicalem ascendere monuit *Cl. BAUME*; diversitas vero hic intercedit, prout stanni variae species fuerunt solutæ.

§. 581.

SOLVIT *BAUME* libras duodecim stanni in libris quadraginta octo acidi muriatici fere fumantis: remansit pulvis griseus, uncias duas, cum drachmis sex æquans, non amplius resolvendus, etsi libra una acidi muriatici cum eo decocta, tum vero per plures dies digestionem exposita fuerit. Solutionem vero stanni decantatam evaporationi exposuit in vasis pluribus ex argilla lapidescente factis; quarta circiter parte abacta, pulvis, priori similis, denuo ad fundum descendebat: separavit hunc, et laticem ad dimidium nunc evaporando abegit: enata fuerunt in refrigerato crystalli pulchrae, aciculares, albae; exemptis his, reliqua solutione denuo evaporationi commissa, obtinuit crystallos alias, figura prioribus analogas, colore tamen roseo donatas; tum demum jam albae jam roseae oriebantur. Crystallum roseum in aqua solvit, solutionem quieti exposuit, donec limpida ex integro fieret; decantatam evapo-



mati parte exacte mistum, committitur retortae, cui argillae ope excipulum jungitur, fit destillatio ex balneo arenae; quando ulterius nihil ex retorta prodire conspicitur, ut vasa frigescant, permittimus; reperitur in excipulo acidum salis concentratum, in quo stannum, quod cum ipso in excipulum transit, sub aurantiæ calcis forma conspicitur, et inde quiete sededit; non levis autem stanni portio sub forma sublimati metallici superius retortae hemisphaerium obsidet, quaedam autem in fundo corneam speciem habens remanet, neutiquam in modum lunae corneae scindenda; hac ratione obtinetur acidum, quod octavam mercurii sublimati ad experimentum assumpti ponderis partem aequat. Si stannum, in amalgama redactum, (quod aptius prae stanno integro est ad hoc experimentum, quia menstrua potentius in corpora agunt, quorum adgregatio jam est soluta) recipitur, et cum duplo mercurii sublimati destillatur, acidum, pro suo ingenio fumans, obtinetur; stanni non parca portio sub forma floccorum albissimorum, quos *barbam jovis* dicunt, collo retortae adcrefcit: hac methodo ex octo unciiis mercurii sublimati obtinentur unciae duae cum dimidia spiritus. Resolutio mercurii sublimati, quae hic fit, adfinitati, quae stannum inter et acidum salis intercedit, est adscribenda, portio acidi destillat, et secum aliquid stanni abducit, alkali ope inde deijciendum, alia ejusdem pars, a stanno, quod recepit, spissior reddita, *barbam jovis* constituit, calore liquandam, et ex qua, mediante cucurbita, acidum potest elici; reliquum acidum, quod largius metallum habet, sub forma *jovis cornei* in fundo retortae remanet, in quo etiam mercurius revificatus, et amalgama haeret, quod acido restitit. Nec in stanno, quod cum acido salis transstillat, nec in illo, quod, pauciori acido nuptum, sublimatum metallicum format, aliquam mutationem observavit, quum utrumque reduxerit,

xerit, *Cl. SPIELMANNUS*, cui haecenus dicta debentur.

S. 584.

SPIRITUS hicce fumans *Libavianus* etsi non levem stanni copiam secum vehat, aliam denuo adsumere valet, dum metallo huic adfunditur. Fumos copiosos eructat, in aëre diutius permanentes, quotiescunque vas, eum continens, apertum fuerit. Fumi hi tum a summa concentratione acidi, tum ab incompleta saturatione hujus per stannum *Cl. MACQUERUS* bene deduxit; videtur tamen, subdit, alia quaedam simul causa ad indolis hujus genesin concurrere; nam, etsi spiritus *Libavianus* fumans multo magis sit spiritu salis vulgari concentratissimo licet, more *Glauberiano* destillato, vapores tamen *Libaviani* acidi coërceri multo melius queunt, et elasticitate multo minori gaudent: rationem vero hujus *Cl. MACQUERUS* invenire facile potuisset, dummodo attendisset, stanni non exiguam copiam in spiritu *Libaviano* haerere. Diversitatem praeterea inter bina haecce acida intercedentem notat aliam insignem: aether scilicet muriaticus obtineri bene potest miscela spiritus *Libaviani*, non vero spiritus salis communis, optimi licet, cum alkohole. Notandum circa diversitatem hanc demum et illud est, spiritum *Libavianum* esse, ut sic dicam, fumantissimum, spiritum vero salis muriatici vulgarem fumum omnem perdere, dum copia stanni aequalis in spiritu *Libaviano* contentae solutae in illo solvitur. Subnectit quae sita varia *Cl. MACQUERUS*, quorum resolutionem experimenta plurima instituenda subpeditare unice poterunt; an acidum salis in spiritu *Libaviano* partem principiorum suorum mercurio et jovi largitur? An non potius quaedam ex jove, et forsan et ex mercurio adquirat? Hoc admissio, qualenam principium acidum intrat?



intrat? An phlogiston, an terra mercurialis est? c.
f. p.

§. 585.

BUTYRI *stanni* nomine acidum concentratissimum *stanni* copia determinata gravidum sublimatum: *barba jovis* igne fusa in *butyrum stanni* vertitur, et *butyrum stanni* concentratissimum *barbam* jovis dat; eadem fere ratione, uti circa oleum vitrioli glaciale fieri solet.

§. 586.

GUMMI *jovialis* nomine notavit Cl. WALLERIUS sublimatum griseum, figuratum, in aëre deliquescent, quod sub praeparatione spiritus Libaviani ascendit, dum supressionis ignis, expulso jam spiritu et butyro, adhibetur. *Sulphur jovis*, forma pulveris rubri obtineri adfusione aceti ad gummi joviale, digestionem, decantationem, ac destillationem subsequens; ex joviali hoc sulphure pari demum *sal jovis* viridescens, si in aqua solvatur, ac solutio inspissetur, monuit.

§. 587.

EXSURGENS ex connubio acidi nitrosi cum acido muriatico *aqua regia* stannum optime solvit. Adferam circa hanc solutionem imprimis *Marggrafiana* tentamina, quibus purissimo licet stanno arsenicum tamen inhaerere demonstravit.

§. 588.

PARAVIT Cl. *Vir* acidum nitrosum miscela anaticae dosi vitrioli ad flavedinem calcinati, et nitri depurati,

si, additis libris tribus aquae destillatae pro septem libris totius massae: acidum sic obtentum nitrosum in aquam regiam vertit, additione drachmae dimidia salis ammoniaci depurati ad unciam unam acidi nitrosi. Solvat in aquae hujus regiae unciis quatuor unciam semis limati stanni, ea lege, ut grana sex aut scrupulus semis quavis vice ingereretur; post primam, secundam, vel tertiam demum injectionem, MARGGRAFIUS ait, solutio lactescet, ac si aer frigidior paulo fuerit, tum calx alba ad fundum descendet, tum crystalluli exiguae vasis lateribus adcrebunt, utrumque tamen sensim de novo disparebit, ut solutio stanni diaphana, limpida, nullo sedimento donata supersit. Pulverem vero hunc ipsum et crystallulos verum esse arsenicum, praemittitur interea.

§. 589.

INFUNDATUR tum solutio in phialam evaporatorium, aut vas cylindraceum vitreum amplius, ut tertiam solum vasis partem solutio occupet, tegatur charta emporetica laxius, ut pulveris solum arceatur inlapsus, vasque inponatur calidae arenae, ut evaporatio lentissime solum procedat: adscendent sic una cum vaporibus aquosis et albicantes nonnulli; his adparentibus ignis caute regi debet, ne intendatur nimium; in conspectum prodibunt dein crystalli enascentes: his visis vas ab igne tollatur, ac in locum reponatur subfrigidum, ubi major crystallorum prodibit seges. Crystallorum harum drachma fere dimidia ex uncia una stanni puri Malaccensis, ex stanno vero alio duriori, imprimis Saxonico, major adhuc obtinebitur copia. Ignem vero caute administrandum esse patet ex eo, quod totum alias sub forma spumae ex vase profluat,
ac



ac ne umbra quidem cryſtallorum obtineatur ex latice in vaſe fors adhuc remanente. *)

§. 590.

CRYSTALLOS vero ſic obtentas verum et genuinum eſſe arſenicum, jam enarrandis experimentis *Cl. MARGGRAFIUS* evicit. Drachmam earum unam ex retorta vitrea cum adplicato excipulo deſtillationi ſubjecit, calorem ad candefcentiam uſque ſub finem intendendo: in altum elevatum totum fuit, pauciſſima ſolum fundo adhaerente quantitate. Sublimatum remiſcuit cum quarta parte ſalis tartari, ac deſtillationi denuo ſubjecit; aſcendit ſic arſenicum albiſſimum, ac a ſale tartari reſorptum omne adhaerens fuit acidum: ſublimatum hoc arſenicum fuiſſe docuerunt ſequentia: exigua ſublimate dicti doſis laminae cupreae calefactae inpoſita maculam reliquit albam; fumus aſcendens arſenicum redolet ac laminae obiectae frigidae forma alba, pulverulenta, more arſenici adhaereſcit. Pars ſublimate una remiſta cum quarta parte ſulphuris, expoſita ſublimate ſub forma conſueta arſenici flavi, ſeu realgaris aſcendit.

ALIA

*) Si ſolvatur, Marggrafius ait, methodo antea dicta uncia una ſtanni in unciis quatuor aquae regis, ſolutio ſuſceſcit, et cryſtalli aegrius adhuc obtinentur, quum effluxus liquidi ex vaſe impediri vix queat. Dum vero loco aquae regiae, ſale ammoniaco paratae, adhibetur alia, conſtans miſcela unciae unius aquae fortis cum drachma ſpiritus ſalis, effluxus quidem metuendus non eſt, difficilius autem multo enaſcuntur cryſtalli, obtentae in aëre libero facillime deliqueſcunt, hinc ſeparari a latice vix queunt, quum cum ſtanni ſolutione reliqua mox denuo conſundantur.

ALIA, quae solutionem stanni in aqua regia concernunt, in *capite de AUREO*, ubi de *purpurae mineralis* praeparatione agebam, jam fuerunt adlata.

§. 591.

CIRCA solutionem stanni in aceto adduci omnino merentur tentamina ab *III MARGGRAFIO*, et *Cl. WESTENDORF* instituta. Praemittam MARGGRAFIANA.

§. 592.

STANNUM ab acidis vegetabilibus non addici, NEUMANNUS, addici solum stanni calcem igne exustam, JUNKERUS dixerat. Sumsit MARGGRAFIUS stanni Malaccensis, stanni Anglicani, stannique Saxonici determinatam quantitatem, ex eaque vasa parva lebetiformia ejusdem magnitudinis fabricari jussit: infudit cuius uncias binas aceti vini vulgaris, puri, filtrati; tum vasa calori temperato cubiculi exposuit. Elapsis nondum horis binis turbidum jam erat acetum, ac sapore infectum metallico; elapsis diebus aliquot adeo cernebatur turbidum et opacum, ut vasis fundus conspici jam non potuerit, pulvis simul deponebatur in calcem erosi stanni.

§. 593.

ACETO vulgari substituit *acetum destillatum* generosius eadem denuo quantitate, vasis optime prius purgatis; idem, uti prius, exortum nunc fuit phaenomenon. Filtravit acetum post aliquot dies, ac solutionibus salinis variis filtratum exploravit; praecipitatio exorta fuit ab addita solutione salis communis, salis alkalini volatilis salisque alkalini fixi: praecipitatum a solutionibus alkalinis deiciebatur majori copia.

§. 594.



S. 594.

VASIS probe purgatis infudit succos alios vegetabilium acidos v. c. succum citri filtratum, succum filtratum ribium, vinum acidum e. f. p. ab omnibus rodebatur stannum, succus citri turbidus quidem non fiebat; erosio tamen facta in stanno ipso cernebatur, succi vegetabilium rubri colorem mox deperdunt sic, et caerulefcentes evadunt: solum stannum oculis facile objici potest, dum acida in vasis illis diutius contenta evaporatione abiguntur, residuum comburitur, caputque mortuum actioni flammæ, cannula ferruminatoria adactæ subjicitur.

S. 595.

Quo vero innotesceret quantitas jovis, quæ in determinata quantitate aceti foret solubilis, sumsit Cl. MARGGRAFIUS stannum Malaccense purissimum tornatum, adfudit huic in cucurbita contento sextarium (Quart) aceti vini optimi, paulo magis concentrati; digestionem miscelam per noctem exposuit leniori, tum vero per horas aliquot calori ebullitionis, refrigeratum acetum a stanno decantavit, per filtrum misit, ac ex retortæ vitreæ calore balnei maris destillatione ad uncias circiter quatuor usque provocavit; acetum sic obtentum destillatum, cum æquali copia aceti recentis mistum, eidem uti prius experimento, eadem lege adhibuit, atque hoc repetiit octo vicibus ex ordine, solutionem stanni a tot extractionibus residuam inmisit retortæ vitreæ minori, abstraxit acetum, massam siccam, fracta retortæ exemptam, inclusit retortæ denuo minori, acidum adhuc adhaerescens abegit, calore ad vasis candescentiam usque intenso; sublimatam inclusit retortæ denuo minori, acidum adhuc adhaerescens abegit, calore ad vasis candescentiam usque intenso; subli-

mata

mata fuit aceti fuligo oleosa una cum admistis punctis quibusdam albicantibus, quae arsenicum simul sublimatum *Cl.* *VIR* dixit: remansit in fundo vasis calx stanni metallica, semireducta, pondere drachmas tres adaequans, pars hujus, flammae candellae cannula ferruminatoria adactae objecta, in verum reductum stannum, forma metallica donatum: constat itaque ex uncis duabus jovis vera solutione per acetum referatas fuisse in hisce tentaminibus drachmas tres cum granis viginti.

§. 566.

VIDEAMUS nunc pericula, quae cum stanno *Cl.* *WESTENDORF* instituit. Quum dimidia, ait, uncia stanni Anglicani purissimi duabus uncis aceti concentrati infunditur, et loco frigido ponitur, acetum mox acquirit colorem lacteum, sine omni tamen ebullitione, aut intrinseco motu; post sex horas modica jam pulveris albi quantitas fundum petit. Altera die, quum mistum ex retorta destillarem, lenique igne adhibito aceti ferme dimidiam partem abstraxissem, nigra quaedam stanni frustula non corrosa, nec soluta in retorta supererant; abstractum itaque acetum huic residuo denuo adfundeatur; unciaeque circiter dimidia destillando proliciebatur: quo facto stannum in retorta prorsus fuit partim in calcem corrosam, partim solutum; cum aceto prolecto rursus conjunctum liquidum omne a calce praecipitata separabatur. Filtrata solutio lacteum quendam prae se ferebat colorem, pellucida tamen erat, et longo demum tempore quidquam ad fundum dimisit: varia experimenta frustra institui, ut istam solutionem ad crytallificationem deducerem.



§. 597.

SAL *jovis* ex solutione stanni per acetum obtineri jam MYNSICHTUS dixit, qui tamen calcem stanni solvendam praecepit; stannum ipsum solvi ab hoc menstruo posse ignarus.

§. 598.

TARTARUS qua ratione stannum solvat, sufficientia facta nondum fuerunt experimenta.


§. 599.

DUM stannum, CL. WALLERIUS retulit, funditur, fusoque duplum salis communis cochleatim additur, peracta decrepitatione miscela agitur, ac tamdiu in igne retinetur, donec stannum sub forma metallica non amplius conspiciatur, totum stannum in calcem sic verti potest; eloto sale adhaerente omni calx albissima acquiritur. Solutionem vero salis communis in stannum etiam agere, tum patet ex colore nigro, quo vasa stannea tingi solent, dum salis muria, aut edulia salita in illis decoquantur, vel et abs ebullitione calentia super ignem retinentur; tum et ex calcinatione, quam experitur stannum granulatum, aut stanni limatura in muria salis decocta.

§. 600.

NONDUM constare (*Sibi*,) CL. BAUME dixit, quae nam actio salis ammoniaci in stannum sit, conjici solum posse, fore ut a stanno prout a reliquis metallis pluribus decomponendum sal hoc sit: interim tamen vel ex Alchemicorum dudum innotuit scriptis, *flores joviales* albissimos obtineri, remittis tribus aut quatuor par-

tibus



tibus ammoniaci salis cum una parte stanni limati; alkali tamen volatile a stanno non eadem ratione, uti a plumbo liberatur.

§. 601.

NITRUM cum stanni limatura detonat, ac in calcem albam hocce vertitur: detonatio hic fit vivida oritur, quum phlogiston in stanno non firmiter adeo ligatum sit metallicaee terrae. Elevari sic vidi, et adcretae laminae objectae frigidae flores pulverulentos ex albo flavescentes, cuprum dealbantes, hinc arsenicales. Monuit *Cl. WALLERIUS* vaporem album, ac stanni flores, dum stanni granula minima remiscuntur cum anatica dosi nitri, et miscela haec sensim ingeratur in retortam eandem tubulatam, epistomio claudendam, adposito simul excipulo.

§. 602.

OBSERVAVIT *Cl. GEOFFROY*, calcem stanni vulgarem nitro fuso injectam eandem producere scintillantem detonationem, uti fieri solet, dum stanni ipsius limatura ingeritur. Adjecit observationi huic *BAUME* effectum hunc non sequi, dum calx jovis acidis erosa recipitur; adparere hinc, phlogisto non adeo privatas esse calces, ignis ope confectas. Notare debuisset, magnam sane diversitatem inter calces diverso igne paratas; vidisset sic, stanni calcem igne violentiori diu tortam, parum adeo detonationem excitare, ac aliam erosam acidis.

§. 603.

RETULIT *Cl. ZIMMERMANN*, dum calx stanni probe calcinata remiscetur cum dupla aut tripla parte salis



salis Anglicani, miscelaque ultra horam calcinationi vehementiori exponitur, calcem maximam partem solvi, sal vero alkalescere; tritis his invicem, et adfusa aqua madefactis, calorem nasci magnum, tum vero miscelam lapidis adinstar indurescere; ex conminuta demum massa hac eadem, et in aqua soluta, solutionem stanni bonam obtineri, ex qua per oleum tartari per deliquium *stanni magisterium* deijcitur.

§. 604.

STANNUM cum *sulphure* abit in massam splendens, fragilem; oritur stratificatione stanni cum sulphure, ac fusione minerae stanni artificialis, in qua stannum sulphure vere mineralisatum occurrit. *Stannumustum* conficitur, dum partes quinque stanni limati, aut subtiliter granulati remiscuntur cum partibus tribus florum sulphuris in vase terreo (sartago enim, quam alii fumendam praecipiant, minus apte adhibetur, uti ex antea in *capite de FERRO* dictis circa *relationem ferri ad sulphur* constare poterit,) vasque inponitur igni, ut sulphur deflagrare queat; si quid forte minus accensum restet, JUNKERUS ex KUNCKELIO refert, adjecto novo sulphure deflagrat, deinde vero, quantumcunque sulphur addatur, non amplius cum eo dicto modo incenditur. Pulvis, seu potius calx stanni haec residua partim cinereo, partim nitidius atro colore adparet, qui ulteriori calcinatione qua sulphur abigitur, transit in colorem umbrae similem, longiori igne denuo nigricantem, tandemque cinereum, in furno autem reverberatio denique albescentem, aut subflavidum; calx haec, quo magis exusta est eo minus reducitur in metallicam formam.

§. 605.

SINGULAREM observationem adduxit Cl. WALLERIUS, cujus auctorem non addidit: quodsi nempe in minora fragmina quassatum sulphur sensim stanno fuso adjiciatur, pars cum stanno jungitur, stannum vero hoc, in conum fusorium effusum, Zincum fere mentitur. Dum stannum sic sulphuratum in crucibulo fusioni repetitae exponitur, tum ratione florum ascendentium, tum et flammae caerulescentis, eadem vix non uti Zincum exhibet phaenomena.

§. 606.

HEPAR *sulphuris*, notante JUNCKERO, stannum subtiliter adeo solvit, ut fere totum in aqua deliquescat, et mox, instituta filtratione per filtrum una transcat liquoris ex nigro fusci colore. Totum hoc deauro latuit BAUMEUM.

§. 607.

ACIDUM *phosphoricum* nisi concentratum sit, in stannum non multum agit; concentratum vero metallum hoc adrodit.

§. 608.

SAL *fusibile microcosmi* stannum vix tangit via humida. Via sicca singularia, et notatu digna, narrante Cl. MARGGRAFIO, exhibet phaenomena. Dum scilicet scrupuli duo stanni funduntur cum drachmis binis nunc dicti salis, in crucibulo tecto, sat notabilis portio stanni solvitur, uti ex scoriis lactescentibus fit manifestum. Regulus fundo adhaerens scrupulum unum cum granis duobus pondere exaequat: ut adeo



grana desiderentur octodecim. Textura reguli hujus foliacea singularis est, splendens, in fractura Zinci similissima. Inductilitas ejus satis indicat, magnam stannum expertum fuisse mutationem. Carbonibus ardentibus inpositus, aut candefactus, fluit sub inirium, tum vero, phosphori aut Zinci ad instar, accenditur, quod quidem, observante MARGGRAFFIO, satis demonstrat, phlogisticum stanni principium cum salis hujus acido coisse in phosphorum, metallo tandem inhaesurum, donec tandem candescencia expellatur. Regulus tamen hic idem cum partibus quatuor mercurii in amalgama perfectum ac legitimum vertitur.

§. 609.

ACIDUM formicarum stannum limatum, stanni que calcem vix adgreditur: ex solutionibus filtratis operationis salis tartari parum, aut nil omnino, deiectione potuit *III. MARGGRAFFIUS.*

§. 610.

OXYGALA, urina, cum stanni bracteolis omnium tenuissimis calore digesta, solutionem dederunt, ex qua calx albidula excussa ruebat. Stannum ab urina adhaesum, docent matulae stanneae diu in usum vocatae.

§. 611.

SAL alkali fixum cum stanni limatura fusum, diutius in igne retentum, metallum in scoriaceam massam vertit. Ab alkali caustico in aqua soluto stannum discerpi, si rasura eidem incoquatur, JUNCKERUS adnotavit.

§. 612.

SAL. *alkali volatile* in stannum etiam agit; solutionem hanc in crystallos concrelescere, Cl. WALLERIUS habet; crystallorum autem formam non descripsit.

§. 613.

NOTANDA demum adhuc venit singularis actio, quam ova, cocta inprimis, in stannum exserunt: dum ova cocta, bifariam dissecta orbi stanneo nitidissimo inponuntur, altera die, vel et elapsis solum septem, aut novem horis, macula in orbe cernitur, ejusdem magnitudinis, uti incumbens ovum fuerat, subnigra, plumbea; ovum caerulefcit, et saporem ingratum, metallicum, subarsenicalem linguae inprimit. Notatu omnino digna est, quum in bonum generis humani tendat ac solutionem stanni per ova apertissime doceat, observatio, quam Cl. BUECHNERUS in *diatribe de circumspecto usu vasorum stanneorum ad potuum, ciborumque, speciatim ex ovis conficiendorum, praeparationem necessario* *) tradit. Halae Magdeburgicae femina quaedam paraverat jusculum ex jure carnis bubulae in patina, ex Anglico stanno confecta, quod per noctem sequenti diei adservaverat. Eo igitur illud fervidum denuo fecit in eadem patina, tribus simul inmissis ovis, albumine singulis vitellis circumjecto, iisque ex artis coquinariae legibus in eodem loco inmotis remanentibus (Ses. Eyer; gesehte Eyer.) Quo deinde jusculo et ipsa haec femina, ipsiusque mariti soror atque filioli, singulique uno ovo vescuntur, paulo post vero, hora vix elapsa, omnes nausea, vomituritione, tandemque vomitibus per octo horas fere continuas

U 4

cor-

*) VIDE et *Comment. de rebus in scientia naturali &c. T. III. p. 303.*



corripiuntur, vehementer inde enervati. In ista deinde lance, oculis perlustrata, tres observatae fuerunt maculae nigrae in eodem loco, quo jacuerant ova, his ipsis magnitudine sua respondentes. Instituit deinde, ut de solutione hac stanni per ova eo certior redderetur, *Cl. BOECHNERUS* tentamina sequentia, quae ipsius verbis adferam. In orbem, inquit, stanneum infundimus ovum forbile, et per noctem ita infusum reliquimus. Mane forbendum illud decimus feli: cui tamen nulla alia symptomata, nisi, transacta circiter dimidia hora, frequentes ructus acciderunt. Verum tamen eodem die visa est ventriculo non recte valere, quoniam toto die vix aliquid ciborum degustavit. In ipso autem orbe, ab ovi reliquiis purgato, color nictidus perparum tantummodo obscurior factus deprehendebatur. Altero die eidem feli adposuimus comedendum ovum coquendo induratum, quod iterum per noctem, in duas partes dissectum, plana superficie in lance, e stanno Anglico confecta, repositum fuerat. Felis haud ita multo post esum non quidem vomuit; vomituritionibus autem frequentibus vexata est. Nitor stanni paulo magis, ac priori experimento, in nigrum vertebatur colorem eo, quo ovum jacuerat, loco. Tercio denique ovum salitum Halense (*Sool-Ey*) medio dissectum priori ratione per noctem in patina adservavimus. Mane satis insigni nigredine notata erat lanx, et feli ab ipsius ovi esu, inter plures vomendi conatus, ter ventriculus est subversus. — Solutio vero haec stanni per ova sali ammoniacali, ovis inhaerenti, probabiliter maxime ratione adtribuitur. An et inde petenda causa, quod cochlearia argentea, dum ad comedenda ova fuerint adhibita, colore subaureo primum, deinde fuscescente, et nigricante tingantur, eadem fere ratione, uti, dum aquae calcis argentum inmittitur politum, fieri solet?

§. 614.

OLEA in calcem stanni phlogisto omni nondum spoliata melius paulo, quam in stannum ipsum agunt; interim tamen et illa actio exigui est momenti, si cum ea, quam in plumbi calces exserunt, conferre velis.

§. 615.

PRAECIPITATUR stannum ex acido vitriolico ex observatis *Cl. HIAERNE* sequenti ratione. Stannum, ait, in spiritu vitrioli solutum mercurium sublimatum reddidit opalino colore, id autem solus spiritus vitrioli purusque neutiquam facit. Salia fixa non inspissantur, sed flavescunt tantummodo leniter, pelluciditate non ablata, cum aliquali tamen fermentatione: lixivium antimoniale praecipitatur colore flavo; spiritus salis ammoniaci solummodo colorem dat saturate viridem cum innatantibus floccis.

§. 616.

SOLUTUM in acido nitroso excutitur tum calore admoto, uti jam antea, de solutione hac agens, dixi, tum aqua adfusa; solutione, uti lac schiston spissescente, coagulata; *Magisterio stanni* ad fundum demum ruente. Stannum solutum in spiritu nitri, referente *HIAERNE*, nihil mutatur ab adfuso sale tartari, nec effervesceat quidquam cum salis ammoniaci spiritu, sed obscuratur solummodo colore ex fusco flavo cum opalini aliquid inmixto: nec violarum succus rubedine notatus, uti a spiritu nitri fieri solet, sed manet fusco suus color caeruleus. Saturatior haec solutio, monente *Cl. WALLERIO*, ab sale alkalino fixo, et spiritu salis ammoniaci calcis ope parato inspissatur, et syrupum violarum flavum, adinstar vini, non tamen



rubentem reddit. Interim jam ante dixi, saturatam stanni solutionem parari vix unquam posse.

§. 617.

SOLUTIONEM stanni *acido muriatico* factam cum salibus alkalinis, tum fixis, tum volatilibus effervesce, ac horum ope ad fundum deturbari *Cl. WALLERIUS* adnotavit. Ex observatis *Hiaernianis* stannum in spiritu salis resolutum mercurium sublimatum plane album reddidit. Veneris vitriolum et solutio, cum hac solutione commutata fuerunt aliquatenus (*sed quomodo?*) Alkalia fixa non dense coagulata; sed suam mutationem peregerunt lenius solito.

§. 618.

STANNUM solutum in *aqua regia* cum mercurio sublimato non albescebat modo, *HIAERNE* ait, sed et praecipitabatur albedine saturata. Fixa salia pallide flava reddebantur, cum quadam liquoris spissitudine, Antimoniale lixivium non fuscum reddebatur, uti solet cum *aqua regia*; sed ut solet, ubi cum volatilibus concurrit, flavum absque foetore; salis ammoniaci spiritus subviridescebat: in reliquis sese habuit more acidorum solito, cum violarum et heliotropii succis.

§. 619.

STANNUM solutum in aceto destillato mox, et calore, partim excutitur; *magisterium stanni* alkalium ope inde excutitur potest. Tentamina, quae *Cl. WERSTENDORF* cum hac solutione instituit, sic se habent: sal commune, ejusque acidum mox calcem albam haud mediocri copia praecipitabat; sal alkali fixum et volatile talem aequae extrudebat. Cum solutione mercurii

curii in spiritu nitri utrobique praecipitatio fiebat, sed partialis duntaxat. Dejectum autem crySTALLINAM habebat formam, et colorem albissimum splendentem. Idem phaenomenon se obtulit ex miscela solutionis mercurii sublimati, praeterquam quod calx quoad maximam partem ex mercurio constabat. Ex solutione argenti in spiritu nitri fiebat confestim praecipitatio metalli nigerrimo colore infecti; supernatans liquor colorem purpureum prae se ferebat, qui adjecta solutione stanni clarus iterum evasit. Praecipitatum saepius edulcorando nigredinem suam quodammodo amisit, quae vero exsiccatione et calcinatione intensior reddita: reductum argentum stanni quid inmixtum habuit. Solutio auri sub omni proportionem atque modificationem ab hac solutione colore purpureo praecipitabatur (*v. quae antea in cap. de Auro circa praeparationem purpureae mineralis additi.*) Vitriolum martis, veneris, saccharum saturni, acidum vitrioli, nitri, solutionem hanc non turbant; *) ratione adfinitatis aceti ad stannum *Cl. WESTENDORF* sequentem scalam condidit. Acidum falis communis, vitrioli, aceti, nitri. **)

§. 620.

*) CUR ergo dixit *Cl. WALLERIUS*, ex solutione stanni in aceto, tum ope salium alkalinorum, tum et ope acidi vitriolici, magisterium deijci posse?

**) NOTAT *Cl. WESTENDORF* circa colorem purpureum, sub quo aurum per hanc solutionem deijcitur, sequentia: recepta, ait, sententia, quod stannum nil ad colorem auri calcis purpureum conferat, mihi videtur falsa esse, quum purum phlogiston, vel ignis elementaris nulla terra admixta ruborem istum haud progignat. Sub certa encheiresi solutio stanni hunc ruborem, imperfectiore licet gradu, etiam cum solutione argenti producit. Plures observarunt, alias ad-



§. 620.

STANNUM ex solutione in aqua forti salis ammoniaci spiritu dejectum, referente *Cl. WALLERIO*, de novo solvitur, dum major spiritus copia adfusa fuerit; quod vero metallo huic speciale non est phaenomenon; solutionem quamdam etiam fieri subjungit, dum stanno sale alkalino fixo dejecto, spiritus dictus readfundatur.

§. 621.

STANNI cum *auro* misti phaenomena in *capite de Auro* fuerunt adlata.

§. 622.

STANNUM cum *argento* mistum vide in *capite de ARGENTO*.

§. 623.

adhuc solutiones metallicas purpuream auri calcem procreare; id quod equidem veritati consentaneum est; verum a solo phlogisto horum metallorum, in sua puritate considerato, prout a *BECHERO* factum, non efficitur, sed ex parte quoque a subtili, huic phlogisto admista, terra, quae variare in metallis mihi videtur, et ex quo discrimen hujus *principiati* nascitur.

CONFERRI haec debent cum illis. quae prius, dum de *purpura minerali* sermo erat, dicta fuerant, simulque adtendi, colorem purpureum enasci, quotiescunque aurum omnium subtilissime divisum fuerit, etsi nulla prorsum terra metallica adsit; instantiae nunc dictorum *loco citato* sufficientes habentur, ut earum repetitio hic foret supervacua.

§. 623.

STANNUM mistum cum *platina*, vide in *capite de PLATINA*.

§. 624.

STANNUM conjunctum cum *ferro*, vide in *capite de FERRO*.

§. 625.

STANNUM mistum cum *cupro*, vide in *capite de CUPRO*.

§. 626.

STANNUM sincerum Anglicum candidum mistum cum *plumbo* Scotico sincero in tentaminibus *Muschenbroeckianis* deprehensum fuit in stanno augere firmitatem, adeo ut miscela ex tribus vel quatuor partibus stanni, et una parte plumbi, sit duplo firmior, quam solum stannum fuisset; optima proportio pro firmitate est, quando ad tres partes stanni adjicitur una pars plumbi, tum enim firmitas fuit librarum 310. in parallelepipedo, cujus latus quodlibet in medio fuit $\frac{17}{100}$. poll. rhenoland: in omnibus experimentis parallelepipeda antequam frangerentur in majorem longitudinem sunt producta, et locus fracturae desit in tenuem apicem.

§. 627.

EXPERIMENTA etiam fecit cum stanno Malaccensi misto cum *plumbo* Anglico; specimina fundebantur in modulo stanneo, quorum quodlibet latus parallelepipedi quadrangularis in medio, qua parte frangebatur, fuit



fuit $\frac{17}{100}$. poll. rhenoland.; fuit magna tenacitas, ait, in multo metallo, et frangebantur omnia exemta, postquam erant producta in maiorem longitudinem, et adtenuata; optima proportio quoad firmitatem fuit, quum ad stanni partes 3. 4. vel 5. addita fuit una pars plumbi, tum enim metallum sustinuit libras 240. Sed in stanno Anglico misto cum plumbo major fuit firmitas, et quidem librarum 310., quod indicat stanni Anglici fabricam multum differre a stanno Malaccensi. — Ex stanno Anglico sumto ad libras 94. et additis plumbi libris sex componitur *stannum rosae* dictum, signatum rosa; parallelepipedum, cuius quodlibet latus $\frac{17}{100}$. poll. crassum, frangebatur a libris 190. Ex stanni Anglici libris 84. et plumbi libris 16. componitur stannum cantharorum: parallelepipedon, cuius quodlibet latus $\frac{17}{100}$. poll. crassum, frangebatur a libris 290. Ex $\frac{2}{3}$ partibus stanni Anglici, et $\frac{1}{3}$ parte plumbi componitur ferrumen, *clarum* dictum, ex quo parallelepipedon $\frac{17}{100}$. poll. frangebatur a libris 280. Stannarii Hollandici non solent pro patinis, aliisque utensilibus stanno Bancas, aut stanno Malaccensi uti, quia haec ambo stanni genera sunt nimis mollia, et candida: verum serviunt imprimis tinctoribus, et celeriter in aqua forti solvuntur.

§. 628.

EXPERIMENTA demum fecit MUSCHENBROECKIUS cum plumbo Indico, et stanno Malaccensi, invicem remissis. Plumbum Indicum, ait, servit thecis amplis, in quibus thea ex China ad nos adfertur; hoc plumbum non videtur esse sincerum, sed aliquid stanni admistum habere, ut firmitus sit, et latera thecarum fortiora efficiat; est quoque arenosius et siccus: miscui hoc plumbum cum stanno Malaccensi, fuitque fufum in modulo stanneo, crassities fuit $\frac{189}{10000}$. pollicis



cis quadrati, adeoque quodlibet latus $\frac{17}{100}$. poll. rhénoland. plumbum Indicum solum fractum fuit a libris 66.; quae firmitas ostendit non solum esse plumbum; nam plumbum Anglicum sincerum ex Hull sustentat modo lb. 25. et optimum Scoticum libras 30. Instituit experimenta decem miscelarum plumbi Indici cum stanno Malaccensi, ex quibus primum solum et ultimum hic adducam; miscela ex plumbi Indici parte una cum parte una stanni Malaccensis fracta fuit a libris 181., gravitas specifica erat 9, 0909.; plumbi Indici partes decem mistae cum stanni Malaccensis parte una, miscelam dederunt frangendam a libris 131.

§. 629.

PLUMBI tres partes, cum una parte stanni fusae, refert JUNCKERUS *) igne aperto, forti, sic ut instar plumbi, in cupella undulantis, fluat, singulare phaenomenon exhibet: nam metalla haec invicem turgescere primum, et quasi exērescere in altum videntur, deinde lucide candescunt, ac scintillant, quae tamen incensio repente evanescit, ac cinerem crassiusculum granulatum relinquit, difficulter fusilem.

SIGNATUM *stannum*, aut *librale stannum*, (ge. stempeltes Zinn, pfündiges Zinn) dicitur, quod plumbo sub diversa proportionē remissum est; *bisignatum* constat parte una plumbi cum partibus binis stanni, atque ex hoc in *Suecia* utensilia parare prohibitum est:

*) RETULIT hoc ipsum et Cl. WALLERIUS ex JUNCKERO, quin tamen Auctorem hunc nominaverit; ac ubi JUNCKERUS *tripulum* plumbi posuit, apud WALLERIUM unam *tertiam partem* invenio; an vitio typi?



est: *) *trifignatum* constat, *Walleriano* calculo, partibus 83. stanni, et 17. plumbi; *quadrifignatum* ita mistum est, ut in centum datis partibus contineantur partes 97. stanni, partesque 3. plumbi.

§. 630.

MERCURIUS cum stannō in amalgamatione sat facile jungitur, et stanni bracteis lubenter adhaerescit. Miscelae hujus ope paratur *aurum* sic dictum *musicum*, seu *aurum mosaicum*, aut *aurum masivum*, aut *aurum* demum *ad scribendum praeparatum*, et si denominationes nunc dictae omnes ineptae satis sint, quum ne granulum quidem auri ullius hic adlit. Descriptiones praeparati hujus dederunt Auctores varias. Adducam hic imprimis recentissimae, ac uti videtur optimae, quam Cl. Woulfe in *Philosophical Transactions Vol. LXI. p. 114 — 160.* inferi curavit, compendium ex *Commentar. de rebus in scientia naturali &c. gestis Vol. XXI.* Optima, epitomatores ajunt, ratio *aurum mosaicum* praeparandi est, si ad normam in Dispensatorio Londinensi praescriptam duodecim partes liquefacti stanni cum sex partibus mercurii amalgamantur, amalgama hoc pulverisatur, et una cum partibus septem sulphuris et sex partibus salis ammoniaci sublimatur. *Aurum* tunc *mosaicum* in inferiori parte sublimati reperitur. Miscela calefacta, stannum in sal ammoniacum agit **) seque cum acida ejus parte unit, alkali vero volatile cum sulphuris parte combinatum sub-

*) IN *Mineralogia* vero Cl. WALLERIUS *bilibrale* stannum partibus anaticis plumbi ac stanni, *trifignatum* vero 84. partibus stanni, et 17. partibus plumbi componi retulit.

**) CUR non potius dicitur, acidum muriaticum, in sale ammoniaco contentum, agere in stannum?

sublimatur, et fere totum dissipatur. Ipsum autem sal stanni, unione hujus metalli cum acido salis productum, etiam sublimatione extollitur, mercurius vero cum portione sulphuris unitur, et cinnabarin format, quae etiam ignis vi ascendit. Iam vero id, quod reliquum est, stanni, cum reliqua sulphuris portione unitur, et aurum mosaicum format, quod in inferiori parte sublimati reperitur. Nullus, observante *Cl. Woulfe*, in hac operatione mercurius cum acido salis combinatur. Neque acida, neque alkalia in aurum musivum agunt; si ea in aqua soluta sint. Si enim illud cum aequali portione salis alkali fixi igni committitur, hepatis species, in aqua deinde solubilis, exin producitur. Etiam sine mercurio aurum mosaicum praeparari potest, cujus quidem varios modos *Cl. Auctor* describit, inter quos is optimus est, quo octo partes stanni sulphure fusi et saturati, cum quinque partibus sulphuris fusione miscentur, et deinde cum quatuor partibus salis ammoniaci calcinantur. Pluribus quoque experimentis *Cl. Auctor* cognovit, vel ipsum sal ammoniacum in auri musivi praeparatione omitti posse. Sic v. c. si partes quatuor stanni cum sulphure saturantur, et deinde pulverisantur, atque cum duabus partibus sulphuris, et una parte stanni acido salis soluti, ac in crystallos redacti, miscentur, et deinde omnia calcinantur, aurum mosaicum optimi coloris obtinetur. Idem in praeparatione *liquoris* sic dicti *fumantis* *LIBAVII* fit, si scilicet stannum sulphuratum cum mercurio corrosivo miscetur, ac destillatio instituitur, qua peracta, aurum mosaicum in fundo retortae reperitur. Ex omnibus denique *Cl. Auctor* concludit, praeparatum, de quo hic agitur, ex stanno, et sulphure constare; mercurium vero ideo tantum addi, quo stannum dividatur; sal autem ammoniacum fusionem sulphuris impedire. Si duodecim partes stanni, septem sulphuris, et tres salis ammo-



niaci, totidemque mercurii sumuntur, major copia auri mosaici producitur, quam proportionem superius indicata. Pars sublimati, quae in aqua solubilis est, melius, quam ulla alia praeparatio stanni tingit. *)

ARGENTI *musivi* praeparationem in capite de Bismutho adferam.

§. 631.

Ex unione amalgamatica mercurii cum stanno parantur etiam *globi* sic dicti *mercuriales*, (*boules de mercure*) quibus pro depuratione aquarum utuntur. Formulam Cl. BAUME praescripsit sequentem: unciae duodecim stanni Malaccensis fundantur in cochleari ferro, adjiciantur fufis unciae tres mercurii, miscela bene invicem agitetur, ac in modulum demum effundatur, ut in formam sphaericam, dum frigore consistit, abeat. Globos tales linteolis obvolutos suspendunt in aqua, infectis impura reddita, et aquam hanc ebullitioni exponunt: monuit vero BAUME non abs ratione circa hanc operationem, infectorum interitum non tam globis mercurialibus, quam gradui magno caloris, quo aqua ad ebullitionem indiget, et quem infecta viva perferre omnino nequeunt, fore adscribendum.

§. 632.

UNIONIS demum stanni cum mercurio interventu *speculorum* ex altera parte *incrustatio*, (*l'étamage des glaces*; das Belegen der Spiegelgläser) perficitur. Ope-

- *) QUUM vero color jam remissior, jam intensior sit, rationem hujus, praeter alias causas, et ab arsenico, stanno, jam majori, jam et minori copia inhaerente, cum sulphure per artum nexu, repeto.



Operationis hujus fundamentum in eo potissimum versatur, quod vitra specularia lucem longe melius reflectant, dum corpore metallico, densissimo simul, lucem non transmittente, ac splendente, obducuntur. Operationem ipsam *Cl. MACQUERUS* in *Dictionnaire de Chymie T. II.* compendiarie ac bene descripsit. *)

§. 633.

TABULAE vitreae, quae incrustari debent, repuntur in mensis, horizontali, ac ad libellam composito situ; repurgatae prius ab omnibus adhaerentibus impuris, oleosis imprimis, pinguibus, aut fuliginosis vaporibus, vitro adhaerescantibus; nisi enim tertissimae tabulae fuerint, incrustatio tota non coit cum vitri superficie. Pro repurgatione hac cineres elixivatos, dein pannum laneum, crassiores, demum vero linteum adhibent; alii post cineres furfuribus tabulam perfricant, panno laneo ac linteo postea abstergendam. Tegitur tum superficies tabularum bracteis stanneis mundissimis, crassitie chartam aequantibus, adfunditur stanno mercurius currens copia majori, ut undique eo exacte obducatur, in hoc statu tamdiu relinquitur adparatus, donec amalgama stannum inter ac mercurium debite contractum fuerit. **) Inclinatur tum tabula vitrea parumper, ut excedens mercurii copia delabi paulatim queat: elevatur vero magis magisque per gradus, ac sub finem situ verticali collocatur.

X 2

Hac

*) PAUCA solum *Macquerianae* descriptioni addidi, ne limites operi praefixos nimium transscenderem.

**) ADTULI hic ea imprimis, quae in scopum praefixum facere magis visa sunt; relictis aliis, quae mechanicum potius adparatum mensae, vasorum mercurii excipientium, repagulorum ex lateribus coercentium &c. concernunt.



Hac ratione mercurius omnis expellitur, eo solum remanente, qui ad unionem metallorum inter sese invicem, et cum tabulae ipsius vitreae superficie praecise requisitus est. Amalgama vero hoc ipsum, cum ipsum connectitur cum vitro solo vinculo contactus exactissimi, ac prorsum immediati; hinc adparet, cur tanta cura adferri debeat, ne sordes, aut pulvisculi tabulae incrustandae adhaereant. Interim tamen cohaesio haec firma adeo non est, uti v. c. cohaesio stanni, cupro aut ferro inducti, ubi solutio simul, ac intrinseca magis penetratio locum habet: muniri hanc ob rationem latus amalgamate obductum ab adfritu omni vel levissimo, a rudiori adtactu, ab humiditate, a rodentibus imprimis exactissime debet; quin ad ipsam mercurii superabundantis expulsionem cautela requiruntur, ut per gradus vix sensibiles altior demum reddatur tabula; alias enim solo hydrargyri, ponderosissimi post aurum corporis pressu bractea stannea, in moleculas levissima vi ab invicem separandas, resoluta, rumpe retur, ac una cum mercurio delabente per tabulam devolveretur.

§. 634.

REGULUM *antimonii Cl* MUSCHENBROECKIUS miscevit cum stanno Bancas; fusio peracta in modulo et aurichalco, crassities fuit $17\frac{1}{2}$ poll. rhenoland.; *) et tentaminibus decem tria solum adducam: partes decem stanni dicti, mistae cum parte una reguli antimonii massam dederunt, cujus firmitas erat lb. 316., specifica gravitas 7, 3592, parum producebatur; fractura erat aspera; partes quinque stanni Bancas mistae cum

*) CRASSITIES $17\frac{1}{2}$, ait, est ad $\frac{17}{100}$ poll. uti 306.

parte una reguli massam fuerunt largitae, cujus firmitas erat librar. 375. grav. specifica 7, 2228., parum producebatur, fractura erat aspera granorum tenuium; ex miscela demum partis unius stanni Bancas cum parte una reguli antimonii obtinuit massam, cujus firmitas erat librarum 90., gravitas specifica 7, 0606.; major quantitas reguli antimonii cum hoc stanno misceri nequit, respuitque bonam fusionem.

§. 645.

MISCUIT et stannum purum Anglicum, *Bloktin*, cum regulo antimonii. Stannarii, ait, nonnunquam offendunt stannum, quod regulum antimonii respuit, vel parcam ejus copiam tantum admittit, quod ab incognita constitutione stanni et reguli pendet: ideo saepius tentavi aliquot miscere proportiones binorum metallorum, sed irrita successu; quum aut in modulis frangebantur infusa, aut exempta ex modulis erant adeo fragilia, ut nec limari, nec tractari potuerint; si stannum admittat regulum, tum stannarii centum libris stanni Anglici decem libras reguli antimonii adjiciunt, ex quo composito metallo efficiunt furcas, quae dentibus rigidis constant. Quum stannum inveneram, quod cum regulo antimonii bene miscebatur in igne, formata sunt parallelepipeda quadrangularia, quae modulo stanneo erant infusa, quorum quodlibet latus fuit $\frac{17}{100}$ pollic. rhenoland. —; ex sedecim tentaminibus, a MUSCHENBROECKIO institutis, adtulisse sufficiat sequentes: stanni Anglici partes novem, reguli pars una firmitas librarum 218.; stanni partes 3., reguli pars 1., firmitas librarum 350. stanni partes 4., reguli pars $1\frac{1}{2}$., firmitas librarum 180.; stanni partes 3., reguli partes 2. firmitas librarum 90.; stanni pars 1., reguli pars 1., firmitas librarum 41. gravit. specif. 7, 000. quia stannum Anglicum solum in ea cras-



fitie frangitur a libris 150., et regulus antimonii a libris 30., patet regulum non parum augere firmitatem stanni Anglici; maxima firmitas erat, quum pars 1. reguli miscebatur cum tripla parte stanni Anglici, tum enim metallum sustinuit libras 350. quando autem pari copia capitur stannum et regulus, fit metallum fragillimum, quod fractum splendet granis magnis.

§. 636.

MISCUIT demum stannum Malaccense cum regulo antimonii, quod quidem longe facilius misceri potuit. Ex decem tentaminibus primum et ultimum adferam: stanni Malaccensis pars una, reguli pars una, firmitas librarum 141. grav. specifica 7, 0793.; stanni partes decem, reguli pars una, firmitas librarum 133. gravit. specifica 7, 5660.; hujus, ait, misti metalli nequaquam fuit similis fragilitas ac in praecedenti, sed potius tenacitas, quae stanno Malaccensi est propria.

§. 637.

IN tentaminibus *Gellertianis* anaticae partes reguli antimonii ac stanni metallum dederunt album, ipsi regulo simillimum, inductile, gravitate specifica minori donatum.

ANTIHECTICUM POTERII, ac *bezoardicum joviale* in capite de ANTIMONIO adferam.

§. 638.

STANNUM cum Zinco facile satis jungitur *); stanni pars una, cum decem, aut duodecim partibus Zin-

*) MANIFESTO errore *plumbum*, stanni loco, in Chemico opere Cl. WALLERII ponitur, ubi de hac miscella in capite de Zinco agitur.

ei mista, volatilis redditur, referente *Cl. WALLERIO*. Miscuit *Cl. BAUME* unciam unam cum dimidia stanni, et drachmas sex Zinci, massa prodiit granulis minimis in fractura praedita, dura, multum tamen ductilis. Anaticae partes amborum dederunt massam durissimam, malleo tamen cedentem adhuc, in fractura granulis exiguis donatam. Additis binis partibus reguli antimonii ad partes octo stanni ac Zinci, massa prodiit durior, parum ductilis, aliquantum tamen, quin rumperetur, flexilis, granula obferens exigua. Uncia una stanni, quatuor drachmae Zinci, aequalisque copia reguli antimonii dederunt massam in fractura aes campanum fere referentem. Anaticae partes stanni, Zinci, ac reguli antimonii dederunt metallum granulorum exiguum, fragile. Octo demum partes stanni, octo Zinci, et quatuor reguli antimonii dederunt massam granulorum parvorum, duriores multo, quam quae proxime ante ultimo loco dictam descripta fuit.

§. 639.

MISCUIT et *III. MUSCHENBROECKIUS* in novemdecim tentaminibus stannum Indicum Bancas cum Zinco, ea lege, ut proportionibus singulorum alternatim adscenderent, ac decrescerent, crassities erat $17\frac{1}{2}$ poll. rhemoland. Adducam pro specimine tria solum tentamina; stanni Bancas partes decem, mistae cum parte una Zinci, dederunt massam, cujus firmitas erat lb. 387., gravit. specifica 7, 2880.; fractura erat admodum aspera, quadrata. Stanni Bancas pars una mista cum parte una Zinci massam dedit, cujus firmitas erat librarum 475. grav. specifica 7, 3214.; stanni Bancas demum pars una, mista cum partibus decem Zinci massam dedit, cujus firmitas erat librarum 170., gravitas specifica 7, 1304.



§. 640.

Ex tentaminibus octo cum stanno Anglico sincero *Bloclin*, et Zinco Goslariensi institutis patuit, Zincum cum stanno Anglico mistum, conjungere optime partes, ac firmitatem efficere duplo majorem, et ultra; differre hinc Zincum a stanno, licet nonnullis aliis proprietatibus conveniat (*l'hist. de l'Acad. roial. 1742.*) fusiones in modulo stanneo peractae fuerunt: plerumque partes in majorem longitudinem trahebantur, fracturae desinunt in cuspidem; sed quum minor est copia stanni respectu Zinci, fractura fit aspera, granulosa, et mistum metallum est durius ac fragilius.

§. 641.

Miscuit stannum Malaccense cum Zinco Goslariensi; pars media parallelepipedo, quae erat tenuissima, frangebatur ab adpenso pondere; habuit quodlibet latus in his, uti et in praecedentibus proxime experimentis, $\frac{17}{100}$ poll. rhenolandici. Ex decem tentaminibus patuit, quod Zincum videatur firmitus conglutinare partes stanni Malaccensis, quam stanni Anglici; est enim firmitas solius stanni Anglici major quam stanni Malaccensis; nihilominus stannum hoc cum Zinco junctum plus ponderis gestare potuit, et praeterea retinuit proprietatem tenacitatis, quae stanno Malaccensi inest; quum autem frangebatur, in multo majorem longitudinem extractum fuerit: quum tamen proportio stanni decreverat multum respectu Zinci, fractura fuit aspera et granulosa.

§. 642.

Miscuit stanni Anglici partes $\frac{4}{7}$ cum plumbi Scotici p. $\frac{1}{7}$, et Zinci Goslariensis p. 1. rupta massa fuit



a lb. 291. ; miscuit stanni dicti p. $\frac{4}{5}$. cum plumbi p. $\frac{1}{5}$. , et Zinci p. $\frac{2}{5}$. rupta fuit a libris 290. ; miscuit demum stanni p. $\frac{2}{5}$. cum plumbi p. $\frac{1}{5}$. et Zinci p. $\frac{2}{5}$. , rupta haec massa fuit a libris 390. , latus quodlibet parallelepipedo erat $\frac{17}{100}$. poll. rhenoland. stannum Malaccense, bismuthum, et Zincum miscebantur pari copia, infusa miscela fuit modulo stanneo, latus quodlibet parallelepipedo uti prius; fractum fuit a libris 225. Miscebantur et stannum purum Anglicum, Bismuthum, et Zincum pari copia, massa infusa modulo stanneo; parallelepipedon, cujus quodlibet latus fuit $\frac{17}{100}$. poll. rhenoland. fractum modo fuit a libris 310. Miscelam stanni cum Zinco specificè leviolem dixit Cl. GELLERTUS.

§. 643.

STANNUM Bancas cum *bismutho* mistum Cl. MUSENBROECKIUS novemdecim tentaminibus exploravit, ea denuo lege, ut proportionem utriusque corporis alternatim adscenderent, ac decreverent. Adferam primum ex illis, medium, ac ultimum; (metallum fufum fuit in modulo aurichalceo, crassities $17\frac{1}{2}$. poll. rhenolandici; bismuthi folius firmitas fuit lb. 40.) partes decem stanni Bancas mistae cum parte una bismuthi metallum dederunt, cujus firmitas erat lb. 380. grav. specif. 7, 5769. fractura quadrata, aspera granis crassis, longiora non fiunt: stanni Bancas pars una cum anatica portione bismuthi metallum dedit, cujus firmitas lb. 360. gravit. specifica 8, 4169. stanni Bancas pars una mista cum decem partibus bismuthi dedit massam, cujus firmitas lb. 116., grav. specif. 9, 4239. fragilem, non productam, granis crassis: firmitas autem maxima erat librarum 500. additis partibus quinque stanni ad partem unam bismuthi; minima, librarum solummodo 86. additis partibus septem bismuthi



muthi ad partem unam stanni ; gravitas specifica sese habuit in prima nunc dictarum miscelarum uti 7, 6132. in altera vero uti 9, 4528.

§. 644.

Ex tentaminibus decem aliis , in quibus junctum fuit stannum Malaccense cum bismutho (latere quolibet parallelepipedo quadrangularis $\frac{17}{100}$. poll. rhenoland, efficiente) patuit , stannum Malaccense refusum bene misceri cum bismutho, nec metallum fragile efficere: augere autem bismuthum stanni firmitatem, praecipue si respectu stanni capiatur uti 1. ad 3., vel 1. ad 4. Major minorve copia stanni mista cum bismutho metallum mistum exhibet infirmius. Nihilominus bismuthum admodum augēt stanni Malaccensis firmitatem, eamque quadruplo majorem facit, adeo ut bismuthum stanni hujus partes optime conglutinet. Stannarii belgici, qui ex stanno Anglico quaelibet vasa, et patinas, et orbes faciunt, stanno bismuthum adjiciunt, ut stannum facilius in igne lique scat, et modulus accuratius inpleat: verum libris centum stanni non plus quam sesquilibram bismuthi, alii minus adjiciunt. Non autem stannum Anglicum patitur quolibet bismuthi copiam sibi admisceri ; imo, quum ad sex partes stanni adjicitur una pars bismuthi, metallum compositum oritur, adeo fragile, ut tractari fere nequeat, et cujus fractura est admodum aspera. *) Bismuthum auget stanni Anglici firmitatem, sed nequaquam tantopere, ac stanni Malaccensis. Fractura 10. spe-

*) In adjecta vero tabula ad frangendam miscelam partium sex Anglici stanni, ac unius partis bismuthi libras 280. requiri, in parallelepipedo, cujus latus quodlibet fuit $\frac{17}{100}$. poll. rhenoland. MUSCHENBROECKIUS posuit.

speciminum erat aspera, exhibens speciem grani, quod in nonnullis adparuit crassius, in aliis tenuius, superficies fracturae fuit plana et recta, ad longitudinem parallelepipedum; frangebantur uno ictu celeriter, et rupta non evaserunt longiora. Etli vero MUSCHENBROECKIUS paulo ante dixerit *stannum Anglicum non pati sibi admisceri quamlibet bismuthi copiam*, in Scholio adnexo tentaminum decem tabulae denuo monet: quod firmitatem adtinet, non multum differre, quatenam capiatur proportio stanni respectu bismuthi, quum fuerit eadem firmitas in proportionem 9. ad 1., ac 2. ad 1.

§. 645.

Ex binis partibus stanni, parteque una bismuthi metallum compositum, TUTTANEGO dictum obtinetur: recurreret adhuc sermo de connubio stanni ac bismuthi in *capite de BISMUTHO*.

§. 646.

COBALTI *regulus*, anatica dosi junctus cum stanno, metallicam praebere massam in fractura obscure griseum, adeo vero sub malleo ductilem, ut in laminas tenues expandi queat, atque instantiam hanc esse solam et unicam ductilitatis miscelae ex metallo ac semimetallo factae *Cl. WALLERIUS* monuit; bene tamen adiecit *Cl. WEIGEL*, et aurichalcum componi metallo ac semimetallo, satisque esse nihilofecius ductile.

§. 647.

MISCUIT *Cl. BAUME* drachmam dimidiam stanni fusi cum drachmis binis reguli cobalti sulphurati, drachmisque binis salis communis: obtinuit massam
me-



metallicam, drachmas duas cum granis duodecim ponderantem; arte substantiae distae invicem junctae fuerunt: massa granula minima, et colorem subviolaceum exhibuit; scoriae tinctae fuerunt colore pallido, subfornido cerasco.

§. 648.

STANNUM cum *arsenico* facile jungitur, et summa substantiarum harum amicitia ex antea dictis jam patuit. Stannum, III. MARGGRAFIUS ait, unum ex metallis est, queis arsenicum lubentissime adhaerescit, ac a quo aegerrime divelli potest, uti sequenti experimento patescit. Sumsi unciam semis limaturae stanni Mallaccensis, addidi huic unciam dimidiam arsenici albi, miscelam retortae vitreae indidi, adposui excipulum, et ex balneo arenae, calore ad candescentiam usque intenso, destillationem urxi. Sublimatum sic fuit arsenicum sub forma metallica reguli arsenici, fracta retorta ponderatus aequabat drachmas duas cum dimidia; stannum in fundo retortae remanens mutatum nunc erat in calcem ex albo griseam, ponderantem drachmas quinque cum dimidia; hinc, non obstante igne candescentiae, drachmam unam ac dimidiam arsenici in amplexibus suis retinuit. Arsenicum vero ipsum eripuerat stanno phlogiston, atque hujus ope forma semimetallica in altum elevatus fuerat. *) Stannum ab arsenico in calcem sic mutatum, drachmas quinque cum dimidia ponderans, indidi retortae loricatae terreae, ignem

*) MAJOREM tamen arsenici reducti copiam adscendere posse, ubi aut minor dosis arseniei, aut major stanni recipitur, ut sic phlogiston copiosius ex stanno in sese rapere arsenicum possit, alia experimenta docuerunt: fateri tamen simul debeo, nunquam non partem arsenici stanno remanere intricatam.

ignem, adposito excipulo, per gradus ad summum usque intendi. Refrigerato demum adparatu inveni in excipulo parcam copiam liquidi, odore phosphorum referentis; in collo vero retortae paucum arsenicum nigricans, pondere scrupulum dimidium circiter aequans, loco postico maxime grana nonnulla arsenici albi crystallini; residuum constituebat calx stanni grisea denuo; superne rarior; inferne, ubi retortam terream tetigerat, tum firmiter adcreta, tum ad oram in substantiam vitriformem fuscescentem mutata; quod a vase liberare potui, unciam dimidiam exacte ponderabat; ut adeo in computum simul ductis adcreta firmiter parte, sublimato, liquido odorato, ac substantia pulverulenta drachma arsenici, sub igne violentissimo arsenico mista manserit. Sumsi tum drachmas duas cum dimidia arsenici forma metallica prius sublimati una cum pauca copia, quae igne violento ex retorta terrea adhuc prolecla fuerat; remiscui denuo cum uncia una stanni limati, miscelam prius dicta ratione destillationi subjeci ex igne arenae; in altum nunc drachma circiter dimidia arsenici sub forma metallica elevata fuit. Residuum stannum, uti prius factum, in calcem ex albo griseum iterum abiit, pondere unciam unam, drachmasque binas aequantem. Quodsi ergo drachmae dimidiae arsenici nunc sublimati uncia stanni semis adhuc adderetur, ac operatio eadem denuo lege institueretur, arsenicum certe adhaesurum esset stanno; constat itaque uncias binas stanni recipiendae unciae dimidiae arsenici aptas natas esse.

§. 649.

ADJECI, MARGGRAFIUS pergit, ut viderem, qua ratione calx haec stanni, arsenico gravida, phlogisto remissa, ac sub reductione insequente sese gereret, unciae uni ac dimidiae calcis dictae drachmas tres fuliginis



nis exustae, cum uncia una semis salis tartari; fusioni miscelam hanc in crucibulo probe tecto exposui; obtinui vero, reguli loco, massam spongiosam, nigram, granulis metallicis referram; haec per noctem aëri exposita mansit; dum vero sequenti die in mortario terere in pulverem vellem, adeo incaluit, ut mortarium teneri manibus vix potuerit. Miscui denuo cum uncia dimidia fluxus nigri, ac regulum tandem obtinui, qui, a scoriis adhaerentibus liberatus, Zincum forma retulit, fragilissimus erat, et, igne leniori refusus, drachmas septem pondere aequabat. Planum ex hoc tentamine omnino fit, quam arcte arsenicum stanno cohaereat: quum vero in plerisque mineris jovialibus magna copia arsenici lateat, uti sub earum ustulatione satis adparet, ustulatio vero nec diu satis protrahatur, arsenicum praeterea vix divelli a stanno queat, simul etiam concurrant minerae pyritosae albae (Misspickel), ac martiales arsenico inquinatae, quibus forsitan conubium arsenici cum terra metallica stanni facilius redditur, fusio etiam aliter fieri nequeat, quam ut carbones mineram immediate tangant, a priori adparet, fore, ut sat notabilis portio substantiae hujus, noxiae adeo, sub reductione metallica terrae jovialis penetralia metalli exsurgentis subeat; atque hinc stannum, quod ab officinis pro purissimo divenditur, majori copia arsenici inquinatum sit. Ab arsenico deducit *Cl. MARGGRAF* duritiem ac fragilitatem stanni, de qua Stannarii artifices saepe adeo conqueruntur.

§. 650.

STANNUM, *Cl. CRONSTAEDT* ait, cum *Niccolo* facile jungitur in massam albentem, splendentem; dum haec miscela sub testudine fit, flamma illico accenditur, ac stannum una cum niccolo in calcem albam sub forma dendritica efflorescit.

§. 651.

§. 651.

INTER *succedanea* ad hocce caput adferam *antihecticum* sic dictum POTERII, *bezoardicum joviale*, ac *incrustationem ferri cuprique ope stanni*.

§. 652.

ANTIHECTICUM POTERII MAETS sic praescripsit. Reguli Antimonii partes duae, stanni Anglici optimi pars una, vel ana partes aequales, fundantur simul in crucibulo, ubi bene fusa steterint, effundantur, et, simul ac refrigerata erunt, comminuantur in pulverem tenuem, cui admisce nitri purificati praeter propter partem semis, vel, uti MORLEY monuit, ad pondus omnium. Totius massae contritae instituatur decoctio in crucibulo, ut artis est in antimonii diaphoretici praeparatione. Calcinatione peracta, falsedinem ablue, pulveremque subtilissimum a grunis separato.

§. 653.

BEZOARDICUM *joviale*, Cl. SPIELMANNUS ait, *antihecticum* POTERII esse adfirmat HOFFMANN ad POTERII *Pharmacopoeam* *) Spagy. L. II. cap. 18. praecunte ETNERO *Man. Poterian.* paratur istud metallum, ex una reguli antimonii parte, et duabus stanni constans, cum triplo nitri deslagrando; caerulescente colore hoc praeparatum solet esse insignitum. Dixit quidem SPIELMANNUS, *antihecticum* POTERII, si proprias insistendis diarrhoeis, et sudoribus colliquativis vires edat, prouti edere a multis dicitur, eas ratione

*) ANTEA data *Antihectici*, et nunc sequens *bezoardici* descriptio, quid circa haec statui debeat, facile demonstrabit.



tionem stanni exferturum esse: meliorem tamen mereri non videtur crisin, quam remedium esse, tum *antihelcticum*, tum *bezoardicum*, inutile, ac subleſtae fidei, quod ex Pharmacopoeis optime jure expungatur: in stanno enim vix abs ulla exceptione arsenicum latere, arsenicum hoc arctissime cum stanno jungi, (ne fors quis dicat, liberari per detonationem ab arsenico fors adhaerente stannum) ex antea dictis abunde patuit; arsenicum vero corpori ingestum horrendum esse venenum, notum nimis est, quam ut latius hic demonstrari deberet.

§. 654.

INCRUSTATIO *ferri* et *cupri* per *stannum*. Differunt ab invicem, *Cl. MACQUERUS* ait in *Dictionnaire de Chymie T. II. **), encheireses, quibus ferrum stanno obducitur ab illis, quarum ope stannum superficiem cupri adplicatur. Cuprum obducitur stanno, dum vasa ac utensilia varia jam ex eo confecta sunt, ferrum autem in laminis plerumque obducitur, etsi quidem vasa quoque ferrea et possint, et soleant stanno induci.

§. 655.

CUPRUM stanno obducendum omnium primo ab adhaerente fors aerugine, ope instrumenti chalybei, huius negotio speciatim dicati, optime repurgatur: quum vero hac ratione cuprea vasa insigniter simul destruantur, ac tenuiora semper fiant, alii perfricant eodem successu cuprum obducendum faecibus vini, exigua parte aquae for-

*) JUNGAM descriptioni *Macquerianae* operationis hujus hinc inde quaedam, quae ad eam perfectiorem reddendam facere videbuntur.

fortis, et arena subtiliori: *) inponitur tum prunis ardentibus, ut caleseat; calens fricatur resina, ac illico adfundunt liquatum stannum, quod mediante fasciculo cannabino, ligneo manubrio adligato, expanditur, ac parieti vasis adlinitur. Adhibent hunc in finem stannum una parte plumbi plerumque remissum. *Cl. BAUME* vero monet, in Galliis etiam stannum purissimum pro hac incrustatione recipi, nec bene adeo negotium totum succedere, dum stannum plumbo mistum sumtum fuerit. Picis additio omnino requiritur, quum gradus caloris, cui vasa cuprea exponuntur, sufficiens esse queat, quo superficies levissime saltem calcinaretur; haec vero, etsi tantilla foret, impediret tamen adhaesionem arctissimam stanni cum ipso cupro; pice itaque phlogiston, forsitan deperditum, illico restituitur. In formam, ejus opè, pariter reducuntur metallicam exiguae moleculae stanni, fusione ipsa in calcem versae.

§. 656.

FUNDUNT etiam alii stannum in ipso vase, quod obducere illo volunt, fusum per totum vas movent, ut ubique adhaereat; methodus vero haec aliis postponenda est. Ex relatis *Baumeanis* in orientalibus provinciis vasa cuprea, in quibus coffeae fabarum tostorum pulvis decoquitur, solutioni inmerguntur salis ammoniaci, siccataque inmittuntur stanno fuso. Stannum purum ad hanc speciem incrustationis requiritur, uti ex libello: *Ausführliche Anweisung zur Verzinnung*

*) *RATIO* praeviae hujus operationis ex illis, quae in *capite de METALLIS IN GENERE* dicta fuerunt circa dotem metallorum, quod uniri cum calcibus nunquam possint, sed forma ipsa metallica sese mutuo tangere debeant, facile eruitur.



nung der kupfernen, messingenen, und eisernen Gefäße, mit reinem englischen Zinn, von den Gebrüder Gravenhorst. Braunschweig, 1774. 8. Opus vero non est, ut sal ammoniacum in lixivium prius, seu solutionem aquosam redigatur; in pulverem enim tum vasi calefacto adspergi, et fasciculo cannabino adfricari potest, quo facto stannum liquatum methodo antea dicta lateribus vasis applicatur. Sal ammoniacum tum superficiem vasorum recipiendo stanno reddit aptiorem, tum et, parte contenta phlogistica, cuprum a calcinatione aliquatenus tuetur.

Quo durabilior incrustatio fiat, artifices nonnulli Zincum fuso stanno solent adjicere, quin alii solum Zincum hunc in finem adhibent, quum, dictis legibus, cupro bene etiam adhaerescat.

§. 657.

Pro incrustatione ferri, metallum hoc praeparari pariter prius debet. Rationes enim eadem prorsus huc adfunt, quae paulo ante circa cuprum fuerint adlatae. Hinc superficies obducenda arena, aut frusto arenarii saxi (*grais*) probe perfricatur, ut sordes omnes maculaeve rubiginosae prorsum auferantur: inponitur hoc facto aquae, in qua furfures filiginei, aut farina haeret immista, fermentationem subitura, ac liquidum redditura accescens; per horas viginti quatuor sic haerere debet, interea tamen temporis alternatim versae, ut nova superficies exponatur aquae subacetosae actioni. Fricatur tum denuo, abstergitur linteis, ut humiditas auferatur omnis, ac in loco sicco interim adservatur; atque haec quidem praeparatio cum laminis ferreis potissimum suscipitur; res enim aliae limae ope potissimum incrustationi excipiendae adaptantur.

§. 658.

§. 658.

FUNDITUR jam stannum eo solum ignis gradu, qui ad fundendum, ac in statu fluido retinendum, requiritur, adjicitur simul ea quantitas picis, resinae, pinguedinis, aut sebi, (res enim eodem redit,) ut fuso stanno ad trium, quatuor, aut quinque denuum pollicum altitudinem incumbat: quod quidem eo solum consilio fit, ut aëris arceatur liber aditus ad fusum stannum, ut hinc in calcem hoc verti aëris et ignis conjuncta actione nequeat; etsi *III. REAUMUR* monuerit, pinguedinis hujus ope tum adhaesionem stanni ad ferrum reddi faciliorem, tum et stannum in calcem versum illico denuo reducatur in metallicam formam. Fuso sic stanno ferrum obducendum immergitur, movetur, undique obductum extrahitur, ac nonnihil supra vas stannum continens retinetur, ut adhaerescens nimia stanni copia guttatim delabi queat. Pinguedo adhaerens lignorum scobe a ferra decidua, fursuribus &c. aufertur. In ferri incrustatione adhiberi pariter potest sal ammoniacum, cujus solutioni ferrum immergitur, aut prunis injecti vaporibus objicitur, aut demum, uti antea dictum fuit, pulvere perfricatur.

§. 659.

SAL *jovis* in diversis fabricis optimo cum successu adhiberi, pro colorum rubrorum ac caeruleorum, telis bombacinis adplicandorum, exaltatione, notari his loci adhuc meretur.



P L U M B U M.

§. 660.

PLUMBUM, SATURNUS (h) *) metallum ignobile, colore donatur ex albo, griseo, livido misto, plumbeo speciatim dicto: in fractura recenti ex albo caerulefcit, manibus tractatum easdem nigro pigmento inficit, ac in charta etiam vestigium relinquit. Splendens quidem remissius plumbum nunc fufum, aut politum est; mox tamen caerulefciente colore inducitur, demum splendorem omnem amittit. Colores caeterum plumbum largitur varios, uti mox dicetur, albos, flavicantes, aurantios, rubros. In examine plumbi per microscopium *Cl. TILLET* grumulos majores, quam in stanno, cavernulas magis patulas deprehendit.

§. 661.

GRAVITAS plumbi *specifica* insignis est, mercurio proxime accedens; adsignatur in Chemicorum scriptis uti 11325, ad 1000. aquae. In tentaminibus *Muschenbroeckianis* rationes occurrunt sequentes: Plumbi minera 6, 800., plumbi calx 8, 940., cerussa 3, 156. plumbi cerussa ex Gazophylacio *GAUBII* 4, 59066., plumbum ustum 1, 666., lithargyrium auri 6, 000., lithargyrium argenti 6, 044., Saccharum saturni 2, 745., plumbi galena Fahlunensis 7, 220., plumbum viride ex Hungaria 4, 148., plumbum viride Ohrenburgense 3, 398.: Plumbum vero *sub metallica forma* Indicum 11, 2259., Anglicum purissimum 11, 4459., optimum ex Stoklon insignitum *IB.* 11, 3333., ex Stok-

*) h. notat totum fere rodens, cum aliqua argenti similitudine, quod perito satis. *BOERHAAVE.*

Stoklon minoris valoris insignitum t. II, 4626., ex Hull II, 424., aliud II, 4794., aliud II, 325., aliud II, 345., Scoticum purissimum II, 38759., aliud II, 4166., Germanicum purissimum II, 4451., ex Herstal II, 156., aliud II, 310., mistum ex Anglico Stoklon, ex Scotico, et ex Germanico pari copia, II, 225. Pollex cubicus plumbi ad uncias 7. hinc pes cubicus ad libras 828. vulgari calculo aestimatur.

§. 662.

DUCTILITAS plumbi ductilitate metallorum reliquorum minor est.

§. 663.

TENACITAS plumbo ea est, communi calculo, ut filum unam decimam pollicis Rhenensis partem crassum libras viginti novem solum cum unciis quatuor sustineat, antequam rumpatur. In tentaminibus cum machina *Muschenbroeckiana* klastica institutis fracta fuerunt parallelepipeda, fusa in modulo stanneo, quorum latera quaevis $\frac{17}{100}$ poll. crassa erant, sequenti modo: plumbum Anglicum sincerum ex Hull ruptum a libris 25. pl. Anglicum optimum insignitum I. B. ex Stoklon a libris 25 — 30., pl. Anglicum ex Stoklon minus sincerum a libris 25., pl. Scoticum optimum a libris 25 — 30. pl. Germanicum ex Herstal a libris 17., plumbum Indicum a libris 63 — 66.

§. 664.

EXPLORAVIT praeterea MUSCHENBROECKIUS, quantum plumbi Scotici firmitas et densitas increset, dum plumbum idem variis vicibus trahatur per foramen rotundum: crassities cujuslibet parallelepi-



pedi fuit $\frac{17}{100}$. poll. rhenolandici. Didicit ex illis, plumbum in fila ductum posse evadere fere triplo firmitus, quam erat modo fufum: quāmobrem, ait, quum tecta aedium, et canales pluviam ex tectis recipientes, soleamus obtegere laminis plumbeis, vel canalibus plumbeis pluviam dirigere in cystemas: qui canales ex lamellis in rotundum flexis et ferruminatis efficiuntur, multo praestantiores et firmiores, pro his omnibus operibus plumbeae laminae erunt, si intra cylindros ferreos, in rotundum converfos, fuerint adplanatae, et partes partibus adpressae: tum enim fissurae et inflaturae vesicularum aërearum, quae interfundendum saepe oriuntur, tollentur, lamellae plane solidae efficientur, et usui meliores erunt. Haec methodus planandi et densandi plumbeas laminas (vulgo vocatur *Pletten*) in Belgio nondum est recepta, uti quidem in Gallia, quum tantum laminis fufis uti soleamus: praestabit quoque complanatum plumbum pro canalibus fontium, quum latera canalium multo tenuiora, et aequae firma, quam crassiora plumbi modo fusi esse possunt. Flexibile satis plumbum complanatum manet in omnes usus. Monet praeterea *Cl. Vir*, tentaminibus edoctum fuisse, plumbum tum tractione per foramina, tum cusione non densari, quum tamen multo firmitus evadat: plumbum enim, cuius gravitas specifica erat 11, 4794., tractum octies fuit per foramen continuo angustius, huiusque gravitas specifica fuit 11, 3176., tutudidit dein plumbum idem diu malleo in rotundum ab omni parte, tumque gravitas specifica fuit 11, 2187. Refudit idem filum plumbeum in cochleari ferreo, in eoque refrigeratum etiam fuit; sed rediit pristina gravitas major, quam in tracto cusove plumbo fuerat; ne sordes, vel pinguedines superficiei adhaesisse dicantur, abrasit caute externam superficiem, lavit in aqua, sed semper plumbum modo fufum, et refrigerio commissum maioris gra-

gravitatis specificae deprehendit, quam idem cūsum tractumve per foramina; in altero plumbo gravitas fuit 11, 40329., ejusdem in filum tracti autem 11, 38043.

§. 665.

Quid plumbo sub malleo accidat, ex nunc dictis facile patescit.

§. 666.

ELASTICITATE palmam reliquis plumbum relinquit.

§. 667.

AJUNT quidem passim Chemicī, plumbum inter substantias metallicas reliquas minime sonorum esse, atque in proverbium abiit, ut res parum, aut omnino non sonora cum plumbea campana in comparationem traheretur. Observavit tamen, his omnibus non obstantibus, *III. REAUMUR*, et plumbum tinnitu clariorique sono gaudere. Deprehendit omnium primo *Cl. LEMERY*, massam quamdam plumbi tinnitu fuisse praeditam: sonus massae hujus clarus ac subtilis regiae scientiarum Academiae socios in admirationem omnes rapuit, ait *Cl. REAUMUR*.

§. 668.

UT vero tinnitus producat, non determinata quaedam plumbi requiritur species, sed omnes omnino rei huic aptae sunt. Dum plumbum in cochleari ferreo funditur, ac in eodem refrigerio dein exponitur, vix non semper tinniens erit: figura, quam plumbum hic adsumere debet, sectione sphaerae, aut sphaeroide elliptica, ex uno latere complanata, absolvi-



tur. Expressit *Cl. REAUMUR* et in arena formam cochlearis, liquefactum illi infudit plumbum, et tinniens ex aequo metallum hocce obtinuit: notavit autem, sonorum non fuisse, dum in formam lenticularem, seu ex utroque latere convexam, funderetur; sonorum quidem, minus tamen, quam sub prima figura fuit, in discos paulo crassiores fufum.

§. 669.

DANTUR tamen et circumstantiae, ubi plumbum ex cochleari exemptum non tinnit. Prima haec est, dum superficiem illius obsident sordes, altera, dum margines ad lineas aliquot extenuati nimium sunt: primum evitatur, ejectam calcem tollendo a plumbo in statum solidum jamjam abituro; alterum, abscindendo forfice marginem nimium tenuem; sonus sensim enascens acutior in massa apici digiti inposita, et instrumento quodam percussa, designabunt, quantum abscindendum sit.

§. 670.

FORMA tamen sola tinnitui producendo non sufficit, malleo enim in dictam antea formam redactum plumbum parum adeo, ac vulgare quodvis aliud, tinnit; massa tinniens malleo percussa tinnitu privari poterit, quod et accidit, si massa tinniens una cum clavibus in sacco diutius portetur.

§. 671.

RATIO phaenomeni directioni, ac positi symmetrico particularum plumbi, quam sub refrigeratione adsumunt, videtur adscribenda. Comprobatur hoc instantiis variis; nam plumbum fufum solum, ac len-

te refrigeratum tinnit; effectus autem hic non sequitur, dum partium positio quacunque demum ratione turbata fuerit; uti ex paulo ante dictis circa deperditionem soni, quam plumbum tinniens percussione patitur, adparet. Fudit etiam *Cl. REAUMUR* plumbum in cochleari methodo consueta, liquidum adhuc agitavit, ut in superficie undulae continuae formarentur, quae demum et in refrigerato persisterunt: fudit plumbum et in alio cochleari, atque cochlear quidem ipsum non motitavit, fili autem ferrei ope fibras metallicas in plumbo hoc statui solido jam vicino abruptit, ac turbavit: massa utraque ne minime quidem tinniebat. Granula exigua, quae in textura plumbi diffracti manifeste conspiciuntur, alium longe positum in omnibus hisce casibus adsumere debent, quam sub refrigeratione lentiori adsumerent; hinc vibrationibus alia longe ratione obsecundant; hinc propagationi soni undique obstant; hinc massa tota tinnire nunquam poterit. Adparet vero ex adlatis omnibus, plumbum solummodo fufum tinnitui producendo aptum natum esse; dotem hanc deperdi, dum percutitur nimium, aut mallei ope expanditur; tum et formam quamdam determinatam prae reliquis omnibus tinnitui acuto et claro producendo dicatam esse. *)

Y 5

§. 672.

*) MONET simul per transfennam, tentari posse, an ex metallicis compositionibus, quibus campanae constant, soni acutiores prodituri non forent, si metallicis his eadem forma daretur, quae ad plumbum tinniens requiritur; quum enim metallum, quod a sono alias remotissimum, hac sub conditione sonorum fiat, spem adfulgere, fore ut metalla per se jam sub formis omnibus insigniter sonora, sub adlata prius forma eo magis dote sonora gaudeant.



§. 672.

ODOREM plumbum frictum non gratum exhalat; *sapor* plumbi, rubiginosi potissimum, subdulcis, stypticus est: cave sub sapore saccharino latens horrendum venenum.

§. 673.

IN *aëre* plumbum, uti jam ante monui, splendorem mox amittit, ac nebula obducitur, nigrescit. Obfidetur et specie rubiginis albicantis lanuginosae, farinaceae. Debetur metamorphosis haec salinis corpusculis per aërem dispersis, plumbum in superficie erodentibus. Nam si aëri purissimo possibili plumbum exponeretur, haud magnam fors experturum foret mutationem, quod quidem ex tectis plumbeis laminis obductis satis conficitur, quae profundius exeduntur rubigine iis in locis, ubi vapores acres rodentes dispersi magis haerent. Caeterum vero plumbum in aëre libero diu satis absque majori corruptione persistit. Retulit tamen HOMBERGIUS, sub Zona torrida plumbum a calore solis ingenti adeo resolvi, ut canales tectorum plumbei trium quatuorve annorum decursu in pulverem fatiscant.

CIRCA plumbum aëri diu expositum variae, experimentis tamen non demonstrandae, prolatae fuerunt sententiae: dixerunt aliqui, plumbi laminas excrecere, ac vincula statuarum plumbea in stirias quasi, incremento ex aëre adtracto, produci; alii, his non contenti, plumbum tectorum, aëri, pluviis, jubarique solis per saecula expositum in argentum sincerum magnam partem demum abire pronuntiarunt: infelix eorum sane conditio, qui argentum aliud acquirere nullum queunt, quam quod ex plumbeis tectis educitur.

Al-

Alchemici demum, ac BECHERUS ipse, alique plures, ex rubigine, qua plumbum, aëri diu expositum, obducitur, mercurium facile educi posse adjecerunt; admit- tendum quidem facilius est, in plumbo mercurii par- tem quamdam frequentius latitare, quod tum BECH- ER, tum et KUNCKELII, GROSSII, WALLERII, alio- rumque tentaminibus comprobatum videtur.

§. 674.

IN aqua plumbum non adeo, uti ferrum, resol- vitur: fieri tamen solutionem posse, imprimis ab aqua minus pura, aut substantias vehente salinas, docent plu- rimae observationes *pathologicae*, quibus demonstra- tur, colicam pictonum, aliaque mala sequuta fuisse usum diuturniorem aquae per canales plumbeos adla- tae, aut in receptaculis plumbeis adservatae. Refert Cl. PERCIVAL, observata varia huc spectantia in *observations on the poison of lead*, alia habentur in SHAW'S *notes to BOERHAAVE'S Chemistry*, in opere Cl. FALCONER *on Bath waters*, in Cl. PERCIVAL'S *Essays medical and experimental*, in *Medical Transactions* e. s. p. Unam solum alteramve instantiam adduxisse sufficiet. Vidi, ait Ill. Van SWIETEN, integram familiam colica pi- cionum laborasse, dum ad culinares usus adhibebatur aqua, in magno receptaculo plumbeo collecta, et diu haerens. HIPPOCRATES jam, uti optime monet Cl. PER- CIVAL, et GALENUS, usum aquae in canalibus plum- beis adductae damnarunt; rejecit et plumbeos aquae- ductus VITRUVIUS *). Colica, quae *Amselaedami* diu

*) MAGNAS laudes hinc meretur Helvetus artifex, qui ante paucos annos loco canalium plumbeorum pro aquaeductibus canales terreos incrustatos excogita- vit, eosque in diversis Galliae locis optimo cum suc-



diu grassabatur, plumbi paucae copiae in aqua haerenti originem debebat, uti retulit *Cl. TRONCHIN*. Plumbum vero sat cito nonnunquam in aqua solvi posse, observatio sequens extra omne dubium ponit, quam ex *Cl. PERCIVAE observations on the poison of lead* traductam hic inferam. Vir nobilis urbis *Worcester* parens numerosae sobolis erat. Proles viginti et unam genuit, quarum octo juniores fato cedebant, tredecim vero parentum lugebant mortem. Dum in infantia adhuc degebant, ac ut, quod res est, fateamur, dum in loco consueti domicilii morabantur, sat notabiliter adversa fruebantur valetudine, morbis ventriculi ac intestinorum maximam partem laborantes. Parens ipse a multis annis paralyti tenebatur, mater doloribus colicis, ac obstructionibus biliosis oppressa erat, enecta demum ab ictero pertinaci: icterus quidem hic cesserat saepius usu aquae *batheanae*; rediit autem semper, muliere domum *Worcestriam* redeunte. Mortuis parentibus haeredes vendiderunt domum, in qua tamdiu habitaverant. Emtor puteum reparari curavit, ex plumbo canales fabricati erant; atque plumbum hoc erosum adeo erat, ut tubus, quem embolus intrat, foramina hinc inde exhiberet. Receptaculum aquarum superne ad crassitiem chartae emporeticae redactus, ac foraminibus cribri adinstar exesum erat. Aqua urbis *Worcestriae* austera est, a sale alkalino fixo et volatili sedimento non exiguum dejicitur &c.; selenitem vehunt,

successu canalibus plumbeis, ac ligneis toties putrescentibus, substituit. Per saecula duraturi forent aquaeductus, si quis canales ex argilla sic dicta *lapidescente* (*Steingut, Fläschenthon*) parare vellet; artificium maximum foret, ut ea massae miscela per experimenta inveniretur, quae in furno minime retrocederet (*schwinden*), ut sic tuborum commissurae exactissime sese exciperent.

hant, qui, etsi solvens plumbi aptissimum non sit, adrodere tamen metallum hoc satis poterit. Historia hac jam adnotata, prosequitur *Cl. PERCIVAL*, narravit mihi artifex plumbarius, quod reparaverit puteum hunc saepius, ac ultima quidem vice tribus circiter, aut quatuor demum ante Viri supra dicti obitum, canales vero, ac adparatum totum in eodem, uti nunc descriptus fuit, statu offenderit, ex quo omnino adparet, corrosionem illam plumbi intra breve satis temporis intervallum contigisse. Adparet simul ex his, quam inconsiderate posuerit *Cl. BAUME*, a plumbeis canalibus recens paratis solum oriri posse noxas, nil metuendum esse ab iisdem crusta terrea obductis —.

§. 675.

OBSERVAVIT *Cl. MONNET* in *Traité des eaux minerales*, ad hoc, ut aqua cum terris jungatur, non semper acidam, aut salinam substantiam requiri; sed fieri hoc etiam posse, dummodo molecule terreae summe adtenuatae fuerint. Idem circa metalla contingere, etsi corporum omnium naturalium sint gravissima, singularia demonstrarunt experimenta; suspensio hictum continuo aquae ipsius motu, tum et selenitica, aliave substantia intermedia commode perficitur. Plumbi limatura cum aqua in mortario vitreo diu trita, vel aqua trita in mortario plumbeo, nigrescit, ac spissior evadit, species haec solutionis, (nam genuina solutio dici minus valet,) aqua plurima diluta, aqua hac per filtrum saepius missa, plumbi tamen pars quaedam continetur in limpida satis aqua.

§. 676.

AQUAE ope *plumbum lotum* pararunt VETERES; praeparationem *Dioscorides* sub titulo: *πεπλόμενος μό-*



μόλιβδος, sic descripsit: In mortarium plumbeum injicito aquam, pistillo plumbeo terito, donec aqua nigrescat, et limi modo crassa, aut lutosa fiat. Linteo dein aquam infundes, ut eo facilius, quod solutum est, incerni queat: hoc iterum fac, donec satis collegisse credis; ubi subsederit, priore aqua effusa novam adde, ac ut cadmiam lava, donec nulla exstet nigredo: postea in pastillos coge, ac repone. Quidam scobem plumbi mundi lima paratam, mortario pistilloque lapideo terunt, aut manibus cum aqua paulatim adfusa subigunt, donec nigrescat; mox ubi fundum petierit, effusa aqua, in pastillos redigunt; nam tritum sic vehementer, cerussae simile redditur; alii demum limaturae plumbi partem quamdam plumbaginis addunt, adfirmantes ita lotum plumbum praestantius esse: haec DIOSCORIDES.

§. 677.

PLUMBUM in calore etiam expanditur; rationes expansionis in *capite de FERRO* jam fuerunt adlatae: in igne mox funditur, ante candescentiam; libram unam plumbi citius quam libram butyri, cerae, aut picis fluere, notarunt DE LANIS, ac STURMIUS. Fusum jam, non candescit; ac, nisi intendatur ignis, chartulam vix fuscam reddit. Vidi, ait CL. BAUME, fabros quosdam plumbarios, monetam, quae in vas ferreum plumbum fusum tenens ad fundum hujus usque ceciderat, exemisse illaesis digitis, etsi ad sex pollices plumbum incumberet monetae; monere tamen simul potuisset, quo ex metallo facta haec moneta fuerit. *)

§. 678.

*) MAGIS calere plumbum fusum stanno fuso observatione singulari demonstravit MAYOW. Quum enim e stanno, vel e plumbo liquato, ac inter duos asseres,

in-

§. 678.

Dum copia plumbi minor in vase paulo magis paulo igni inponitur, metallum mox funditur, ac dum fufum nunc est, in superficie obducitur pellicula, quasi iridis coloribus donata, inter quos medius eminet sub-aureus, ac aurantius caeruleo admistus: pellicula haec vertitur paulatim in substantiam subterream, cineres nonnihil referentem, non tamen adeo resolutam: si bacillo motitetur, aut vas conquassetur, totum plumbum in terrestrem hanc substantiam, colore subgriseum, hinc inde flavicantem, *calx plumbi* dictam, mutari potest. *)

§. 679.

intus bombycino textu obductos, effuso, tabulae formantur, quas dein curvatas in tubos ad organa musica idoneos redigant, compertum est, hujusmodi planas formas ad stannum liquatum recipiendum decies octies fere, ad plumbum fufum autem vix decies, aut duodecies adhiberi posse, quin adustione corrumpantur. Dixit *Cl. Muschenbroeckius*, plumbum a gradu incipientis fluxus usque ad splendorem in igne reductum, gradus rarefactionis quadraginta sex in ferro pyrometri, circa quod fundebatur, plures fuscitasse; hinc metalla, quae refunduntur, antequam igne candent, jam fluida, maximam ignis copiam non sorpsisse, nec maxime tumere, quando igne liquata splendent. An id, quaerit, non inde fit, quia ignis, amplissimos poros primum ingressus, partes quidem satis removet, ut vix amplius cohaerescant, sed fluant; verum nondum omni possibili copia poros angustiores particularum ingressus est, quos ubi penitus implevit, tota massa candet, plus ignis recipiendi incapax?

*) PLUMBUM, JUNCKERUS ait, prunis inpositum, et simul fortiter adflatu ignis commotum, effumat in flores albos.



§. 679.

GRADUM sane determinatum dari, ultra quem in fluidis igni expositis calor non adscendat, nisi aliae accesserint causae, extra dubium positum est: arte vero calorem intendi posse, constat ex calore adnotato aquae ebullientis purissimae, et aquae, in qua salis muratici copia major soluta fuerit.

§. 680.

SUB titulo *purificationis plumbi*, Auctores nonnulli praescripserunt, ut plumbum fundatur, ac fuso nunc scbum, resina, vel carbonum pulvis &c. adjiciatur. Chemiae tamen probe gnarus facile percipiet, nullam hic fieri purgationem, sed plumbum solummodo praeservari, ut in calcem non mutetur, vel mutatum partim, addito sic phlogisto, in metallicam formam denuo redeat.

§. 681.

CALX dicta plumbi in diversis artibus adhibetur; parant ex ea figuli tegmen, quo vasa obducunt argillacea; plumbum ea ratione calcinant, ut ignis flamma lambere cogatur superficiem plumbi fusi, ut sic eo citior evadat calcinatio *). Addito stanno plumbi calcinatio longe citius perficitur, atque hac ex miscela tegmen vasorum murrhynorum ac encaustum album potissimum conficitur. Formulam sequentem pro vasis pseu domurrhynis convenientem numerosis experimentis deprehendi: recipe libras triginta tres stanni, ac libras centum plumbi, calcinentur invicem in massam albi-

*) FUSIUS de his agam in dissertatione speciali, sub titulo: Bemerkungen über das Fayancesgeschirr, edenda.

albicantem, ac omni dote calciformem; miscelam hanc artifices Germani sub nomine *cineris stanni* (Zinnasche) designant; tum recipe centum libras arenae purae, libras quadraginta sodae, 1 libras triginta cinerum clavellatorum, hanc miscelam vocant *frittam* (Fritte, oder Meistergut); frittae demum nunc dictae centum librae una cum admistis octoginta libris cinerum descriptorum stanni, decemque libris salis communis tegmen vasorum illorum (feine, weisse Fayance Glasur) constituunt. Notandum vero, non omnem argillae speciem tegmen ex aequo bene suscipere; quod enim huic optime adhaeret, ab altera magis minusve respuitur; prout ex collatione argillae adlatae ex *Tarnowitz*, *Klinitz*, *Proskau*, *Strelitz*, *Chrzelitz*, in *Silesia*, tum et ex *Eisenstadt*, *Holicz*, *Kopczan* in *Hungaria*, ex *Prossnitz*, et vicinia urbis *Brünn* in *Moravia*, manifeste patuit; vidi tum tegmen, quod argillae huius substantiam optime subierat, ab altera recedere, ac in bullas adtolli; vidi argillam, una cum tegmine fere confluentem, etsi idem, ac in reliquis, ignis adhibitus foret gradus: monere tot experimentis edoctus debeo, tegminis nullam plane compositionem in unum versum adeo commendari posse, ut omni argillarum speciei abs distinctione adplicari queat; dum nunc v. c. optimam *temperaturam* habeo pro argilla *Prossnitzensi*, aliam denuo conficere debeo pro argilla *Klinitzensi* territorii *Ill. Comitissae GASCHINN* — Tegmini huic varii admiscant varia, quod quidem subin pro determinata specie argillae convenire potest; subin vero damni plus adfert, quam commodi, quod vero fabricarum administratores, doctrinae Chemicae minus gnari, dijudicare haud semper possunt; hinc vero per numerosa tentamina sinistra magis congruam miscelam demum expiscari tenentur. Nota mihi fabrica est, ubi tegmini sat magnam borracis copiam nunquam non admiscant; admistione hac plura lucrantur incommoda;



tegmen vasorum bullulis plerumque inaequale est, ad adfusus calidis rimas agit, ac tegmen carius longe est, quum borra non levi adeo pretio veneat.

§. 682.

TEGMINI albo colores varii conciliari queunt, admistis *substantiis colorantibus*, et additis aliis, quibus fluxilitas promovetur: sic *magnesia vitriariorum* diversos ex intense fusco in leucophaeatum usque producit colorum gradus; sic colores eleganter flavi, itramineï, citrei, ope *antimonii* producuntur; sic *smalta* caeruleos generat; sic additione *calcium cupri* virides exsurgunt. e. f. p.

Compositiones plurimae tegminum, ac encaustorum legi poterunt in scriptis NERII, MERETTI, KUNCKELII, et *diatribe Cl. d'ARCLAIS de MONTAMY*, consulendus etiam *Ill. Comes de MILLY l'art de faire la Porcelaine*.

§. 683.

CALX plumbi antea descripta magis exusta, igne reverberii cremata, ex albo in flaventem, subcroceum colorem abit; dum remissius adhuc flavet, *Massicot album*, dum intensius, *Massicot flavum* dicitur; utramque speciem nomine *minii albi* et *flavi*, *calcis plumbi flavae*, *flavedinis plumbi*, *cerussae citrinae* &c. nomine notarunt alii.

§. 684.

MINII praeparationem descripturi Auctores, in eo passim conveniunt, quod ignis violentissimus debeat adhiberi, simulque flamma superficiem calcis, in minium redigendae, lambere: sic *Cl. SPIELMANNUS* di-

xit: calx plumbi flava ulterius, ea lege, ut ipsam flamma lambat, calcinata, rubrum colorem induit, et in *minium* abit. BOERHAAVIUS calcem plumbi diu calcinatam, motamque supra ignem, tandem pondere auctam, colore coccineo fulgere dudum retulit, et sic porro. His tamen omnibus admissis nondum satis constitit, quomodo minium conficiatur, ac si quis calcem plumbi diutissime Auctorum ex praescripto cremaverit, exiguum sane minii copiam nasci videbit, si nascatur ullum.

§. 685.

DESCRIPSIT vero ante paucos annos CL. JARS in *Memoires de l'Academie royale des sciences de Paris* 1770. methodum, qua in Anglia minium parari solet, in speciali Dissertatiuncula: *Procédé des Anglais pour convertir le plomb en minium*. Descripsit etiam, anno elapso, CL. FERBER encheiresin, qua minium facere solent prope *Wirksworth* et *Derby*, quae descriptio habetur in CL. VIRI *Versuch einer Drystographie von Derbyshire in England*. Ex utrisque adducam notatu dignissima, quum alia hactenus operationis huius non exstet exacta descriptio. Descriptione praemissa, et icone simul addito furni, (qui verus furnus reverberatorius est, cui binis ex lateribus ignis applicatur,) pro quavis vice decem plerumque plumbi massas, quarum quaevis centum quinquaginta libras pondere exaequat, hinc quindecim centenarios adhiberi refert CL. JARS, novem harum massarum plumbo proveniente ex furno reverberii, decima vero plumbo veniente ex fusione scoriarum, eliquatione minerae in furno reverberatorio Anglicano productarum, constat*);

Z 2

ac

*) ADDERE juvat ipsius CL. JARS verba: *on en met*, ait, *neuf (Saumons de plomb) dit-on, provenant de la fon-*



ac sine hujus posterioris additione non bonum adeo minium confici ajunt, quum minium exurgens ex plumbo fuso in furno reverberii calidum, uti termino recepto sese exprimunt, nimium sit, ac in pulverem non abeat.

§. 686.

Dum operationem nunc suscipere volunt, interius, ac ante ostium furni ponitur crassius residuum in fundo vasis, ubi eluitur flavicans materies, depositum, ac postea adhuc describendum; impeditur sic, ne plumbum extra furnum profluat, dum hujus areae adlibellam planissimae fusum incumbit: plumbum, ingestum per furni ostium, mox funditur vi ignis, binis ex lateribus (*dans deux chausses*) administrati. Ante ostium furni dependet catena, cujus extremo uncus adfixus est, cui manubrium magni rutabuli incumbit, quo plumbum nunquam non movetur. Prout vero metallum in calcem vertitur, haec ad latera removetur, et plumbum ipsum tamdiu agitur, donec totum demum in calcem versum fuerit. Calcinatio tota quindecim centenariorum ultra quatuor quinqueve horas nunquam producitur *); quum vero calci intermiscitur fem-

te au fourneau de réverbère, et un provenant de la fonte des crasses, dans une espèce de fourneau à manche; on prétend qu'on ne ferait pas du beau minium sans avoir du plomb des crasses (on entend ici par plomb des crasses, celui des crasses ou scories qui proviennent de la fonte du minéral dans le fourneau de réverbère à l'Anglaise) que celui que l'on obtient de la fonte au fourneau de réverbère est trop chaud et ne se convertirait pas en poudre.

*) MISCELAM paulo ante descriptam stanni, et plumbi intra duas horas in furno minori calcinam saepe vidi;

semper haereant moleculee plumbi nondum calcinati, feliguntur haec inde, ac pro altera operatione adservantur. Furnus durante tota calcinatione vivide ignitur; interim tamen colore saturato ceraforum solum cander; ostia enim bina, per quae pabulum ignis ingeritur, ac ostium intermedium, per quod plumbum ipsum ingeritur, semper patent, ut aër libere ingredi, plumbo incumbere, et calcinatio sic celerior reddi queat: pro pabulo ignis lithanthraces adhibentur, atque horum fumus, plumbique ipsius vapor per ostium una egrediuntur, atque sic per totum caminum externum ambulant.

§. 687.

MAJUS vero requiritur spatium temporis, ut plumbum in calcem flavicantem, quae *Massicot* nomen mereatur, abeat; hinc et per horas fere viginti quatuor in furno adhuc relinquitur; agitatur autem nunc ea solum lege, ut in grumos abire nequeat. Dum calcinatio protrahita satis videtur, ex furno rutabulo ferreo educitur, ac strato planissimo lapideo insternitur; adfunditur tum frigida, quo, uti operatores ajunt, pondus adquirat calx; ratio vero melior est, ut in grumos collecta denuo fatiscat, et friabilis evadat satis, ut molae mox describendae committi queat: aquae tantum adfunditur, quantum calx imbibere potest; calens adhuc lithargyrium fere refert; frigida vero colorem exhibet sordide flavicantem.

§. 688.

MOLA, qua utuntur pro calce hac conminuenda, molae, qua cerussa teritur, analoga vix non est: mo-

Z 3

vetur

vidi; pabulum ignis ex uno solum latere administrabatur; citius adhuc operatio *Holiczii* perficitur.



vetur rota, quam ferit aqua; calx per orificium superius ingeritur, ac adfunditur aqua; conminuta defluit in receptaculum magnum ligneum infra subpositum; elui tamen debet, quum non aequaliter contrita sit; hunc in finem adponitur receptaculo dicto aliud vas ligneum aqua plenum; massa trita, uti profuit, excipitur, ac pelvis cupreae dimidium ea repletur; pelvin hanc operator binis manibus prehensens, receptaculo aqua repleto inmergit, atque ea ratione in aqua motitat, ut materies, in pulverem subtilissimum trita, per aquam totam dispergatur, ad fundum demum delapsura; reliquum crassius, non satis contritum, quum fors nondum satis calcinatum fuerit, in pelvi remanet; atque hoc, uti sub initium descriptionis dictum fuit, ostio furni adponitur, ut effluxus plumbi liquati impediatur. Collecta tota flava calce in fundo receptaculi, aqua decantatur, ac sedimentum sequenti operationi adhibetur.

§. 689.

Ut calx flava colore donetur rubro, in fabrica minii prope *Chesterfield* furni bini similes sunt pro calcinatione, ac pro confectione ipsius minii; in fabrica autem prope *Wirksworth* eodem furno pro duabus utuntur operationibus: inponitur calx antea dicta flava in medium areae furni, formatur ex ea cumulus unicus, in summitate complanatus, in superficie fulci inprimuntur, ac totum raro, et eatenus non nisi movetur, ne totum una conglutinetur. Relatum in una harum fabricarum *Cl. JARS* fuit, oportere ut calx per triginta sex, aut quadraginta horas igni exposita sic maneat; in altera vero quadraginta octo horas requiri adseruerunt.

§. 690.

CALCINATIO vero haec ipsa colorem pulchre rubentem calci demum conciliat; ignis idem plane, uti sub prima operatione, administratur; quum in furnulis lateralibus clathra nulla sint, per quae lithanthracum exustae reliquiae delabi possent, lithanthraces non moventur, et paulatim solummodo bitumen suum amittunt, cinerum exigua formatur copia, exusti enim carbonēs fossiles eximuntur plurimi adhuc integri, ac recentes in eorum locum substituuntur. Dum calx in minium versa diu satis in igne mansit, ex furno nunc exemta colorem obfert, calens adhuc, profunde ochraceum; frigesceus autem pulchre rubrum acquirit, quo minium tingitur. Transeo, quae circa cribrationem, et reliqua, commercium concernentia, *Cl. JARS* addit: monendum vero adhuc ex illo est, non quosvis lithanthraces ex aequo convenire parando minio, imprimis in operatione secunda. Binae occurrunt lithanthracum species, una accedit forma ad vulgares, qui pope *Newcastle* effodiuntur; altera, minus recludens bituminis, lithanthraces Scoticos magis refert: prima species praefertur; ac, uti operatores ajunt, minium ne quidem parari posset alterius ope. Mirum vero et mihi visum fuit, ait *Cl. JARS*, et videbitur omnibus, quod pro certo habeant minii confectores, operationem lignorum ope fieri nequaquam posse; adfertum tentaminum incassum institutorum relatione confirmare nituntur. Reor, prosequitur, carbonēs exiguos, ex dissiliēte ligno in superficiem calcis plumbi jactos, calcem hanc in formam metallicam reducturos esse, quod cum lithanthracibus non fit.

§. 691.

Ex relatione *Cl. FERBER* sequentia potissimum veniunt adnotanda. Plumbum ex minera eliquatum (non
vero



vero *Galenam*, uti *Cl. JUSTI* crediderat) recipiunt. Furni, uti a *Cl. JARS* describuntur ac delineantur; pro pabulo ignis solos lithanthraces adhibent, cineraria et spiracula in furnis nulla adsunt. Plumbi *one Tonn*, seu libras bis mille quadraginta plumbi simul in furnum inponunt. Calcination, sub agitatione continuata ope rutabuli per sex vel septem horas producitur, donec plumbum totum in pulverem mutatum sit ex griseo flavidum, subviridem. Oltio furni argilla aqua madefacta adponitur, ne plumbum fusum effluat. Calcinatione finita pulvis dictus, aqua remistus, ope lapidis molaris parvi horizontalis, quem rota movet minor, in pulvem subtilem teritur, aqua haec diluitur magis, et per cribrum adigitur, ut in dolio aquam continente ad fundum descendat. Sedimen hoc ingeritur furno secundo, priori per omnia simili; in eo tamdiu calcinatur, donec in minium legitime versum fuerit.

SATIS ex his adparet, quod descriptio Auctorum horum eadem vix non sit, paucis solum exceptis, quae *Cl. FERBER* aliter quam *Cl. JARS* adnotavit.

§. 692.

MINIUM *) in singulari casu paratum fuisse optimum, uti instituta id evicerunt experimenta, etsi flamma plumbum non lamberit fusum, etsi et plumbum insigni mistum fuerit stanni quantitate, sequens docuit observatio. Dum enim *Holliczii* in *Hungaria* ubi vasa psevdomurrhyna fabricantur, furnus repararetur, in quo plumbum et stannum invicem mista calcinantur, pro materie tegminis vasorum albi, maxima

*) INSERUI observationem hanc BIBLIOTHECAE meae PHYSICO-MEDICAE volumini primo, quod *Wratislaviae* 1776. prodit. Addidi, ne quis mihi plagiū obijciat, Auctorem *Bibliothecae* ignorans.

ma quantitas minii pulcherrimi, haerens inter interstitia, commissurasque lapidum, furnum componentium. Tempus quidem longius effluerat, per quod metallorum calces in illas commissuras penetraverant, quum per decem circiter annos furnus abs ulla reparatione scopo satisfecerit. Repetitis etiam experimentis didici, ad minii praeparationem lithanthraces non absolute requiri, uti quidem artifices *Wirksworthenses* et *Chesterfieldenses* perhibent; requiri vero singularem omnino encheiresin; processum vero hunc non ex facili adeo perfici, uti quidem legenti Chemicorum compendia videri posset; obstante siquidem, si nulla alia re, plumbi facillima ex calce in metallicam formam reductione; aut, igne inprimis nimium intenso, in vitrum metamorphosi. Clausis vasis nondum perfectum.

§. 693.

SINGULARIS dos plumbi competit calcibus, minio inprimis, quod ponderosiores multo sint, quam ea quantitas metalli fuerat, ex qua parantur, (etsi quidem et in aliis calcibus metallicis auctum occurrat, sed non insigniter adeo, pondus). Ex centum libris plumbi centum decem libras minii confici posse passim adferitur; pondus auctum ad libras quindecim pro centum libris produxit *Cl. BOMARRE*, ad libras viginti *Cl. WALLERIUS*. In meis tentaminibus decem librae plumbi ad duas fere libras (ponderis *Borussici*) fuerunt auctae, calcinatione per integras novem horas producta in furno majori reverberatorio, ubi plus quam centum librae plumbi stannique mistorum singulis vicibus calcinantur: vidi simul pondus eo magis incrementum, quo perfectior, quo vero lentior simul fuerit calcinatio.

CAUSAM phaenomeni diversam excogitarunt varii. Moneo nunc, uno verbo, ex adlatis hactenus omnibus



bus expositioni sufficere nullam, ne novissimis quidem exeeptis. Ut meliorem adferant Physices experientialis Auctores, velint Superi!

§. 694.

ADDENDA adhuc ad calcis flavae plumbi, ex qua minium paratur, et quae sub nomine *Massicot* in pitura recipitur, historiam, venit praeparatio coloris flavi sic dicti *Neapolitani*, (*Giallo lino*, Neapolitaner gelb); arcana haec a multis habetur; detexit tamen Cl. FOUGEROUX DE BONDAROY in *Mem. de l'acad. royale des sc. de Paris* 1766. formulam sequentem colorem hunc optime producere. Unciae duodecim cerussae, aluminis uncia una, salis ammoniaci uncia pariter una, antimonii diaphoretici unciae tres, intime mista invicem, indantur crucibulo, ignique leniori per septem octove horas subjiciantur. *) Videatur et l' *Art de faire la Porcelaine par Ms. le Comte de MILLY*. Verum *Massicot* ex galena plumbi, *flavedinem plumbi* autem ex ipso plumbo confici, notavit Cl. WALLERIUS.

§. 695.

*) GIALLO LINO quidam ex fossili regno ceu productum naturae deduxerunt; alii vero arte confici crediderunt. Descripsit sub nomine *il selso frustrato* massam ex Vesuvii montis visceribus oriundam Cl. MARIA. Cl. POTT in eo partem quamdam calcis Zinci latere adsumsit. Dejecit ex eo Berolinense caeruleum Cl. d'Arclais de MONTAMY, hinc ferrum in eo recondi foret evictum. Dum ochra, AUCTOR nunc citatus ait, italica, quae colore pulcherrime flavo tincta est, calcinatur, intense rubescit, admisto tum ei sale muriatico, ac miscela hac valido igni in capsula terrea exposita; ferrum sub formula globulorum exiguum reducitur, terra autem remanens colorem obfert pallide flavum, uti flavum Neapolitanum.

§. 695.

CALCES plumbi hactenus descriptae, patent, et magis, quam plumbum ipsum, patent, *acidorum* imperio; ad solutionem tamen drachmae unius minii uncias octo aceti requiri, *Cl. WALLERIUS* habet.

§. 696.

SOLVUNTUR et in *oleis pressis*, unde et emplastra ingrediuntur, ac unguenta: libram fere dimidiam minii a libra una olei olivarum resolvi, citatus paulo ante AUCTOR observat. *Balsami plumbi* ex soluta in *oleis pressis*, aut stillatitiis, plumbi calce exsurgunt.

§. 697.

CUM *sale ammoniaco* mistae, destillationi subiectae, sal alkali volatile expellunt: dixit quidem *Cl. WALLERIUS*, partem minii conjungi cum spiritu salis ammoniaci, ac resolutum sic massam constituere durum, fragilem, colore plumbeo donatam, partem vero aliam reduci in plumbum: ponendum tamen fuisset loco spiritus salis ammoniaci, acidum salis cum minio mistum massam dictam constituere.

MINIUM in vase quodam super prunis ignitum redire in ochream flavedinem, *JUNCKERUS* retulit.

§. 698.

LITHARGYRIUM exsurgit, dum calx plumbi eum experitur ignis gradum, quo in vitrescentem massam converti valet; constat lithargyrium squamulis micaceis, laevibus, splendentibus, ab interstrato pulvere calciformi flavicante, aut rubescente, vario colore donatis: lithargyrium venale ex operationibus docimasticis,



cis, circa aurum et argentum institutis, maximam partem producit. Lithargyrium albidius *lithargyrium argenti*, seu *argyritis*, rubrius autem *lithargyrium auri*, seu *chrysis* vocari plerumque solet.

§. 699.

LITHARGYRIUM diversos in usus cedit praeter eos, quos in docimasticis laboribus exserit. Figuli pro incrustatione vasorum lithargyrio maxime indigent: in arte vitriaria pariter cum successu adhibetur, quum et ipsum sit fusibilissimum, et aliarum substantiarum fusibilitatem pulcherrime promoveat: oleum pictorum sic dictum siccativum lithargyrii beneficio paratur; ac in re medica varia etiam ingreditur praeparata.

§. 700.

ACETUM *lithargyrii* secundum praescriptum *Pharmacopoeae Austriaco-provincialis* paratur sequenti modo: recipe lithargyrii libram unam, pone in vas vitreum colli angustioris, dein adfunde aceti vini fortis libras quatuor; digere tamdiu, subinde agitando, donec acetum perfecte fuerit saturatum. Hoc acetum ad consistentiam extracti liquidi inspissatum vocatur *balsamum*, sive *extractum saturni*: de hoc mox recurret sermo.

§. 701.

LITHARGYRIUM, uti et calx plumbi omnis reliqua, igne validiori adhuc torta, confluit in vitrum ex flavo fuscescens, ponderosum, diaphanum, admistu lapidum omnium vitrescibilium purissimorum colore dilutiori tingendum, ubi tamen flavus magis minusve semper obtinet.

§. 702.

§. 702.

VITRUM hoc plumbi dotibus gaudet insignibus: materias omnes terrestres, metalla omnia ignobilia, scorias omnes resolvit intime, adtenuat, in vitrum reducit: fufum nunc in tigillo vix paucas horas, quin et vix quadrantem horae subin remanet, sed parietes tigilli exedit, penetrat, ac foras sese subducit: purum vitrum plumbi *Cl. Macquerus* ait, obtineri vix potest, ob dictam nunc rationem: in crucibulo vulgari *Cl. Pott* notavit, vitrum plumbi ultra mediam horam, aut tres demum quadrantes horae raro permanere. Vidi vero, etsi aliae simul substantiae vitro plumbi forent objectae, in quae aegere posset, terreas tamen solutas nihilofecius fuisse; miscui in diversis tentaminibus antimonium in subtilem pulverem tritum cum minio, miscelam furno exposui; eximens tigillum observavi, parietes interiores ad duas nonnunquam lineas exesos fuisse.

§. 703.

DIVERSAS, ut huic incommodo irent obviam, compositiones excogitarunt Chemicis, ex quibus crucibula dein fabricari iusserunt: ingentem numerum experimentorum circa negotium hoc in Lithogegnosia publicavit *Cl. Pott*, quae sane in compendio adferri hic vix queunt; adferam tamen praecipua. *Becherus* partes binas talci addidit uni parti argillae, miscelam aqua calcis in pastam redegit, atque hinc tigilla paravit, quae vitrum plumbi diu retinerent, quin exederentur: admisceri posse meliori cum successu, *Cl. Pott* monuit, aut partem exiguam calcis ipsius plumbi, aut gypsum, aut vitrum contusum; ea ratione, ut recipiantur v. c. partes quinque argillae, aequalis copia talci, et pars una contusi vitri; vel partes binae argillae, pars
una



una talci, et pars $\frac{1}{20}$. vitri, ut consistentia tigillis concilietur major: praescripserunt alii libram unam argillae, uncias tres talci, et anaticam huic posteriori dosin gyphi, bene tamen observat POTT, miscelam hanc eandem fluxilem nimis esse. GLAUBERUS argillae albae recenti partes duas, tres, aut quatuor argillae jam excoctae, et in pollinem tritae, addendas voluit; tigilla exin paranda non supra rotam tornari, sed cupellarum adinstar adaesto pistillo in formam confici debent. Bonam compositionem prae reliquis POTT sequentem invenit: septem semunciae argillae crudae misceantur cum quatuordecim semunciis argillae coctae, in pulverem crassio rem tusae, et drachma una colcotharis vitrioli; vel semunciae decem argillae crudae misceantur cum aequali copia argillae excoctae pulverisatae, et drachma una colcotharis; ex miscela hac fiant crucibula, eaque interne argilla elutriata, seu elota perfundantur, tum demum in furno legitime excoquantur. Utiles praeterea invenit compositiones sequentes; partes octodecim argillae excoctae misceantur cum aequali copia argillae crudae, et parte una spathi fusibilis; miscela haec vitrum plumbi prae reliquis *diutissime* sustinuit: vel partes octo argillae misceantur cum parte una arenae, parteque una cretae; vel partes viginti argillae misceantur cum partibus quatuor argillae coctae, et parte una cretae, vasa inde parata externe loricentur: vel partes octo argillae crudae misceantur cum partibus viginti quatuor excoctae, partibus duabus gyphi, parteque una lithargyrii &c. *Cl.* NEUMANNUS, ait *Cl.* HELLOT in opere *de la fonte des mines &c.* traduit *de l'Allemand de SCHLUTTER T. I.* excogitavit methodum, qua crucibula vitro plumbi continendo redderentur idonea, quam ex epistola illius quadam excerpti: crucibula parari debent ex partibus aequalibus argillae albae, ex qua fistulae tabacariae parantur, crudae et excoctae; utraque species contunditur in polli-

nem



nem subtilissimum, per fetaceum poris exilissimis praeditum agitur, ac in crucibulorum formam aquae ope convertitur. Dum vero utebatur crucibulis Hassiacis, diluit partem unam miscelae modo dictae aqua in consistentiam jusculi tenuioris, aliam vero partem in consistentiam vulgaris luti: exsiccat crucibulum Hassiacum ignis ope ab omni fors inhaerente humiditate, induxit tum dilutam illam miscelam tenuiorem, exsiccationi exposuit, repetiit eandem operationem septem vel octo vicibus; hoc facto, miscelam demum adplicuit spissiore, eamque, quantum fieri poterat, complanavit; inductum sic crucibulum aëri primum, tum vero leni calori pro exsiccatione exponatur. Expertus fui, subjungit *Cl. HELLOT*, crucibulum Germanicum (*an Hassiacum intelligitur, nam multa in diversis Germaniae locis fabricantur crucibula?*) *Neumanniana* methodo inductum vitrum plumbi, salium experts, per septem continuasse horas.

§. 704.

MONERE adhuc debeo, argillam ipsam, arenae pauca copia mistam, variis in locis crucibula praebere, vitrum saturni optime ferentia. In ditione Silesiaca *Ill. Comitissae de DIETRICHSTEIN - PROSKAU* ad pagum *Klein-Strelitz* prope *Chrzelitz* argilla talis effoditur, quae vitrum plumbi per decem duodecimve horas fert: firmiora adhuc ea reddidi, dum partibus septem argillae crudae partem unam excoctae, in subtilissimum pulverem redactae, misceri jusseram.

§. 705.

VITRUM saturni plerumque paratur additione arenae, ut consistens magis fiat, nec vasa cito adeo transcat. Recipiuntur, ut *Cl. MACQUERUM* sequar, partes
binæ



binæ calcis cuiusdam plumbi, v. c. minii, ac una pars arenæ, aut silicum contuforum; miscela hæc inmittitur in crucibulum optimæ notæ, ex argilla refractaria fabrefactum; crucibulum reponitur in furnum fusorium, operculo, luti ope firmato, tectum; calor per gradus lentos intenditur, ne findatur crucibulum, et materies nimium intumescat, aut adscendat; ignis hoc regimen per horam, aut sex quadrantes horæ sic protrahendum est: augetur dein ignis, ut fusio perfecta fiat, atque in eodem gradu per dictum antea tempus retinetur: tum adparatus totus sponte frigeat: fracto crucibulo cadit massa vitrea, diaphana, flavens. Est hoc *vitrum plumbi*, seu *vitrum saturni paratum sine salibus*. Addunt alii partem quamdam nirri, salisque communis; lucrantur additione hac, ut fusio reddatur facilior, ac arena exactius per vitrum distribuatur.

§. 706.

MISCELAM vero varii assignarunt variam pro confectiōe saturnini vitri: *Cl. BAUME* partes tres minii jungendas voluit cum parte una pyromachorum nigrorum, probe calcinatorum. Miscuit præterea in aliis tentaminibus uncias duas minii cum uncia una silicum, vitrum obtinuit pallidius, topazio analogum; miscuit unciam unam silicum calcinatorum cum uncis binis cerussæ, vitrum erat diaphanum, pallide flavum; miscuit uncias quatuor minii cum uncia una silicum calcinatorum, vitrum transiit crucibulum, et incrustatio solum remansit vitrea; *Cl. HELLOT* partem unam silicum calcinatorum jungendam esse dixit cum partibus quatuor lithargyrii triti: *Cl. SPIELMANNUS* arenæ subtripulum a Docimasticis requiri ad partem unam vitri plumbi monuit: *Cl. GROSSE* vitrum plumbi pro docimasticis laboribus confecit pariter ex partibus tribus minii, partequæ una are-

nae albae, abs additione ullius salis; vitro hoc usus fuit pro mineris contumacioribus; pro aliis vero facilius fundendis arsenicum adjecit: monet autem probe *Cl. HELLOT*, dum arsenicum additur, ignem illico esse intendendum, quum alias illud sensim evaporet.

§. 707.

BINA imprimis circa vitrum saturninum veniunt notanda: primum *Cl. GEHLER* adnotavit, vitrum plumbi, quale in officinis venale prostat, non colorem illum pulchre flavum saepe obferre, qui legitimo proprius est, sed virentem potius, opacum: ratio est, quod in laboratoriiis docimasticis conficiatur ex lithargyrio, ex depuratione lunae residuo, venere satis inquinato: adparet hinc, vitrum hoc laboribus, ubi purissimum requiritur, parum omnino convenire.

§. 708.

ALTERUM in eo versatur: si quis, ut incommodo statim dicto eat obviam, vitrum saturni conficere ipsemet velit, probe attendere debet, qualenam minium ad operationem feligat. Adnotavit enim *Cl. DOSSIE* in *the secrets of modern Chemistry and pharmacy revealed*, minium sat frequenter inquinari ochra rubra; hinc, ut certus sit de puritate minii, tum adhibendum conferre debet cum alio, de cujus puritate dubium nullum superest, tum et partem quamdam reductionis ope in statum metallicum reducere, ut, quid remaneat, possit perspicere. Notandum hoc imprimis est, dum psevdogemmas, et colores encausticos paramus; facile enim adparet, longe alium in dictis casibus proditum fore colorem: etsi quidem in colorum praeparatione crucibula quoque seligi debent, quae a materie contenta minime, quantumcunque possibile est, adfi-



ciantur; quum alias certi nunquam esse possimus, qualisnam oriturus color sit, dum massa jam pura, jam semunciis aliquot crucibuli soluti conspurcata obtinetur.

§. 709.

Ex calcibus vitroque plumbi metallum sub forma sua consueta, adjecto phlogisto, aut substantiis quibuscunque istud continentibus majori minorive quantitate, facilius reducitur, quam ex calcibus metallicis aliis ignobilibus reductio fieri solet: haec tamen ad decimasiam potius pertinent.

§. 710.

VIDEAMUS nunc saturni phaenomena diversis menstruis objecti. *) In *acore vitriolico* solutio non adeo facile fit; et caloris accessus requisitus est. Refert ex KUNCKELIO *Cl.* WALLERIUS, partem saltem plumbi solvi, si duae, aut plures, partes olei vitrioli adfundantur parti uni plumbi granulati, miscela haec decoctioni in cucurbita vitrea exponatur tandiu, donec massa siccescat, et vapor albus adscendat, tum vero frigenti adfundatur copia quaedam aquae, vase igni denuo inposito: videtur ex his, ac statim dicendis, generaliter denuo nimis *Cl.* BAUME pronuntiasse, plumbum ab acido vitriolico, sive debili sive concentratissimo, sive frigido, sive ebulliente solvi prorsum non posse.

§. 711.

PLUMBUM, cum acido vitriolico unitum, itidem sal album formare, cui autem aliquid flaviusculi accedit, experientia docet, ait *Cl.* SPIELMANNUS. *Sal hoc,*

*) OBSERVAT *Cl.* MACQUERUS, plumbum cum acidis eadem fere, uti argentum, exserere phaenomena.

hoc, seu *vitriolum plumbi*, ratione formae à Cl. DE L'ISLE descriptum non fuit: aciculis componi Cl. BAUME notavit.

§. 712.

NITROSUM *acidum* melius in plumbum agit; effervescentia simul oritur, et calor mediocris: calx plumbi sponte subsidet, nisi aqua fortis praecipitata pro solvendo saturno fumatur. Solutio saturata spissior ac subgrisea est; ait Cl. WALLERIUS, in aqua forti diluta unam quartam partem plumbi ratione ponderis menstrui disparere posse. Solutio plumbi in acido nitroso (à quo, uti ab aliis acidis, et calces plumbi reserantur) crystallos, seu *nitrum saturninum* largitur, quas diversimode descripserunt Auctores: crescent, BOERHAAVIUS dixit, crystallos albae, solidae, valde ponderosae, in aëre non deliquescentes, sed constantes satis; sapore dulces quidem, at magis austeræ simul, quam quæ ex unione plumbi cum aceto nascuntur. Crystallos has easdem sub nomine *salis saturni*, seu *salis plumbi*, Cl. WALLERIUS descripsit pyramidales, regulares, tetraëdras, flavicantes, subdulces, austeras, ponderosas, in aëre non deliquescentes, ab aqua aegre solvendas. Cl. ROUELLE vero non tetraëdras, sed hexaëdras esse ait, tria latera obposita reliquis cerni majora; constare pyramidibus truncatis; apicibus crystallinari etiam hexagonis. Cl. BAUME crystallos obtineri retulit obscure albicantes, compositas triangulis complanatis, extremitatibus omnibus truncatis. Cl. ROMÉ DE L'ISLE demum invenit crystallificationem corporibus irregularibus, drusiformibus constantem; inter quæ tamen distingui poterant cubi, segmentis prismatum hexagonorum remissi, quorum nonnulla lateribus, reciproce latioribus ac angustioribus, donata erant.



§. 713.

NITRUM hoc *saturninum* in igne detonat: Sal hic, BOERHAAVIUS descriptioni datae subjunxit, siccus, prunae ardenti injectus, non inflammatur, sed crepitat violentissime in igne, indeque, magno cum adstantium periculo, quaquaversum diffilit, inpatiens ignis; in polinem tritus magno igne fundi dein potest. Hanc ob dotem nitrum plumbi prudenter solum exsiccare, nec in retorta igni committi debet. Ob dotem etiam hanc *plumbum fulminans*; seu *saturnus tonitruans* dictum fuit. Post detonationem calx remanet flavesceus, sublamellata, in vitrum plumbi sat facile mutanda. *Saturnus tonitruans* obtineri etiam potest, ex inspissata, nec ad crystallisandum prius exposita solutione plumbi in acido nitroso. Lixivium vero mater a crystallisatione residuum *oleum saturni* inepto termino dictum fuit, quale etiam paratur, acido ditius ex resolutione nitri saturnini in acido nitroso, evaporationi commissa. Monuit GROSSE, pulverem griseum sponte ad fundum cadere ex solutione dicta nunc saturata, et calori exposita; solutionem vero colore flavo, uti in auri solutione conspicitur, donari, si decantetur exacte pars albicans, sedimento incumbens, praecipitato albo sponte sua ad fundum prius ruente: reliqua, quae GROSSE circa mercurificationem plumbi fusissime retulit, hic lubens praetereo, quum et extra dubium posita non sint, ac Tyronibus talium cognitio parum sane emolumenti adlatura videatur.

§. 714.

ACIDUM *salis* calore adjutum plumbum minori copia recludit, solutio diaphana non fit: praecipitatum denno sponte ruit ad fundum, verum *saturnum cor-*
neum

neum constituens *) : facilius paulo calces plumbi resolvuntur ab acido salis. Minium et cerussam, non vero plumbum ipsum, ab acido salis recludi *Ill. Comes de SALUZES* retulit: minium ab acido hoc privari colore rubro, *Cl. MONNET* recte notavit: quae salis hujus crystallorum forma sit, interrogat *Cl. DE L'ISLE*.

§. 715.

Ab *aqua regia* melius quam ab acido salis plumbum solvitur; melius hoc fieri, menstruo supra plumbum, aut plumbi calcem fuso, dixit *Cl. WALLERIUS*. Non requiri hoc, circa acidum muriaticum saltim, *Cl. MONNET* adnotavit.

§. 716.

SATURNI solutionem per *aceti vaporem* eleganter descripsit *BOERHAAVIUS*: Ampla, ait, fumatur cucurbita, ita abscessa, ut orificium habeat valde patulum: Huic respondeat amplius alambicus: in hoc alambico sic adcommodentur tenues lamellae plumbi, ut intra cavam fossam annularem alambici circumponantur satis erectae, neque delabi potentes. In cucurbitam infundatur acetum. Ponitur in furno arenae; inponitur alambicus cum lamellis plumbi; adplicatur excipulum, leni igne destillare cogitur acetum duodecim horis. Dein relinquuntur duodecim horis frigida omnia. Lamellae tum exsiccentur leniter. Albescunt, squalent pulvere albo: qui pede leporino deterfus *cerussam* dictam exhibet *albam*. Si repetito labore sic pergitur, totum plumbi corpus in pulverem illum album convertitur, prorsus insipidum, inodorum. Aceti interrim elevatus vapor in liquorem densatus albescentem,

Aa 3

tur.

*) De saturno corneo mox amplior recurret mentio.



turbidulum, dulcem, nauseosum, stypticum, est *acetum plumbi*, sive plumbi solutio.

§. 717.

FIERI tamen solutio plumbi in aceto poterit, quin *Boerhaaviana* methodo instituaturs operatio; etsi quidem fatendum simul sit, acetum requiri generosum, accessum caloris, atque non magnam saturni copiam; optime fit, dum plumbum adhibetur, in tenuissimas, chartam subtilissimam aequantes bracteolas tufum, quas intra acetum ex filis suspenduntur, ut moveri eo facilius queant saepius. Monuit *Cl. WALLERIUS*, a libris binis aceti, queis inmissa fuerit drachma una plumbi, vix grana viginti resolvi. Majori tamen copia plumbi calces in menstruo hoc eodem disparent; quum libra una aceti destillati drachmam unam minii, libra semis ejusdem aceti destillati drachmam unam lithargyrii in pulverem conminuti solvat, referente *Aureo* nunc dicto.

ACETUM vero plumbi, antea dicto simillimum, enascitur, sive cerussam, sive minium, sive plumbum ipsum acidi hujus actioni subicias.

§. 718.

ACETUM hoc plumbi inspissatum alia denuo constituit remedia, quorum sat magnam copiam *Chirurgus Gallicus Cl. GOULARD* excogitavit. *Extractum saturni* *Cl. GOULARD* paratur et aceto cum lithargyrio decocto, etsi quidem extracti nomen non adeo mereatur, quum fluidum adhuc esse debeat, *Cl. GOULARD* praescribente. Subjunxit tamen ipse *Cl. Vir*, decoctione protracta liquidi per filtrum acti verum extractum nasci. Monet autem optime *Cl. AIKIN*, extractum saturni a saccharo saturni, ac aceto saturni, gradu so-



lum concentrationis distingui; ex formulis a GOULARD et aliis praescriptis adparere satis, vires extracti diversissimas esse debere, quum et a fortitudine acetii adhibiti, et a diuturniori, breviorive tempore decoctionis dependeant, quorum tamen neutrum determinatum certo fuit: praeserentiam ex unica solum ea ratione extractum plumbi prae saccharo saturni mereri, quod majorem acetii copiam recludat, quodque saccharum saturni, in crystallos jam redactum, ab aceto non facile adeo resolvatur; dum vero aqua multa solvi debet, ut in formula *aquae saturninae Goulardianae* praescribitur, rem eodem plane redire, sive saccharum saturni solvatur aqua, et addatur dein acetum, sive sub forma extracti haec invicem illico remisceantur.

AQUAM *saturni*, seu aquam *vegeto-minerali* enasci dixit GOULARD, si cochlear exiguum extracti saturni misceatur cum cochlearibus parvis binis spiritus vini, atque miscela haec inmittatur in lagenam aquae purae.

§. 719.

CERATUM *saturni Goulardianum* constat miscela unciarum quatuor cerae purae, libra una olei, quae liquantur invicem, refrigerata infundantur vasi terreo planiori, agitentur spatula lignea, et admisceantur aquae *vegeto-mineralis*, ea ratione confectae, ut ad libras sex aquae unciae quatuor extracti saturni *) recipiantur, librae sex, atque totum tamdiu agitetur, aquam paulatim adfundendo, donec aqua tota olei et cerae unionem subierit.

§. 720.

CATAPLASMA *saturninum* composuit GOULARD mica panis, aqua *vegeto-minerali* madefacta, tantillum ebullitioni exposita.

Aa 4

§. 721.

*) QUANTUM alcoholis hic addendum sit, GOULARD non monuit.



§. 721.

UNGUENTUM *saturni* GOULARDI componitur unciis octo ceræ puræ, mistæ, lege artis, cum octodecim unciis olei rosacei; additis demum unciis quatuor aut quinque extracti saturni, ac drachma una camphoræ.

§. 722.

NUTRITUM *Goulardianum* componitur unciis sex lithargyrii, in pollinem triti, remisti cum unciis quinque olei, ac unciis octo aquæ vegeto-mineralis.

§. 723.

UNGUENTUM *saturninum* GOULARDI paratur ex miscela mensurarum duarum aquæ communis, unciis binis extracti saturni, unciis octodecim saponis communis, et drachma una camphoræ. — Absurdæ fatis hæc est compositio, etsi GOULARD ipse fateatur, quod additionem saponis debeat *Ill. Belliduci de RICHÉLIEU*: acidum enim aceti agere omnino debet in sal alkali, quod in sapone cum oleo mistum habetur, decomponitur hinc totum, et excutietur plumbi calx; monuit sane *Cl. AIKIN*, sedimentum copiosum, album, floccosum, fuisse dejectum, *Goulardianum* hoc magma dum tentaminis gratia conficeret.

§. 724.

SPARADRAFUM *saturninum* Goulardi componitur miscela librarum duodecim ceræ, librarum trium cum dimidia olei olivarum, unciarum octo extracti saturni, ac drachmarum demum binarum camphoræ.

§. 725.

REMEDIIUM *antiscabiosum* GOULARDI constat libris binis axungiae porcinae, unciis quatuor sulphuris,

ris, unciiis binis aluminis, aequalique dosi extracti saturni.

§. 726.

PULVIS *extracti saturni* Goulardi constat comminuto extracto saturni solis radiis exsiccato; superfluum, dum saccharum prostat saturni.

§. 727.

CANDELULARUM *saturninarum* plures species fuissime descripsit Goulardus; monuisse hic sufficiat, ne lectorum excitem taedium, componi *primam* speciem cerae libra una, mista cum uncia dimidia extracti saturni; *alteram* unciiis sex cerae et uncia una cum dimidia, vel et unciiis binis extracti saturni; *tertiam* libris sex cerae, libra semis vervecini febi, et unciiis quatuor extracti saepe dicti; *quartam*, addendo unciam unam extracti saturni ad libram quamvis cerae, quibus seg-menta linteorum obducuntur ad leges artis, in candelulas convolvenda. Lubens jam pertranseo *unguentorum saturninorum* descriptiones, quas in altero operum suorum tomo denuo congeffit GOULARD: addam solum, consuluisse illum, ut per omnes vias plumbum corpori ingereret, internum quoque extracti saturni usum. Ex Auctoris hujus praescripto instillari deberent guttae duodecim aut quindecim extracti saturni mensurae aquae communis, ab aegro diei unius spatium hauriendae: usum hujus nemini suaserim.

§. 728.

DIXI prius, plumbi solutionem ope vaporis aceti enarrans, lamellas plumbi tegi calce alba, *cerussa alba* dicta. Cerussa haec majori copia confici solet peculiari adparatu, suspendendo laminas plumbi spirali ductu circa sese laxissime revolutas in vasis terreis,

Aa 5

aceto



aceto ea ratione repletis, ut laminae ab aceto aliquot saltim digitis remotae sint, tumque balneo arenae, vel et fimo equino inpositis; collecta plumbi calx abradi-
tur, lamellae novae erosioni dicta nunc ratione ob-
iiciuntur. Forma lamellis hisce spiralis ideo potissimum conciliatur, ut vaporibus aceti et maxima simul expo-
natur superficies, et minimum simul illae in vasis oc-
cupent spatium: cerussa calcem sistit veram plumbi,
acidi ope paratam, nullo tamen acore dotatam, hinc
et nullo modo salinam.

§. 729.

SUBSTANTIAE tamen salinae dos cerussae facile con-
ciliari potest, dummodo in aceto, mediante calore, re-
solvatur: evascentur tum verum sal metallicum, acido
aceti, ac in calcem eroso saturno constans, sub nomi-
ne sacchari saturni, ob saporem subdulcem, aut salis
plumbi crystallini notum. *) Depuratur saccharum
hoc saturni, solvendo crystallos, prima vice obtentas,
in aceto generoso destillato, solutionem hanc reponen-
do, ut calciformis materies non probe soluta ad fun-
dum ruat, filtrando, debite evaporando, et crystalli-
fationi exponendo; oriuntur sic crystalli sat elegantes,
crystallis genuini sacchari sat similes, notante *Cl. WAL-*
LERIO; in prismata, describente *Cl. Romè DE L'ISLE*
tetraëdra, homoëdra concretas: aciculares dixit *Cl.*
BAUME, splendentes, albas, sese invicem decussantes;
saccharum primae crystallisationis, descriptore *BOER-*
HAAVIO, constat massa, spiculis tenuibus, erectis con-
creta; saccharum hoc, ait, vulgare, venale solvatur
recenti aceto stillatitio acerrimo — — crescent in
fundo

*) NOTANDUM tamen, et ex aliis plumbi, aut calcium
plumbi, in aceto solutionibus saccharum saturni ob-
tineri posse.

fundo vasis crystalli crassae, solidae, perfectissime referentes formam sacchari vegetabilis crystallini, habentesque saccharinum saporem.

§. 730.

EXAMINEMUS dotes sacchari sic obtenti. Quando crystalli hae, BOERHAAVIUS prosequitur, denuo solvuntur in aceto acerrimo, stillatio, quiete depurantur; lento igne liquor inspissatur, donec redeat in olei spissamen; acquiritur liquor, qui difficulter parvo igne exsiccare in duritiem poterit, sed manet fixior aliquantum, et parvo calore liquefaciendus instar cerae. Quo saepius inpraegnatio haec cum novo aceto fit, atque exsiccatio succedit, eo materies in igne parvo magis fixa, non fumans, facile fluens, habetur. Haec dum fluida adhuc effunditur in aliud vas frigidum, per aëra frigidum, in ipso hoc effusu mire coagulatur, inque filamenta tenuia, instar telae araneae concrescit, quae filamenta perfecte argentea videntur, miro sane et amoeno valde spectaculo. Simulac coagulatum hoc corpus in fila majori exponitur calori, mox defluit iterum, postea effundi denuo potest. Si saepiuscule haec resolutio et inspissatio, diligenter et cum patientia, repetitur, facibus semper abjectis, tumque diu, leni igne, fovetur materies, donec spissata concrescit, tandem formatur massa, adspectu externo incautis argentum referens, de qua re legi meretur ISAACUS HOLLANDUS *de lapide ex saturno*.

§. 731.

IN aqua saccharum plumbi non magna adeo copia solvitur. In tentaminibus NEUMANNI uncia una aquae purae solvebatur scrupulus unus sacchari saturni, quum
tamen



tamen in eadem aquae copia solverentur unciae duae sacchari farinacei albi, drachmae sex salis Sedlizenfis, drachmae novem sacchari candi rubri, e. f. p. Praecipitationes calcis plumbi ex hocce saccharo dein dicam.

§. 732.

BALSAMI plumbi species exurgit, describente BOERHAAVIO, dum saccharum saturni, in subtilem pulverem tritum, calefactumque in cucurbita vitrea, perfunditur quadruplo tepidi olei terebinthinae; et cucurbita oleo lini pro ebullitione inponitur: violentiori citoque intenso igne fufum salinae adhaerentes molculae partim avolant; saturnus tum reducitur in formam metallicam, tum in vitrum abit.

§. 733.

SATURNI spiritus austerus, inflammabilis, obtinetur per destillationem sacchari saturni ex retorta institutam; sub finem operationis, JUNCKERUS ait, prodit oleum potens acidissimum, fere instar olei vitrioli, BASILIUS VALENTINUS *olei plumbi* nomine hoc insignivit; aucto magis igne oleum rubrum sequi, grate olens, Cl. WALLERIUS habet, qui simul adjecit, destillatione violentius pulsa remanere demum caput mortuum, in aëre libero sponte sua inflammabile, hinc *pyrophorum* constituens *) in plumbum sat facile reducendum; ab unciis viginti quatuor sacchari saturni liquida spirituosa ac oleosa uncias tres cum dimidia aequare, in massa remanente uncias octo plumbi latere, nunc dictus *Auctor* observavit. **)

§. 734.

*) Ab addito sale tartari, aut nitro, massam igne concepto fulminare, adnotavit KUNCKELIUS.

**) Ex sacchari saturni probe siccati libra uncias tres cum dimidia spiritus aceti plerumque prodire, ex eadem copia

§. 734.

ACETUM ex saccharo saturni sic extortum e natura acida in spirituofam denuo rediisse, tentamine hoc evinci credidit *Cl. WALLERIUS*; acetum concentratum dixit *Cl. ALBRECHT*; concentratissimum esse, ac purissimum acetum, pronuntiavit *Cl. BAUME*: concentratum esse acetum, oleosa parte inbutum, experimenta docent. Rectificatio ex hoc eodem spiritu partem aetheream, volatilem separat, medium fere spiritus hujus prodeuntis ex saccharo aequantem. Spiritus hujus partem subtiliorem exardescere phaenomenon singulare adeo non est, nam et spiritum, ex aerugine expulsum, inflammari, antea in *capite de CUPRO* dictum fuit.

§. 735.

TARTARUS plumbum etiam solvit. Exsurgit species sacchari saturni ex decocto cum plumbo hujusve calcibus tartaro. Ex destillatione solutionis hujus laticem aquosum, spiritum, oleum, ac sublimatum in aëre deliquescent, adtenuatum sal tartari hinc recludens, obtinuit *Cl. WALLERIUS*; in retorta plumbi pars in formam reducta metallicam erat. Speciem aliam sacchari saturni obtineri ex decompositione solutionis saturatae sacchari saturni, vulgari methodo parati, per superadditum acidum tartari sub forma praecipitati, *Cl. RETZIUS* monuit in *Act. Acad. reg. Suec. vol. XXXIII.* sejungitur scilicet acidum aceti a plumbo per acidum tartari. Regulum pulchrum plumbi, alio plumbo candidioris et purioris, remanere in vasis fundo, ex quo adhaerens tartari acidum avocatur, *GLAUBERUS* monuit.

§. 736.

copia recens facti salis uncias quatuor cum dimidia transstillare, monuit *Cl. BAUME*.



§. 736.

VINA, subacidula inprimis, plumbum pariter dissolvunt, ac saccharum saturni sic oritur: nefarii oenopolae saccharum ipsum saturni, aliasve plumbi calces, v. c. cerussam, minium, vinis acidis admiscent, ut sic acidum obtundatur, et vinum dulcificetur: ex pathologicis autem constare debet omnibus, quanta inde oritura sint mala. Mangonii hujus detegendi gratia varias iniverunt vias Chemicæ, quarum tamen non omnes æque bonæ sunt; nam hepate sulphuris v. c. non solum plumbum, sed et ferrum vinis, tum ex indole propria, tum ex causa aliâ adventitia (moto e. c. vino catenis ferreis, quod in *Helvetia* sæpe fieri *Cl. STRUVE* in *Bernisch. Magazin* B. 1. Th. 2. monuit) inhaerens nigro sub colore præceps datur. Optima vinorum docimasia edita nuper fuit a *Cl. Viris MORET, LA PLANCHE, BAUME et CADET*; tum et a *Cl. Cl. COSTELL, VALLMONT de BOMARE, CADET, et MITONART*, inserta hæc tentamina fuerunt in *Observat. sur la Physique &c. par Mr. l'Abbé ROZIER, Novemb. 1771. p. 114.*

§. 737.

SAL commune, JUNCKERO teste, in cerussam corroditur, si rasura plumbi cum eo permixta in cella reponatur, ut sal desuper collique scat. Calx plumbi pura obtinetur, *Cl. WALLERIUS* adnotavit, si plumbum fundatur, ac sensim duplum salis communis cochlearum addatur, miscelæque post quamvis decrepitationem bene agitur; sal adhaerens elutriatione tollitur.

§. 738.

CUM nitri parte dimidia commixtum, et prunis in vase amplo aperto inpositum plumbum, descriptore ten-

tentaminis KUNCKELIO, dissolvitur, ubi confluunt, sensim in flavam lithargyrio aemulam massam, sine manifesta scintillatione. Alkali sal elui potest ab eroso in calcem, ab aliis non diversam, saturno.

§. 739.

PLUMBI cum *Sulphure* phaenomena DIOSCORIDES jam sequentibus non inepte descripsit. Uritur, ait, plumbum sic: super tenuissimas plumbi laminas, fictili novo inditas, sulphur spargito; additisque aliis rursus laminis, interjecto semper sulphure, usque dum vas expleveris, succendito. Flagrante autem plumbo, ferrea rude versato *), donec perfecte redigatur in cinerem, nihilque e plumbo non ustum haeserit: tum demum, obstructis naribus, eximito; alioquin halitus plumbi noxius sentitur. Aut elimatam plumbi scobem in olla sulphure urito.

§. 740.

JUNGI vero potest aut plumbum illico cum sulphure, uti nunc dictum fuit, aut fuso plumbo sulphur sensim adjici, orietur semper *plumbum* sic dictum *ustum*, *plumbum ab acido vitriolico sulphuris erosum*, *plumbum sulphuratum*, μόλιβδος κεκαυμένος. Species *Galleanae artificialis* enascitur striata, fragilis. Pro plumbo usto Cl. WALLERIUS uncias quinque plumbi granulati, ac uncias duas sulphuris, Cl. BAUME drachmas sex, vel unciam unam florum sulphuris ad uncias duas tresve plumbi, JUNKERUS uncias duas sulphuris, et uncias quinque plumbi granulati praescripsit.

§. 741.

*) PATET autem ex antea, in cap. de FERRO, dictis, ferum ipsum sic solutum iri.



§. 741.

HEPAR *sulphuris* plumbum in massam nigricantem exedit: calcibus plumbi additum, fusioni expositum, in formam eas reducit metallicam, denuo tamen, sulphure mineralisante, in galenam artificialem illico mutandas.

§. 742.

SAL *ammoniacum* plumbum in superficie saltem mutare in calcem albam, Cl. BAUME vidisse sibi visus est. Plumbum in subtilissima ramenta rasum, cum sale ammoniaco mistum, sublimationi expositum, sal alkali liberat, ipsum cum acido salis in saturnum corneum abit. Melius hoc ipsum minii ope perficitur, uti jam prius adnotavi. Operatio haec alio loco denuo recurret.

§. 743.

ACIDUM *phosphori* concentratissimum plumbum citius paulo quam stannum adrodit.

§. 744.

SAL *fusibile microcosmi* cum tripla parte aqua edlutum plumbum non nisi parum adficit: fusioni vero drachmae duae salis hujus cum scrupulis binis plumbi mistae, massam dederunt, illi, quae ex stanno obtenta fuit, (v. caput de STANNO) analogam; carbonibus accendendam, non tamen adeo flagrantem, malleo adhuc obtemperantem: pondere grana sexdecim decreverunt.

§. 745.

PLUMBI *limatura* ab *acido formicarum* non tangebatur; minium autem cum acido hoc eodem mistum, dige-

digestioni calidiori expositum, abiit, filtratione liquoris praemissa in crystallos pulcherrimas, saccharo saturni vulgari quoad figuram sat similes: haec ex tentaminibus *Marggrafianis*.

§. 746.

OXYGALA, *urina*, plumbum paulatim exedunt.

§. 747.

OLEA calces quidem plumbi, uti jam antea dictum fuit, melius referant, quam plumbum forma metallica donatum; solvunt tamen et hujus quamdam partem. Horologiorum artifices plumbo adjecto depurare ab acido superabundante ac mucilagineis oleum, atque ab oleo sic depurato rubiginem haud facile enasci in ferro illo inuncto, *Cl. WEIGEL* monuit.

§. 748.

REFERT, observatio enim huc inprimis pertinet, *Cl. GAVBIUS* in *Verhandeligen Sc. door de Hollandse Maatschappij der Weetenschappen te Harlem 1. Deel p. 125.* ex *Cl. COHAUSEN*, monachos cujusdam monasterii pessima adfectos fuisse pictonum colica, ab assumpto butyro, in vase plumbeo diutius adservato, hinc erosio ab acore, butyro inhaerente, plumbo inpraegnato.

§. 749.

PLUMBUM ab *alkalinis salibus* non optime resolvitur, etsi quidem partim solutio contingat, cum sale alkalino acuato inprimis decocto saturno; uti ex nigrore lixivii, minuto pondere plumbi, ac dejiendo praecipitato conficitur. Facilius succedit solutio cal-

Part I.

Bb

cium



cium plumbi salisve. Salis crystallini plumbi, BOERHAAVIUS ait, accuratissime siccati, dein minutissime contriti, uncias duabus adde olei tartari per deliquium uncias quatuor, pone in digestionem, quo diutius, eo melius. Dein adde salis ammoniaci unciam; misce accurate, iterum digere vase clauso, egressum digerendo liquorem salinum readfunde; iterum digere; quo bis terve facto, exsiccetur materies lento igne penitus; siccata exponatur aëri humido, ut solvatur. Siccetur iterum, dein sicca materies destillet ex retorta vitrea loricata, per gradus successivos, tandem summos arenae possibiles, in excipulum magnum, in quo aliquid aquae purae adsit. Transibit materies triplex, quam miraberis; in fundo retortae singularis alia remanebit mire mutata; speravit BOERHAAVIUS ex operatione hac, partem metallicam mercurialem puram seorsum a caeteris secretam exhiberi forsitan posse, si industria artis eo tandem pervenire queat: sed relinquamus haec, circa quae et GROSSE, et alii plurimi, magnis conatibus fuerunt versati, otiosis Alchemicorum manibus. —

§. 750.

VIDEAMUS nunc, quid circa *praecipitationes plumbi* notatu dignum magis occurrat. Ex *acore vitriolico sale volatili* calx alba, tenera dejicitur. Ex *acido nitroso* varia ratione expellitur: dum in solutionem plumbi in acido nitri factam infunditur *acidum vitriolicum*, illico ad fundum cadit praecipitatum album, quod verum obfert *vitriolum saturni*; sub forma pulveris albens cadit hoc, quum in aqua solubile adeo non sit: ab aqua tamen bullienti, copia sufficienti adfusa, resolutum ex integro disparet; idem phaenomenon evenit ab adjectis salibus, quibus acor vitriolicus inhaeret: instantia hic habetur adfinitatis inter quatuor simul corpora intercedentis, ex qua decompositiones
binae,

binae, binaeque compositiones enascuntur: acidum siquidem vitriolicum adgreditur plumbum; relicta, cui prius inhaeserat, basi; acidum nitrosum vero adgreditur basin hanc, relicto, quod solutum tenuerat, plumbo.

§. 751.

Ab instillato in solutionem plumbi nitrosam *acido muriatico*, additove sale quocunque, acidum hoc recludente, flocci dejiciuntur albi, sale metallico, ex unione acidi muriatici cum plumbo orto, constantes. Floccihi speciali nomine *saturni cornei* fuerunt donati.

§. 752.

SATURNUS corneus *) in igne facile funditur, vasa penetrat, volatilis est; fusus, frigesactus ex opaco diaphanus est, in aqua, notante Cl. MACQUERO, facilius multo, quam luna cornea, solvitur, ac in crystallos tum conerescere aptus natus est: crystalli sapore sacchari saturni, styptico magis, donantur. Ab acido muriatico solutus, ex relatis *Wallerianis* in crystallos abit exiguas oblongas, quae supra carbones ignitos sub vaporibus densis avolant. In aceto solutus cadit ad fundum specie pulveris albi. Sale communi et argilla remistus, ac in retorta robustiori destillationi expositus, spiritum largitur, ac sublimatum, narrante STAHLIO; obtineri dixerunt mercurium, si producta illa invicem denuo mista fuerint, repetitae destillationi, ad siccitatem usque protrahat, exposita, et liquido, transeunti in excipulum, sal tartari addatur.

Bb 2

In

*) *SATURNUS corneus* etiam oritur, si acidum muriaticum supra plumbum granulatum abstrahatur, aut mercurius sublimatus corrosivus plumbo admistus exponatur sublimationi.



In aliis tentaminibus *mercurificatio* haec parum adeo, ac *Grossana*, successit. Instantia hic denuo est, dum saturnus corneus sale quodam medio, acidum muriaticum vehente, dejicitur, adfinitatis intercedentis inter quatuor corpora.

§. 753.

Ab *alkalinis salibus* nitrosa plumbi solutio spissescit, non tamen effervescencia oritur: demonstratur, ait *Cl. Wallerius*, ex hoc phaenomeno, tum et ex eo, quod syrupus violenter adfusione solutionis hujus ejusdem virescat, acidum hic obtusum omnino, et fractum ex integro esse. Monet simul Auctor nunc citatus, plumbum sub forma metallica per alkohol (sub forma *magisterii saturni*, uti alii praecipitatum hocce dixerunt) exin dejici; praecipitatum etiam oriri adfusione simplicis aquae. Ait vero *Cl. Baume* et *Macquers*, praecipitationem hanc ab aqua purissima non produci, sed contingere tum solum, quum in aqua seleniticum sal haeserit, atque tum non quidem plumbi puram calcem, sed vitriolum geminum saturni ruere. Si quis *Magisterium* plumbi sincerum facere velit, subdit *Cl. Baume*, admisceat sal alkali fixum omnium purissimum solutioni nitrosae plumbi, praecipitatum aqua purissima copiosa abluat, ac in vase optime clauso adseruet, quum aeris ac vaporum phlogisticorum accessu facile nigrescat.

§. 754.

ADDITVM salis plumbi soluto, aut aceto plumbi, oleum tartari per deliquium speciem aliam *saturnini magisterii* dejicit; idem et salis alkalini volatilis, et absorbentium terrarum ope fieri poterit.

§. 755.



§. 755.

AVRI cum plumbo miscelam in *capite de Auro* dixi.

§. 756.

ARGENTI miscela cum plumbo in *capite de Argentento* quaeratur.

§. 757.

PLATINAE miscela cum plumbo in *capite de Platina* exponitur.

§. 758.

FERRI miscela cum plumbo in *capite de Ferro* habetur.

§. 759.

CYPRI miscelam cum plumbo in *capite de Cypro* dixi.

§. 760.

STANNI miscelam cum plumbo in *capite de Stanno* exposui.

§. 761.

MERCURIUS cum plumbo conjungitur, tum tritu simplici mechanico, tum et caloris fusionisque posterioris metalli ope; tum binis hisce adminiculis in unum conjunctis: Amalgama pro diversa ratione additi mercurii diversum etiam consistentiae gradum acquirit.

§. 762.

CIRCA miscelam plumbi cum mercurio, cui additur bismuthum, singulare phaenomenon notandum occurrat.



currit; quod, ut ex *Cl. BAYME elementis de Pharmacia* excerptum, una cum ratione mercurium adulteratum detegendi, hic inferatur, mereri videtur: Mercurius, de adulterationibus medicamentorum agens ait, adulteratur plumbo, interveniente bismutho. Funduntur una in vase ferreo partes anaticae plumbi ac bismuthi; additur hisce mercurius currens ea quantitate, ut pondere dimidium massae totius exaequet: agitur miscela, donec refrigerit: obtinetur sic amalgama fluidum, in aëre libero non densandum, ac ex integro fere per poros alutae transiens, uti transire solet mercurius ipse purus. Pars tamen bismuthi ex eo secedit, elapso tempore aliquo superficiei mercurii sub forma pulveris griseocinerei innatatura; plumbum vero nunquam non sub forma fluida inmixtum manet. Adulteratio haec, subjungit, phaenomena obfert chemica, difficillime exponenda. Dum plumbi et mercurii partes aequales in amalgamate invicem junguntur, aut dum eadem operatio sub eadem quantitate instituitur cum plumbo et bismutho, Amalgamata utrinque oriuntur solida. Plumbum etiam et bismuthum, confusa invicem, massam denuo constituunt solidam: unitis autem corporibus nunc dictis tribus invicem, miscela prodit, mercurio puro fluiditate fere analoga. Adulteratio haec mercurii detegitur primum ex eo, quod specificè levior sit mercurio vulgari. Secundo, dum inponitur orbi murrhyno, vase terreo, fundo planiori donato, vasque inclinatur leniter, ut mercurius ex obliquo plano paulatim solum defluere possit, post se relinquit filum pulveris metallici, mercurium praecedentem comitans; gutta nempe quaelibet mercurii petiolo exiguo nunc instructa cernitur, quum alias esse deberent omnes rotundissimae. Tertio demum, si exponatur portio minor mercurii sic adulterati in cochleari ferreo calori majori, mercurius avolat, et substantiae, quae prius inmixtae fuerant metallicae in fun-

do

do cochlearis remanent. Dum destillationis ope mercurius a plumbo et a stanno, quibuscum in amalgama concreverat, abigitur, facilius a plumbo secedit, ex observatis *Wallerianis*, quam quidem a stanno, plumbum etiam in superficie exesum cernitur in calcem flavicantem, quae cum mercurio misceri amplius nequeat.

§. 763.

PLUMBI vapore mercurium solidescere, si in linetolo supra fustum illud suspendatur proxime, vel foveolae impressae inponatur, plurimi adnotarunt; fluxilitatem quodam gradu deperdere, expertus ipse saepius fui.

§. 764.

REGULUS *antimonii* cum plumbo anatica dosi mistus regulum praebet coloris obscurioris, malleo parum obtemperantem. *Cl. WALLERIUS*. Eandem miscelam descripsit *Cl. BAYME* fragilem, induttilissimam, in fractura facieculas obferentem splendentes. In alio tentamine miscuit uncias duas plumbi cum uncia una reguli antimonii; obtinuit metallum fragile, induttile, in fractura obscurum, granulis exiguis donatum, ferro puro, non autem chalybi, forma analogum, malleum parum non nisi admittens. Unciae duae plumbi cum uncia semis reguli antimonii dederunt metallum; malleo magis paulo priori complanandum; granulis minoribus denuo praeditum. Unciae duae plumbi cum drachmis tribus reguli antimonii metallum dederunt, a priori vix diversum. Unciae demum duae plumbi cum drachmis binis reguli antimonii dederunt metallum fat molle, granulis minimis, ad instar chalybis purioris, donatum, eundem vix non colorem obferens. Miscela plumbi et reguli antimonii specifi-
cam gravitatem auctam exhibuit in *Gellertianis* tenta-



minibus. Observavit *III. MVSCHENBROECKIUS*, miscens regulum antimonii cum plumbo Scotico puro, maximam firmitatem fuisse miscelae hujus, quando ad octo partes plumbi una pars reguli antimonii adjicitur, tum enim mistura sustinuit libras ducentas sexaginta. Quantitas major minorve plumbi, recipiens parem reguli copiam, metallum infirmius praestat; antimonium, ait *Muschenbroeckius*, respectu plumbi munere glutinis fungitur, partes plumbi cum partibus conculantis; nam plumbum in simili crassitie sustentasset libras viginti quinque, aut ad summum libras triginta; regulus antimonii etiam libras triginta; ambo metalla mista in ratione 8. ad 1. efficiunt firmitatem librarum ducentarum sexaginta, adeoque decies fere majorem: sed quando metalla ambo pari copia capiuntur, vix aucta est firmitas, et mistum metallum est admodum fragile; hinc natura in his omnibus observat firmitatis aliquod maximum et minimum.

§. 765.

ANTIMONIUM crudum cum plumbo jungitur, dissolvi tamen a fusa miscela potest, partem licet plumbi secum vehens: ex hoc phaenomeno adparet, ait *Cl. WALLERIUS*, crimationem *lupi metallorum*, omnia metallica corpora devorantis, plumbum non mereri. Plumbum, ad modum reliquarum metallicarum substantiarum, cum sulphure, altera antimonii crudi parte, abit in scorias; ex scoriis deijciendum ope stanni granulati fusae massae adjecti. Cur scripsit *Cl. BAUME*, ignorari, an regulus antimonii, plumbi, uti reliquarum substantiarum metallicarum interventu, a sulphure in antimonio crudo sibi adhaerente liberari queat? *)

§. 766.

(*) AN non legit *Cl. BAUME* locum in *Diction. de Chymie* *Cl. MACQUER T. I.* sequentem, luce clariorem: la plu-

§. 756.

Bb 5

Zin-

plupart des métaux, tels que le fer, le cuivre, l'étain, LE PLOMB, et l'argent, ont beaucoup plus d'affinité avec le soufre que n'en a le régule d'antimoine. Il s'en suit, qu'on peut précipiter le régule d'antimoine dans la fusion, et le séparer d'avec le soufre, par l'intermede de ces métaux. C'est aussi ce qui a lieu; et le régule, qu'on obtient par ces intermedes métalliques, se nomme en général *régule des métaux* &c. ? In *Elemens de Chymie* Cl. MACQUERUS etiam dudum dixerat: omnia metalla, excepto auro, pro intermedio adhiberi posse, cujus ope antimonium solvatur, ac sulphurea pars a metallica divellatur; hinc ferri loco cuprum, *plumbum*, stannum, aut argentum adhiberi utique posse, quorum ope regulus pariter conficeretur, e. s. p.



Zinci foret admista. Plumbum etiam *Scoticum*, Zincum, et bismuthum miscuit pari copia, infudit modulo stanneo; parallelepipedon, cujus quodlibet latus fuit $\frac{17}{100}$ poll. fractum fuit a libris centum sexaginta octo. Miscela plumbi cum Zinco specificè gravior deprehensa fuit in tentaminibus *Gellertianis*.

§. 767.

BISMUTHUM mistum plumbo massam dat, referente *Cl. WALLERIO*, obscure griseam, flexilem aliquatenus et ductilem, dum aequalis cujusvis recipitur copia; sub fusione majorem partem in scorias abire, quam bismutho misto cum stanno, addit. Miscuit *Cl. BAUME* unciam plumbi unam cum eadem quantitate bismuthi, massa obtenta plumbo puro durior erat, satis tamen malleabilis, abs ruptura malleo cedens, colore, textura chalybi puriori accedens. Uncia una plumbi, mista cum duabus uncis bismuthi, massam malleo minus obtemperantem, granulis majoribus donatam, colore albidiozem, fragilem, inductilem dedit. Unciae demum plumbi duae, remistae cum uncis sex bismuthi et drachmis quatuor reguli antimonii, massam praebuere duram, malleo prorsus non cedentem, granulis exiguis, densis, colore argenteo praeditam. Miscuit *Cl. MUSCHENBROECKIUS* plumbum *Scoticum* purum cum bismutho: firmitatem maximam vidit, quum plumbi et bismuthi aequales mistae forent partes; et quo proportio propius aequalitati accessit, eo major fuit firmitas: nam plumbum et bismuthum, pari copia mistum, sustinuit libras 207.; quando plumbi partes 3. bismuthi partes 2. sunt sumtae, firmitas fuit librarum 147.; quum fuerunt plumbi partes 2. bismuthi partes 3., firmitas fuit librarum 290.; major copia plumbi bismutho addita debilitavit massam: quidquid sit, subnectit *MUSCHENBROECKIUS*, bismuthum

re-

respectu plumbi fungitur munere glutinis; nam partes plumbi cum partibus firmitus suo interposito conjungit. Miscela plumbi cum bismutho specificam gravitatem majorem exhibuit in tentaminibus *Gellertianis*.

§. 768.

COBALTUM, dixit *Cl. GELLERTUS*, non nisi parum plumbum adscit: dum partes aequales fusioni una exponuntur, massam refrigeratam examinando cernimus, substantias hasce binas adhaerere solum sibi mutuo; plumbum, donatum gravitate specifica majori, partem occupat inferiorem, cobaltum superiorem, ut adeo adsumi jure queat, nullam omnino horum factam fuisse unionem. Dum vero cobaltum hoc ipsum, sic tractatum, cum ferro, seu metallo, quod aptissimum videtur ad unionem cum illo contrahendam, jungitur, in fundo crucibuli colligitur regulus parvus plumbi, quum ferrum et plumbum sese invicem non solvant. Miscuit et *Cl. BAYME* grana quatuor cobalti sulphuri nexi cum drachmis quatuor plumbi; invicem non coibant, sed plumbum descendebat denuo ad fundum. In alio tentamine miscuit drachmam unam plumbi cum granis viginti quatuor reguli cobalti; eadem denuo prodiit massa, ac metalla bina mallei ictu separari ab invicem poterant; in plumbo acidorum ope soluto partem cobalti quamdam haesisse tamen deprehendit, quod vero adhaerens potius, quam admixtum vere fuerit: in cobalto nullum plumbum, eandem vero, uti prius, sulphuris copiam sese detexisse, addit. Cupellationi demum exposuit drachmas quatuor plumbi, drachmasque binas cobalti sulphurati; gradum ignis eum adhibuit, quo fusa fuit miscela partium aequalium cretae ac argillae spatio horae dimidiae



midiae in vitrum pulchre diaphanum; remansit demum cobaltum sub forma calcis nigrae; in metallicam formam reductus eandem, uti prius, continebat sulphuris copiam. Miscelam metallica haecce corpora abnuere, ac ictu mallei ab invicem separari posse, dum fusioni simul fuerunt exposita, et *Cl. WALLERIUS* habet.

§. 769.

ARSENICO mistum plumbum partim volatilifatur, *JYNCKERUS* dixit, partim in hyacinthinum denique vitrum abit. Plumbum partim abire illico in vitrum hyacinthinum, partim retinere formam metallicam, sed fragile tamen, ac in fractura splendens reddi, eundem effectum sequi, regulo arsenici cum plumbo fusione unito; addito demum arsenico ad vitrum plumbi fustum, rubro colore hoc ipsum tingi, adjecit *Cl. WALLERIUS*.

§. 770.

NICCOLVM cum plumbo aegre jungi, miscelam oriri fragilem, obscuram, tessulis majoribus compositam *Cl. CRONSTAEDT* retulit. Cur dicit denuo *Cl. BAYME*, *CRONSTAEDTIUM* nihil protulisse circa relationem horum corporum forma metallica donatorum, sed dixisse solum in actis Upsaliensibus, in vitrum ea invicem abire? Quae *BAYMEVS* non legit aut vidit, ea nec scripta, nec facta unquam fuisse, parum sane convincenti argumento, concludere saepe solet. — In *Mineralogia* etiam *Cl. CRONSTAEDT* monuit, *Niccolum* jungi cum substantiis metallicis omnibus, excepto solum hydrargyro ac argento.

§. 771.

§. 771.

INTER succedanea ad hocce caput veniant sequentia.

CERVSSA *cretata*, seu *creta mista*. Teritur cerussa plumbi cum tertia parte cretae albae, ac sufficienti copia aquae purae supra porphyritem, aut ope molae manualis in pastam atomis inpalpabilibus compositam. Pasta haec inmittitur in modulum infundibuliformem: exsurgunt sic coni, trium, quatuor, pluriumve librarum pondere, qui sub titulo ante dicto ex Venetiis, et ex Hollandia potissimum, in alias orbis partes divenduntur.

§. 772.

CERVSSA *tabulata*, aut *album scissile*, est ipsa cerussa purissima, squamis sibi superinpositis constans.

§. 773.

LAC *virginis* oritur, aceto plumbi aqua odorata quacunque misto, excussa sic parte quadam erosi in calcem saturni.

§. 774.

BALSAMVM *album Chemicorum* componitur miscella olei rosarum cum oleo plumbi inepte sic dicto, quod aceto plumbi inspissato, additione aceti diluto, aedenuo inspissato constat; oleum hoc plumbi ad mellis redactum consistentiam *Mellago plumbi* vocatur.

§. 775.



§. 775.

PLUMBI granulatio. Plumbum leniori igne funditur, fufum injicitur in pyxidem ligneam, creta interne obductam, operculo firmo claudendam, *pyxidis granulatoria* dictam: pyxis haec aut in pavimento, aut manibus rotatur; conquassatione hac plumbum in minutissima granula discerpitur, quae cribri ope ab adhaerentibus forsan majoribus massulis facile secerni queunt.

Sphalmata, quae ob plurium milliarium distantiam Auctoris ab inpressionis loco inreperunt, emendandave alia, Tomo secundo adnectentur.




INSTITUTIONES

C H E M I A E

P A R S II.

S E C T I O II.



FRANCISCI DE WASSERBERG

INSTITUTIONES

CHYMIAE,

IN USUM EORUM

QUI

SCIENTIAE HUIC OPERAM DANT.

REGNUM MINERALE

SEMIMETALLA.



VINDOBONAE,

APUD RUDOLPHUM GRAEFFER,

MDCCLXXIX.

Les premiers pas qu'on fait dans la carrière épineuse
des sciences, sont toujours les plus difficiles: et c'est
aussi parce qu'on les fait très lentement, qu'on doit avoir
une reconnaissance extrême pour ceux qui nous ont pré-
cédés, et qui d'une main hardie ont osé dévoiler les se-
crets, les énigmes de la Nature.

Hist. critique de la Philosophie,
par Mr. D*** Preface.



PRAEMONENDA.

NE moles voluminum nimium ab invicem discreparet, TOMUM ALTERUM in *duas dirimere sectiones* Dominus EDITOR voluit; atque partitionem hanc, quum operi ipsi nil plane obficiat, lubens admisi; etsi quidem Tomum secundum primo futurum majorem, non, in duas partes dividendum, promiserim.

SUPPLEMENTA, quorum editionem in capite de Antimonio pollicitus fui, dabo certo; in speciali, eoque curatiori substantiarum, quae ad Chemiae doctrinam referendae sunt, excusa disquisitione; voluminibus non quidem cohaerentibus, rei totius tamen augmento dicatis, edenda: absolvi nunc, *germanico idiomate* conscriptam, ut



vulgatior fiat utilitas, *historiam chemicam sulphuris, ovi, plumbi, stanni, et cupri*, proximis nundinis pars horum fors publicam videbit lucem. Unice in his omnibus incitamento mihi fuit studium, artis cognitu reddendae facilioris.

Tyronum plurimorum supina est *fo-*cordia — In paroemiam olim transit; *mortalem nimium addiscere nunquam posse; multa* (seu, si libere fateri velimus, *pau-*ca:) *nos scire, ignorare plurima*. Illis vero metus instare videtur, *ne nimium cal-*leant; quum certissime persuasi sint, quae Professor dixit, abunde sufficere. Sed et *sapientes illi in compendio* non solum praeter Professorum dicta nil amplius requiri, sed et horum adhuc plurima tuto negligi posse, pro certo habent — Metuo vero plurimum, ne, horum in gratiam, etsi optimo consilio, irrito tamen successu, susceperim laborem. Id mihi unice accidit solatii, non omnibus datam esse mentem pro sale, ne putrescant. —



ZINCUM.



ZINCUM.

§. 1699.

ZINCUM; (Z.) *) ZINQUUM, ZINCKUM, CINCUM, PARACELSO ZINETUM, SPEAUTER, SPIAUTER, CONTERFEY, KUNTERFEY; KONTERFEI, AGRICOLAE CONTREFEYN, BOYLEO SPECTRUM, MARCANT, CALAEM, CALOENUM, CALOEN, CADMIA METALLICA, CADMIA METALLARIS, MARCASITA AUREA &c. semimetallica substantia, colore instruitur ex albo, aut argenteo subcoerulescente, facieculis nitentibus punctis prominulis asperis; compagem Zinci fibrosam quasi esse, aut pyramidibus minimis laevibus compositam *Cl. WALLERIUS* monuit. Zincum, observante *Cl. POTT*, facile distinguitur à bismutho, quum bismuthum magis album et pulverisabile sit, tum inflammatione, et sublimatione, solutione quoque in acidis, et tinctura cupri; quibus indiciis etiam facile a regulo antimonii dignosci potest, item specifica gravitate, arguit hinc merito *GLASERUM*, qui olim pronuntiavit: eodem modo, ac bismuthum tractari et praeparari Zincum posse.

A 4

§. 1700.

*) Z, prima corporis hujus metallici littera pro characteristico ejus signo poni plerumque solet: etsi alii X, aliudve signum illi substituerint.



§. 1700.

GRAVITATIS Specificae rationes sequentes III.
MUSCHENBROECKIUS adnotavit: Zincum indicum sese habuit uti 7, 2401, goslarie uti 7, 215, aliud uti 7, 350, aliud uti 7, 065. modo fufum uti 9, 3548, idem diu cufum uti 7, 1764, ad 1000, aquae pluviae.

§. 1701.

ZINCUM malleabile quidem sensu strictiori dici nequit, minus adhuc ductile, interim tamen malleum melius nonnihil, semimetallis reliquis, fert, nec in pulverem contundi potest, quum tenacitate partium majori longe quam bismuthum, aut antimonii regulus donetur: ignitum fragilius esse, *Cl. Pott* recte statuit.

AERI expositum Zincum rubiginosum non erudit, nitor tamen fusi, aut politi sensim perit, nunquam vero ad obscurum plumbi colorem deprimitur.

§. 1702.

Aqua in Zincum vires nullas exferit, aqua pluvia, aqua destillata rubiginem nullam produxit: Zincum cum aqua diu decoctum nullam plane mutationem expertum in experimentis fuit.

§. 1703.

IGNIS in Zincum diversa plane, ac in metalla, aut semimetalla reliqua agit ratione. Ignem non lenem, sed intensum satis ad hoc, ut in fluxum deducatur, Zincum requirere, longeque difficilius, quam stannum, et antimonium fluere, *Cl. Pott* habet. Fusio circa candescentiam fere fieri solet. Zincum limatum per speciem ustulationis gradui ignis expositum, qui ad gradum pro ejus fusione requisitum proxime

❧

9

proxime accedat, in calcem nondum vertitur, sed si Zincum fustum diutius in igne detineatur, tunc superficies pedetentim in calcem ex albo cineream abit, uti *Cl. WURKO* ex *WALLERIO* nuper adhuc retulit.

§. 1704.

Si vero major ignis gradus Zinco in crucibulo contento admoveatur, ita ut candescat, et fusi calce obducti superficies aëris exponatur accessui, tunc in flammam lucidissimam exardescit, ex candente virentem, oculis vix ferendam; atque adeo per hanc incensionem Zinci phlogiston destruitur, et Zincum in calcem levissimam abit, floccorum tela araneorum adinstar crucibuli superiora obsidentem, per camini fornicem hinc inde obvolitantem, *flores Zinci*, aut *lana philosophica* dictam. Dum in laboratoriiis magnis, ait *Cl. TESSARI*, minerae metallicaë funduntur, quae Zincum complectuntur, vel ipsum a propriis mineris separatur, vel tandem aurichalcum conficitur, Zincum, sive ejusdem flores, cohaerentibus simul etiam metallis ad diversas altitudines adsurgunt varia forma et colore, parietibus furni adhaerentes. Hae sublimationes communi nomine *Cadmia furnorum* adpellantur; quae infimum locum tenet, cinerei coloris, *spodium*, sive *tutia officinarum* vocatur; quae medium levior, cinerea dilute *pampholix*; quae sublimem levissima alba, et farinacea, *nihil album* vocari solet, a floribus Zinci non diversum.

§. 1705.

DIFFERT autem Zincum dote hac a cognitis haecenus corporibus metallicis omnibus; differt et a sulphure, quippe quod flammae candelae admotum inflammatur; nec, uti Zincum, tantum, quantus ad fusionem requiritur, caloris gradum exigit.



§. 1706.

FLORES Zinci eo solum ignis gradu, qui ad inflammationem Zinci requiritur, paratos una decima parte Zincum ad experimentum adhibitum pondere superare *Cl. WALLERIUS* adnotavit; ex libris quatuor Zinci libras tres unciasque quatuordecim florum alborum pulchriorum, uncias binas, binasque drachmas aliorum, minus alborum, fusciscentium, nec adeo subtilium, unciam demum unam terrae calcinatae, aut speciem saltem hujus exhibentis substantiae obtinuit *Cl. HELLOT*, *Mem. de l'Acad. roy. des sciences* 1735. ut adeo drachmis binis cum dimidia libra una Zinci aucta florum in formam redacta fuisset; ubi tamen pars vaporibus in altum abrepta aestimari non poterat. Ex libra una Zinci uncias sexdecim, drachmas sex, granaque quinquaginta florum sese obtinuisse *Cl. BAUME* retulit.

§. 1707.

Ad meliorem encheireseos successum requiri monuit *Cl. HELLOT*, ut primum recipiatur crucibulum majus, utque hoc ipsum in furnum ponatur sub inclinatione anguli quadraginta quinque circiter graduum, ut denique ignis mediocris nonnisi admoveatur, ac tantillo fortior conservetur, quam, ut plumbum fusum manere queat, requiritur.

§. 1708.

ODOREM sub operatione adscendere suballiacum, hinc suspicionem adesse principii cujusdam arsenicalis idem *HELLOT* dixit; adjecit his, periculosum esse, si quis vaporem illum diutius adtrahere vellet, quum pulmones subeat, ac tussim molestam, per aliquot dies remanentem, excitet. His tamen non obstantibus, vaporem hunc periculi nil omnino involvere, profi-

proficuum potius esse, ac ophtalmiis conducere, plurimi alii monuerunt Auctores. Vaporem autem arsenicalem, aut alliaceum nunquam observavi, etsi numerosa vice Zincum magna satis copia in flores redegerim, remedium confecturus antispasticum, aut flores in usus chemicos obtenturus. Quod Zincum, durante flamma, foetorem phosphorinum, et arsenicalem spargat, nunquam advertere potui, *Cl. POTT* dudum dixit. Non tamen ideo negaverim, quae *Cl. HELLOT* adtulit, sed vaporem arsenicum redolentem, et tussim inde oriundam non Zinco, sed carbonibus, quibus crucibulum exponitur, adtribuenda esse censeo; quum a vapore carbonum dictum odorem adscendentem saepissime invitus perceperim, et mala a vapore hoc eodem nasci posse varia, gravissima, praeter molestant tussim, exemplis constet innumeris. *V. BIBLIOTHECAE meae physico medicae Vol. 1. art. de noxis ex vapore carbonum in sanitatem redundantibus.*

§. 1709.

CARBONIBUS ardentibus injecti Zinci flores colorem flavescentem induunt; in frigore albam de novo recuperaturi; criterio hoc Zinci calcem ab aliis omnibus calcibus, ac terris facile distingui posse *Cl. WALLERIUS* observavit.

§. 1710.

In igne flores Zinci fixi sunt, nec nisi violentissimo flammae torrente abripiuntur, quod levitati eorum potius, quam volatilitati verae adscribendum est; uti plumula in altum flatu tollitur, non quod volatilis, chemico vocis sensu, sed quod levis sit.

§. 1711.



§. 1711.

EXPOSUIT *Cl. BAUME* flores Zinci per bihorium igni violentiori, in quo miscela argillae, et cretae intra mediam horam in fluxum abiret; tanto tamen calore ne concreverunt quidem leviter in unam massam. Pulverem in refrigerato adparatu invenit colore malorum citri donatum. Repetiit eandem operationem aliquoties eodem semper cum successu; coloris intensitas in refrigeratis multum decrevit.

§. 1712.

INCLUSIT et *Cl. d'ARCET* Zincum ipsum globis ex pasta vasorum murrhynorum factis, atque sic furno, in quo vasa haec excoquuntur, commisit. Diffraeti fuerunt globi; exigua pars Zinci, quae adhuc remanserat, hinc nigra, illine obscure flava adparuit. Dixit *BAUME* spem esse, ut hac ratione ex Zinci calce color elegantius adhuc flavescens, quam ex *Giallo line*, aut *flavo neapolitano*, obtineatur: institui itaque plurima tentamina, an non in picturâ encaustica boni quid ab ea obtineri posset; vidi tamen, irritos omnes fuisse conatus, et colorem solum prodire sordide albentem: miscui cum aliis coloribus flavis; eorum elegantiam destructam vidi, miscui cum vasorum tegmine albo, optimo, pulcherrimo, sed hic quoque damni plus, quam emolumenti Zinci flores adtulerunt.

§. 1713.

FLORES hi carboni inpositi, et cannulae ferruminatoriae ope reductioni subjecti, flammam, uti Zincum ipsum, edunt; unde, reduci eos, sed illico de novo comburi adparet.

§. 1714.

MISCUIT *Cl. MACQUERUS* flores Zinci cum carbonum pulvere, miscelam loricatae retortae indidit, destil-

destillationi subiecit; sublimatum obtinuit griseum, ac flavicans, reducti Zinci parcam copiam, guttularum sub forma collum retortae obsidentem.

§. 1715.

Qua ratione ad menstrua sese habeant, dum de solutione ipsius Zinci agetur, simul enarrabitur.

§. 1716.

Cum dupla parte nitri detonationi expositis floribus Zinci, igne in auxilium vocato vegeto, nitrum, communi in his tentaminibus lege vertitur in sal alkali fixum, massa obducitur cuticula virente squamosa, ac, uti *Cl. HELLOT* retulit, superior pars citrino, inferior purpureo colore tingitur. Hinc solutio partis saltem Zinci per sal alkali obtinet, ac *nitrum* enascitur *rubrum RESPURII*, hoc vero, aquae ope soluto, *liquor alkabest RESPURII*: absurda fide credidit *RESPURIUS*, mediante hoc sale metalla omnia in principia sua primigenia recludi posse. Enarravit *Cl. HELLOT* operationem *RESPURII*; ambos autem rationem totius hujus operationis non optime perspexisse bene monuit *Cl. BAUME*. Calcinationi, ait, per decem horas protractae, exposuerunt miscelam partis unius florum Zinci, partiumque binarum nitri; rebantur nitrum a floribus Zinci in sal alkali fixum versum fuisse, quin tamen ulla accesserit detonatio; non adtenderunt autem, nitri in sal alkali fixum metamorphosin unice deberi calcinationi diuturnae salis hujus in vase aperto. Nitrum autem, sub contactu corporis inflammabilis cujusvis, confestim in sal alkali abit; atque hoc ipsum evenit, dum Zincum cum nitro detonationi exponitur, ibi namque acidum nitrosum ac Zinci principium phlogisticum una inflammantur, calx vero Zinci, ac nitri basis alkalina in crucibulo remanent.

§. 1717.



§. 1717.

SULPHURI remissi, igni expositi flores Zinci, partim solvuntur; in metallicam formam nil omnino reducitur.

§. 1718.

EXPOSITI haecenus Zinci flores ipsissima terra metallica Zinci phlogisto magis, minusve privata absolvuntur: legitimi praeparati albi, leves, tactu, uti *Cl. HART Dissert. de Zinco*, adnotavit, subsaponacei, odore, saporeque ex integro destituti sunt. Has ob dotes, tum et ob relationem ad acida, quam mox videbimus, plurimum illos ab arsenico diverfos esse, *Cl. HART* observat, quidquid alii circa analogiam intercedentem somniarint; accedere potius ad indolem terrarum absorbentium; differre tamen et ab his, quod principia nihilofecius Zinci in sese recludant; esse demum eos veram basin Zinci, quae, cum inflammabili parte juncta, Zincum forma metallica exhibeat.

§. 1719.

ACTUM haecenus de floribus Zinci, ex inflammatione semimetallicae hujus substantiae in vasis apertis obtinendis. Expositum autem in retorta valida ferrea, aut terrea Zincum ea ratione, ut aëri nullus omnino accessus detur, non calcinatur, non vertitur in flores, non adscendit in sublimatum magis minusve calciforme; sed forma metallica adscendit, ac, diversa ab aliis metallicis, ac semimetallicis substantiis lege, vera sublimatione metallica obtineri valet. Optime hoc perficitur, dum simul pulvis carbonum admiscetur, ac ignis vivacior simul et semel instruitur, ubi impura, Zinco admista, teste *Cl. WALLERIO* in fundo retortae remanent. Fateri tamen debeo, metalla, semimetallaque, dummodo exigua eorum adsit copia, una cum Zinco in sublime sic evehi;

hinc



hinc depurationem hanc exactissimam non esse, ut nunc, Zinco nil heterogenei adhaerescere, pro certo adsumere liceat.

§. 1720.

ALIAM adhuc methodum, Zincum depurandi idem AUCTOR indicavit. Inponatur hunc in finem depurandum Zincum crucibulo, inponatur huic alterum obversum, uniantur amborum commissurae luti ope exactissime ad invicem, ut aëris accessus omnis omnino arceatur. Adparatus hic reponatur in furnum anemium, ignis admoveatur cito intendendus, ac eadem intensitate per quartam circiter horae partem retinendus. Refrigescat demum sponte sua adparatus; soluto illo Zincum depuratissimum in superiori crucibulo adhaerescens deprehendetur. Calor tantus hic non requiritur, uti in sublimatione reguli antimonii, ac bismuthi, vasis clausis instituta.

§. 1721.

NUNC, qua ratione Zincum, ab acidis, aliisque menstruis adficiatur, videamus; addam simul, quid circa solutionem florum Zinci ab eodem menstruo notatu magis dignum observatum fuerit.

§. 1722.

ACIDUM *vitriolicum* concentratissimum, seu oleum vitrioli in Zincum, forma metallica donatum, minus agit. Sumsit *Cl. HELLOT* uncias tres olei vitrioli concentrati, diluit hoc anatica portione aquae purae, ac in miscela hac eadem drachmas sex, cum granis viginti Zinci solutas vidit. Fugata, per decursum binorum mensium humiditate superflua obtinuit demum massam vitriolicam molis minoris, diaphanam.

§. 1723.



§. 1723.

SOLVIT et uncias quatuor Zinci in unciiis sexdecim olei vitrioli, aqua pluvia debilitatis. Ex unciiis triginta sex solutionis hujus evocavit, mediante calore balnei arenae, uncias septemdecim phlegmatis; eodem ignis gradu unciam unam cum dimidia acidi vitriolici debilioris, seu spiritus vitrioli, qui tamen odore sulphureo nares ferire jam coepit. Cessavit tum a destillatione. Retortam furno reverberii denuo commisit. Sub initium odor ascendit hepatis sulphuris; finem versus intensior hic, et suffocans evasit. Elapsis binis horis in conspectum prodierunt vapores albicantes, uti sub rectificatione olei vitrioli adparere solent. Adposito alio excipulo obtinuit *Cl. Vir* uncias duas cum dimidia olei vitrioli adeo concentrati, ut guttae ejus paucae, oleo vitrioli debiliori in priori excipulo contento admistae strepitum excitarint, ac si ferrum candens foret inmissum: calor etiam tantus hic, uti, dum acidum vitriolicum concentratissimum aquae commiscetur, exortus fuit.

§. 1724.

CALCULO subducto phlegmatis in primo, ac olei vitrioli in secundo excipulo contenti patuit, uncias tres acidi meraci adhuc inhaerere massae salinae, albae, crystallinae, quae in retortae fundo remanserant. Massam hanc, per bihorium igni reverberatorio violentissimo exposuit tandem, donec retorta ipsa fundi demum inciperet. Vapor nullus prodiit; refrigerato adparatu, sequenti die invenit uncias sex, drachmasque totidem salis albi, sal sedativum forma vix non referens. Sal hoc ipsum sensum urentem in lingua excitat; cum aqua multum incalescit; humiditatem ex aëre paulatim adtrahit. Fundo retortae, qui ignis vim omnium maxime expertus fuerat, adhaesit crassa scabra, granulosa, pulchre rubra. Alcohol huic adfu-

adfusum elapsis binis diebus colore eleganter aureo tinctus fuit. Tinctura eadem altera vice additum alkohol non ultra notavit; tum et ex priori color novem elapsis diebus disparuit, quin praecipitatum ultimum valis fundum petierit; sapor tamen stypticus non recessit.

§. 1725.

SALIS paulo ante descripti unciam unam indidit phialae cylindricae, sub collo horizontaliter abscissae; vas una cum contento sale adcurate ponderatum, ac aëri, quin pluvia id subire posset, expositum fuit. Elapso trimestri decursu sexta fere sui parte pondere auctum fuit, ac massa contenta una circiter duodecima parte majus occupavit spatium.

§. 1726.

DUM per octo, decemve dies salis huic aciculari inhaeret alkohol sub digestionem, idem fere enascitur odor, qui sub praeparatione liquoris aetherei *probe-niani*, ac *grossiani* nares ferit. Quum vero partem acoris vitriolici recipiat, forma etiam salis mutatur nunc; in pulverem abit inpalpabilem, ac stypticitatem ex integro vix non deperdit.

§. 1727.

FLORES Zinci quod attinet, majorem paulo eorum, quam Zinci ipsius copiam solvi ab calchanti acido HELLÖT vidit. Caeterum florum, aequali ratione, uti Zinci ipsius ope concentrari acidum hoc ipsum valet. Haec *Hellötiana* circa solutionem Zinci in acido vitriolico tentamina.

§. 1728.

ADJECIT Cl. WALLERIUS, sub solutione Zinci in hoc acido nunquam non supernatare substantiam quamdam nigricantem; descendere hanc demum ad

Pars II. Sect. II.

B

fundum;



fundum; collectam, aqua multa elotam, ficcitam, inflammari, ac sulphuris vapore nares adficere. Enascitur scilicet hic, uti jam in aliis instantiis vidimus, sulphur ex unione principii phlogistici cum vitrioli acido. Sulphur autem hoc nullatenus in Zinco praefens prius erat, uti nonnulli, inflammationem Zinci in igne exposituri, absurde conceperant.

§. 1729.

SCIUNT quidem Chemici dudum, ait *CL. MONET* in *Traité de la dissolution des métaux* Zincum ab acido vitrioli bene solvi; attamen, sal ex solutione hac enascens difficillime in cryсталlos demum cogi posse non omnes adeo sciunt. Solutio haec, evaporationis ope, concentrari plurimum debet, refrigerat insuper citissime oportet; his tamen in auxilium vocatis licet encheiretibus cryсталli solum obtinentur aciculares; ac haud raro molliores, nec firmiter cohaerentes. Haec fors ratio fuit, quod *Goslariae*, ubi *vitriolum album* magna copia conficitur, solutio ad perfectam siccitatem deducatur; liquidum, ex quo cryсталli hae moles obtinentur, olei adinstar spissum est. *CL. PORT* in *diatribe de Zinco* monuit, adfuso spiritu vini rectificatissimo celeriolem reddi salis hujus ipsius cryсталlificationem. Quod evincit, ipsi *CL. PORT* notam fuisse difficultatem, qua sal hoc in formam cryсталlinam reducitur.

§. 1730.

ACIDUM vitriolicum non solum ab omnibus metallis, ac a ferro ipso, abscedit, ut cum Zinco uniat, sed terram ipsam aluminis relinquit eadem ex ratione; ebullitioni miscelam limaturae Zinci, ac aluminis exposui, acidum vitriolicum a terra aluminis recessit, et cum Zinco in vitriolum album coivit.

Decom-

Decompositionem hanc singularem *Cl. POTT* omnium primus observavit. *)

§. 1731.

SUBSTANTIAE nonnullae metallicae Zinco heterogeneae adhaerentes, v. c. ferrum, et cuprum in errorem varios induxerunt. Substantiae hae, quae in dissolutione Zinci ad fundum semper ruunt, seduxerunt quosdam, ut, illas essentielles semimetallicae hujus substantiae partes crederent. Dictum hinc fuit, solutiones hujus corporis nunquam non coloratas esse; verumtamen, dum Zincum purum est, albisimae (*hyalinae*) potius solutiones enascuntur.

§. 1732.


Quum et solutio Zinci medium subpeditet, Zincum ab adhaerentibus partibus metallicis aliis privandi, acidis omnibus metallicum hocce corpus reliquis metallis, abs exceptione, praeferentibus, reduci debent calces Zinci, ex depuratis solutionibus obtentae, ut semimetallum hoc omnium purissimum adquiratur.

B 2

§. 1733.

*) SOLUTIO Aluminis, *Cl. POTT* ait, cum Zinco digesta, praecipitat terram aluminosam, ejusque loco Zincum in sui consortium recipiendo format vitriolum Zincinum sapore perquam adstringente; mirandum utique est, Zincum ipsam hanc aluminis terram praecipitare, adeoque ipsa solubilius esse.

TERRAE vero hujus peculiaris inquisitio *Cl. MARGGRAFFIO* reservata, nec *Cl. POTT* probe nota adhuc ea fuit. Inquiri, nunc citato textui subdit, simul potest differentia praecipitatae hujus terrae ab ea, quae cum sale alkalino praecipitatur, ratione variationis colorum, et pigmentorum, cujus basin ea plerumque constituere solet.



§. 1733.

FIGURA crystallorum vitrioli Zinci, aliaque ad illud spectantia in *capite de vitriolo* exposita habentur.

§. 1734.

ACIDUM *nitri* vivacissime in Zincum irruit, calor simul enascitur sat vehemens. *Cl. POTT* observavit, medium sui ponderis de Zinco recipere posse acidum hocce. Ebullitio illa sub initium major, quam quidem ad finem vergente magis solutione est. ut solutio obtineatur cito, nec jactura nimia fiat vaporum rubrorum, acidum nitrosum, ex miscela partis unius nitri depurati, partiumque sex argillae paratum diluendum dixit *Cl. HELLOT* anatica, ratione ad pondus habita, dosi aquae destillatae. Aquae sic paratae fortis unciae sex binis horis nondum elapsis solverunt uncias sex, drachmasque quinque cum dimidia Zinci in minores moleculas confracti. Acidum hoc, ait Zincum ex integro resolvit; et, si materies nigricans ad fundum fors descendat, concussu laticis, totum perfecte solvitur.

§. 1735.

IMPOSUIT *HELLOT* retortum vas, solutionem continens, igni leniori arenae, phlegma fugaturus. Transferunt hujus unciae quatuor in excipulum. Mutavit hoc; intra trium horarum spatium sex drachmae solum acidi nitrosi debilioris transferunt. Pars vero acidissima intra Zinci soluti compages concentrata fuit, ac in massam, fundo adhaerentem concretit diaphanam, tenacem, colore aurantis donatam. Subiecta igni reverberii retorta, adscendentes intra horam dimidiam vidit vapores ruberrimos tanta copia, ut metus rupturae vasorum instaret, nisi illico ignes fuisset subflaminatus. Altera die eadem vaporum, uti sub destillatione ipsa movebatur in vase copia.

Exci-

Excipulum vero minus unciam unam cum dimidia acidi nitrosi continuit; pulcherrimo virente colore, smaragdi adinstar oculos acidum hocce ferit. Vapores intra octo dies non evanuerunt.

§. 1736.

RETORTAE prius dictae collo applicuit excipulum aliud, aquam vulgarem continens. Ascendit illico ex retorta, frigida licet adhucdum, densa vaporum rubrorum columna. Situm haec, aquam versus, retinuit perpendicularem, quaecunque foret positio colli retortae versus eandem superficiem. Spectaculum hoc per horam fere integram duravit: tum vero vapores cessarunt. Adplicato intermedio tubo longiori vitreo intra collum retortae, novumque excipulum, distillationem, igne leniori denuo incepit. Intra quatuor horarum decursum drachmae novem acidi nitrosi prodierunt. Aqua licet remistum eleganter tamen vix non adeo fuit, uti drachma prius obtenta cum dimidia, aquam non continens. Infudit acidum hoc omne in lagenam vitream HELLOT, eamque epistomio, cerae liquefactae inmerso, ex subere secto, munivit. Hoc tamen non obstante color viridis, elapsis triginta horis avolavit, et residuum flavicans solum adparuit. Conservari autem viridis color laticis poterit in vase hermetice clauso, vel et epistomio solum vitreo probe clauso. Laevis orificii, ac epistomii superficies consulto destructa, ut eo firmitus claudant invicem, ab acidis vaporibus, perpetua circulatione ascendentibus mox adroditur, ac epistomium una cum orificio vasis ita conferruminatur, ut volatilibus vaporibus exitus omnis praecludatur. Abs coloris mutatione per annos binos spiritum hunc adservavit HELLOT.



§. 1737.

FLORES Zinci in acido nitroso aequali copia aquae, ratione ad pondus sumata, diluto, mox etiam disparuerunt. Unciae sex florum cum granis triginta quatuor solutae fuerunt ab unciis sex acidi nitrosi, dicta ratione aqua debilitati. Solutione hac destillationi ex balneo arenae exposita, uncias quatuor phlegmatis vix non insipidi dimisit; igne reverberii extortae fuerunt unciae novem cum dimidia acidi, colore virenti antea descripto aliquantum cedentis. Acidum reliquum, uti in altero experimento per juncturas vasorum dissipatum fuit: pars alia concentrata inhaesit massae subterrestri, fundo retortae incumbentis, a qua, sub finem destillationis, vas in sexcenta fragmina disiectum fuit. Vasorum rupturam, ac dislosionem evitasse, omni licet cautela adhibita sese nunquam potuisse, dum acidum nitrosum cum Zinco remistum tractaretur, Cl. HELLOT observavit.

§. 1738.

MASSA vero ipsae, nunc dictae terrae crassiori tripolitanae forma similis erat. Superficie donabatur scabra, tuberculosa. Aëris humiditatem in se non rapiebat, nec eminentiori adiciebat linguam sapore. Sperabat Cl. HELLOT, obtenturum se ex massa hac phosphorum Balduini; calcinationi hinc eandem exposuit, igne intensiori, follibus aucto, usus. Nec tamen mutata fuit in superficie textura, nec colore, nec in obscuro lucem ullam sparsit.

§. 1739.

SOLUTIONEM Zinci in acido nitroso, meraciorem imprimis, non limpidam, sed olei adinstar spissam esse, mediante hac solutione facile detegi, an Zinco ferrum admistum sit, quum illico sub forma croci hoc

hoc metallum excutatur, ac filtro inhaereat, per quod solutio haec ipsa mittitur, *Cl. MONNET* observat.

§. 1740.

SOLUTIO Zinci in acido nitroso, maximam partem abacta tenuiori parte ac subsequo citissimo refrigerio, massam Auctori nunc citato largita fuit albam, molliorem, foliaceam, seu tenuissimis lamellis compositam. Adtraxit haec humiditatem ex aëre vehementer adeo, ut in liquamen illico verteretur, ac olei adinstar diffunderet. Saporem in lingua excitavit validiorem acerrimum. Igne, butyri adinstar funditur. Abacta aqua crystallisationis, jucundo fatis spectaculo fulminat, flammamque spargit lucidam, eadem vix non ratione, uti limatura Zinci cum nitro detonans. Manifestius hoc conspicitur, injecto carbonibus ardentibus, aut una cum carbonum pulvere remisto, ac in crucibulo ignis actioni exposito sale hoc eodem siccato. Remanet calx Zinci flavescens, refractaria maxime, et aegerrime reducenda in formam metallicam.

§. 1741.

VIDETUR ex his, non recto insistere talo observationem *KUNCKELII*, adferentis, Zincum in aqua forti solutum formare virides crystallos pulchriores cupro ipso; nam Zineum, uti statim patuit, vix in crystallos cogitur, acido nitri solutum; ac, si demum eogatur, crystalli virides non sunt: sed et ipsum cuprum, acido hoc eodem solutum, difficillime crystallifari, antea, in *capite de CUPRO*, dixi: ut adeo, de quamam Zinci specie, de quamam aqua forti *KUNCKELIUS* loquutus fuerit, non adpareat.



§. 1742.

OBSERVAVIT STAHLIUS, aquam fortem non tam largos, nec adeo subtiles vapores rubros cum Zinco, quam quidem cum Marte spargere; phaenomenon hoc ipsum a majori adtractione, et inhibitione terrae alkalinae dependere, ratione non adaequatissima Cl. POTT pronuntiavit.

§. 1743.

Nunc ad phaenomena, quae Zincum, *acido salis communis* objectum, exhibet. Unciae tres acidi muriatici in tentaminibus Cl. HELLOT ad perfectam sui saturationem receperunt drachmas tres, minus duobus granis Zinci comminuti. Destillatione solutionis instituta vapores adscenderunt calidi adeo, ut collum retortae fissum exin fuerit. Materies nigra, spongiosa, tenuis ex hoc acido, ac ex acido acetii remanet. In aliam dein retortam solutio indita, ac massa non soluta separata, aqua elota fuit. Siccata colorem schisti lapidis exhibuit. Auro et argento adfricta nullum dedit mercurii indicium, etsi Auctores nonnulli mercurium in ea latitantem suspicati fuerint: tum et levitate sua substantiae ponderosissimae absentiam indicat. Flammae candelae pars objecta calcinata fuit abs inflammatione. Carbonibus ardentibus inposita pariter calcinata; in formam autem metallicam nil omnino restituitur; ab acore vitriolico, et nitroso probe referatur.

§. 1744.

SOLUTIONEM demum decantatam, limpidam igne per gradus aucto destillationi subiecit: obtinuit inde primum binas uncias phlegmatis insipidi, tum vero drachmas duas acidi muriatici debilioris, grate olentis, fornici retortae flores in sublime aëli adhaeserunt. Excipulo tertium mutato adquisivit guttas septem-



septemdecim acidi muriatici colore aureo donati, omnium acerrimi. Distingui poterant guttae hae ab acido priori excipulo excepto, coloratae enim erant, ac vaporum sub forma in sublime rapiebantur. Sequenti die reperit parti superiori retortae adhaerens sublimatum densum, albicans, in colorem citreum nonnihil tendens: fundum vasis obsedit massa gummosa, tenax, nigricans. Retorta haec ipsa in igne reverberii candescentiae exposita, sublimati aucta fuit copia. Tanta tamen ignis vis vaporum nil prorsum ex retorta pepulit. Refrigerato adparatu, retortam disscidit, ac superiorem partem tectam vidit specie vernicis diaphanae, venis opacis, albidis distinctae; incrustatio haec in aëre libero humida mox facta fuit. Fundo incubuit materies crassior, nigricans, subvitreæ, borracis vitrum aemulans, aquam atmosphaericam pariter in sese rapiens. Vaporem cuncta spargebant sulphureum, vehementiorem, suffocantem. Fragminibus retortae cunctis aëri expositis, vernix illa, et massa fundo adnata solvebantur deliquescentia: liquamen per filtrum misit, huic vero materies albicans inhaesit; elota haec siccata, microscopio examinata flores Zinci subtilissimos exhibuit.

§. 1745.

LIQUIDUM autem, per filtrum actum odorem sparsit ingratissimum, ac stypticitate maxima praeditum fuit. Sex mensium spatio elapso fundum demum petiit pulvis rubicundus, ac stypticus tum simul sapor minutus nonnihil videbatur.

§. 1746.

SOLVIT praeterea *Cl. HELLOT* in unciis tribus acidi muriatici sensim drachmas tres, granaque quinquaginta octo florum Zinci. Solutio cito, ac sine ebullitione peracta fuit. Fundo vasis incubuit mate-



ries nigra, ponderosa; ut penitus dissolveretur, digestionem exigens.

§. 1747.

DESTILLATIO ex balneo arenae duas fere uncias phlegmatis, drachmas quatuor acidi debilissimi extorsit. Interrupta fuit destillatio defectu caloris requisiti: soluti flores massam exhibuerunt rubram, gummosam. Inferior massae hujus pars, per ipsos retortae parietes spectata, Stellam sex radiis donatam, satis regularem exhibuit. Vidit stellam hanc fundo adhaerentem *Cl. HELLOT* semper, dum acidum salis florum Zinci ope concentraret.

§. 1748.

RETORTAM igne reverberii, ne rimas ageret, caute exposuit; ex candente demum prodierunt guttae viginti octo acidi fortissimi, flavi. Candescencia ad summum deducta, proruperunt vapores albi, densi, flores in collo retortae, ac in excipulo adfixos abripietes. Adscendit dein sublimatio florum sub forma butyri citrini: eodemque tempore materies rubra collum, fornicemque excipuli obduxit. Fundo adhaesit massa minor, rubicunda, foraminulis innumeris per totam substantiam penetrantibus undique pertusa. Oram extimam obsidebant moleculae, parvae, splendentes, microscopio examinatae scobem cornu albam exhibentes. Butyrum illud, calens adhuc drachmas tres cum dimidia adpendit. Aëri libero expositum intensius fumat, ac humiditatem atmosphaericam in sese rapit. Massa rubra grana duodecim aequavit.

§. 1749.

DIVERSITAS hic intercessit quaedam inter examen florum Zinci, ac ipsius Zinci, forma metallica donati:

nati: sub solutione Zinci effervescencia valida; sub solutione florum vix ulla: acidi muriatici concentratissimi undecim guttis major ex floribus Zinci, quam ex Zineo ipso, acido salis resolutis prodiit copia: sub examine florum Zinci butyrum in collum retortae ascendit; Zincum ipsum massam, vitream fere, fundo adnatam dedit; etsi idem ubique ignis gradus foret observatus: residuum demum rubrum Zincum, forma metallica donatum, largitum non fuit.

§. 1750.

ADFUDIT omnium ultimo butyro, paulo ante dicto, Zinci, antequam humiditatem ex aëre adtraxisset, portionem quamdam olei vitrioli *Cl. HELLOT*: q in ignis ulla accessisset actio, effervescencia violenta fuit enata: acidum salis hac ratione obtinuit meracissimum: omne autem inhaerens expulit, admota retortae fundo lampade, elychnio unico instructa. Acor vitrioli Zincum in sese rapuit, expulso, cui prius unitum illud fuerat, acido muriatico: enatum sic fuit sal metallicum, a vero vitriolo Zinci, seu vitriolo albo, aut goslariensi, antea descripto, vix distinctum.

§. 1751.

CIRCA solutionem Zinci, huiusque florum ab acore muriatico *Cl. POTT* sequentia adnotavit. Acidum salis, ait, longe vehementius (quam acetum) Zincum odoritur colore aquoso, et odore ovorum quasi putridorum, in quo cum spiritu vitrioli convenit, cum separatione floccorum nigrorum, solutionem si destilles, phlegma praecedat, et pro concentratione spiritus salis obtinendo solutio concentrata fortiori igne transpellenda est; quod jam *GLAUBERUS* monstravit: si vero concentrata solutio cum spiritu vini, praecipue oleosiore, digeratur, tum separatur oleum,
ut



ut supernatet. Flores Zinci itidem solvuntur in spiritu salis, colore paulum ad rubedinem inclinante, sed abstractione tantum flavescit. Zincum cum quarta parte mercurii sublimati mistum largitur spiritum salis inpetuose fumantem; cum binis partibus mercurii sublimati format butyrum; cum tribus partibus mercurii sublimati mistum etiam effervesceere solet, si iuste adplicetur. Sic quoque cum butyro antimonii, joviali, vel auripigmentali posteriores subtilisationes cum ipso institui possunt. Addidit *Cl. POTT* his in *Dissertatione de Zinco* expositis, in *Dissertatione de sale communi* inter alia adhuc ea quae sequuntur: quodsi Zincum misceatur cum duplo mercurii sublimati, et destillationi subjiciatur, tum ascendit aliquid mercurii sublimati albi; residuum vero cum Zinco fluens ebullit, reagit, et transit spissis albisque fumis, qui mox in formam siccam coalescunt; quidquid griseum est, butyrum Zinci praebet, remanet autem reliquum Zincum in pristina metallica forma satis splendida; sed butyrum gryseum in aëre deliquescit.

§. 1752.

IN *aqua regia* Zincum, eodem *Cl. POTT* teste, vehementissime ebullit, et solutionem flavam constituit, quae etiam quodammodo ad consistentiam gelatinosam inclinat, sed paucis aquae regiae guttis adfusus denuo limpida fit; interim elapso aliquot tempore omnis flavedo evanescit, et pleraque pars Zinci, in pulverem calcinata ad fundum secedit. Actionem aquae regiae in Zincum *Cl. BAUME* denuo non novit; quum, ignotam eam adhuc esse, dixerit.

§. 1753.

Acidum aceti Zinco resolvendo aptum natum non minus est: en *Hellotianum* circa solutionem hanc, et phaenomena eam concomitantia tentamen.

UNCIAE

UNCIAE octo aceti vini destillati solverunt intra decem dies, accedente simul digestionē, unciam unam, minus decem granis Zinci, elapso hoc temporis decursu illud non ultra adfecerunt. Acetum dulce exin, fere uti a plumbo factum fuit, fere inquam, ait nunc citatus Auctor, gustare enim solutionem hanc nolui, quum *Cl. GROSSE* mihi retulerit, non impune eam in ore retineri; ac, si tantillum deglutiat, nauseas, vomitus, ac diarrhoeam saepevis doloribus junctam, saepius nasci, uti ipse, ac avunculus ejus experti in proprio corpore fuerant.

§. 1754.

DESTILLATIONE lenta uncias sex, drachmasque binas phlegmatis meri, aut acidum saltem manifestius non vehentis obtinuit. Igne aucto striae in alambico adparuerunt; mutavit tum excipulum. Expulso laticē spirituosō, quod striae venturum praedixerant, florum alborum, subtilium elevatum fuit sublimatum. Excipiebant hoc vapores albidi, in alambico condensandi in guttulas olei primum flavicantis, deum viridis. Finita destillatione in excipulo collectae haerebant drachmae quatuor fere laticis odore sulphureo suffocante donati, alkoholē adinstar inflammabilis. Inclusit hunc *HELLOT* phialae cylindricae, ad tres quartas partes aqua repletae. Innatavit sub initium aquae: subiit dein hanc ipsam, alkoholē in morem; ac guttae tres non nisi olei rubentis, aromatici summa tenuerunt; quod quidem oleum pro genuino olei Zinci *Cl. HOMBERGIUS* olim venditavit. Flores durante destillatione sublimati flammam spargunt, candelae ardenti objecti, eleganter coerulescentem. Sublimatum illud ipsum alkoholē nonnisi resolvitur. Colorem ei primum conciliat opalinum, tum, mucī adinstar, fundum petit. Microscopio examinatus mucus hiece flores minimos Zinci sistit, par-



tis inflammabilis, in aceto latitantis ope in sublime
evehctos.

§. 1755.

INMISIT aequali portioni aceti vini flores Zinci
Cl. Vir; soluti sic fuerunt flores minus uncia una
cum quibusdam granis intra sex dierum decursum.
Destillatio laticem inflammabilem, oleosum, uti in
priori operatione, minorem vero florum copiam ex-
tricavit.

§. 1756.

CAPUT mortuum ex utroque tentamine remanet
colore cinereo pictum. Largitur oleum a prius de-
scripto diversum denuo. Hunc in finem adfundatur
eidem phlegma acidum, destillationum ope obten-
tum, miscela per octo, decemve dies digestionem ex-
ponatur, decanteretur, tum filtraretur, ac ad siccitatem
usque destillationi subjiciatur: remanebit, fundo cu-
curbitae adhaerescens, materies subresinosa, quae
tollitur debet; donec, repetita extractione ope ejusdem
destillatione obtenti liquoris, copia resinae sufficiens
collecta sit. Inmittitur tum retortae minori, eaque
ad candescentiam usque igni per gradus aucto subji-
citur. Prodit sic parcius liquidum sulphureum, flavi-
cans, stipatum vapore albo, densoque. Operatio to-
ta finita est, dum pristina in excipulo redit limpidi-
tas. Habetur demum in excipulo liquidum flave-
scens, de quo paulo ante dictum fuit, quin olei ul-
lum simul adpareat vestigium. Evocatum hoc supra
pulverem album, excipuli illi parti adfixum, quae,
durante operatione sub collo retortae haeserat, pulve-
rem hunc illico solvit, ac olei sic simul rubentis gut-
tulae in conspectum prodeunt. Penicilli apicem oleo
hoc madefecit *HELLOT*, tumque lineas duxit in auri,
argentique lamellis. Elapsis horis viginti quatuor
partem

partem linea obductam in auro aequae ac in argento solutam vidit.

§. 1757.

ZINCI indici unciam semis *Cl. WESTENDORF* cum aceti concentrati uncis duabus solvendum exposuit. Actio aceti in Zincum admodum erat valida; cum motu insigni, atque calore odoreque ab initio odorem hepatis sulphuris referente, paulo post vero evanescente. Motus quum erat validissimus, vapores surgentes flamma admota ardebant, flammamque reddebant coeruleam. Misto, quod post unam horam in coagulum crystallinum abierat, unciae duae aquae communis adhuc adfundeantur; quo facto solutio denuo procedebat. Post horas octo Zincum perfecte erat solutum, praeter flocculos quosdam nigros, liquido limpidio innatantes, solutio filtrata post aliquot horas crystallos exhibebat oblongas pulcherrimas, quoad figuram cum crystallis nitri convenientes, sapore austeras, atque adstringentes. Liquor a crystallisatione residuus ulteriorem denegabat crystallisationem, licet ad syrupi consistentiam usque redactus. Dum vero per aliquot dies in quiete relictum vitrum in manus sumeret *Cl. WESTENDORF*, visurus, an crystalli generatae essent, protinus, sub levi hoc motu vitri calorem sensit in liquore successive ortum, atque sic sensim auctum; simul vero crystalli formabantur minimae stellatae, magis magisque adcrecentes; brevi tempore liquidum omne in solidum, ac crystallinum coagulum abiit.

§. 1758.

SOLUTIO vero (ait) crystallorum Zinci *) in aqua sequentia cum reagentibus exhibuit phaenomena.

Syrupus

*) MALUI haec conjunctim hic exhibere, quam sub titulo praecipitationum, aut succedaneorum sparsim enarrare.



Syrupus violarum viridem inde nanciscebatur colorem. Oleum tartari per deliquium ex solutione valde diluta terram praecipitabat albam; talem quoque lixivium sanguinis praebibat, addito acido minerali in colorem coeruleum mutabilem. Alkali volatile calcem albam extrudebat, quae vero statim denuo solvebatur. Memoratu dignum est, hanc miscelam postmodum per alkali fixum non praecipitari; quod de solutione Zinci jam adnotavit *Celeberrimus* POTT. Quod autem hoc in casu alkali fixum praestare nequit, illud, facili negotio, a lixivio sanguinis efficitur. Sal commune, nitrum, tartarus vitriolatus, eorumque acida solutionem dictam minime turbant. Solutio auri in aqua regis ab initio non turbatur; elapso vero aliquo tempore subcoeruleum induit colorem, aurumque colore puniceo praecipitatur. Eundem effectum alias acetum concentratum per se quoque exferit. Argentum ex spiritu nitri sub calcis albae forma praecipitatur; idem accidit cum solutione argenti in aceto. Solutio Zinci in spiritu nitri eundem cum solutionibus argenti effectum producit. Mercurius ex spiritu nitri in crystallos nitidissimas, colore margaritarum praecipitatur. Mercurii sublimati solutio inmutata remanet; uti et solutio vitrioli coerulei. Stannum ex omnibus solutionibus, scilicet ex aqua regis, spiritu salis, et aceto praecipitatur. Marcassita ex solutione per spiritum nitri facta sub forma exilium crystallosum albarum splendentium fundum petit; verum, ut talis praecipitatio succedat, certa requiritur liquidorum dilutio. Cum alumine nulla efficitur turbatio, quae tamen fit ab aqua calcis vivae, modica tantum praecipitatione insequente. Infusum gallarum turcicarum statim praecipitationem albam producit.

§. 1759.

ZINCI crystallorum cum aceto praeparatarum drachmae tres, destillationi in retorta vitrea commissae, ab initio quasdam aceti puri guttulas dimittebant; liquor postea transcendit pondere drachmae semis circiter, magis magisque dulcescens, atque empyrevma parum olens; eodem tempore sublimati quidquam sub forma florum in collo retortae conspiciebatur; olei nulla obferebantur vestigia. Massa relicta, remotis floribus ex collo retortae, et fortiori ignis gradu ad candescentiam retortae adhibito, quasdam Zinci particulas metallicas sublimatas praebuit. Residuum carbonem levem largiens pondere acquavit grana viginti quinque. Zinci reducti pondus erat granorum triginta sex, sublimati albi gran. sexdecim. Reliqua ponderis pars in abstracto liquore erat contenta, qui curatius examini subjectus, Zinci partem solutam secum traxisse conspiciebatur. Sublimatum salinum in aqua valde solubile erat, saporis admodum dulcis, parum adstringentis; deflagratione flammam hoc exhibuit subviridem.


§. 1760.

Ex miscela drachmarum duarum crystallorum Zinci, et drachmarum trium salis tartari siccissimi per triturationem, statim ortum est deliquium; mistum resiccatum in crucibulo igni expositum, acetum mox empyrevmaticum sive destructum dimisit, ignisque gradu aucto fustum flammulam coeruleam subinde eructavit. Crucibulo ab igne remoto, aërique per quaedam temporis momenta exposito, massa subito fortem volatilem urinosum odorem per dimidiam horam exhalavit. Massa dum aqua solvebatur, odor hic urinosus denuo parumper sensibus sese manifestavit. Liquor filtratus alkalinus maximam Zinci partem solutam, et phlogisto suo haud destitutam reti-

Pars II. Sect. II.

C

nuit,



nuit, quod praecipitationes variae, aliaque experimenta satis superque manifestarunt.

§. 1761.

SUBITANEA, Cl. WESTENDORF tentaminibus hisce subdit, volatilis urinofi salis generatio memoratu omnino digna est. Simile quid *celeberrimus* POTT in miscela Zinci cum nitro animadvertit. Utriusque effectus causa eadem esse, et a iusta substantiae phlogisticae Zinci cum alkali fixo combinatione repetenda videtur; ex hac enim certis sub modificationibus atque circumstantiis nondum satis cognitis sal volatile generari, manifestum est. Quod vero odor hic volatilis tunc demum se exferat, quando per aliquod tempus materia aëri exponitur, aut quando illi aqua adfunditur, explicatu haud ita difficile videtur. Sal volatile quidem tunc demum haud generatur, quando materia ab igne remota est; sed igne jam natum est, verum absque humiditatis aquosae auxilio sese exferere non potuit. Cujus rei documentum destillationis spiritus salis ammoniaci cum calce viva exhibet. Etenim si recens calx, et adhuc ignita adhibeatur, et sal ammoniacum prorsus fuerit exsiccatum, ex miscela ambarum substantiarum, nisi aquam adjeceris, destillationis ope ne vestigium quidem salis volatilis obtinetur. *)

§. 1762.

*) JUNGAM hic et reliqua, etsi quidem ad *caput de ZINCO* proprie non pertineant. Quo, addit AUCTOR paulo ante citatus, generationi salis volatilis uberio-rem lucem adfunderem, cum Chemiae curiosis aliud quoddam experimentum nuper a me institutum communicabo. Haud raro accidere constat, quod lixivium sanguinis sub praeparatione odorem alkalinum volatilem spargat. Quum vero nuper illud

lixivi-

§. 1762.

Cl. MONNET maximam partem Auctorum, qui solutionem Zinci in acido aceroso descripserunt, non optime descripsisse phaenomena monuit, quae circa solutionem hanc eandem veniunt notanda; quin videri legenti relata illorum, omnibus notam minus fuisse solutionem totam. Fufius quidem, prae reliquis, spartam hanc examinatam fuisse a *Cl. PORT*,
er

lixivium parare vellem, praeparationem vero in diem sequentem differrem, ecce! odor iste jam in materia sicca calcinata percipiebatur. Tum ergo materiae retortae commillae pauxillum aquae adfudi, atque humiditatem forti ignis gradu prolicui; quacum sal volatile causticum nunc prodibat. Is spiritus urinosus de materie tingente quidpiam secum traxerat, efficiebatque praecipitationem coeruleam, aequae ac lixivium sanguinis ordinarium. Residuum denuo calcinavi; quumque altero die solutionem instituire vellem, eundem ac prima vice odorem volatilem percepi; separavi volatile juxta methodum praecedentem, denuoque calcinavi residuum; et haec quoque operatione iterum sal volatile fuit generatum atque separatum. Eandem operationem quinque repetii, et quavis vice denuo sal volatile adquisivi. Quoniam versus finem materia valde erat diminuta, ex ea denique lixivium paravi, remanente ultra dimidium terra nigra; inde natum sal inspissatum, atque calcinatum aucto ignis gradu diffuxit cum pelluciditate, refrigeratum vero aliquanto lacteum erat. Id sal quosdam salis urinae fusibilis effectus praestat; naturae alkalinae plane ablimile est, et indolem acidam ostendit; carboni ardenti inpositum in vitrum abit, quod aëre colorem lacteum adquiret, atque tandem deliquescit.



et HELLOR, utrosque tamen reprehensionum non esse immunes, quas *Cl. MONNET* modo proposuit.

§. 1763.

SUMSIT nunc citatus Auctor limaturam Zinci purissimam, inmisit matraccio chemico, superadfudit acidum aceti concentratum ad quatuor circiter digitorum eminentiam; intacta sub initium mansit substantia semimetallica, solutio tamen manifeste incepit admodum calore. Pauciori elapso temporis intervallo limatura

OMNEM spiritum alkalino-volatilem, quo magis concentratum haberem, lenissimo igne rectificavi; qui inde summe volatilis atque causticus factus, quoad tingendi facultatem lixivio sanguinis plane erat similis. Residuum phlegmaticum, suo volatili sale privatum, saporis erat lixiviosi, itidemque qualitate tingendi praeditum; acido vitriolico saturatum parvas oblongas, sili mirabili similes, crystallos exhibens. Omnino adtentione dignum est, quod mediante phlogisto salis alkalini fixi unciae sex ita sint volatilifatae, ut vix dimidia ejus uncia fuerit relicta, quae quoque aliam plane naturam induit. Adparet quoque, alkali volatile posse forti ignis gradu salis lixiviosi parum inmutatum secum trahere, quod postea, leniori gradu, iterum derelinquit. Supra memorata residua terra nigra intensissimum requirebat ignem, quo nigredinem suam exueret, rubraque fieret; sub examine deinceps eam calcaream, aluminosam, atque martialem deprehendi. Ex solo sanguine prognata censeretur non potest; alkali destructi terra procul dubio partem ejus aliquam constituit. Tametsi ergo jam diu apud nos celebratum fuerit sanguinis lixivium; ipsius tamen qualitates singulares, quas nunc in aprium deduxi, haecenus obscurae atque occultatae manserunt.

tura tota ex integro soluta fuit. Solutionem filtravit *Cl. VIR*; alba haec erat, visuque homogenea, nec sedimentum ullum ochraceum dimisit, quum Zincum purissimum, ac ab omni ferro immune foret. Gustu dotata fuit subacerbo, acetoso. Evaporationi, balnei arenae ope, exposita in capsula vitrea fuit: obtinuit demum *Cl. MONNET* sal album, diaphanum, ac in crystallos concretum figura diversa praeditas. Crystallos ad marginem capsulae magis accedentes lamellas referebant, complanatas, striatas; quae occupabant medium, minores multo, scabrae, ac inaequales, utraeque vero friabiles erant, ac in pulverem tritae talcofae quasi tactu deprehendebantur, colorem vero margaritaceum fere, seu intense minus albertem referebant. Sal nunc descriptum humiditatem ex aëre non adtrahit, ac forma solida incorruptum persistit; carbonibus ardentibus injectum sub initium nonnihil detonat, et flammam exiguam lucidam, subcoeruleascentem spargit; tum vero funditur, acidum dimittit in auras, ac in calcem abit eleganter flavicantem. In alkohole tepesfacto facile dissolvitur; partim vero, solutione hac eadem, decomponitur, Zincum scilicet, sub forma calcis albæ partim dimittit; alcohol etiam album et turbidum, pro ratione diversa solutionis, magis evadit. Calcem Zinci separavit, filtrationis ope, *Cl. MONNET*, factio hoc solutio limpidissima, et colore aliquantum succineo donata cernebatur. Admoto igne parietibus vasis interne ac externe, copia major fiorum elegantium albißimorum (*argentines*,) forma crystallina donatorum adcrevit: in acidis flores hi erant solubiles.

§. 1764.

EBULLITIONI exposuit *Cl. MONNET* limaturam Zinci, ac tartari cremorem cum sufficienti quantitate aquae; actionem tartari manifestam in Zincum exor-



tam fuisse conspexit, odor simul metallicus, Zinco in specie proprius, sub ipsa solutione hac adscendens, nares feriit. Elapsa hora circiter liquidum fiebat turbidum, et sedimentum album copiosum ad fundum descendit. Praecipitatum hoc videbatur *Cl. VIRO* compositum crystallulis minimis tartari, Zinci tantilla parte onustis. Liquido, colore eleganter citreo donato, trans filtrum misso, evaporationi in balneo arenae exposito, enascebantur in superficie crystalluli tenuissimae, parti plumularum brevissimarum barbatae satis similes. Decantationis ope a liquido separavit crystallulos has; colore flavicante donatas, ac aegerrime solubiles eas nunc deprehendit. In lingua saporem sensibilem magis non excitabant, quod quidem ex solubilitate difficiliore conjici praevidere poterat. Protraxit evaporationem diutius, atque tum observavit, crystallos dictas mediante solum enasci calore. Remoto enim ab igne vase, et liquido refrigerationi citae exposito non enascebantur diversae a prioribus. Remansit sub finem species lixivii matris, in crystallos jam non amplius coiens. Habuit hoc *Cl. MONNET* pro specie salis febrifugi Sylvii, quale etiam sub crystallificatione solutionis ferri ope tartari. Ebullitioni demum exposuit sal prius descriptum una cum limatura ferri, atque sic, decomposito illo, Zincum ad fundum dejectum fuit; quum salia metallica omnia, quae ex unione substantiarum metallicarum cum tartaro exsurgunt, decomponentur, dum una cum limatura ferri decoctioni fuerint exposita.

§. 1765.

ZINCUM cum sale ammoniaco mistum, et sublimationi expositum, observante *Cl. POTT* largitur spiritum urinosum satis penetrantem, terras imitans calcareas; elewantur dein flores pauci flavicantes; massa remanet in aëre deliquescent, quae caustica ad
instar

instar salis ammoniaci fixi, solutionem Zinci in acido salis sistit; simul vero pars Zinci quaedam in massam reducitur, imperfecte malleabilem. Qui sub CLEANDRI, subjungit, nomine latere voluit D. Franc. CLINGIUS in *tractatu de peste* de hac miscela sequens adfert experimentum. Si duae unciae Zinci limati misceantur cum uncia semis salis ammoniaci in pulverem redacti, et inponantur dein patellae vitreae, eique adfundatur aqua ad eminentiam digiti transversi minoris, circumagitur, et postea resideant, ita sensim Zincum aquam inbibere, intumescere, imo fermentare, adscendentibus et subsidentibus bullulis; aqua hac absorpta novam adfundendam ad usque eminentiam sulmi straminei, vel cultri, idque repetendum aliquoties, demum mediocriter ficcandum, ut tamen adhuc madescat, & ligno conmovendum: tum demum ita incalescere, ut spissus fumus adscendat; conmotionem hanc esse repetendam, donec non amplius fumet; ita Zincum instar pulveris mortui remansurum esse. Instituto tamen examine, bullulae quidem adparuerunt continuo adscendentes, et subsidentes, quod etiam cum pura aqua quodammodo contingit, Zincumque multum intumuit, et superficialiter albo colore, a levi adrosione investitur, sed incalescentia illa una cum fumo adparere noluit; interim, subdit, Zincum notabiliter immutatum fuisse ex eo adparet, quod carbonibus vivis injectum non amplius inflammetur, sed fumum acidum eructet, et in calcem flavam convertatur; solutio salis ammoniaci aqua abluta oppido perparum solvit de Zinco, quod praecipitatio testatur, destillationi vero subjectum spiritum urinosum largitur. Circa relationem Zinci ad sal ammoniacum legi etiam potest examen Cl. MANGOLD, et Cl. HENCKEL *adnotationes in librum RESURI*.



§. 1766.

REMISCVIT *Cl. HELL*OT uncias quatuor florum Zinci cum uncis binis ammoniaci salis, miscelam destillationi exposuit, igne usus per gradus eatenus intenso, ut retorta sub finem candesceret. Adparatu soluto drachmas quinque invenit spiritus volatilis, penetrantissimi. Colore spiritus hic donatus fuit albente, seu subopalino, quum partem quamdam florum Zinci teneret solutam. Fornici vasis excipientis stratum adhaesit tenuius volatilis salis forma sicca praediti. Adfudit sali huic spiritum antea descriptum, obtinuit drachmam unam cum paucis granis florum ex collo retortae; aqua solutis his, ac per filtrum missa solutione inhaeserunt chartae emporeticae veri Zinci flores; solutione evaporationi exposita, crystallisatio exorta fuit acicularis, antimonio fere similis. Locum insertionis colli in ventrem retortae obsidebat sublimatum sal ammoniacum; firmiori, tenaciori, textura, tum et colore sordido magis donabatur hoc, quam alterum, ipsum collum occupans. Massa fundum retortae occupans dura erat, densa, fere vitrea, ac eatenus caustica, ut in admota vix lingua bulla exorta illico fuerit. Rogavit *Cl. Auctor* *Cl. MORAND*; ut tentamina cum materie hac instituere vellet, eaque caustici vulgaris loco uti; scopo optime fatisfecit.

§. 1767.

PARTEM massae hujus ejusdem *Cl. HELL*OT in crucibulo igni exposuit folium ope animato; quum magna adhuc salis ammoniaci pars remaneret, odor urinosus sub initium prodit; sequutus tum fuit vapor densus, crocum grate redolens, quem quidem odorem acidum muriaticum, substantiae cuidam metallicaee junctum, exhalare nunquam non solet. Abacto
sic

fic acido muriatico omni massa remansit jam non amplius caustica, floribus Zinci in igne fixis composita.

§. 1768.

RELIQUA vero massae causticae prius descriptae portio in aere libero mox abiit in deliquium. Liquido exin orto, per filtrum misso instillatis guttis paucis olei vitrioli, coagulum illico enascitur, uti fieri solet, dum acidum hoc ipsum oleo sic dicto calcis additur; vapores simul in altum elewantur acidi muriatici, odorem suboleosum spargentes. Magna tamen diversitas obtinet inter coagulum olei calcis, et coagulum olei hujus Zinci. Coagulum enim olei calcis in aqua frigida et calida non solvitur: Coagulum Zincinum, accessu aquae frigidae illico solvitur; diluto sic menstruo, aptoque reddito resolvendis floribus Zinci, coagulum producentibus. Oleum enim vitrioli concentratissimum flores Zinci non referat, uti prius jam, ubi de solutione florum horum in acido vitriolico sermo erat, adlatum fuit.

§. 1769.

COAGULUM sic resolutum vitro immisit *CL. HELLOT*; ortae fuerunt crystalli aciculares, accedentes ferre crystallis in alio vase enatis ex miscela guttarum paucarum olei vitrioli cum mercurio sublimato corrosivo.

§. 1770.

PROTRACTA sufficienter evaporatione coaguli, paulo ante dicta ratione denuo soluti, ortae fuerunt massulae coagulatae binae, coagulo primo colore alben- te, et densitate amaloga. Enata fuerunt in illis strata crySTALLINA angularia, sale aciculari, prius ena- to, non decomposito.



§. 1771.

PARTI alteri olei ante dicti Zinci adfusum fuit oleum tartari per deliquium. Odor ascendit urinosus, ac momento enatum coagulum album. Aqua haec non solvitur, quum praecipitato constet florum Zinci, acido muriatico cum sale alkalino coeunte.

§. 1772.

LIQUIDO inhaerente decantato, evaporationi exposito, coierunt crystalli cubicae salis muriatici regenerati (seu potius *Digestivi* SYLVII) lateribus planissimis.

§. 1773.

REFERAM nunc relationem Zinci ad *nitrum*, atque omnium primo referam tentamina, et animadversiones CL. POTT. Cum nitro, ait, miscendo sive hujus partem semis, sive una, sive duae vel tres partes adsumantur, et in tigillum candens, vel retortam tubulatam inmittatur, quin et in retorta simplici, simulac incandescere incipit, egregie detonat, qualis cum parte anatica, vix cum ullo alio corpore vehementior observatur, una cum dissectione materiae, si Zincum limatum adsumas; minor vero una cum diuturniore flagratione, si plus nitri, et quidem fluenti Zinco injiciatur, aut si in vase retorto tubulato operatio instituatur; dat spiritum clyssiiformem subtilem una cum floribus, restans nitrum alkalescit, eoque elixato remanet calx Zinci ex flavo alba; vel, si tres partes nitri adsumferis, sic dictum Zincum diaphoreticum; propulsio ejusmodi spiritus volatilis in praepositam lunae solutionem scopo gradatorio a D. P. Juncker commendatur. Si aurum vel argentum Zinco admistum est, tum Zincum adjectione nitri calcinando detrahitur, quod etiam cum bismutho, regulo antimonii, regulo cobalti, plumbo, et stanno

contin-

contingere notum est. Ex commistione florum Zinci simplicium, vel solarium, vel ejus calce cum nitro nonnulli magna sperant; quum jubent eos cum binis partibus nitri in tigillo per octo horas leni igne, postea fortiori, fusorio tractandos esse; ita demum adparere stellam fulgentem igneam, quo adparente signo materiam eximendam calide, in pulverem redigendam, et deliquescentiae subjiciendam esse, liquor inde prodiens abstrahendum dein; eumque pro eximia medicina venditarunt, tanquam veram aquam vitae ex aëre per hunc magnetem adtracta. Verum in examine nec stella Magorum adparuit, nec color ruber, nec aqua adtracta a nitro alkalifato prae communi ex omnibus deliquescentibus alkalinis salibus proliciendo phlegmate praerogativae quidquam monstravit, unde mutatio ejus in terram albam, nitentem mediante digestionem trium mensium vix erit expectanda. Promittunt nonnulli, si tres partes Zinci cum octo partibus fundendo misceantur, et radícula perpetuo agitentur, Zincum in forma acuum aurearum et argentearum concreturum, quod tum *Antimonii magici* titulo honorant; est labor non semper succedit, et confusio nitri liquati cum Zinco fuso cautissime est instituenda propter facillimum detonationis periculum. Jactatur quoque nitri cum Zinco fixatio, si istius duae partes cum hujus parte una per duodecim horas igne leni, ne incandescent, detineantur, et postea per horam fortiori urgeantur; sed labor omnis est irritus; nam, simul ac post praeterlapsum duodecim horarum spatium ignis augetur, ut paulo candescere incipiat, mox omnia cum fulmine incenduntur. Sed si moderato igne utraque fluant, tum confundi possunt absque ulla detonatione, et postea stylo ferreo jugiter circumagitentur; provenit massa nigricans, quae aqua soluta mox copiose spiritum urinosum dimittit. Si vero nitrum cum portione anatica Zinci limati misceatur,



tur, ac in vase retorto terreo destillatio adornetur, non transeunt vapores rubri, sed portio phlegmatica; post aliquod tempus vero detonatio percipitur, sub qua vas in rimas dehiscit, et in eodem momento flores ex flavo grysei, fortiter lixiviosi vas recipiens implent: caput mortuum restat partim nigrum, partim purpurascens; hoc in aqua solutum sistit solutionem pulcherrime purpurascentem, simulque eluitur crocus tener coloris cinnamomei in igne fixus, qui ulteriorem inquisitionem exposcit: grossius vero, et nigrum magis residuum restat, eadem ratione ac crocus martis antimoniatus adstringens Stahlî ab aperiente separari potest.

§. 1774.

EN nunc observationes *Hellotianas* circa miscelam Zinci cum nitro. Alkahest, *HELLOT* ait, *RESPURII*, ab illo pro menstruo venditatum, a quo metalla omnia in primæva sua exordia referarentur, nil nisi nitrum est floribus Zinci fixatum. Si quis præscriptam ab *RESPURIO* operationem simpliciorē reddere velit, sequenti hoc perficere poterit ratione.

§. 1775.

TERITUR pars una florum Zinci cum partibus binis nitri purissimi, probe siccati, trajiciuntur ambæ hæ substantiæ per cribrum; inmittuntur tum crucibulo, circumdatur crucibulum carbonibus aliquot candentibus, quo sic totum exactissime siccam reddatur; vas claudatur operculo, ut carbonum impediatur inlapsus, et nitri accensio. Augetur hoc facto ignis, massæque in fusionem deducitur. Igne rotæ tamdiu torqueatur adparatus, donec vas in vitrum abire incipiat; auferatur dein. Instituit *Cl. HELLOT* tentamen ea ratione, ut et nitri, et florum Zinci sesquilibrium fumeret. Massa salina obtenta, calida ad-

huedum

hucdum uncias nonnisi tredecim pondere acquabat. Latex itaque, calore abactus, et moleculae salinae, quae crucibuli compagem penetrarunt, uncias undecim effecerunt.

§. 1776.

MASSA haec eadem cuticula viridescente undique obducta cernebatur, per squamulas auferenda. Summitatem massae stratum encausti densioris, citrei. Massa haec diffracta colorem purpureum interne exhibuit; atque hoc ipsum phaenomenon ceu signum legitime peractae operationis RESPURIUS assignavit. In binas portiones divisit illam HELLOR, alteram in capsula vitrea aëri libero prope fenestram exposuit. In deliquium abiit, etsi tempestas sicca foret, et frigidissima. Adparet hinc jam, nitrum in sal alkali fixum mutatum probe fuisse, etsi non accesserit detonatio. Deliquium per filtrum actum liquorem largitum fuit flavum, successu temporis colore obscuriori, subrubente donatum: filtro inhaeserunt flores Zinci.

§. 1777.

PARTI reliquae dimidia massae prius descriptae salinae acetum destillatum HELLOR adfudit. Color illico enatus fuit pulchre ruber. Digestione per horas triginta protracta acetum decantavit, atque recens superadfudit; quadraginta octo unciae aceti colore rubro tinctae fuerunt ab uncis sex cum dimidia massae dictae: remansit demum materies gummosa; in deliquium mox abiens. Filtratione praemissa obtentae fuerunt unciae sex cum dimidia materiei obscure rubrae, aeris, causticae maxime, et liquidae. Atque haec ipsa materies *alkabest* illud est famosum RESPURII.

§. 1778.



§. 1778.

Ex dictis nunc facile patet, nitrum floribus Zinci mixtum in hac operatione verti in sal alkali fixum, sola ignis violentia, nec ulla simul accedente detonatione, aut fulguratione. Sub metamorphosi hac nitri per horas duodecim fere protracta contactus particularum nitrosarum mutuis interpositione particularum Zinci sejungitur: Moleculae, ex *Hellotiana* expolitione, igneae subire ac penetrare massam totam eo facilius queunt, atque nitrum bene adeo hic in sal alkali fixum vertitur, ac si pulvis carbonum fuisset adhibitus, et detonatio accessisset. Causticam salis hujus insignem adeo vim *HELLOT* ab admistione principii inflammabilis (oleosum illud dixit) partim deduxit; videri saltim colorem exin dependere monuit, quum nitrum ope pulveris carbonum in sal alkali versum pallide stramineum solum referat colorem.

§. 1779.

IN alio tentamine sex uncias nitri in crucibulo fusioni exposuit, inmisit dein nitro fuso frustillum Zinci forma metallica donati, quod fundum crucibuli illico petiit; elapso pauciori tempore in summitatem denuo adscendit, ibique remansit. Auctum vero magnitudine catenus fuit, ut, quum hordei granum prius aequaret, nunc ad molem juglandis minoris infurgeret. Forcepis ope exemptum denuo molle deprehendebatur calens adhuc; frigesactum autem durum, et inductile denuo evasit. Fractura granula exhibuit splendore omni destituta; interstitiis inhaesit nitrum; injecit massam hanc denuo nitro fuso, summitatem et nunc tenuit, donec sal candesceret; tum fundum petiit, ac, eo vixdum tacto cum detonatione fulguravit; flamma enim Zinci columnam tribus pollicibus altiore in fluente sale penetrare debebat, do-

nec

nec sursum emergere posset. Detonatione finita frustilla alia Zinci iniecit; fulguratio contigit eadem, non tamen in summitatem adscendebant, quum calor intensissimus in fundo vasis obstaret, ne intumescerent. Majorem sensim copiam molecularum Zinci sic iniecit, donec sal spissesceret; Zincum vero ipsum in flores mutatum fuit. Sub finem inmutatum illud mansit, quum salis amplexus subire amplius non posset. Superficies massae totius colore viridescente tincta adparuit: vapores etiam rubentes nitrosi evolarunt, quos quidem sub calcinatione nitri ope florum Zinci HELLÖT non observarat.

§. 1780.

IGNE exempto crucibulo massa, calens adhuc, vi-
rebat, refrigerata colorem cinereum induebat; pur-
purei vero nil omnino adparuit; nec humiditatem ex
aëre adtraxit, quod tamen massa alkalina florum Zin-
ci ope generata fecerat. Calente aqua hinc eam sol-
vit; in solutione filtrata, evaporationi exposita enatae
fuerunt crystalli verae nitrosae. Liquidum a crystal-
lificatione residuum nullum plane alkalinae indolis de-
dit indicium; solutionem mercurii sublimati corrosivi
colore albo potius lente deiecit; quae praerogativa sali
alkalino volatili peculiaris habita fuerat. Observat
tamen HELLÖT simul, indicium hoc saltem in tenta-
mine dubiae fidei esse. Reperto siquidem tentamine
praecipitatum album, majori copia nunc collectum,
eluit, siccavit, et cupreae candenti laminae iniecit;
abs omni mutatione ibi jacuit, nec in fumos minimum
quid abiit. Microscopicum vero examen docuit, praeci-
pitatum illud componi floribus subtilissimis Zinci,
quos nitrum retinuerat, etsi filtrata fuisset salis hujus
solutio. Acidum, ait, muriaticum in solutione mer-
curii sublimati corrosivi flores hosce interventu tan-
tillae partis nitri in sal alkalium versi forsan praeci-
pites



pites egit; quin tamen mercurius in solutione contentus ipse deorsum lapsus fuerit, quum in solutione nitri alkali non sufficiens adesset copia, quo mediante metallica illa substantia a menstruo suo divelleretur.

§. 1781.

FUSIUS examen actionis *alkabesti* RESPURII in solutionem auri, atque unionis Zinci cum auro, nosse qui velit, in ipsa HELLOTIANA *diatriba de Zinco in Mem. de l'Acad. royal. des scienc. 1735.* legere poterit.

§. 1782.

ZINCUM cum binis partibus *salis communis* mistum, ac in vase retorto tractatum, absque flamma in calcem abiit in tentamine a Cl. POTT instituto.

§. 1783.

CIRCA relationem Zinci ad *vitriola* Cl. POTT sequentia retulit. GLAUBERUS jam, ait, et BECHERUS adverterunt, quod Zincum praecipitet inhabitans metallum, et semet ipsum acido vitriolico adsociet, tanquam corpus istis solubilius, et cum eo vitriolum Zincinum efformet: ubi, quod vitriolum veneris adtinet, nullum ejus rei dubium superest, quippe ejus solutio cum Zinco granulato vel limato digesta visibiliter Zincum cum bullulis adgreditur, colorem coeruleum exuit, cuprum forma metallica splendenter praecipitat, et colorem albidum induit, ut et in calcinatione terram plane albicantem relinquit, ei similem, quae ex solutione Zinci cum alumine, vel spiritu vitrioli occurrit. Sed de vitriolo martis Chemicus quidam non inceleber dubia movebat non levia, imo plane negabat. Quae pro hac sententia militant circumstantiae potissimum sunt sequentes: quia, si vitriolum martiale cum Zinco coquatur, solutio
manet

manet viridis, et crystallifatur vitriolum viride, sub digestionem perparum ad fundum deicitur, et quod subidet, non a Zinco, sed ab ipsa aqua, acidum in vitriolo diluente, deducendum esse; adhaec, Zincum injectum eodem pondere redire, praecipue si granulatam adsumferis; imo quoque paulo plus; accedit, quod ejusmodi vitriolum calcinando non albescat, ut vitriolum ex solutione Zinci cum spiritu vitrioli paratum facit, sed rubescat, sic quoque longe alium colorem et saporem esse ac cum isto; sic et crystallos figura sua multum differre, dum haec instar communis concrevit, illud vero instar tenerarum et quasi nitriformium crystallorum; sic apertum quoque esse, Zincum martem ex solutione cum spiritu salis facta non praecipitare &c. — Argumenta vero probantia sequentibus fulcris nituntur: quia solutio vitrioli martis cum Zinco sub digestionem diu et longe aperte ebullit cum copiosis vesiculis (regerunt, id etiam cum aqua, et aliis liquidis contingere, nulla tamen subsequente solutione corporis); quin et aperte praecipitat crocum martialem, (reponunt, tale quid contingere etiam, si sola solutio vitrioli martis cum aqua parata digeratur, vel coquatur, ob dilutionem acidi per aquam) quia crocus praecipitatus a magnete copiose adtrahatur, (respondent, ab adhaerente superficialiter ferro id contingere): — quibus ut opinionem nostram adjiciamus, advertimus, praecipitationem ferri utique contingere, notatis tamen sequentibus circumstantiis; ut scilicet solutio vitrioli non unica vice, sed repetita, cum recenti Zinco digeratur, quia, quod adhaerescit praecipitatum ferrum, ramentum Zinci involvit, et ulteriorem ingressum cohibet (interim non omne ferrum repetito etiam Zinco ingesto praecipitari, ex eo utique adparet, quia nihilominus solutio manet viridis, et productum vitriolum viride, et utriusque adhuc commistionem mon-



strat praecipitatio hujus vitrioli cum sale alkalino, ubi praecipitatum album aperte Zinci corpus monstrat, sed inmixta et supernatans flavedo martiale indigitat; sic etiam quod in fundo remansit Zincum, optime licet ablutum, tamen in aqua forti solvitur colore rubro, propter adhaerens praecipitatum martiale; adeoque aliqua praecipitatio ferri crudioris et inhibitio Zinci utique contingit, licet non totalis; unde etiam ejusmodi vitriolum calcinatum flavescit, sed ex vitriolo venereo albescit, cujus praecipitatum cum sale alkalino longe albicantius est, quam prioris: sic vice versa solutio Zinci in aqua regia instituta ab inmisso ferro non praecipitatur, e contra solutio ferri in aqua forti (dummodo debite diluatur, filtratur et digeratur) ab inmisso Zinco crocum martis aperte ad fundum dejicit, licet etiam purissimum acidum nitrosum adsumtum fuerit. Id vero non possum non mirari, quod ferrum in spiritu salis solutum à Zinco non praecipitetur, sed solutio maneat viridescens, non turbata; interim tamen sub digestionem aliquid Zinci adhuc inhibet, unde cum alkali praecipitatur flave; conjicio proinde non totalem prorsus existere ferri solutionem in acido salis, sed tantummodo partialem.

§. 1784.

TARTARUS *vitriolatus*, ut et *sal mirabile* cum Zinco, igne intenso tractata, efformant sulphur commune, ex mistione acidi vitriolici cum parte inflammabili Zinci.

§. 1785.

ACIDUM *phosphoricum* Zincum violenter, ac sub ascensu odoris foetidi solvit.

§. 1786.

§. 1786.

SAL fusibile microcosmi via humida Zincum limatum in pulverem album erodit; aqua diluta pseudosolutio haec, et per filtrum missa, ab oleo tartari per deliquium plurimum praecipitatur.

§. 1787.


SAL idem fusibile via secca sequenti ratione sese gessit in tentaminibus III. MARGGRAVII. Grana quadraginta limaturae subtilissimae Zinci, cum drachmis binis dicti salis in mortario trita, tum destillationi ex retorta vitrea exposita, igne ad vasis candescentiam intenso, phosphorum egregium dederunt, generatum ex phlogistico principio Zinci, ac acido in sale fusibili contento. Massa remanens grysea, loco inferiori, ubi vasi adhaesit, in fluxum partim abiit; pondere drachmas duas parum excessit. In crucibulo hassiaco fulioni legitimae exposita pulcherrimum exhibuit spectaculum, quoniam flammulae innumerae fulgurum adinstar, phosphoro genesin suam debentes, sparsae fuerint, ac detonationis simul species easdem stiparit. Reliquum, vase refrigerato, scoriam vitream gryseam satis retulit.

§. 1788.

CUM acido sacchari Zincum forma metallica donatum parum, referente CI BERGMANN, effervescebat, in pulverem album mox mutatur. Pulvis hic salinus 75. partes metalli in centenario recondit; ab aqua non solvitur, nisi excessus adsit acidi. Calx Zinci eundem praebet pulverem; tum similis ruit, ex solutione Zinci vitriolica, nitrosa, muriatica initillato sacchari acido.

§. 1789.

ACIDUM formicarum, accedente digestionem, Zincum inperuolue solvit; solutio filtrata crystallos ele-



gantes, firmas generat, ab crystallis, unione Zinci ac acidi aceti enatis, longe diversas; solvitur etiam remissus ab acido hoc eodem calx Zinci.

§. 1790.

ACIDUM formicarum, secundum tentamina *Cl. BERGMANN*, Zincum, et metallicum et calcinatum, perlibenter adgreditur, et cum vehementi effervescentia perfecte solvit. Singulae solutiones sapore subdulci, simulque adstringente et limpiditudine inter se conveniunt, ast in eo differt regulina, quod, si frigida facta fuerit in clausa lagena, vapores procreet inflammabiles, et fulminantes, quibus emissis turbatur pulvere flaveole fundum petente. Sub-evaporatione secernuntur crystalli plerumque coalitae, sed interdum exacte cubicae, et hyalinae, quae aegre sunt solubiles, ut in calore medio copiam aquae destillatae ultra vices majorem requirant: spiritum vini respuunt, et in igne crustantur lacteo velamine, tumunt, et liquefacta partim in fumum pungentem, partim in cinerem rediguntur. Unionem nequaquam laxat acetum, nec metalla in hoc negotio quidquam valent.

§. 1791.

ZINCO cum sale alkalino vel fluore nigro diutius fuso, observante jam *Cl. POTT*, illud omne avolat, et alkali causticum redditum relinquit; via humida cum lixivio cocto illo, nil notatu dignum evenit; sub fluxu tamen aliquid recipit, quod deliquescentia et praecipitatio ostendit. Solutionem Zinci salis alkalini fixi et *Cl. MALOUIN* perfecit; vid. *Mem. de l'Acad. Sc. de Paris* 1743.

§. 1792.

ALKALI phlogisticatum Zincum acido nitroso prius reseratum, dein dejectum pulchre solvit, uti *Cel.*
MARG-

MARGGRAFIUS primus ostendit in *Mem. de l'Acad. de Berlin* 1745.

§. 1793.

ALKALI volatile in Zincum non, aut parum sane agit. Praecipitatione vero, ac solutionis supersaturatione et hic solutio fieri potest.

§. 1794.

SULPHURI in Zincum nulla est actio; atque inter omnia metallica corpora Zinco et auro solis praerogativa haecce competit. Hanc ob dotem sulphuris ope Zincum ab adhaerentibus metallis, ac semimetallis omnibus reliquis liberari potest. Encheiresis in *Doximasticis* quaerenda erit; videri etiam poterit *Bisulph. chym. phys. metallicum* p. 108. &c.

§. 1795.

NEC *hepar sulphuris* plus in Zincum valet, quidquid *Cl. Cl. GROSSE* et *HELLOT* conati fuerint, ut substantias hasce mutuo unirent.

§. 1796.

CIRCA praecipitationes Zinci notatu digniora pauca occurrunt: praecipua in ante dictis fuerunt exposita.

§. 1797.

ZINCI cum auro unionem vide in *capite de AURO*.

§. 1798.

ZINCI cum argento nexum vide in *capite de ARGENTO*.

§. 1799.

ZINCI ad ferrum habitum vide in *capite de FERRO*.



§. 1800.

ZINCI ad *cuprum* relationem vide in *capite de CUIRO*.

§. 1801.

ZINCI ad *stannum* habitum vide in *capite de STANNO*.

§. 1802.

ZINCI ad *plumbum* habitum vide in *capite de PLUMBO*.

§. 1803.

ZINCI ad *mercurium* habitum vide in *capite de MERCURIO*.

§. 1804.

ZINCI ad *antimonium* habitum vide in *capite de ANTIMONIO*.

§. 1805.

ZINCI habitus ad *bismuthum*. Cum Zinco mixtum bismuthum, ex observatis *Cl. POTT*; portione anatica, et liquatum non miscerur, quod plane singulare est; cujusque, subdit, analogum in toto regno minerali adhuc ignoro; nam Zincum sub fluxu usque quaque inferiorem, et bismuthum superiorem locum occupat, et sub effusione quoque retinet; ita sub diffractione a quovis mox distincte discerni a se invicem possunt, quamvis sibi cohaereant superficie tenus; nec coeunt, licet etiam multo cum inflammabili, et jugi circumagitatione in tigillo tractentur. De eadem hac miscela *Cl. CRAMER* adserit, quod idem sub contundendo in mortario flammam concipiat, et pulveris forma super chartam effusa eam accendat; existimat hinc, lignum cum ejusmodi globulis incendi posse: sed fatendum mihi est, quod phaenomena haec mihi nulla ex parte successerint; unde circa hoc negotium occulta quaedam circumstantia adhuc eruenda.



da est. Vel an forte mercurius sublimatus additus fuit.

§. 1806.

Scio tamen ipse, etsi mercurius sublimatus, ex conjectura hac *Cl. POTT*, adjiciatur, phaenomenon a *Cl. CRAMER* descriptum tamen non evenire; nec, quid mercurius sublimatus in hunc scopum adeo faciat, video.

§. 1807.

RETULIT *Cl. WALLERIUS*, quod si recipiatur Zincum et bismuthum anatica dosi, miscela fluxu nigro tegatur, coire ambas hasce substantias in massam fragilem, et bismuthum sic deperdere texturam suam schistofam, micaceam, indipisci striatam.

§. 1808.

BISMUTHUM et Zincum, ait *III. MUSCHENBROEKIUS*, si capiantur aequali copia, difficulter in igne miscentur; fusa in modulo stanneo exhibuerunt metallum, cujus gravitas specifica 8, 33613, quodlibet latus $\frac{17}{100}$, frangebantur a $\text{lb. } 168$. quum latus fuit $\frac{2}{10}$ poll. frangebatur a $\text{lb. } 210$, est autem hoc mistum admodum fragile, ruptura aspera, non splendens; nihilominus firmitas in duplum increvit, quod probat, partes utriusque semimetalli bene misceri, et se mutuo conglutinare.

QUOMODO haec omnia simul cohaerent?

§. 1809.

CUM *cobalti regulo* Zincum non lubenter coit, sed in flores exardescit, avolat. *Cl. WALLERIUS*.

§. 1810.

ZINCUM ac *arsenicum* massam dant Zinco ipso duriolem, fragiliorem, in fractura chalybem fere



aemulantem. Ex tentaminibus MALOUINIANIS in *Mem. de l'Acad. de Paris* 1744. insertis, circa veram arsenici ad Zincum relationem non multum eruitur. Major prae reliquis experimentis arsenici copia Zincum subingressa fuit, dum pinguedinem in auxilium vocavit, semimetallum ex facili destructile denuo reducentem.

§. 1811.

NICCOLUM Zincum respuit, uti plures testantur Chemici: monuit tamen novissime Cl. BERGMANN in *Dissert. de NICCOLO*, cum Zinco colliquefcere niccolum depuratum, fragilem tamen fieri massam.



BISMUTHUM.

§. 1812.

BISMUTHUM (B. vel W.) *) WISMUTHUM, BISEMATH, BISEMUTHUM, MYTHAN, MYTHUM, CONFREFEYN, STANNUM GLACIALE, STANNUM CINEREUM, PLUMBUM CINEREUM, SATURNUS GRYSSEUS, ANTIMONIUM ALBUM PARACELSI, FOEMINA, MARCASITA, MARCASITA ALBA, MARCASITA ARGENTEA, MARCASITA JOVIS, SEU JOVIALIS AGRICOLAE, PYRITES CINEREUS AUCTORIS ALCHEMIAE DENUDATAE, ZINCUM ALBUM, MAGNESIA, MAGNESIA GEBRI, PLUMBUM PHILOSOPHORUM, ELECTRUM INMATURUM, METALLUM MASCULUM, MAGNES MINERALIS GLAUBERI DEMOGORGON, HELMONTI NYPHA, AUGURELLI GLAURA &c. substantia *semimetallica* est coloris subargentei, ad flavedinem, aut umbram ruboris inclinantis, non, uti in Zinco observatur, coerulescentis; tessulis constans lamellosis majoribus, laevibus, nec, uti in Zinco, punctis prominulis inaequalibus, asperis; dum politum est, ad speciem reguli antimonii satis accedens; friabilis, in pulverem facile conterenda.

§. 1813.

GRAVITAS *specifica* bismuthi ad aquam in scriptis Chemicorum uti 9, 700. ad 1000. passim adsignatur. Invenit III. MUSCHENBROECKIUS bismuthum modo fufum 8, 7168; idem tufum quantum potuit 9, 6388; bismuthum 9, 700; aliud 9, 850; aliud 9, D 5 866;

*) LITTERA vocis initialis hic, uti in ZINCO, NICCOLO, et COBALTO, pro signo substantiae characteristico recipi passim solet.



866; aliud 9, 9259; bismuthi mineram coeruleum pigmentum finaltam praebens 6, 221; mineram smaltinam 2, 949; ad 1, 000. aquae pluviae.

§. 1814.

MALLEABILE bismuthum nullatenus est, quum sub malleo, vel pistillo illico rumpatur; in pulverem autem tundi apte valet, nam nulla prorsum tenacitate gaudet; atque dote hac ad antimonium maxime accedit.

§. 1815.

ELASTICITATEM, aut *ductilitatem* bismutho nullam plane competere, ex nunc dictis facile conficitur.

§. 1816.

AERI expositum bismuthum rubigine diu non obducitur; color, observante Cl. POTT, tum quodammodo ad purpureum dilutum inclinat; favilla tamen ex albo gryseo in bismutho, aëri, impuro praesertim, diutissime exposito, sensim enascitur.

§. 1817.

AB aqua purissima destillata bismuthum non solvitur, nec mutationem sensibilem exin experitur.

§. 1818.

IN igne bismuthum facillime funditur, diuque ante candescentiam. Fusum nunc vapores densos eruat, inflammabiles, flammaque coerulea exardescens. Negavit quidem hoc Cl. POTT, verumtamen et Cl. WALLERIUS expertus idem fuit, ac ante illum Cl. GEOFFROY junior tentaminibus evicit in *Mem. de l'Acad. des Sciences* 1753.

§. 1819.



§. 1819.

INMISIT GEOFFROY uncias binas bismuthi in crucibulum, inposuit hoc igni validiori ea ratione, ut superficies semimetalli accessui aëris prorsum pateret; fustum bismuthum flamma subcoerulecente exarsit, ac vaporem, fumumve densum emisit. Extraxit ex igne crucibulum, eique infundibulum inposuit vitreum; sublimati sic flores infundibuli adhaeserunt lateribus. Refrigeratum denuo inposuit igni, extraxit denuo, infundibulum idem qualibet vice inposuit; encheiresi hac usus fuit eo usque, donec nil amplius florum adscenderet; tertia vice sublimati flores jam pallide flavescentes, ultimum autem in sublimae aëri colore auripigmento analogo tincti conspiciantur. Observavit simul GEOFFROY, compendium laboris fieri posse, si follis ope aër in superficiem bismuthi fusi adigatur. Intra horae unius decursum unciae binæ bismuthi in fumum illum mutatae fuerunt, *flores* veros largientem; remanserunt in crucibulo grana viginti quatuor massae fixioris; haec vero in speciem lithargyrii confluerunt.

§. 1820.

ELEVATA autem in flores bismuthi calx calci Zinci in eo est similis, quod ignem nunc validiorem sustinere, quin sublimetur, possit. Inmisit GEOFFROY partem hujus retortae vitreae, hanc per horam calori majori exposuit; nec atomus tamen sublime petiit; inspergit partem aliam carbonibus ardentibus; sed nec hic elevatum quid fuit; flavescebat solum calx, et portio ejus quaedam in bismuthum forma metallica donatum reducenda fuit; patet hinc, calcem eam, his saltem conditionibus politis, refractariam adeo reductioni non esse.

§. 1821.



§. 1821.

DUM, *Cl. POTT* ait, bismuthum pulverisatum in patella terrea leniori sub initium igne calcinatur, movendo saepius fistula tabacaria, tum ratione hac in calcem reducitur, postea facile in vitrum convertibilem, sed addito denuo inflammabili consistentia regulina redit. Quodsi in cupella cinerum c. g. uncia semis bismuthi tractetur in furno docimastico, in principio non parum ejus dispergitur, reliquum vero pondere duarum drachmarum, unius scrupuli, et sexdecim granorum sub forma vitri flavi cineres intravit, unde a nonnullis commendatur pro instituenta cupellatione loco ordinarii saturni, quia citius fluit, ac vitrescit, cineresque intrat; ubi commista metalla sub hac sua depuratione tam diuturnum ignem non experiuntur, ac cum plumbo, quod longe lentius vitrescit, et cupellae insinuat.

§. 1822.

CIRCA sublimationem vero bismuthi sequentia *Cl. POTT* adnotavit. Commode etiam subiectum nostrum sublimando tractari potest, et quidem vel per se, dum in cucurbita vel retorta terrea forti igne urgetur, ubi sub forma albi fumi ad latera elevatur, (interim etiam in forma semimetallica sublimari aeque ac arsenicum testis est *HENCKELIUS*), cujusmodi flores etiam pyramidales occurrunt; praecipue si sub operatione in vase adaptato materia per foramen unco ferreo circumvertatur; idque longe facilius admittit quam plumbum; vel addito nitro: de hoc paulo post agam.

§. 1823.

MENDERUS retulit, bismuthum in foco speculi caustici confluere in vitrum, seu scoriam ponderosioram ac prius, colore flavo donatam.

§. 1824.

§. 1824.

CONFLUIT vero calx bismuthi sublimatione parata, quin adjiciatur quid, quin etiam speculo utamur caustico, in vitrum diaphanum, topazinum; permeat vitrum hoc crucibula, nisi fuerint optima, interim tamen vitro plumbi minus penetrans videtur.

§. 1825.

INCLUSIT *Cl. d'ARCET* globo, ex pasta vasorum murrhynorum nondum cocta parato, grana quadraginta tria bismuthi, exposuit globum in furnum, ubi vasa illa excoquantur. Globus disruptus fuit, ac bismuthum maximam partem effluxit, massula remansit minima, globus autem ab eo vix adfectus adparuit; pars bismuthi, quae in vitrum abiit, internam globi superficiem crusta vitrescente diaphana fordidè violacea obduxit; vitrum autem, globi extimam partem vestiens, flavum obtulit colorem, vitro saturnino aemulum.

§. 1826.


DEMONSTRAVIT praeterea *GEOFFROY* speciem minii, colore remissius rubro donati, ex bismutho confici posse.

§. 1827.

VIDEAMUS nunc, quid *mensura* in bismuthum possint. Loquuti sunt, *Cl. MONNET* ait, Auctores plures de solutione bismuthi in acido vitriolico, eosque denuo sequutus fuit *Cl. POTT*; his tamen non obstantibus, tentaminibus quibuscunque adhibitis, solutionem hanc eandem perficere nunquam potui. Ex illis, quae *Cl. POTT* in *dissertatione de bismutho* adtulit, facile patet, non ex facili adeo eam saltem confici. Suspiciari sane licet non abs ratione agi ibi loci solum de effectibus acidi vitriolici in mineras bismu-



bismuthi, quae forsan tales omnino non erant. Quum itaque solutionem hanc recepta methodo facere non potuerim, aliam ingressus fui viam. Sumsi hunc in finem bismuthi in pulverem triti unciam semis, in-misi eam in retortulam loricatam ex argilla lapidescente factam; adfudi unciam circiter olei vitrioli, vas inposui furno reverberatorio, ignem per gradus auxi, donec vas obscure in fundo candesceret. Egressi fuerunt vapores copiosi spiritus sulphuris volatilis; sub finem sulphur ipsum adcrevit tubo intermedio inter retortam ac excipulum posito. Refrigerio tum adparatum reliqui. In fracta retorta inveni massam albam salinam, nec atomum semimetalli ad experimentum adhibiti; totum exactissime solutum fuit. Adfudi copiam minorem aquae calidae; prout massa illa in aqua solvebatur, pulvis ad fundum sensim ruit albis-simus. Liquidam per filtrum trajeci; quum vero crederem, bismuthum omne adfusione aquae fors fuisse dejectum, etsi minimam addidissem quantita-tem, oleum tartari per deliquium, ut rei hujus cer-tior fierem, adjeci; illico enatum fuit praecipitatum album. Reposui dein solutionem ipsam in balneum arenae; etsi vero excessus in ea adforet acidi, mate-riem tamen quamdam salinam inde orituram speravi. Enatae etiam fuerunt pelliculae crystallinae; non ta-men cohaerentes, quum, uti vero videtur simile, acidi obsisteret praesentia. Separavi pelliculas ex li-quido; dum vero abluere easdem tantillo aquae vo-lebam, partim decomponebantur, ac in calcem abie-runt, dum interim pars alia, majori adhuc acidi ex-cessu remissa, solveretur in aqua. Interim, si quis solutionem hanc decomponere, et calcem omnem omnino bismuthi ad fundum deturbare velit, solum requiritur, ut magnae crystalli inmergantur aquae co-piae. Adparebit ex dicendis dotem hanc et reli-
quis



quis bismuthi solutionibus propriam esse, et characteristicam.

§. 1828.

UT autem adpareat, quid ipse *Cl. POTT* de solutione hac statuerit, et quod destillationem in hac operatione *Cl. MONNET* non primus excogitaverit, en ipsam *POTTIANAM* descriptionem. Ab acidis, ait, purioribus bismuthum diversimode inbibitur, et quidem ab acido vitriolico tam regulus, quam praecipue minera. Si regulus pulverisatus cum spiritu vitrioli digestionem exponatur, et postmodum depleatur, *) vel si $1\frac{1}{2}$ pars bismuthi cum una parte olei vitrioli misceantur, leni calore humiditas abstrahatur, et residuum elixivietur, tum utrobique monstrat colorem ex flavo rubeum, ita ut tantum partem inflammabilem ex ragulo extrahere videatur, praecipitatione enim cum sale alkalino nihil terrestris ad fundum dejicitur; quod vero acidum hoc regulum nostrum omnium citissime, et cum magna ebullitione solvat, ut alicubi legitur, id experientiae non respondet, ut potius partem strictius regulinam non attingat. Mineram vero, utpote arsenicali, et colorante quodam principio magis scatentem, copiosius adhuc resolvit; et quidem mineram hasserodensem cum violenta ebullitione, saxonicam autem lentius, cum hac enim spiritus vitrioli format solutionem dilute rubeam; sic etiam spiritus vitrioli cum octava parte spiritus urinosi commistus sistit extractum, et crystallos rubras: quod si etiam tres partes spiritus vitrioli cum una parte aquae fortis misceantur, producant solutionem dilute rubeam, sed residuum in calcem albam corroditur: ut et spiritus vitrioli partes sexdecim, aquae partes octo, et aquae fortis pars una; nec inconcinna est

*) *VITIO* typi verbum hoc positum, et loco illius, spiritus depellatur, legendum videtur.



est methodus, si sesqui part. minerae bismuthi cum una parte olei vitrioli misceas, medioeri igne omnino phlegma abstrahas, ut residuum leniter torreatur, tum residuum pulverises, et cum transpulso phlegmate addita majori copia aquae communis solvas, filtres, evapores, crystallises; sic recipies vitriolum purpureum cum tempore, quod in aqua solutum, et cum decocto gallarum mistum non nigrescit; cujusmodi speciei vitriolum a non paucis anxie quæri solet. Spiritus vini ulterius ex ejusmodi vitriolo extrahit tincturam, quam nonnulli concentrare et vitrificare adlaborant. Quod vero oleum vitrioli a bismutho regulino abstractum ad volatilifandam lunam singulariter conferat, ut in concordantia Becheriana legitur, id adhuc confirmationem meretur.

§. 1829.

PRAEROGATIVA itaque MONNETIANAE encheiraeos in concentratione acidi vitriolici supra bismuthum consistit. Singulare tamen viderur, quod nil omnino ex abstracto supra substantiam hanc vitrioli acido ope salis alkalini deicere potuerit *Cl. POTT*, seu quod nec micula bismuthi soluta sic ab acido vitrioli fuerit; sed nec sulphurei ullius prorumpentis acidi mentionem injecit. Cur vero posuit *Cl. WALLERIUS*, bismuthum ab acido vitrioli solvi, solutionem ex flavo rubentem esse, mora in obscurum, subfuscum colorem mutandam? An solutio haec facile aut difficile succedat, an concentratum, an dilutum acidum adhibendum sit, an digestio, an destillatio accedere debeat, nil addidit, ut, an ipse eandem instituerit, dubium videatur; monet solum sub finem, singulare in hac solutione id esse, quod salis alkalini fixi ope nil deicere ex ea possit.

§. 1830.

IN *acido nitroso* bismuthum facillime solvitur; ut solutio haec eo melius succedat, requiritur acidum minus meracum sit, alias enim inpetuose nimis sit, et semimetallica substantia in calcem potius eroditur, quam legitime solvitur. *Cl. POTT* inter chemicos omnes, *Cl. MONNET* ait, verissima simul, ac notatu dignissima circa solutionis hujus historiam, et phaenomena eam concomitantia adtulit, nil tamen plane dixit de substantia salina ex hac ipsa solutione obtinenda; interim tamen substantia haec ipsa latius paulo examen omnino meretur. Priusquam vero ad sal hoc ipsum deveniam, phaenomenon quoddam adducere prius debeo, quod in solutione bismuthi contingere solet, et a *Cl. POTT* adnotatum non fuit; saturari nempe solutio haec nunquam potest, quaecunque demum, ut hoc obtineatur, instituta fuerint tentamina. Dum majorem bismuthi copiam resolvere in acido nitroso volui, seu saturatissimam demum solutionem producere, praecipitatum sat copiosum ad fundum descendit, ac acidissima nunquam non mansit; differt itaque hoc respectu solutio bismuthi nitrosa plurimum ab solutione plumbi, ope acidi ejusdem facta.

§. 1831.

EVAPORATIONI solutionem hanc in balneo arenae exposui, refrigerata dedit crystallos pulcherrimas prismaticas radiatas (*en prismes rayonneux*) altera vice crystallisati enatae rhomboidales erant, aut aciculas referebant sibi mutuo inpositas divergentes, ut adeo rosaceas massulas, sat pulchras, adspectui exhibuerint. Sal hoc acerrimum est, ac nullatenus dulce, uti sal, ex solutione plumbi in acido nitri enatum: in aqua difficillime solvitur; dum solutioni exponitur, bismuthum, ejus basin constituens, forma

Pars II. Sect. II. E calcis



calcis albae ad fundum partim labitur; pars vero legitime demum soluta magno excessu acidi dotata est: carbonibus ardentibus expositum non detonat, sed decrepitat, uti sal muriaticum; acidum sic avolat, et calx flava, adinstar *massicot*, remanet.

§. 1832.

CALX bismuthi aquae ope ex solutione dejecta in acido nitroso resolvitur denuo, difficilior tamen quam bismuthum forma semimetallica adhucdum donatum.

§. 1833.

CHEMICORUM nonnulli, quum bismuthum metallum album, seu lunare foret, sustinuerunt, ejus in acido nitroso soluti ope sal commune, tartarum vitriolatum, aliaque salia vitriolica ex aequo decomponi posse, uti hoc mediante plumbo, mercurio, aut argento perficitur. Falsitas hujus sententiae eo minus cuiquam occurrebat, quum *Cl. POTT*, magni in chemia nominis Auctor in diatribe de decompositione tartari vitriolati edixerat, duplicem hancee decompositionem ex ipsa fieri. Respuisse tamen illum hanc opinionem, patet ex iis, quae in dissertatione de bismutho adtulit. Ostendit ultimo loco decompositionem hanc nil nisi praecipitationem bismuthi ope aquae factam esse: eundem errorem revocavit insuper in dissertatione de sale communi: his tamen omnibus non obstantibus chemici gallici plures tueri hanc opinionem maluerunt; argumentum rei hujus invenio in opere recenti chemico, sub titulo *Tableau de l'Analyse chymique* a *Cl. ROUELLE* nuper edito. Expressis verbis ibi ponitur, tartarum vitriolatum ac sal muriaticum, cum solutione bismuthi mista, producta largiri singularia, ex unione acidorum cum semimetallo hooce enascentia. Quum non credere ipse possem, Chemicum hunc versatum in errorem lapsum

psum fuisse, repetenda denuo experimenta duxi. Suspiciari illico, difficultatem decompositionis hujus producendae dependere ex eo, quod solutio bismuthi saturata satis nunquam foret; atque monui in praecedentibus, metallicas solutiones decompositioni huic aptas ob excessum acidi saepius reddi incapaces. Has ob rationes saturavi excessum acidi in solutione guttis paucis alkalini salis in liquorem resoluti. Aliud praeterea obstaculum, duplici huic decompositioni contrarium illud esse arbitratus fui, quod salia, quae admiscerentur solutioni bismuthi, diluta nimis forent, atque aqua eadem soluta tenens bismuthum deiceret, antequam ipsa duplicis decompositionis actio adhuc inciperet. Ut huic irem obviam, solvi sal muriaticum in minima, quae possibilis foret, aquae copia; miscui tum solutiones; tranquilla tamen omnia manserunt, et praecipitatum nullum subsequutum fuit, antequam aquam copiosorem adfudissem. Praecipitatum sic enatum collegi, ablui, siccavi, et simillimum, seu potius idem plane deprehendi cum illo, quod aquae solius beneficio excutitur.

§. 1834.

PRIUS jam monui, oleum vitrioli, ac acidum salis adfusa solutioni bismuthi nullam ibidem excitare mutationem; observavit hoc et *Cl. POTT* optime: plura tamen rescire volui, quam quae *ILL.* hic *VIR* adnotaverat, miscelis ad determinatum usque punctum evaporationi expositis partem bismuthi praecipitatum deprehendi, liquidum vero acidissimum linguae inpressit saporem. Praecipitatum solvebatur ab acido nitroso; atque nil nisi nitrum bismuthicum esse, forma crystallulorum minimarum praecipitatum didici; factum hoc, uti vero videtur simile, ideo fuit, quod acidum vitriolicum, acidumque muriaticum aquam illi eriperint.



§. 1835.

HAEC *Cl. MONNET* debentur: audiamus nunc loquentem *Cl. POTT*; paulo notior est, ait, (quam cum acido vitriolico, de quo prius egerat) bismuthi cum spiritu nitri relatio; solvitur quippe regulus in spiritu nitri, vel aqua forti cum fumis violentis, effervescencia, et calore, (quod saturnus non facit) quod vero id tanto cum impetu faciat, ut flamma inde percipiatur, ut *BECK*: adferit, id non potest animadverti; nec id, quod in *Actis Parisinis* habetur, quod in ejus solutione semper restet materia bituminosa, super quam spiritus nitri non agat, dummodo res recte instituatur, nam si uni parti bismuthi pulverisati lente adjiciantur duae partes aquae fortis, cavendo ne effervescent, nec ea ebulliat, tum plenarie in ea resolvi poterunt; sed et post resolutionem mox crystallifat, et format sal exiguis crystallulis praeditum. Si vero paulo plus aquae fortis, quam par est, adfunditur, effervescit copiosis rubris fumis, et nisi vitrum magnum sit, facillime oras vitri transcendit: sub hoc actu materies intumescit, ut quinque plus spatii requirat; simul etiam canescit, dum parvae istae crystalluli materiae non solutae immiscentur, unde hac ratione nimio (qua methodo forte usus est *Auctor alchemiae denudatae* qui sex vel octo partes aquae fortis pro plenaria ejus resolutione requirit) adeoque superfluo acido operatur, indeque tanto plus aquae pro praecipitatione postulat: hinc patientia opus est, paulatim semper instillando, quo conserventur spiritus, quum alias non parum phlogisti nitrosi cum fumo illo pereat, et residuum quasi calcinatur ac cum ferro; quas tum *LEMERY* partes pingues, bituminosas, non solubiles vocat, ejusmodi quoque solutio viridescit; quae vero lenta ejusmodi inhibitione perficitur solutio, et cum binis partibus aquae

aquae fortis absolvitur, non viridescit, sed alba manet, mox tamen in albas crystallos coit; vel cui patientia deficit, is factam solutionem mox calidam adhuc depleat a residuo, antequam crystalluli formen-
tur: vel aqua fortis cum una vel duabus partibus aquae prius debilitanda est, (qua ratione ad plumbum et stannum adhibetur) postea saepe movendo et digerendo. Sic quoque ratione hujus solventis notandum, quod spiritus nitri purior adsumendus sit, quum ejusmodi aqua fortis, quae acido vitriolico adhuc inbuta est, praecipitatum magis gryfeum producat. Solutio ejusmodi praecipitatur ab aqua pura, a spiritu urinoso, a sale alkalino, et a spiritu vini.*)

§. 1836.

SOLVITUR bismuthum et *acido muriatico*; adtulit circa solutionem hanc, post ea, quae *Cl. POTT*, et *Cl. BRANDT* habent, inprimis sequentia, singularia magis, *Cl. MONNET*. Illico, dum acidum salis fumans, hinc coloratum, bismutho adfunditur, idem evenit, quod semper contingere solet, quotiescunque acidum hoc ipsum metalla tangit, quae difficulter solvit, odorem scilicet suum, coloremque perdit; acquirit vero nunc foetorem hepatis sulphuris analogum.

§. 1837.

MISCELAM in matraccio minori intensius calefecit *Cl. MONNET* mediante calore balnei arenae; decantavit tum acidum salis bismutho inpraegnatum, limpidissimum, album. Evaporationi hanc in balneo arenae exposuit. Abacta parte superflua, accedenteque refrigerio enatae fuerunt crystalli oblongae non persistentes; chartae emporeticae inpositae, ut ficcesce-

E 3

*) RELIQUA, ubi de *praecipitationibus* agetur, adducam.



cescerent; humiditatem vero potius avide ex atmosphaera adtraxerunt; indidit hinc eas capsulae vitreae, ubi in deliquium mox abierunt ex integro. Destillationi exin sal hoc ipsum subjecit in retorta; ascendit sub finem pars, quod et *Cl. BRANDT* observavit. Retulit et *Auctor* nunc citatus binis partibus mercurii sublimati corrosivi, parteque una bismuthi invicem mistis, destillationique expositis butyrum exurgere legitimum bismuthi; solvi etiam calcem bismuthi in acido muriatico. Vera haec esse vidit *Cl. MONNET*, sed requiri, ut acidum ebulliat, simul vidit; saturare vero ex integro acidum calce hac nunquam potuit; solutio acidissima semper mansit, ac in crystallos coire ideo non potuit.

§. 1838.

SOLVITUR bismuthum in *aqua regia*, sive illico in aquam regiam injiciatur, sive sub solutione mediante aqua forti iteratis vicibus sal commune, aut acidum addatur salis. Arguit *Cl. MONNET* Chemicos alios negligentiae, quod sub solutione hac praecipitatum copiosius ad fundum ruere non addiderint. Solutionem instituit in aqua regia ex anatica dosi acidi nitrosi, acidique muriatici facta; praecipitatum examini subjiciens vidit, simile id vix non esse nitro bismuthico antea descripto. Readfudit solutioni spiritum nitri, eamque ulterius calori exposuit; solutum sic ex integro fuit praecipitatum salinum; liquidum evaporationi expositum crystallos easdem dedit, uti solutio ipsa bismuthi. Adparet hinc, ait, quod hoc non accidisset, si spiritus salis bismuthum in sese rapere valuisset ex acido nitroso. Praecipitatum autem copiosum deducit ex eo, quod acidum muriaticum aquam in se rapiat, hinc sal bismuthicum, in aqua parum solubile, prout enascitur, ad fundum denuo ruere

ruere cogatur. Idem vix non effectus oritur, dum acidum vitriolicum acido nitroso fuerit admistum.

§. 1839.

SOLVITUR bismuthum in *acido aceti*. Acetum, *Cl. POTT* ait, succus citri, tartarus, acetum lignorum &c. et regulum bismuthi, et copiosius adhuc mineram, coquendo resolvunt et exinde amaro venereo, stypticoque sapore imbuuntur, nullatenus vero dulci, saturnino, ut quidam scribunt. - - Praecipitationem a sale alkalino simul solutionem bismuthi per acetum monstrare paulo post subjunxit; unde quoque substantia haec semimetallica in superficie nigra redatur; corrodi praeterea bismuthum ab aceto in pulverem album, solutionem tamen hanc in aqua resolutam difficiliter in crystallos coire. Monuit demum, jubere alios, ut bismuthum prius in aqua forti solvatur, haec abstrahatur, residuum in aceto destillatione denuo, et postea in aqua solvatur, et crystallisationi exponatur; nihil tamen singularis exinde prodire.

§. 1840.

ALIA longe denuo protulit *Cl. MONNET*: acidum aceti, ait, inter menstrua bismuthi collocatum etiam fuit. Mentionem solutionis hujus *Cl. POTT* injicit, et post adsertum hoc dubium videri non deberet, an solutio haec re ipsa, aegre quidem, succedat. Misi ergo, Pottiano testimonio confisus, bismuthum in minimas moleculas tritum in matrarium, adfudi ad altitudinem trium digitorum acetum concentratum, clausi vasis orificium, illudque balneo arenae inposui. Calorem admovi per horas viginti quatuor fortiores; vidi demum, nec atomum solutam sic fuisse bismuthi; nam nec albo colore tingebatur aqua, cui acetum hoc infuderam, nec alkali fixi salis ope de-



jectum quidquam fuit. Ratus hinc sum, bismuthum, in calcem prius redactum, felicius solutum iri; operationem itaque priorem institui cum praecipito bismuthi per aquam obtento. Eundem autem vix non obtinui successum; vix color leviuscule vi-rens ope lixivii phlogisticati productus fuit. Qua itaque ratione adferere potuerunt Auctores, bismuthum plumbi fere adinstar sese habere ad acidum aceti, ac sal saccharinum quoque enasci. Errorẽ quidem hunc *Cl. POTT* jam refutavit.

§. 1841.

MANIFESTE itaque adparet diversitas sententiarum ac experimentorum *Cl. Cl. POTT*, et *MONNET*. Iungamus autem his examen hujus ejusdem rei adhuc aliud, quod *Cl. WESTENDORF* perfecit. Ad inpetrandam Marcasitae (seu bismuthi) solutionem, *WESTENDORF* ait, drachmis ejus duabus aceti concentrati uncia una cum dimidia superfusa fuit. Acetum protinus marcasitam adgressum est, actio autem mox desinit. Post digestionem duodecim horarum liquor subflavo colore tinctus a remanente marcasita separabatur. Residuum nigricans, ad auri colorem aliquomodo vergens, haud plus quam grana undecim pondere amiserat. Solutio sapore parum dulci gaudebat; cum reagentibus vero nulla sequebatur turbatio, nisi lateus color cum lixivio sanguinis, qui, addito minerali acido, coeruleus evadebat. Ad siccitatem abstracta sublimati quid forma florum alborum splendentium, saporis admodum dulcis adstringentis praebebat; reliqua parva terrae nigricantis portione. Sublimatum salinum in aqua solubile erat; ejus vero exigua quantitas inpediit, quo minus hac vice plura cum eo instituere potuerim experimenta: interim igne absque flamma colorata dispergebatur; solutioque argenti subfusco colore inde fuit turbata.

§. 1842.

§. 1842.

Vis solvens aceti concentrati, his subjungit, in unam tantum partem constitutivam marcasitae mihi agere videtur, et quidem in phlogisticam; ubi effectus ejus major est, quam acidi vitriolici, quod intactam fere marcasitam relinquit. *)

§. 1843.

Quod Cl. POTT majorem aceti, aliorumque acidorum vegetabilium vim solventem animadvertisse sibi visus est, et solutionem amaro, venereo septicoque sapore inbutam, quam dulcem ego deprehendi, illud quidem tam ab diversitate marcasitae, quam a majori puritate acidi derivari potest. Quod enim aceto a partibus suis oleosis sufficienter liberato, in combinatione cum diversis corporibus dulcedinem producendi virtus insit, passim jamdum adnotavi, atque porro etiam adnotabo. Hac occasione non possum non veluti in transitu monere, quod mihi non omnis affinitas acidi salis et vitriolici cum calce marcasitae deneganda videatur, licet praedictus Cel. VIR contrarium statuatur. Major gravitas specifica calcis, nec non ejus quantitas major ex solutione nitrosa per additionem salis communis, ejusve acidi, seu tartari vitriolati, ejusdemve acidi sententiam ejus refellunt. Verum quidem est, quod praedictorum praecipitantium admistionem nulla insequatur marcasitae praecipitatio, nisi solutio aqua sit diluta; nihilominus vero nova oritur in liquore solutio, salisque communis, seu tartari vitriolati decompositio; cujus rei ulterior liquoris a praecipitato residui disquisitio exhibere potest testimonium; quippe in priori casu nitrum cubicum,

E 5

*) CONTRARIUM huic sententiae eventum supra ubi de solutione bismuthi in acido vitriolico actum fuit, ex recensione tentaminum Monnetianorum vidimus.



bicum, in posteriori vero nitrum commune, modo tamen priori difficilius obtinetur. Porro, quando ex solutione cum spiritu nitri per aquae adfusionem nil amplius secedit, tum salis communis; aut tartari vitriolati admistione haud modica adhuc praecipitatio contingit, qua in priori casu marcasita sic dicta cornea producit. Occasio tale praecipitatum magna in quantitate comparandi huic observationi ansum praebuit.

§. 1844.

Ex nunc adlatis patet, *Cl. MONNET* dissertationem *Cl. WESTENDORF* sane non vidisse.

§. 1845.

Cl. WALLERIUS denuo retulit bismuthum ab aceto destillato ebulliente facile adeo ac plumbum resolvi, saporem autem huic solutioni, non uti quidam voluerunt dulcem, sed amarum, venereum, ac septicum esse. Descripsisse hoc videtur ex *Cl. POTT*.

§. 1846.

WISMUTHI, *Cl. POTT* ait, uncia semis cum ana *sulphuris* fusa duos scrupulos sulphuris retinuit, mixtura haec fuit tenuiter, et citissime, et efformat post effusionem teneras strias longitudinales in morem antimonii licet acutiores; cf. *Cl. HENCKEL*: eadem miscela deflagrata et inspissata nil vitriolati monstravit, adeoque totum sulphur absque relictione partis suae acidae calcinatione abit, quod et jam *Stahlius* advertit, quod sulphur nempe medioeri igne argentum et bismuthum relinquat.

§. 1847.

HEPAR sulphuris bismuthum pariter solvit. Actionem tum sulphuris, tum ejus hepatis in bismuthum tristi crisi notam nondum esse denuo dixit *Cl. BAUME*,
ut,

ut, si quis BAUMEUM in chemicis ducem unicum sequatur, ea quae ante triginta, pluresve annos cognita jam fuerant, nec hodie adhuc resciat, aut pro ignotis habeat.

§. 1848.

BISMUTHUM cum nitro in calcem vertitur, detonatio non magna exoritur, scoriam enatam carbonibus, aliove inflammabili mistam, liquatam facile regulinam formam induere, *Cl. POTT* perhibuit. Nitri et tartari ana unciam semis cum uncia una bismuthi miscuit, detonationi exposuit, pars in scorias redacta est; scoriae hae aceto colorem non dederunt coeruleum: residuum non scorificatum formam tenebram secundum longitudinem striatam exinde recepit. Calcem bismuthi nitri ope confectam in vitrum subflavescens fundi posse *Cl. WALLERIUS* reliquit.

§. 1849.

SAL commune effectum, *POTTIO* teste in bismuthum partim calcinantem, partim solventem, et sublimantem exferit.

§. 1850.

SALI ammoniaco bismuthum admistum, sublimationi expositum flores largitur salis ammoniaci bismuthicos. Dum pars una calcis bismuthi remiscetur cum partibus binis salis ammoniaci, miscelaque ex retorta vitrea destillationi submittitur, spiritus alkalinus volatilis penetrantissimus liberatur, sublimantur collo retortae adhaerentes flores, in fundo vasis remanet massa, ex acido muriatico et calce bismuthi composita.

§. 1851.

MISCUIT *Cl. GEOFFROY* partem unam bismuthi cum binis partibus mercurii sublimati corrosivi, adplicuit excipulum retortae in balneo arenae positae, destil-

76
destillationem instituit. Fluxit calore leniori miscela, nonnihil effervescens, colore subviridi tincta apparuit; igne per gradus intenso primum mercurius revivificatus, tum vero *butyrum bismuthi* adscendit. Butyrum hoc aëri expositum deliquescit, aquae instillatum sedimen ad fundum vasis dimittit, acido salis aquam subeunte, bismuthi erosam calcem ex amplexibus dimittente: destillationi autem denuo subiectum, partim adscendit, partim pulverem dimittit subtilem, coloris margaritarum orientalium; tertia vice operatione instituta pulvis iterum acquiritur colore pulchriori adhuc praeditus; repetitis sic vicibus totum bismuthi butyrum in pulverem hunc, et mercurium currentem reducitur. Pulvis dictus a pictoribus adhibetur margaritas pingentibus.

§. 1852.

SAL *fusibile microcosmi* bismuthum *via humida* non tangit; *via sicca* vero resolvit partim, ex scrupulis binis grana octo desiderari vidit CL. MARGGRAFIUS, scoriae subopacae erant, bismuthum remanens vix mutatum.

§. 1853.

ACIDUM *formicarum* actionem vix manifestam in bismuthum exseruit.

§. 1854.

CL. BERGMANNO teste Bismuthum in *acido formicarum*, adjuvante calore, primum obscuratur, tandemque albido pulvere tegitur, sed vix solvitur, nisi calcinatum, hoc autem parce susceptum non tantum ab alkalibus fixis distincte praecipitatur; sed etiam sub evaporatione crystallinum quadantenus obtinetur. Sal isthoc aquam subit, spiritum vini respuat et in igne nigrescens privatur acido, quod et
acida

acida et metalla omnia, exceptis aceto et argento, via humida facile diripiunt.

§. 1855.

Ab *acido sacchari*, observante eodem *Cl. VIRO*, regulus Bismuthi obnubilatur; calx sola ab illo solvitur. Sal enatum pulverulentum est, albens, aqua vix solubile, dimidia parte metallo constans. Instillato acido hoc in solutionem bismuthi nitrosam, horae intervallo fundum vasis obsident grana diaphana, polygona, eandem, uti pulvis dictus, obferentia indolem; aquae immersa non opacantur uti crystalli nitri bismuthici.

§. 1856.

SAL alkali fixum sufficienti copia adjectum bismuthum in scorias reducere jam *Cl. POTT* monuit.

§. 1857.

SAL alkali volatile bismuthum, forma metallica donatum, non referat, aut minimam solum dosin recludit, quum flavicante tamen colore tingatur; dejectam autem calcem bene solvit; bismuthi calcem ab alkalino phlogistico sale probe, in alkalino volatili liquore lubentissime solvi *Cl. MARGGRAFIUS* adnotavit.

§. 1858.

CIRCA praecipitationes bismuthi in genere tenendum est, dejici illud ex acidis magnam partem aquae solius adfusione; dejici et adfusione salium alkalinarum; monuit tamen *Cl. WALLERIUS*, ex solutione vitriolica nil praecipitari, idem et *Cl. POTT* dudum retulit. Ex solutione nitrosa dejicitur, si haec cum octo, aut novem partibus aquae purissimae fuerit remissa. Centenarius bismuthi ex acido nitri cum aqua praecipitatus dedit *Cl. SCOROLI* quadraginta septem-

grana



grana metalli perfecti absque ullo additamento reduc-
centis substantiae; quod a nemine alio Chemicorum
notatum legi.

§. 1859.

CALX dejecta ex acido nitri aut aqua pura, aut
spiritu salis ammoniaci vinoso, aut aquoso speciali
titulo *Blanc d'espagne, blanc des perles, blanc de
farde*, aut *magisterium bismuthi* dicitur, dum praeci-
pitatione ope salis alkalini fixi in deliquio soluti, seu
olei tartari per deliquium perficitur, *Magisterium
exurgit bismuthi* CLAVEI. Praecipitatum hoc scopo
cosmetico imprimis adhiberi solet; incommodi tamen
simul id habet, quod a vaporibus phlogisticis nigrescat;
an proprietas haec illustratur ex observatione
paulo ante adducta *Cl. SCOPOLI*, quod scilicet inter-
mixta calci semimetallica substantia phlogiston avidius
in sese rapiat? Ejusmodi cum aqua praecipitata calx,
Cl. PORT ait, vocatur ordinarie magisterium bismuthi,
item *blanc d'espagne*, item *blanc des perles*; sed ad-
dito inflammabili facile pristini bismuthi consistentia
splendida metallica redit: exsiccatio magisterii fiat in
umbra, nam si in sole vel juxta ignem siccetur, gry-
seum magis evadit, prout et edulcoratio sufficienter
satis instituenda est, alias extrorsum facile ab aëre ca-
num colorem adsciscit, quod tamen sufficienti facta
edulcoratione non extimescendum, prout et ejusmodi
color facta calcinatione perit, ut albedo restituatur.

§. 1860.

Dos magisterii bismuthi nigrescendi tanta est, ut
si in lagenula probe clausa solis radiis diutius exponatur,
sensim in superficie canescat, et nigrescat. Ex uncia
bismuthi drachmas novem praecipitati obtineri *Cl.
BAUME* adnotavit, ac ponderis augmentum ab adhae-
rentibus pertinacissime particulis aqueis deduxit.

§. 1861.

§. 1861.

OBSERVAVIT *Cl. Monnet*, bismuthum colore eleganter coeruleo ex menstruo deijci ope lixivii phlogisticati. Copiosi satis praecipitati hujus colorem aquae fortis debilioris ope dilutiorem reddere volebat, vidit sic colorem insensibiliter minui, liquidum autem innatans eadem proportionem virefcere; filtrato eo exigua copia praecipitati adhuc remanentis separata. Liquido per filterum misso adfudit idem phlogisticatum lixivium; praecipitatum sic productum fuit subtilissimum, coloris graminei; pallidius hoc adhuc priori coeruleum erat, ad fundum vasis ex integro collectum. Praecipitatum id ipsum denuo disparuit, superaduso acido nitri, solutioque, ut priori vice, vi-rebat. Praecipitatum productum tertia quoque vice iisdem cum phaenomenis, eademque encheiresi fuit. Videtur hinc, ait, praecipitatum id ipsum solubile esse in acido nitri contra generalem regulam a *Cl. Macquero* statuminatam post effectus, quos coeruleum berolinense exhibet.

§. 1862.

RELATIONEM bismuthi ad *aurum* vide in *capite de Auro*.

§. 1863.

RELATIONEM bismuthi ad *argentum* vide in *capite de ARGENTO*.

§. 1864.

RELATIONEM bismuthi ad *ferrum* vide in *capite de FERRO*.

§. 1865.

RELATIONEM bismuthi ad *cuprum* vide in *capite de CUPRO*.

§. 1866.



§. 1866.

RELATIONEM bismuthi ad *stannum* vide in *capite de STANNO*.

§. 1867.

RELATIONEM bismuthi ad *plumbum* vide in *capite de PLUMBO*.

§. 1868.

RELATIONEM bismuthi ad *mercurium* vide in *capite de MERCURIO*.

§. 1869.

RELATIONEM bismuthi ad *Antimonium* vide in *capite de ANTIMONIO*.

§. 1870.

RELATIONEM bismuthi ad *Zincum* vide in *capite de ZINCO*.

§. 1871.

RELATIO bismuthi ad *cobaltum*. Cobaltum et bismuthum fusione non uniuntur, sed quodvis ab altero sejunctum manet; mallei ictu separari facile ab invicem queunt; etsi unum ab altero, ceu cortice nucleum ambiente, obducatur. Interventu tamen reguli Antimonii, aut niccoli, cui cobaltum facile unitur, cobaltum et bismuthum invicem conjungi possunt. *Cl. WALLERIUS*.

§. 1872.

INSTITUIT vero plura tentamina circa substantiarum harum unionem *Cl. BAUME*. Fudit drachmas binas bismuthi, granumque dimidium reguli cobalti sulphurati; non coierunt ambo semimetalla, sed divisa ab invicem sic manserunt, ut bismuthum infimum teneret locum. Mallei limaeque ope separavit ea *BAUME*; regulus cobalti eandem, uti prius, sulphuris tenuit copiam; bismuthum autem pristina gaudebat indole. Exposuit insuper miscelam similem ignis actioni

actioni in cupella. Fusum bismuthum gyrabatur, ac in scorias vertebat cobaltum, subibat et ex integro cupellae compagem; quum vero margines cupellae a bismutho flavo tingantur colore, in hoc tentamine nigri conspiciebantur. Calx cobalti remansit in cupella, colore obscure fusco, in coeruleum nonnihil tendente, donata et concreta. Acido nitroso aegre solvabatur; solutio primum flavebat, solutionis auri adinstar; sensim vero colorem florum persicorum induebat; calcis bismuthi, roseae, portio quaedam fundum vasis petiit; igni haec injecta flavo tincta colore, nullum tamen sparsit odorem. Adparet ex tentaminibus hisce, subjungit BAUME, cobaltum majorem colere adfinitatem cum sulphure quam bismuthum, quum divellere hoc postremum sulphur ab illo non poterat sub fusione; adparet insuper ex operatione secunda, bismuthum accelerasse calcinationem cobalti, ac volatilisationem sulphuris, quum, finita demum calcinatione, nullum amplius vestigium sulphuris in calce cobalti detegi potuerit.

§. 1873.

RELATIO bismuthi ad *arsenicum*. Ignoram esse actionem harum substantiarum in sese invicem. BAUME dixit. Fusione illas conjungi non posse, etsi in mineris bismuthi omnibus arsenicum adsit, CL. WALLERIUS monuit. *Auripigmentum* demum cum portione anatica minerae bismuthi per retortam terream forti igne destillatum transire, ut arsenicum citrinum, CL. POTT retulit.

§. 1874.

RELATIO bismuthi ad *Niccolum*. Retulit de hac miscela CL. CRONSTAEDT, largiri eam regulum fragilem, fractura squamosum, micaceum. Soluta hac miscela in aqua forti, bismuthum aquae ope praeceps dari valet.



DE NICCOLO. *)

§. 1875.

HISTORIAM traditurus NICCOLI optimum fore putavi, si, quae circa substantiam hanc singularem, quae necdum satis nota est, haecenus instituta fuerunt tentamina, ex ordine prosequeretur.

§. 1876.

OCCURRUNT inter haec omnium primo dissertationes binae Auctore Cl. Viro AXEL CRONSTAEDT, quae sub titulo: *experimenta instituta cum minera quadam ex fodinis cobalti rarioris texturae parociae FARILA HELSINGELANDIAE*, inserta habentur *actis Acad. reg. scient. holmiensis pro ann. 1751. et 1754.*

§. 1877.

DISSERTATIO prima sequentibus absolvitur.

§. 1878.

IN fractura recenti alba minera haec est colore argenteo donata, nonnunquam subobscura, cupri Nicolai fere adinstar ex rubro flaret; textura granulosa est.

§. 1879.

AERI libero diutius exposita, efflorescentia viridi obsidetur. Elixiviata lixivium sistit intense virens; evaporatione praemissa vitriolum ex ea obtinetur coloris ejusdem, prismatibus longis compositum, aut
ex

*) BENE monuit Cl. WALLERIUS, ex ignorantia linguae cupri Nicolai vocem fuisse ortam, quum fuericum Nickel non hominem, sed spurium, aut nothum designet, ut adeo nil nisi cuprum spurium hoc termino subintelligatur.

ex binis aut ex ternis lateribus celtis fere adinstar oblique terminatum in extremitatem scindentem.

§. 1880.

VITRIOLUM ante dictum colcothar dilute gryseum, dum calcinatum fuerit, exhibet; triplo fluxus nigri addito regulum praebet illud ad 50 pro 100.

§. 1881.

REGULUS hic externe flavicat, fractura gaudet argenteo nitore praedita, iridescente (skyggande.), bismuthi adinstar tessellata; durus est et sub malleo fragilis, a magnete parum adtrahitur, ustulatus vertitur in pulverem nigrum, quae ambae dotes a ferro oriuntur, quod vitriolum subiit. Ab aqua forti solvitur, uti et ab acido muriatico et aqua regia; acido salis colorem viridem intensum communicat, ruente simul ad fundum pulvere nigro, qui cannulae ferruminatoriae examinatus ope phlogiston cum quadam metalli ipsius parte prodit.

§. 1882.

TERRA metallica vitrioli cum borrace fusa, vitrum largitur opacum, dilute fuscum.

§. 1883.

OVUM ipsum sub ustulatione dimittit primum vaporem sulphureum purum, dein ex albo flaventem male olentem. Quodsi calori majori abs agitatione expositum teneatur, ramificationes, coralliorum adinstar, enascuntur, metallo antea descripto compositae; diutius calcinatae colorem induunt dilute viridem, cohaerescunt, ac tinnientes evadunt. Reliquum minerae sub ustulatione dilute fuscescit, magnamque ferri continet copiam.



§. 1884.

RAMIFICATIONES hae, seu metallum sicustum regulum subpeditant, si cum inflammabilibus fiat fusio, eundem, uti ex vitriolo obtineri antea dictum fuit: ferrum separatur ustulatione quadam, ac unica, vel duplici demum fusione cum borrace, ubi vitrum obtinetur fuscum.

§. 1885.

SEPARATO ferro, regulus residuo borraci colorem pulcherrimum coeruleum largitur, quo demonstratur, cobalti quid simul esse immistum; nova additione borracis in testa, aut cannulae ferruminatoriae opere vexatus relinquit regulum, vitrum coeruleo adeo colore jam non tingentem, nec in vitrum ex facili adeo abeuntem. Regulus hic ultimus argenteo magis colore gaudet, compactior, et splendens magis, quam prius est: malachitis adinstar colore viridi calcinatur, ac majori calori expositus, uti prius de minera dictum fuit, in ramificationes extollitur. Crystallales colore metallico splendente *Cl. CRONSTAEDT* observavit. In cupella plumbi in morem se non gerit; a borrace non facile adeo in scorias vertitur, obducitur tamen sub finem colore ex rubro fuscescente, aut hyacinthino.

§. 1886.

Aqua forti solutus solutionem intense viridem producit; *) cuprum nec in ferrum nec in Zincum deponit;

*) PULVEREM simul ad fundum cadere nigricantem, *Cl. ERXLEBEN* dixit; ego quidem hoc nunquam vidi; nec *CRONSTAEDTIUS*, quantum scio, hujus meminit. Ope solutionis niccoli factae in acidis characteres virides posse scribi, persistentes *Cl. WALLERIUS* notavit.

deponit; ab aqua pura non praecipitatur; cum sale alkalino fixo solutione mista pulvis cadit paulatim de viridi albescens.

§. 1887.

Dum spiritu salis ammoniaci dejectum fuit, atque sufficiens, ei resolvendo, spiritus hujus copia adfunditur, vel dum spiritus nunc dictus praecipitato edulcorato admistus fuerit, colore cyaneo tingitur; solutione vero decantata, ac humiditate evaporando abacta, ex sedimentis nil obtinere potuit *Cl. Vir*, quo praesentia cupri demonstraretur.

§. 1888.

Ab oleo vitrioli, ac aceto destillato regulus hic solutus non fuit; patere tamen videtur ex antea, de vitriolo, adlatis, acidum vitriolicum aut valde concentratum, aut forsan dilutius, menstruum esse substantiae hujus metallica. Amalgamationem cum hydrargyro pariter non subiit.

§. 1889.

In igne validiori volatilis nonnihil est, ac fumum emittit ex albo flaventem; id vero tum solummodo evenit, quando folles nulli adhibentur, alias enim in calcem non nisi abit. Si cobaltum adhuc residuum inhaereat, unitur cum bismutho, et massa exfurgens colore profundiori, ac *iridescente* *) magis donatur; hinc regulus hic substantiam praebet intermediam, ejus interventu uniatur bismuthum cum cobalto, uti etiam tentamina de regulo antimonii evicerunt.

F 3

§. 1890.

*) NOVAM hanc vocem excogitavi, quum alia nulla occurreret apta, quae *succicum terminum skyggande*. apte hic loci exprimeret.



§. 1890.

Si ferrum ex regulo primum obtento ustulatione cum sulphure abigere velis, maxima quidem ferri pars deflagrat; antequam tamen hoc factum fuerit, reliquum redintegratum ramulorum specie efflorescit, colore viridi demum calcinandum.

§. 1891.

REGULUS *cobalti*, fusione cum dupla, aut tripla parte ramificationum harum unitus, regulum constituit granulofum, colore ferreo donatum, in acido nitri colore intenso rubro solvendum, uti regulo *cobalti* solemne plerumque est, in ochra flores *cobalticos* exhibentem. Notari meretur, quod color viridis denuo evanescat.

§. 1892.

DICTA haftenus retulit CL. CRONSTAEDT in dissertatione *prima*; quae sequuntur, ex *altera* excerpti, omiſſis quae minerae descriptionem unice concernent.

§. 1893.

NICCOLUM *cupri* maximam in sese continet copiam *veri niccoli*; ex ustulata hac minera niccolum calcis et borrae anatica dosi invicem mistorum interventu optime extricatur. Regulus, qui sub nomine *Speiſe* notus est, sub fusione *cobalti* in vitrum ad fundum vasorum descendens, componitur maximam partem niccolo; admista simul majori minorive copia *cobalti*, ferri, sulphuris, ac arsenici.

§. 1894.

SULPHUR a niccolo valido nisu adripitur; calx niccoli bene ustulata cum sulphure unitur, aut sub testudine in testa reducitur. Miscela talis praeter firmitatem reguli convexam formam suscipit, latereque
exte-

exteriori splendet. Texturam fractura prodit chalybi aemulam, flaventem. Calore calcinationis vertitur facile in calcem; conminuta scintillas rubras inpetuose, ante folium tubum eiecit; vitro instrato post fusionem per mediam horam continuatam pondus retinuit; vitro colorem nullum communicavit; et si ferum in miscela adforet, a magnete tamen non adtrahendum, donec separatum fuerit sulphur.

§. 1895.

NICCOLUM solutum in tartaro vitriolato, aut hepate sulphuris, fluorem constituit ex flavo virentem, metallicum: soluta hac massa per deliquium in aëre libero, aut ope aquae adfusae, squamae metallicaë sponte ad fundum ruunt; coeunt hae fusae cum frita maximam partem in massam, regulina niccoli parte, ac sulphure compositam.

§. 1896.

NITRUM cum niccolo non ulterius detonat, sed spumescit, ac si sulphuris adhuc pars adforet. Diutius hoc durat, si regulus purus fuerit; sulphur autem recludens a nitro citius resolvitur in fluorem virentem.

§. 1897.

PURISSIMUM niccolum non funditur antequam probe candeat. Gravitas ejus specifica ad aquam depressa fuit uti 8, 000, aut 9, 000; circiter uti 8, 500, ad 1, 000. Colore tum donatur albo, nonnihil rutilante, si cum argento comparetur: textura compacta est, in fractura fasciculos splendentes exhibens.

§. 1898.

MISCUIT *Cl.* CRONSTAEDT niccolum purum cum metallis ac semimetallis reliquis omnibus, repetitio-



ne vero hac superfedere hic possum, quum ad quodvis metallicum corpus relatio, quam habet ad niccolum, adlata jam fuerit.

§. 1899.

CALX niccoli abs addito in calcem fusa non fuit, sed pulverulentam formam per horam dimidiam folibus acta retinuit; color vero viridis in obscure fuscum mutatus fuit. Nec addito vitro in vitrescentiam pronior est; borra tamen a regulo niccoli dilute rubrofuscescente colore tingitur; majori igne vitrum hoc tortum violaceum, demum vero limpidum fit, uti a magnesia fieri adsolet. Niccoli tum calx, tum et regulus cum minera plumbi fusioni expositus, plumbum avide adtraxit, et separari ab invicem ambae substantiae metallica non amplius potuerunt.

§. 1900.

QUUM itaque, ad finem diatribes primae, ait *Cl. CRONSTAEDT*, cognitorum corporum metallicorum et semimetallicorum nullum omnino, dum purum fuerit, dotibus instruatur, quibus gaudet niccolum, (quo imprimis pertinet color viridis in lixivio antea dicto vitriolico, in colcothare, in calce, ac in ipsa solutione; tum et excrecentia dendritica, coralliformis substantiae hujus, calori majori expositae) regulus hinc, separato ferro et cobalto remanens, ac dictas nunc dotes exferens, pro semimetallo novo haberi tamdiu debebit, donec methodum quis ostenderit, qua compositio prorsum similis ex notis duodecim metallis ac semimetalis confici queat. Haftenus *Cl. VIRI* tentamina, in dissertationibus prius dictis exposita.

§. 1901.

ADDITA vero his cogitata quaedam habentur in *Compendio Mineralogiae Cl. CRONSTAEDT*, quae hinc adjungi

adjungi adlatis omnino debent, ut completa, quatenus fieri poterit, substantiae hujus peculiaris habeatur historia. Cobaltum, ait, Bismuthum ac niccolum in eadem fodina plerumque occurrunt. Hinc fit, quod cobalto, reliquorum utilissimo, vitrificationi exposito niccolum simul comitans, ex indole sua sulphur ac arsenicum secum rapiat, quum substantiae hae sub ustulatione abactae non fuerunt, atque sic *Speise* constituat. Dum nunc alia adhuc accedunt corpora metallica, partem calcium bismuthi et cobalti reducunt, tum vero niccolum, seu substantia intermedia uniens semimetallorum horum sibi invicem oppositorum, secum in substantiam *Speise* admiscet ac introducit. Enascitur exin diversitas illa contentorum in hac eadem substantia; enascuntur simul hinc ideae inadaequatae, quas experti minus tum de tota hac miscela, tum de quavis ejus partium sibi formant. Retinere hinc malunt vetustam niccoli cupri descriptionem, quam recipere conclusionem ex *Cronstaedtianis* tentaminibus deductam (paulo ante positam) Rationem tamen sufficientem me habere credo, ut oppositam sententiam teneam, tum quod exosi mihi jam sint termini illi vagi, quibus corpora nondum probe cognita *refractaria*, *rapacia*, *arsenicalia*, *terrae metallica irreducibiles* &c. vocantur; tum et quod nullam adhuc viderim substantiam, aut miscelam metallicam, quae

- 1.) IN igne mutetur in calcem virentem.
- 2.) LARGIATUR vitriolum, cujus colcothar et in igne maneat viride;
- 3.) cum sulphure facillime in singularem adeo mineram abeat, uti quidem massa ex hac unione exsurgens, *Nickelspeise* dicta, est;
- 4.) DEMUM cum argento non coëat, sed firmiter solum fusionis ope, adhaerescens eidem reddatur.



§. 1902.

RATIO autem, quod niccolum non melius hactenus innotuerit, in eo versatur, quod a cobalto ac ferro liberum inventum nondum fuerit. Forsan et *platina del pinto* in locis quibusdam, ubi aurum ex natura sua jam pallidius est, cum niccolo haeret conjuncta? Neganda hinc talium corporum existentia non est, quum detecta non fuerit ratio, qua simplicia fisci queant: absurdum enim hoc adeo foret, ac si quis in regione aliqua, ubi argentum nonnisi ex galenis obtinetur, existentiam specialem ejusdem ex his metallis negare, aut unum ab altero generari, defendere vellet. Notari caeterum meretur, spiritum salis ammoniaci, sub solutione praecipitatorum niccolinorum colore cyaneo tingi, caeterum vero vestigium cupri nullum exhibere; quod tamen si dosi minima niccolo consulto adjectum fuerit, sub vitrificatione illico in conspectum prodit, quum a niccolo ipso mox recedat, in scorias abeat, et vitro sub initium colorem ex rubro fuscum obscuriorem, dum vero igne majori urgetur, diaphanum, ac, more solito, viridem largiatur.

§. 1903.

JUNGAM nunc *Cronstaedtianis* hisce observatis nonnulla circa aliorum de substantia hac eadem sententias.

§. 1904.

CL. CRAMERUS niccolum mineram pronuntiavit arsenicalem, cobalto, pauciori cupro, et sulphure inpraegnatam; eamque mineris cupri spuris accensuit, quod cupri parcam adeo recludat copiam, ut sumtus non compensentur, si quis ex minera hac extrahere illud vellet; hinc verum niccolum nondum novit.

§. 1905.



§. 1905.

Cl. WALLERIUS, in *Mineralogia*, sub nomine *minerae arsenici rubrae*, *niccolum cupri* inter mineras cupri accessorias, nominatè solum recensuit: inter *mineras* vero *arsenicales* substantiam hanc verbis describit sequentibus: arsenicum sulphure et cupro mineralisatum, minera difformi, aeris modo rubente: *Minera arsenici rubra*, *cuprum Nicolai*; WOODWARD. Colore, subjungit, gryseo, sat rubello donatur, cupro fere similis; arsenici magnam satis copiam continet, paucius sulphur, paucissimum cuprum. Niccolum cupri cobalti etiam quamdam partem subin recludit; unde et aliqui Auctores inter mineras cobalti substantiam hanc referunt; reperitur tamen et abs ullo cobalti commercio. Cupri niccolum vitrum saturate coeruleum praebet. Patet ex his, Cl. *Virum, tum temporis*, verum niccolum nondum descripsisse.

§. 1906.

Cl. JUSTI, niccolum miscelam esse pronuntiavit eupri, regulinae cobalti partis, (*Speise*) arsenici, ac ferri.

§. 1907.

Cl. SAGE niccolum ipsum specialem substantiam mineralem non esse, sed compositam arsenico, cupro, ferro, et cobalti prae reliquis maxima parte, post *Cronstaedtianos* labores nuper adhuc in *Elemens de mineralogie docimastique* pronuntiavit. Vide etiam ejusdem Auctoris *Mem. de Chymie* 1773.

§. 1908.

Cl. SCOPOLI niccolum semimetallorum ex familia in *Principiis Mineralogiae systematicae ac practicae* denuo expungendum dixit; e. f. p.

§. 1909.



§. 1909.

CL. HAMPE cuprum Nicolai cupro, ferro, arsenico, et cobalto componi nuper dixit. Pro synonymis hujus substantiae posuit *Mineram cupri arsenicalem, pseudo-cobaltum, cobaltum aeris modo rubens.*

§. 1910.

SENTENTIAE tamen nunc enarratae convincentibus argumentis refutatae denuo fuerunt; et adserti *Cronstaediani* sua confirmata exin habetur fides. *)

§. 1911.

EDITA *Vindobonae* 1770. *Dissertatio* fuit *inauguralis* CL. KAIM *de metallis dubiis*; dissertationis hujus *caput tertium de NICCOLO* agit. Enarrantur ibi omnium primo characteristicae notae, quas CL. CRONSTAEDT circa niccolum proposuerat; miratur CL. KAIM, quod III. LINNAEUS in *System. Naturae* T. III. p. 146. niccolum denuo inter cupri species rejiciat, quum tamen cobaltum, proprio nomine minus dignum, distinctum metalli genus constituerit. Nec jam, in CL. JUSTI, merito acerbe invehit, ait, propemodum tolerari potest nimium illud vituperandi et carpendi studium, quod non primus in scriptis Domini JUSTI observo, quum denuo hoc semimetallum, ut alia fere omnia, in dubium vocat; audiri tamen debet, ut, ex suscepti instituti mei ratione, eidem respondeatur.

§. 1912.

SENTENTIAM suam, reliquis contrariam, eo magis firmaturus, absurdo sane consilio JUSTI fuisse probat,

*) AGITUR his solum de illis, qui niccolum semimetalli specialis nomen non mereri pronuntiarunt. Qui vero cum *cupro Nicolai* confuderunt, refutatione non indigent.



bat, mineram, e qua CRONSTAEDTIUS niccolum eduxerat, mineram cupri sic dicti Nicolai fuisse; qua quidem de re, KAİM ait, tanto minus fuisset cavilandum, quum CRONSTAEDTIUS praeter ochram et vitriolum niccoli non aliam adferat ejus matricem, quam mineram sic dicti cupri Nicolai; ut adeo, ipsis Mineralogis Suecis nihil aliud adferentibus, triumphus Domini JUSTI haud vehementer plausibilis sit. Objectionibus a JUSTI propositis omnibus nil minus quam, quod evincere volebat, revera evincitur.

§. 1913.

QUUM vero KAİM ipse *Justiana* argumenta audienda esse prius dixerit, ut responderi eisdem queat; nunc vero levi pede ea tangat, nec sane pro illorum refutatione, ordine quo proponi debuissent, multum adtulit; et argumenta illa, et eorum refutationem ex *Cl. WALLERII opere Chemiae physicae* hic inferere malui.

§. 1914.

AIT JUSTI, substantiam a CRONSTAEDTIO descriptam iisdem gaudere proprietatibus, uti niccolum cupri — quum vero minera niccoli ipsum niccolum cupri sit, easdem omnino in plurimis habebit dotes; ex quo simul adparet, *Cl. JUSTI* ne perspexisse quidem, quid CRONSTAEDTIUS pronuntiaverit, quum tamen refutandum hunc eundem sibi fumsit; hinc loquutum fuisse de re, quam nullatenus noverat.

§. 1915.

SECUNDO loco JUSTI dixit, regulum ex niccolo cupri eliquatum aquam fortem, et aquam regiam colore viridi tingere ratione cobalti, inprimis vero cupri, quod in menstruis his ipsis virescit, et solutiones reddit virides. Admittens haec, admittit simul,
quid



quin tamen ad hoc adtendat, vel ipse sciat, niccolum diversam a cobalto substantiam esse, de quo inepte dicit, quod aquam fortem et aquam regiam colore viridi tingat, quum tamen menstrua haec ipsa rubro ab illo tingantur colore. Quodsi dicere quis vellet, colorem viridem oriri a cupro; respondeat prius, cur vitriolum coeruleum acidi vitriolici ope non enascatur, sed viride?

§. 1916.

TERTIO loco JUSTI dicit, ramificationes illas, ac vegetationes coralliformes repetendas esse a Zinco simul inmixto — Adserti vero hujus argumentum nullum adferre potuit; quum et substantiae metallicae aliae quibusdam sub circumstantiis in ramificationes, eadem, uti Zincum, ratione germinent; adferre autem debuisset JUSTI, quandonam, et quibus demum sub circumstantiis Zinci minera, aut Zincum ipsum in ramificationes abeat? quod vero ex Zinco flores obtineri queant, res toto coelo diversa est, nec ramificationibus niccoli exponendis ullo modo applicari valet; ignorantiam suam, ait *Cl. WALLERIUS*, in hoc capite aperte nimis prodit *Cl. JUSTI*.

§. 1917.

QUARTO demum JUSTI obposuit, cuprum aperte in niccolo praesens demonstrari posse tum ex colore viridi, quem spiritus ammoniaci salis, a cupro colore cyaneo tingendus, inde acquirit; *) tum ex virifica-


*) VITIUM hic subesse videtur typographicum; nam colore cyaneo spiritum hunc alkalinum a niccolo, cupri adinstar, tingi antea dictum fuit; et phaenomenon hoc ipsum JUSTI pro sententiae suae confirmatione adsumsit. Aut ponendum ergo fuisset loco *viridis coloris cyaneus*; aut, uti ex adferenda statim obje-

trificatione cum borrace, ubi vitrum enascitur ex rubro fuscum, quum borraci mistum cuprum, nisi in fusione diutius detineatur, simile prorsus vitrum largiatur; tum demum ex eo, quod niccolum amalgamationem cum mercurio, uti cuprum, respuat. — Argumenta haecce omnia, Cl. WALLERIUS ait, exiguam sane meretur attentionem: colorem enim viridem, quem aquae forti niccolum communicat, quod adtinet, prius jam, ut alia nunc taceamus, dictum fuit, vitriolum etiam caeruleum, ope olei vitrioli obtineri debere, si color hic a cupro oriretur, quum tamen obtineatur viride, quum tamen acida mineralia omnia viridi colore a niccolo tingantur. Verum quidem est, spiritum salis ammoniaci colorem cyaneum indipisci a niccolo: an vero color hic, sub solutione enascens, oriatur et a cupro, alia denuo quaestio est, ad quam quidem negative respondere poterimus tamdiu, donec unus ex *Justianis* adseclis *) aut reductione, aut alia quacunque demum ratione cupri quoddam vestigium in praecipitato demonstraverit. Vitrificatio cum borrace aperte conmonstrat, cupri nil adesse, quum vitrum, igne validiori tortum, colorem denuo deperdat. Amalgamationem autem quod adtinet, demonstratum prius jam fuit (*vide caput de cupro*), amalgamationem cupri cum mercurio sat facile perfici posse; quod cum niccolo non ex aequo fit. Haec objecta Justiana, et eorum refutationes ex Cl. WALLERIO.

§. 1918.

objectione adparere videtur, poni debuisset: tum ex colore viridi, quem aqua fortis, et colore cyaneo, quem spiritus ammoniaci salis &c. una cum reliquis, quae in textu dein subsequuntur.

*) CONSULTO hoc posui, quum ipse JUSTI ab eo tempore, quo Cl. WALLERIUS haec scripserat, mortuus jam fuerit.



§. 1918.

SCOPOLIANAE sententiae refutationem sibi sumit *Cl. WEIGEL*. Rationes, cur ex semimetallorum speculum familia niccolum excludere velit, sequentes *Cl. SCOPOLI* adtulit; quas ex tentaminibus cum niccolo styrensi institutis sese deduxisse ait:

- 1.) SUB calcinatione niccolum, quod exploravit, in ramificationes non excrevit, sed intumuit solum, colore subterreo tinctum fuit, et vaporem densum, arsenicalem exhalavit.
- 2.) Ex ustulato magnes plures moleculas, quam ex ipso crudo, extraxit.
- 3.) SUB calcinatione triginta ad triginta sex librae pro centumpondio amissae fuerunt.
- 4.) CUM plumbo scoriam dedit impuram, ex nigro gryseam.
- 5.) Ex centumpondio librae novem, vel et duodecim arsenici crystallini fuerunt obtentae.
- 6.) Ex minera ustulata additionibus congruis regulum ferri cupro mistum obtinuit.
- 7.) CUM acido vitriolico non multum effervuit, colorem dedit menstruo rubrum; residuum fuscum erat.
- 8.) CUM aqua forti diu durans, ac validior enascebatur effervescencia; solutio flavicans erat cum residuo albicante.
- 9.) SPIRITUS ammoniaci salis cyaneus ab eo erat.
- 10.) CUM arena, et sale alkalino dedit vitrum coeruleum.

§. 1919.

ETSI vero, inquit jam *Cl. WEIGEL*, phaenomena haecce ab illis, quae *Cl. CRONSTAEDT* descripserat, satis diversa partim sint, concludere tamen exin plus non licet, quam niccolum, a *Cl. SCOPOLI* examinatum, purum non fuisse, sed aliis metallicis substantiis,

tiis, v. c. cobalto, uti ex num. 7. et 10. adparet, mistum: quum praeterea a CRONSTAEDTIO tradita, quorum varia *Cl. SCOPOLI* reticuit, sufficientia praebent characteristica signa, quae discerni essentialiter niccolum, ab illo sub examen revocatum, queat a semimetallis aliis; manifeste inde sequitur, substantiam, quam *Cl. SCOPOLI* disquisiverat, vel niccolum prorsus non fuisse, vel fuisse, sed impurissimum. Ex reductione substantiae per spiritum salis ammoniaci extractae alia fors edoctus fuisset *Cl. SCOPOLI*. Haec *Cl. WEIGEL*.

§. 1920.

Cl. BAUME niccolum miscelam substantiarum aliarum metallicarum pariter dixit: verum experimentum, quo adfertum confirmaretur, adducit nullum; et sententia BAUMEANA in re dubia decisiva vix erit; inprimis dum praenuntiata solum, nullatenus vero demonstrata, aut experimentis convincentibus firmata est.

§. 1921.

ADFERRI nunc debent recentia tentamina *Cl. KAIM*, ex dissertatione antea citata excerpta.

§. 1922.

QUOD praesens, KAIM ait, semimetallum tot certe notae distinctivae a *Cl. CRONSTAEDT* assignatae sunt, ut reliqua certe omnia metalla vix tot a se mutuo discernantur differentiis, quam hoc solum a reliquis omnibus. Licuit tamen mihi nonnullas adhuc novas adjicere, qui puriorem multo niccoli mineram, quam *Cl. CRONSTAEDT* ex *Schneeberg Saxoniae* obtinui. Erat lapis coerulescens, inquinans, non tantum viridi colore hinc inde efflorescens, sed spathum etiam viride inter particulas suas metallicas intertextum habens: hae particulae partim sparsae, partim in venas densas collectae fulvae erant, ac nitidissimae; quem



alias colorem nonnisi argentum cupro mistum prae se fert. — Adfertur hoc sub nomine *cobalti tinctorij* (farbenkobolt) etsi satis inmerito, quum nec atramentum sympatheticum det, nec vitrum coeruleo tingat colore; divenditur autem tinctoribus austriacis a mercatore quodam ejus loci pretio valde magno, nescio tamen ipse, in quem usum. Ut hanc conspexi, minerae mihi nunquam antea visae adlectus novitate, magnam quantitatem, quae omnibus probis docimasticis sufficere posset, numerato pretio mecum abstuli. Ob nomen illi a mercatore tributum usitatam cobaltis tostionem praemissi, ut, abacto prius omni sulphure et arsenico, certius obtinerem regulum; obtinui copiosum; sed, neglecta licet tostione, quantitatem tamen non minorem. Hunc regulum quam saepissime cum borrace fudi; scoria quidem nonnihil tingeatur*), sed puto, id magis tigillis nostris cellensibus, quae ex psevdogalena parantur, quam regulo adscribendum; nam hic nequaquam pondere seu volumine est imminutus. Multo proinde purior haec minera, quam minera vulgaris cupri Nicolai fuit, utpote quae nunquam non alia quoque varia metalla praeter niccolum in sinu suo fovet. Cum hoc proinde meo purissimo femimetallo, quod ad libras usque tres e mea minera obtinueram, experimenta *Cronstaedtiana* reiteravi, et pleraque eodem cum eventu succedere vidi. Solum quod habet de tinctura coerulea spiritus salis ammoniaci tentamen mihi nunquam successit. Ut taceam, colorem flammae, quae a cupro semper coerulea fit, hic nequaquam observatum, et regulum in pulverem comminutum cum spiritu salis ammoniaci concentrato infusum, digestionem fervida per plures horas tentatum, nunquam coeruleum colorem largiri, quem cuprum eidem spiritui communicat promptissime: etiam a massa

ex

*) COLOR, quo tincta fuerat scoria, assignari tamen hic potuisset.

ex aequalibus cupri et niccoli partibus colliquata, in balnei maris aptissimo ad solutiones calore, nec quidquam tingitur; ut eo eventu, quod per transfennam dixerò, in dubium merito revocari possit tritum Doëimastarum principium: cuprum ubicunque latens spiritus salis ammoniaci adfuso detegi; quum solo certe niccolo obvolutum constanter hoc menstruum repellat. Sed ne hoc quidem praetendit ipse *Cl. CRONSTAEDT*, ut potius niccolum aqua forti prius solutum requirat, cui tantum adfundi spiritus salis ammoniaci jubet, quo non solum praecipitari omne niccolum, sed et rursus solvi queat; ita obtineri solutionem coeruleam, instar soluti eodem menstruo cupri adscrit. Verum imitatus experimentum exactissime, praecipitari ex solutione niccolum, inde, copiosiori adfuso spiritu, rursus solvi, semper quidem vidi, verum solutionem constanter observavi coloris illius viridis esse, qui omnibus etiam aliis niccoli productis proprius est. Suspensus ergo sum, fortene in minera *Cl. CRONSTAEDT* tot aliis ad niccolum non pertinentibus metallis conspurcata etiam cuprum lateat? In eum finem fuso niccoli regulo, exiguum limaturae cupri partem inspersi, quae promte cum niccolo confluit. Dissolvi miscelam hanc metallicam aqua forti; solutio jam non flavo viridis, qualis meri niccoli esse solet, sed jam coeruleo-viridis erat. Ex hac solutione niccolum adfuso spiritu salis ammoniaci dejecti, atque uberiori adfusione iterum redissolvi; obtinui solutionem pariter viridescentem; sed quae deposita niccoli ochra, cui forte solvendae omni spiritus non sufficiebat, vivacissime coerulea superfuit, adeo venerae aemula, ut nihil crederes niccoli, cujus tamen erat plurimum, metallo infuisse; quod certe non solum docet, *Cl. CRONSTAEDT* regulum, cujus nempe per spiritum salis ammoniaci solutio pariter coerulea erat, aequè cupro fuisse conspurcatum, sed et sum-



nam interesse inter aes cyprium et niccolum purum differentiam, quod, licet per haecenus dicta jam satis clarum sit, tamen novo adhuc confirmavi experimento; per liquorem nempe probatorium, ex coerulei berolinensis magistraliter parati pigmento, et lixivio salis alkalini fixi factum, quo omnium commodissime, et exactissime, solo praecipitatorum metallorum colore diversitates discerno. Hic liquor nunquam alio niccolum, quam flavo-viridi colore dejiciens, cuprum eidem inmixtum statim detegit; equidem tantilla licet parte cupri, vel sub fusione addita, vel solutioni inmixta, statim prima instillata gutta rubrofuscas foeces praebet, quae uberiori adfusione lixivii probatorii non solum in proprium niccolo viridem colorem non redeunt, sed potius in magis rubrum, ac pene sanguineum transeunt; ut et hoc experimento niccolum plane in conspectum non veniat, pigmento omni ad cuprum adhaerente. Quodsi ergo cuprum, tantilla parte adjectum niccolo, statim differentiis suis a niccolo qualitatibus detegitur, sane conclusio in aprico est, diversissimam a cupro substantiam metallicam niccolum esse. Constantes esse has niccoli notas, inde clarum sit, quod omnia haec, qualicunque arte obtenta producta, igne et fusoriis salibus tractata constanter iterum redeant in eundem, ex quo nata sunt, regulum.

§. 1923.

INQUISIVIT dein haecenus adductus AUCTOR, an non arte parari posset substantiarum aliarum metallicarum miscela, regulus niccolo vero aemulus. *) Niccoli minerae, ait, non minus quam cobaltinae arsenico scatent; suspicio ergo nemini non in mentem venire

*) TENTAMINA circa hanc eandem rem a *A. BERGMANN* instituta inferius latius adducentur.



venire debet, si cobaltum ex ferro per arsenicum producatut (*v. caput de COBALTO*) niccolum ejusdem interventu e cupro gigni. Limaturam itaque cupri, cum tribus arsenici albi in pulverem reducti partibus remissam, in crucibulo igni commisi; cuprum hoc factu fustum est multo celerius, minorique calore, quam fluore quocunque addito sperari potuisset. Conservavi cuprum hoc in suo fusionis statu eousque, donec omnes fumi arsenicales penitus cessarunt; ita expectavi me obtenturum cuprum album fragile, fama ita ferente, hoc metallum ab arsenico dealbari; verum effusa in fusorium conum massa cuprum meum suo proprio colore rufo, ac tenacitate pristina malleabili recuperavi; dissolvi hoc insuper variis in acidis, praecipitavi variis cum lixiviiis, et inprimis meo cum probatorio saepius commemorato; sed obtinui semper easdem solutiones, eadem praecipitata, quae ex cupro puro. Ex quo certe vidi, arsenicum in corpus hoc metallicum nullam habere potestatem. Quum vero satis recorderer, cuprum album non paucis occurrere in Germania nostra locis, non arte, sed natura ipsa productum, Mineralogorum variorum opera evolvi, ut ab iis docerer, quibus partibus constitutivis hoc constaret; inveni tandem egregio in *Anonymo* (*Cl. CRONSTAEDT hic a KAIMIO subintelligitur*) cujus toties mentionem facere cogor, tale album cuprum cum arsenico ferrum inmixtum habere. Suspiciatus ergo sum, ferrum, tantam habens cum arsenico adfinitatem, eidem forte ingressum in cuprum patefacere. Conjectura non destituebatur fundamento; equidem experimentum susceptum optime successit, et metallum album rufescens, propemodum instar niccoli, praebuit; nec abludebat a niccolo solutionis color, quippe qui etiam flavoviridis erat; immo vix non et praecipitatio cum spiritu salis ammoniaci eundem habebat eventum; equidem pariter flavo-viridis esse



videbatur, ut eo viso jamjam gloriarer, me veram niccoli crasin detexisse. Verum, dum praecipitatum illud, quod largiter adfuso spiritu salis ammoniaci, quantum patiebatur, redissolutum est, filtro commisi; tinctura transiit vivacissime coerulea, cupreae ut ovum ovo aemula, flava ochra in filtro restitante; ex quo intellexi, viridem colorem tincturae ex flava ochra, partim liquido innatante, partim ad latera vitri adhaerente, dependisse; tincturam vero reipsa nunquam non coeruleam fuisse. Sed et altero praecipitationis modo, per lixivium meum probatorium cuprum forma praecipitati rubro-fusci statim in conspectum venit, primis lixivii guttis instillatis, cupro majorem, ut videbatur, adfinitatem cum tingente materie habente, quam ferro; sed uberius instillato lixivio quoque nonnihil coerulei in conspectum venit, verum quod ab obscuriori cupri colore statim iterum absorbebatur. Ergo utroque lixivio cuprum a ferro, licet intime unitum, redivellitur; quod, quum in praecipitatione ipsius niccoli haud ita eveniat, vel docendum prius erit, in quo demum arctum illud vinculum consistat, quod partes constituentes niccoli tam firmiter ac inseparabiliter connectit, vel metallum pro novo genere fuscipiendum. Hactenus *Cl. KAIM.*

§. 1924.

EXPERIMENTO, postremo loco posito, superfedere potuisset *Cl. Auctor* nunc adductus; dummodo ad varia phaenomena animum advertere voluisset, quae *CRONSTAEDTIUS* dudum adtulerat. Vix enim suspicari poterat, ex cupro, ferro, ac arsenico, invicem junctis, niccolum esse compositum, quum *CRONSTAEDT* dixerat, colore cyaneo solutionem niccoli in sale alkalino volatili esse praeditam, qui a tali miscela expectari non poterit: Color vitri cyaneus, demum evanescens in tentaminibus *Cronstaedtianis* erat;

in

in antecessum vero praedicere licet, colorem ex illa miscela nec cyaneum, multo minus denuo evanescentem, fore oriturum: vitriolum non obtinisset CRONSTAEDET viridissimum, argenti unionem non abnuisset niccolum, si ex cupro, ferro, ac arsenico foret conflatum; et quae alia plura adferri possent.

§. 1925.

Adferri nunc debet sententia, quam dixit *Cl. Gustav. ab ENGESTROEM* in *Tal om Mineralogiens Hinder och framsteg &c.* circa opiniones Auctorum varias de niccoli natura una cum quibusdam aliis observationibus, substantiam hanc semimetallicam concernentibus. Cobaltum, ait, a plerisque scriptoribus pro semimetallo speciali descriptum fuit; circa niccolum vero offenderunt. Nullus eorum, qui existentiam reguli niccolini impugnarunt, conatus fuit, ut regulum hunc eundem obtineret omnium purissimum: dixerunt aliqui, quin ullum unquam instituisent experimentum, sententiam. Alii vero, tentaminibus claudicantibus fulti, regulum talem in rerum natura nullum dari adseruerunt. Videntur autem omnes metallicam niccolo propriam substantiam confudisse cum minera hujus, *niccolo cupri*, quod quidem ultimum metalla varia, arsenico aut sulphure in universum mineralisata, plerumque continet. Si exactius inquiras, reperies, Auctores illos omnes a *Cl. JUSTI* in erroneam hanc sententiam fuisse inductos. Ex ignorantia hinc factum est, quod regulum niccolinum compararint cum aurichalco, et adseruerint Auctores nonnulli, hoc ultimum eodem jure, uti niccolum, pro metallo speciali fore habendum. Oritur hinc et error *Cl. BAUME*, dum sese detexisse monet novam methodum, regulum cobalti in principia decomponendi, credidit. Fundente enim illo regulum cobalti una cum additamentis, ex quibus he-



par sulphuris oriebatur, magna pars reguli soluta fuit, ac residuum vitro colorem coeruleum jam non dedit. Examinavi et ego varias cobalti species; mixtas cum niccolo nunquam non deprehendi: niccolum vero minorem fovet adtractionem cum hepate sulphuris, quam regulus cobalti, hinc hujus ope separare ab invicem substantias illas facile potui; ex quo simul inventum *Baumeanum* legitime illustratum videtur. Arsenicum omnium aegerrime a niccolo separatur; perfici tamen et hoc potest. Niccolum copia reperiri majori, notum hactenus non fuit; minus adhuc notum, in usus varios adhiberi substantiam hanc posse, quum tamen *metalli albi Sinensis*, magni aestimati, ac argentum referentis, partem potissimam constituat. Cl. BLADD frustra metalli hujus tam crudi, quam remissi jam mihi dedit; circa quae tentamina quaedam illustri scientiarum Academiae Holmiensi obseram.

§. 1926.

In recentissimo opere chemico: *Elements de Chymie theorique et pratique, redigés dans un nouvel ordre, d'après les decouvertes modernes, pour servir aux Cours publics de l'Academie de Dijon*, cujus Auctores sunt Cl. Cl. de MORVEAU, MARET, et DURANDE, cujusque Tomus primus anno proximo elapso prodiit, circa niccolum haec habentur: *Nickel* femimetallum sextum, inventum ac descriptum a Cl. CRONSTAEDT 1751. ex albo rubet, firmum et splendens in fractura est; gravitas specifica ejus ad aquam uti 8500. ad 1000. a Cl. CRONSTAEDT assignata fuit. Reperitur niccolum calciforme remistum ochrae martiali, et mineralisatum subin ope acidi vitriolici solius, alias ope sulphuris, arsenici, et cobalti; atque tum *Kupfernickel* dicitur.

§. 1927.



§. 1927.

DIVERSA vero longe sunt, quae de niccolo protulit Cl. MONNET in *Traité de la dissolution des métaux*; chap. XI. *Dissolution du nickel*: praemittit omnium primo Cl. MONNET, descriptam fuisse substantiam hanc a Cl. CRONSTADT; obferre eam notas características adeo singulares, ac ab aliis omnibus substantiis metallicis diversas, ut a pluribus pro femimetallo speciali recepta fuerit. Ego ipse, profequitur, in Auctorum horum classe versabar, et nicolum in opere *Exposition des mines* pro femimetallo suae indolis proposui. His tamen non obstantibus substantia haec ipsa eatenus, uti lectores facile sese convincere ex dicendis poterunt, ad cobaltum accedit, ut suspicari liceret, cobaltum et nicolum unam solum eandemque esse substantiam.

§. 1928.

SOLVITUR nicolum ab iisdem acidis, a quibus referatur cobaltum, solutio haec iisdem utrinque stipatur phaenomenis. Unica solum intereedit diversitas, quod solutiones niccoli, acidorum ope factae, omnes colore viridi donatae cernantur.

§. 1929.

SOLUTIO niccoli nitrosa crystallos praebet coloris pulchre graminei. Sal hoc, adinstar salis ex solutione nitrosa cobalti obtinendi, humiditatem ex aëre valide adtrahit, ac in liquidum resolvitur. Alkohol pariter illud solvit copiose ac facile, colore exin tingendum pulcherrimo viridi diluto. Vidi drachmam unam salis hujus solutam fuisse ab uncia dimidia alcoholis.



§. 1930.

DEFICIATUR vero mediante lixivio pigmenti berolinensis niccolum ex solutionibus suis colore ex viridi albente. Color hic fere accedit ad colorem praecipitatorum, intervntu salium alkalinarum deturbatorum. Praecipitata salibus alkalinis dejecta solubilia eadem ratione sunt, uti praecipitata cobalti, ac eadem largiuntur producta; excepto solum acido aceti, quod cum calcibus hisce abit in sal humiditatem ex aere non adtrahens, ac, sacchari saturni adinstar, dulci sapore praeditum.

§. 1931.

HIS motus rationibus similitudinis niccoli et cobalti, Cl. MONNET examen instituit, indolis utriusque substantiae, atque in *Traité de la dissolution des métaux* speciali sectione sub titulo *recherches sur la nature du cobalt et du nickel* exposuit.

§. 1932.

PRIMUS, ait, character specialis, quo motus fuit Cl. CRONSTAEDT, ut niccolum pro semimetallo speciali proponeret, in eo versatur, quod et minerae niccolinae, et niccolum ipsum calcinatione vertantur in calcem virentem, quum tamen minerae cobalti eadem methodo tractatae nigrescant. Quodsi vero longius promovisset Cl. CRONSTAEDT tentamina circa negotium hoc ipsum instituta, facile vidisset, colorem hunc viridem transitorium solum, et non persistentem esse; quum mox abeat in brunum, fabis tostis coffeae proprium, dummodo niccolum ejusve minerae satis diu expositae igni relinquuntur. Lex, quam minerae hae, igni expositae, plerumque sequuntur, sequentibus absolvitur: agente in eas nunc primum igne virescant, atque colorem hunc tamdiu retinent, donec

donec vivide candeant; tum calces prorsum similes redduntur calcibus cobalticis. Metuens vero, ne in errorem inducerer a mineris regulisve inpuris, mineras quidem selegi purissimas, regulum vero probe depuravi, successu plane simili. Autumans praeterea, colorem viridem niccoli, quem igni expositum, aut menstruis solutum obfert, proficisci forte a materie quadam heterogenea, calcinatione destruenda, calcem niccolinam, actione ignis colore bruno jam tinctam, fluxus nigri ope reduxi in regulum. Obtentus hac methodo regulus texturam teneriorem et compactiorem nonnihil referre nunc videbatur; mutatus denuo in calcem sub testudine furni docimastici colorem brunum illico induit. Soluta reguli ejusdem pars in acido nitroso, colorem non adeo laete viridem, uti alias consuevit, in menstruo produxit.

§. 1933.

USTULAVI alia vice mineram cobalti albam purissimam ex fodina *Sainte-Marie aux mines*; fusioni eam dein subjeci additis tribus partibus fluxus nigri; obtinui sic regulum pulchrum colore argenteo donatum. Regulus hic sub testudine furni docimastici lente calcinatus, abiit in calcem pulchre adeo viridem, uti calx niccoli esse adsolet. Alia vero pars minerae ejusdem ustulata diutius regulum praebuit, qui eadem, uti prior, ratione tractatus in calcem brunam solummodo versus fuit.

§. 1934.

REGULUS niccoli, observante *Cl. CRONSTAEDT*, aëri libero expositus, aerugine viridi obducitur; hoc ipsum vero et circa regulum cobalti obtinere, experimento didici. Accedunt praeterea multum ad invicem, dum ab heterogeneis adhaerentibus fuerunt satis depurata.

§. 1935.



§. 1935.

PARALLELISMUS inter duos hosce regulos non evertitur, si dotes eorum considerentur, quas aliis in examinibus obferunt. Etſi Cl. BRANDT, qui de proprietatibus cobalti poſitivi quid protulit unicus, characteres hujus ſubſtantiae digreſſionibus ad rem non facientibus implicarit, adparet tamen, cum dotibus niccoli apte illos congruere: nec Cl. CRONSTAEDT quid protulit, quod foret obpoſitum. Dum reguli hi ſunt depuratiſſimi, eadem fuſibilitate gaudent, eademque fixitate, iſdem uniuntur metallis, atque eundem tum acquirunt colorem, eundem habitum.*)

§. 1936.

*) MONET hic Cl. MONNET in *Récueil des Mémoires de Chymie et d'Hiſt. naturelle, tirés des actes de l'Académie royale de Suède T. I. p. 217.* errorem magnum ſatis inrepiſſe, occasione recenſionis tentaminum *Cronſtaëdtianorum*. Auctor hic, ait, in *Originali ſuecico* refert, ſeciſſe ſe miſcelas varias metallicas; regulum niccoli imitaturus talem, qualem Num. 4. et 7. ſuorum tentaminum adeptus fuerat; uſum ſe etiam hunc in finem fuiſſe illuſtrationibus Cl. SCHEFFER: in citato vero opere legitur ſub nomine Cl. CRONSTAEDT, ſe ſeciſſe plura alia tentamina cum hacce ſubſtantia: videtur hinc omnino, ſenſum hujus loci eſſe abruptum, ubi inquitur, an niccolum non foret compoſitum corpus metallicum, non vero de tentaminibus agitur cum regulo hocce captis. Perſuali tamen probe ſumus, vitium hoc ipſum non tribuendum eſſe traductori gallico, bene vero germanico, (a) cui et obiectum fuit, eum textum ſuum non optime ſemper intellexiſſe.

(a) Cl. KAESTNER.

§. 1936.

MAXIMI tamen momenti hanc in finem est color coeruleus, quo vitrum a cobalto tingitur. Ex hocce inprimis capite dependet, an admittendus sit, an rejiciendus antea dictus parallelismus. *Cl. CRONSTAEDT* variis in locis monet, niccolum similem producere non posse effectum, quum colorem non nisi brunum, flavicantem, aut virentem ubique obtinuerit. Refellitur tamen id alio loco, ubi dixerat, borracem a regulo hoc eodem colore pulchre coeruleo tinctum fuisse. Evictum itaque hinc est, niccolum eundem cum cobalto producere effectum. Idem adferere licet de cobalto respectu ad niccolum sumto.

§. 1937.

CALCINAVI diu sub testudine furni docimastici calcem purissimam cobalti, fusioni dein exposui cum quarzo et alkalino sale; vitrum sic obtinui ex fusco viridescens; quod phaenomenon et a *Cl. BRANDT* confirmatum habetur. Adparet simul ex dictis *Cl. BRANDT*, vitrum enatum eleganter coeruleum, dum calcinationi breviori minera fuerat subiecta. An itaque ex his non oriretur suspicio, colorem coeruleum, quo vitrum a cobalto tingitur, principio deberi speciali, ac a substantia hac ipsa independenti; vel et deberi concursui plurium simul materierum cum substantia, quae ignis actione abigitur?

§. 1938.

Ex adferendis nunc, sententia haec eo propior veritati videbitur. Retulit *Cl. BRANDT*, incassum sese tentasse productionem vitri colore coeruleo tincti mediante calce cobalti nimium calcinata; scopum vero demum obtinuisse exposita fusioni miscela partium quatuor reguli cobalti, partium binarum arsenici albi,



bi, anaticae dosis silicium calcinatorum, partiumque quatuor cinerum clavellatorum.

§. 1939.

INSTITUTIS, prosequitur, cum aliis cobalti speciebus tentaminibus, vera vidi, quae *Cl. BRANDT* retulerat: videre autem pariter volui, an, hac eadem methodo utens, coeruleum vitrum produci posset, adhibito, in locum reguli cobaltini, regulo niccolino. Miscui hunc in finem exactissime supra laminam docimasticam partem unam reguli niccolini, partes tres quarzi calcinati, anaticam dosin salis alkalini fixi, partem dimidiam arsenici nativi, duasque cultri cupides limaturae ferri. Miscela haec legitime fusa vitrum dedit colore omnium pulcherrimo coeruleo donatum. Mirum vero magis phaenomenon alterum erat; granula reguli per massam vitream hinc inde dispersa, ac notabili copia collecta aquam fortem colore viridi vivaci tinxerunt. Ferrum in hoc tentamine ideo addidi, quia cobaltum eo magis hac ratione me imitari posse credidi, utpote quod in omnibus experimentis indolem martialem, ac a magnete attractilem prodit; qualem dotem et *Cl. BRANDT* in eo observavit. Vidi praeterea, niccolum abs additione ferri colorem non adeo elegantem, ac saturate coeruleum praebere.

§. 1940.

QUAECUNQUE vero diversitatis hujus in cobalto causa sit, manifestum nunquam non exin habetur, calcinandum cobaltum ejusve mineras nunquam iusto nimium esse, si lucrum ex eo maximum obtinere animus est. Agnoscere veritatem hanc videntur fabricatores Smaltae; praecipitur enim in nonnullis operibus, imprimis in tomo primo operis *de la fonte des mines de SCHLUETTER traduction de Mr. HELLIO*,
p. 250.

p. 250. ut arsenicum adjiciatur in fusione minerarum cobalti. Plures verò Docimastarum nostri aevi additionem arsenici in fusione minerarum cobalti nonnisi pro instrumento quasi vitrificationis cobalti habent. Scio etiam rationem ustulandi mineras cobalti pro parando colore smaltae coeruleo partem constituere methodi in Saxonia inter secreta adeo habitae: nota etiam inter fabricatores coloris hujus phrasis est, de *anima cobalti, quae retineri debeat*. In quacunque vero re *anima* haec ipsa consistat, observasse hic, ceu rem, quae mihi extra dubium posita videtur, juverit, nicolum eadem, uti cobaltum, gaudere facultate, vitrum colore coeruleo tingendi.

§. 1941.

HIS tamen omnibus non obstantibus nulla plane deduci potest sequela, in favorem sententiae KUNCKELII, adferentis, colorem vitri coeruleum proficisci ab arsenico et ferro. Opinionem hanc eandem adsumsit et CL. LEHMANN, et magnis conatibus defendit CL. JUSTI, more suo veritatem sententiae non omnino examinans. Fusioni diversa methodo, et diversis sub proportionibus exposui miscelas quarzi calcinati, salis alkalini, calcis purae martialis et arsenici; nunquam tamen per hanc encheiresin vitrum coeruleum, sed subfuscum (brunâtre) et scoriae simillimum obtinui. Demonstravit etiam CL. BRANDT, ex ferro et arsenico colorem vitri coeruleum obtineri non posse.

§. 1942.

OPINIO illa ex eo forsan enata fuit, quod minerae fere omnes cobalti arsenicales sint, et ferrum maximam partem simul recludant, saltem quoad speciem. Facile hinc an credere quis poterat, substantias hasce ad colorem coeruleum quid facere, verum-

tamen



tamen inadaequate conclusum fuit, substantias illas solas ad rem hanc facere, aut cobaltum ex solo ferro et arsenico conflatum esse.

§. 1943.

REFERT dein *Cl. MONNET*, observasse se, quod et *Cl. BRANDT* jam adnotarat, regulum cobalti, ab arsenico probe liberatum, ex integro fere a magnete adtrahi. Ut videret, an regulus hic eadem dote semper gauderet, nisi per sulphur aut arsenicum enasceretur obstaculum, regulos varios cobalti sub testudine furni docimastici diu ustulavit; reducti deinde in formam pristinam a magnete omnes fuerunt adtracti. Dum vero una cum arsenico fusioni fuerunt expositi, magnetica effluvia non amplius sequebantur. Quo demum eo magis innotesceret, an regulus cobalti ex integro constaret partibus a magnete adtractilibus, calcem puram cobalti addito oleo eousque torruit, donec massa exurgeret grumulosa, et splendens. Exposuit hanc in charta, et magnetem admovit, donec nil amplius adtrahi potuerit: pauca vero tum remansit quantitas, quae non ex integro forma metallica donata videbatur. Mirabundo jam circa rationes phaenomeni varia occurrerunt dubia; an enim credibile foret, regulum vix non totum cobalti componi ferro; quod sequi videbatur, si ad massam a magnete adtractam respicias? Interim tamen phaenomena alia nullam ferri praesentiam in cobalti regulo indicant; nam in acido vitriolico non solvitur; nec solutiones ejus cum gallis atramentum praebent, nec cum lixivio phlogistico berolinense coeruleum; quum tamen exigna licet ferri quantitas his tentaminibus detegiqueat. An itaque exigua illa, quae superfuit, copia substantiae a magnete non adtrahendae obstaculum omne efficit, et ferrum in cobaltum vertit? aut an cobaltum ipsum, ferri adinstar, a magnete adtrahitur?

tur? Quaestiones hae, subjungit, solvere nunc nondum licuit, quum, circa rem hanc occupatus, tentamina omnia, quae ad quaestionem dilucidandam requisita forent, instituere non poteram. *)

§. 1944.

MONNET dein, regulum niccolinum nullum simile obferre phaenomenon. Quum niccolum sulphur aegre satis dimittat, qua quidem dote ad cobaltum accedit, abigi hoc prius debet, ut legitima dein fieri queat comparatio niccoli cum cobalto. Instituit itaque eandem operationem, quam statim retuli, et cum regulo niccolino; minime vero hic a magnete adtrahebatur: ut adeo manifesta hic occurrat inter cobaltum et niccolum diversitas.

§. 1945.

*) MIRARI tamen hic subit, cur CL. MONNET, dum operosiora tentamina circa examen regulorum cobalticorum jam instituerat, faciliora circa examen substantiae a magnete adtractae, aut ab eo relictæ non instituerit. An enim magnus adeo requisitus fuisset apparatus ad hoc, ut v. c. molecule a magnete adtractae injicerentur in aquam fortem, atque sic observarentur inde oritura phaenomena? aut ut fusioni exponerentur, adjecto, si requisitum videretur, fluxu reductivo, atque regulus dein ulterioribus et obviis exponeretur periculis. Eadem, et similia tentamina facillimo negotio fieri potuissent cum substantia altera a magnete non adtracta; quorum beneficio latius omnino promota fuisset cognitio cobalti; quum nunc mota solum, et incepta, minime vero absoluta quaestio circa negotium hoc ipsum sit. Communicabo fors in *Medic. phys. ökonom. Merkwürdigkeiten* experimenta circa rem hanc eandem a me cepta.



§. 1945.

Quodsi verum foret, subjungit, partes cobalti a magnete adtractiles fuisse martiales, admittere deberemus in substantia hac materiem singularem, et essentialem, a qua dependeant dotes, quas illi proprias novimus, atque tum rejicienda non foret sententia Mineralogi recentis ac in metallurgicis versatissimi D. PABST de Hoain. Autumat hic, principium tingens cobalti independens esse a substantia hac metallica, adnexum (lié) illi solummodo esse: occurrere illud etiam posse in substantia metallica quavis alia, atque inibi eodem, uti in cobalto, effectus producere. Adduxit in sententiae suae confirmationem speciem quamdam minerae cobalti, formam terrae nigrae subtilis referentem, quae a Germanis *Kobaltmalm* dicitur; tractata haec cum fluxu regulum non largitur, vitrum tamen colore pulcherrimo et saturatissimo coeruleo tingit. Confirmari haec observatio pluribus experimentis meretur, quae tamen, quum minera illa rara sit, difficilius institui queunt. Scio tamen certissime partem hujus minerae exiguam una cum limatura ferri et arsenico fusam regulum subpeditare, dotibus cobalti optimi instructum. Conclusio exin pronissima deduci poterit; quodsi ferrum ad genesis coloris coerulei in smalta essentialis nil contri-
buat, eidem tamen nec obesse; quae quidem conclusio jam antea formari poterat, dum vidimus, niccolum fusum cum limatura ferri et arsenico, vitrum pulcherrime coeruleum praebuisset.

§. 1946.

AGIT jam Cl. MONNET de specie reguli, sub fusione smaltae praecipitandi, a Germanis *Speis* dicti. Ad experimenta sua adhibuit regulum a fabrica ad Gengenbach (qui locus 14. milliariibus Argentorato remotus est) petitum, quum in fabrica hac cobaltum purissi-


purissimum ac minerae niccolinae nil vehens recipiant. Donatur colore albente nonnihil obscuro, textura compacta, tenera. A pluribus mineralogis pro producto unionis ferri cum arsenico, in mineris hisce majori copia praesente, atque hinc generis finaltae non subeunte, sumtus fuit, contrarium tamen ex nunc adferendis tentaminibus erui poterit.

§. 1947.

Dissolvit omnium primo regulum hunc in aqua forti. Solutio facile et cito peracta fuit, quin ullum caloris requisitum foret auxilium. Miratus vero multum fuit, dum colorem solutionis viridem adeo, uti color solutionis niccolinae esse solet, intueretur. Accesserunt ad invicem solutiones binae hac etiam dote, quod simile sal enasceretur, quale ex soluto in aqua forti regulo niccolino obtineri consuevit. Instillato vero lixivio phlogificato praecipitatum colore dilute cinerascens praeditum ad fundum ruit, quum solutio niccolina colore ex viridi albente dejiciatur. Praecipitatum per sal alkali fixum ad fundum deturbandum colore pallidiori etiam donabatur, quam quod ex solutione niccoli per idem reagens obtinetur. Adperso praecipitato hocce carbonibus ardentibus, vapor specialis adscendit, uti a niccolo, quem vaporem niccolo soli proprium Cl. CRONSTAEDT ratus fuit.

§. 1948.

CAETERUM vero calx haec eadem in igne refractaria etiam deprehensa fuit. Addito vero arsenico fundebatur colorem induens coeruleum. Dum regulus hic idem, ejusve calx, cobalti adinstar cum quarzo et sale alkalino tractantur, vitrum subpeditant coeruleum. MIRUM, Cl. MONNET prosequitur, jam non videatur, Cl. CRONSTAEDT in *Dissertatione secunda*



de *niccolo speis* ex *smalta* obtinendum ceu substantiam hac semimetallica inpraegnata considerare. Interrogare tamen illum quis potuisset, unde ergo adveniat; praesertim si tum temporis demonstrare simul licuisset, in mineris cobalti ad genesin vitri coerulei adhibitis nil plane niccoli contineri; admittere omnino debuisset sic, niccolum ex ipso cobalto oriri. Satis vero adparet, Cl. CRONSTAEDT, dum *secundam dissertationem de niccolo* exararet, respexisse ad mineras (quod et de sententia Cl. MACQUERI et BAUME valeat) cobalti saxonicas schneebergenses, in quibus frequentissime minera niccoli simul occurrit, quodsi vero vidisset, *Speis*, quod ex mineris cobalti purissimis, niccoli nil plane recludentibus obtinetur, iisdem gaudere dotibus, dubium vix est, fore, ut veritati propior nonnihil factus fuisset.


§. 1950.

EMOLUMENTUM vero ex eodem hoc examine enascitur illud insigne, ut fabricatores *smaltae* convincantur, male se *speis*, ceu inutile quid abjicere, quum tamen aut solum, aut recenti minerae cobalti mistum colorem vitri coeruleum largiri queat.

§. 1951.

CONTINETUR in *speis* plerumque magna sulphuris copia; adparet vero exin, quam arctum sit connubium sulphur inter et substantiam hanc semimetallcam; ignis enim validus, qui ad fusionem substantiarum, ex quibus vitrum *smaltae* conficiunt, requiritur, sufficiens utique videri posset ad fugandas vel minimas atomos sulphureas; etsi quidem admittendum simul sit, hic, uti in aliis similibus experimentis ab ipsis suis moleculis metallicis substantiam hanc involvi, ac adversus ignis vim tutam reddi.

§. 1952.



§. 1952.

SOLVIT ex integro (radicalement) copiam quamdam *speis Cl. MONNET*, obtinuit ex solutione hac sulphur filtro inhaerens; ficcatum hoc examinans arsenici tantillo mistum deprehendit. Praesentia itaque sulphuris in *speis* aperte demonstrat, in mineris cobalti sulphur re vera contineri, etsi vulgo, nullum plane recludere, teneatur. Mentionem insuper fecit *Cl. BRANDT*, et *Cl. CRONSTAEDE* minerae cujusdam cobalti, per sulphur solum mineralisatae; ex hac vero minera, quae hucusque nonnisi in Suecia occurrit, smaltum in Germania non conficitur.

§. 1953.

CONCLUSIONES demum ex adlatis hactenus omnibus deduxit sequentes, quae et ex praemissis fluere legitime videntur.

§. 1954.

COBALTUM et niccolum *essentialiter* non nisi unum idemque semimetallum constituunt.

§. 1955.

COBALTUM a niccolo in eo solum differt, quod ferrum contineat, cum substantia propria cobalti intime mistum, cujus etiam beneficio a magnete adtrahitur, et solutiones colore rubente tingit, quum solutiones niccoli in iisdem menstruis virides sint.

§. 1956.

DOTEM quod concernit semimetalli hujus vitrum colore coeruleo tingendi, ea inhaerere videtur substantiae propriae cobalti, requiritur tamen, ut effectus ille sequatur, unio substantiae hujus cum ferro et arsenico. Hinc et niccolum colorem coeruleum nunquam non producet, dum unitum fuerit cum fer-



ro et arsenico; verbo, solummodo substantiae nunc dictae praesentes requiruntur ad hoc, ut niccolum in cobaltum vulgare abeat.

§. 1957.

NICCOLUM pars metallica cobalti omnium purissima est; a qua etiam *per praeserentiam* nominis ratio repetenda erit.

§. 1958.

MONENDUM et illud adhuc venit, Cl. ERYLEEN (*v. physikalische Bibliothek* 3. B. 1. St. S. 105.) pariter eadem vidisse, uti Cl. MONNET, circa solutionem *speis* in acido nitroso, colore viridi, adinstar niccoli tinctam.

§. 1959.

SUPEREST nunc adhuc unice, ut ratio reddatur eorum, quae Cl. BERGMANN de niccolo adduxit in *Dissertatione chemica de NICCOLO* jam antea adducta.

§. 1960.

SUB initium diatribes exponitur descriptio *cupri* sic dicti NICOLAI, una cum sententiis circa id prolati ab HENCKELIO, et CRAMERO, ac indicatione laborum a CRONSTAEDTIO susceptorum. Et si sententiam *Cronstaedtianam Mineralogi sueci* fere omnes, et multi quoque extranei amplexi fuerint, veterem tamen, Cl. BERGMANN ait, opinionem nondum omnes deseruerunt, quamvis nonnulli, non tam fidis duci videantur tentaminibus, quam vagis potius conjecturis et lubricis speciebus. Rationibus quoque ab experimentis chemicis deductis posteriorem nuper adstruere conatus est Dominus SAGE, qui in Actis Reg. Ac. Paris. Niccoli a se tentatam analysin descripsit, et hac

hac nixus novum Semimetallum instar Cobalti, Ferro, Arsenico Cuproque mixti considerat. *)

§. 1961.

Ad has, prosequitur, dirimendas lites multis adhuc opus esse experimentis vidimus, haec itaque animo omni partium studio liberato instituimus, et, si hac vice defectu rari hujus mineralis subsistere fuimus coacti, antequam illis, qui dubitare adamant, omnia eripere licuerit arma, veritatem tamen eo usque denudatam confidimus, ut nova comparata materiae copia, haud difficulter pleno elucere queat vigore.

§. 1962.

ACCEDIT jam ad enarrationem ipsorum tentaminum *Cl. BERGMANN*; haec vero, quum comparata ita sint, ut in compendium redigi vix queant, quin essentialis quid omittatur, ipsa maximam partem, omiſſis paucis, verba *Cl. Auctoris* adducam; quod quidem eo tutius facere potero, quam aliunde fucicae dissertationes in nostris terris occurrant rarissimae. Ut regulus, ait, acquiratur Niccoli, minera primum subjicienda est ustulationi, in qua sulphuris et arsenici diversa copia, pro varia mineralis indole, propellitur, ita ut ponderis dimidium, et quod excurrit, interdum amittat, saepe vero non ultra $\frac{30}{100}$.

§. 1963.

HUIUSMODI minera, diu optimeque calcinata, non eundem semper nanciscitur colorem, sed eo viridior plerumque evadit, quo ditior; interdum, et

H 4

in

*) NONDUM noverat, dissertationem hanc conscribens *Cl. BERGMANN*, tentamina *Cl. MONNET*, paulo ante fuisse adlata, anno eodem 1775. in *Traité de la dissolution: des métaux* publici juris facta.



in primis, si in quiete relinquatur, vegetationibus virefcentibus, coralliformibus, duris et sonantibus superne obtegatur.

§. 1964.

PULVERI ustulato duplum vel triplum addatur fluxus nigri et miscela in crucibulo aperto, sale communi testā more consueto, in foco fabrili, igne follis duplicati ope animato, probe fundatur.

§. 1965.

VASCULO dein fracto in fundo sub scoriis fuscis, nigrescentibus et nonnumquam etiam coeruleis, occurrit globulus metallicus, cujus pondus ratione habita minerae crudae decem, viginti, vel, quod maximum est, quinquaginta centenarii partes adaequat.

§. 1966.

HUNC vero cave credas jam purum esse, nam ustulatione licet vehementissima quam diutissime torta fuerit minera, multum tamen sulphuris et praesertim arsenici in regulo adhuc reconditum reperitur, praeter cobaltum et ingentem ferri copiam, quae plerumque efficit, ut magneti sit obsequiosus. Et haec heterogenea in causa quoque sunt, cur regulus multum variet, non tantum respectu fracturae, cujus nitidula superficies vel laevis est, vel lamellosa, sed etiam ratione coloris albidī, qui magis minusve flaret vel rubet.

§. 1967.

HINC quam sit necessaria reguli depuratio per se patet, si nimirum ejusdem vera et genuina indoles rite dijudicetur. Varias igitur ingressi fumus vias, laboresque perquam taediosos non recusavimus, ut meta adtingeretur proposita. Si vero omnia in hunc finem instituta experimenta cum singulis circumstantiis descri-

describerentur, in volumen excresceret haec pagella. Itaque non nisi palmaria memorabimus idque concisse, nam Metallurgiae peritis non opus est, ut singula consuetaque adnotentur momenta.

§. 1968.

UT, quid valeant iteratae calcinationes et scorificationes, exploraretur, sequentia instituta sunt tentamina cum regulo quodam Niccoli, in collectione Suabiana obvio et a Domino CRONSTÆDT eliquato, cujus gravitas specifica adcuratissima bilance hydrostatica reperta fuit 7, 4210, dum aquae destillatae ponitur 1,0000, quem comparandi modum ubique in sequentibus adhibemus.

a) Novem semunciae, in pulverem redactae, pluribus in patellis per sex horarum spatium sub fornice furni docimastici vehementi torquebantur igne, quo arsenicum, cum solito foetore, primum dissipabatur, dein sulphureus accedebat odor, postremo fumi albicantis copia, allium haud redolens et ab arsenico dephlogisticato fortassis orta, in sublime ferebatur. Dum canderent acervi tumescere inceperunt et ab omni superficie vegetationes prodierunt virescentes, instar muscorum et lichenum filiformium, *) in fundo autem pulvis cinereo-ferrugineus restabat. Hac operatione $\frac{7\frac{3}{100}}$ avolarunt.

b) Semuncia hujus calcis cum triplo fluxus nigri, quatuor horae minutis ope follis in foco fabrilis fusa regulum praebuit superficie reticulata, areolis singulis plerumque sexangularibus, centro tuberculato, ex quo striae radiabant tenuissimae. Pondere $\frac{7\frac{3}{100}}$ semunciae aequalis fuit, magneti obediens et cum borace scorificatus vitrum relinquens subnigrum.

H 5

c) Hie

*) PULCHRE haec consentiunt cum Cronstædtianis antea adlatis tentaminibus: an eorum omnium Cl. MONNET nil omnino observavit?



c) Hic regulus, nova ustulatione, primo odorem alliaceum, deinde vero fumum visibilem, inodorum, cum vegetationibus emisit. Ceterum in hac eodem ac in prima calcinatione se habuit modo.

d) Pulvere ustulato, mediante fluxu nigro reducto, vasculoque exento, arsenici iterum sentiebatur odor. Repetita cum calce et borace, portione anatica sumtis, fusio cobalti obscura tantum monstravit vestigia.

e) Niccoli regulus tertium ustulatus arsenicum parum redolebat, nullae surrexerunt vegetationes et calx tandem metallica magis ferrugineum, quam viridem habuit colorem.

f) Post reductionem in quarta calcinatione eadem fere observata fuerant phaenomena.

g) Facta reductione, cum calce atque borace prima vice fusus regulus multum amisit ferri, scoriis nigris inhaerentis, postea vero hyacinthino tingebat colore, absque notabili cobalti miscela; magneti parum obediens gravitate jam gaudebat specifica 7,0828.

h) Denuo et quidem quintum ustulatus fuit regulus, ast addito per vires pulvere carbonum in patellis candescentibus, insignis arsenici copia antea delitescens in medium prodiit et sub fumi specie evanuit. Scilicet haec est semimetalli indoles, ut, nisi adfuerit certa phlogisti quantitas, cum qua uniri possit, ignis non cedat vi, sed fixum remaneat. Pulvis tamdiu hac methodo tractabatur, donec nullus conspicietur fumus, nec odor oriebatur alliaceus, quamvis comminuti adderentur carbones.

i) Per reductionem acquirebatur regulus, textura lamellosa et tenaci praeditus, qui tamen, vasculo igne exento, arsenicalem spargebat odorem.

k) Ustulatione itaque sextum repetita, quae per decem duravit horas, pulvereque carbonum arsenicum non visu, sed olfactu internoscendum, discussum

sum fuit. Calcis metallica color erat obscure ferrugineus viriditate vix conspicua inquinatus.

l) Reductione cum fluxus nigri, calcis atque boracis portione anatica instituta, regulus coaluit semiductilis, magneti pertinaciter adhaerens, et acido nistri viridissimo colore solubilis: manet tamen nigrescens massa menstrui vim eludens, quae tandem albescit et in pruna candente avolat, absque notabili odore arsenicali.

m) Regulus dein sexies cum calce et borace fundebatur. Scoriae, quae hinc nascebantur, hyacinthi colorem referebant, calx vero metallica viridis circumdabat regulum, qui, eodem ac antea modo, magneti obediens et semiductilis fractura gaudebat tenaci, hoc est, filis quasi porrectis exasperata.

n) Post tot ustulationes semel adhuc, idque per quatuordecim horas, validi ignis ope torquebatur regulus, cui postea pulvis carbonum subinde addebatur, sine ulla arsenici dissipatione, vel ponderis jactura. Pulveris ustulati color erat ferrugineus, cui non nisi debilissima viroris inerant vestigia.

o) Post reductionem in scoriis ferro plurimum contaminatis minutissimus inveniebatur globulus, magneti adhuc obsequiosus, de quo plura dicenda sunt in momento i et sequentibus.

§. 1969.


MINERA Niccolifera, e fodina ad Los Helsingiae extracta, sequenti a nobis excocta et depurata fuit modo.

a) Ustulatio more consueto peragebatur.

b) Itemque reductio.

c) Regulus dein calcinabatur et per vices addebatur pulvis carbonum usque dum omnis arsenici destineret fumus et calx Niccoli colorem nancisceretur saturate viridem.

d) Hac



- d) Hac reducta regulus magneti obsequiosus oriebatur, qui tamen cum calce et borace refusus, eidem non obtemperavit, scoriamque dedit saturate coeruleam.
- e) Tali regulo sufficienter calcinato carbonum pulvis addebatur per 10 horas, (si mox hoc fit regulini atomi facile coalescunt,) quo arsenici copia dispulsa pulvis restabat ferrugineus parum virens.
- f) Post reductionem cum fluxu nigro, calce et borace, partim a ferro, partim etiam a Niccolo tinctae erant scoriae. Regulus albidus a magnete valide trahebatur.
- g) Dein vero, licet huic phlogiston in candentibus patellis abunde adderetur, per 14 horas, tamen nec fumus, nec odor sensibilem arsenici indicantur dissipationem, nec pondus fuit diminutum, sed contra $\frac{1}{3}$ auctum hac ustulatione: calx metallica ferruginea vix virefcebat.
- h) Post reductionem semiductilis et magneti obediens erat regulus.
- i) Hic primum cum calce et borace refusus, dein vero unitus cum illo, cujus mentionem fecimus in §. praec. mom. o, regulum praebuit albidum, semiductilem, distinctum colore calcis viridi et scoriis hyacinthinis.
- k) Idem regulus cum sulphure fundebatur, et massae mineralisatae dimidium, imperfecte ustulatum, portioni crudae fusioni uniebatur. Hoc Niccolum sulphuratum, optime calcinatum et cum duplo fluxus nigri reductum, regulum magneti obsequiosum dedit, qui in igne aequae fere refractarius erat ac ferrum cusum.

Cum sulphur vehementer adpetat Niccolum, spes erat, ut haec mineralisationis materies dum binis, huic nimirum et Ferro, praesentibus saturandis non suffi-

sufficeret, posterius deferens priori adhaereret, quo ipso ferrum facile separaretur scorias intrans. Quid haec valeat conjectura sequens luculentius monstrat §.

§. 1970.

- a) Reguli Cronstaedtiani (§. 1968.) 800 partes cum sulphure et parva boracis quantitate fusae mineralisationem praebuerunt rubicundo flavescensem, pondere 1700 aequalem.
- b) Hujus dimidium in patella ustulatoria lento primum igni expositum nigrescere incepit, deinde vero fortiori torquebatur usque dum vegetationes surgerent: calx metallica jam restans 652 partibus aequilibris erat.
- c) Haec una cum altero dimidio non ustulato, addita borace, fusa regulum dedit sulphuratum, albido flavescensem, ponderis 1102.
- d) Idem regulus in calcinatione, quae per quatuor duravit horas, vegetationibus primum obductus fuit, dein vero, addito pulvere carbonum, arsenici frequentem spargebat odorem. Calcis metallicae dilute virescentis pondus erat 1038.
- e) Post reductionem regulus repertus fuit albido flavus, ponderis 594, semiductilis, magneti, ut qui maxime, obediens, simulque admodum refractarius.
- f) Hic iterum cum sulphure fundebatur, quo facto pondere aequalis erat 816, cujus dimidia pars, usque ad virescentiam ustulata, cum parte altera adhuc sulphurata ignis ope unita et 509 aequilibris magneti vix obtemperabat. Post quatuor horarum calcinationem, sub qua multum arsenici avolavit mediante phlogisto, pulvis cinereum induebat colorem, parum virentem, ponderis 569, qui in reductione regulum praebuit superficie rubicunda et in fractura albido cinereum, valde



valde fragilem, 452 aequalem, ejus gravitas specifica erat 7, 1730.

- g) Regulus tertium cum sulphure mineralifatus eodem ac antea tractabatur modo, et tandem cum pulvere carbonum, donec nulla arsenici superessent vestigia, quod vehementem 12 horarum calcinationem postulavit. Pulvis demum restans cinereo virescens pondere 364 aequalis fuit, regulus vero, qui, post reductionem per tres horae quadrantes in foco fabrili fortissimi ignis ope institutam, acquirebatur, adeo erat refractarius, ut in scoriis hyacinthino colore distinctissimis imperfecte tantum coaluisset, et ne quidem borace addita eademque ignis vehementia in globulum potuit redigi. Reguli hujus gravitas absoluta erat 180, specifica vero 8, 6666: magneti pertinaciter non tantum adhaerebat, sed etiam cuilibet ferro, immo frustula se invicem attrahabant, ea praeterea instructus ductilitate, ut ex globulo, cujus diameter lineam non superabat, cudendo confici posset lamina diametro trium circiter, et quod excurrerat, linearum. Colore albicante rutilabat, tenacique gaudebat fractura. Alkali volatili solutus colorem monstravit coeruleum, et acidō nitri saturate viridem. 100 partes ejusdem reguli malleo in tenues lamellas extensae post 4 horarum calcinationem crusta, specie martiali, tegebantur, sub qua pulvis viridis, et intime nucleus e regulinis atomis immutatis, reperiēbatur: pondus 5 erat auctum. Haec materia in pulverem redacta colorem induebat fusco virescentem, et post iteratam 4 horarum calcinationem in crustam fragilem, nigrescentem, fundoque adhaerentem concresebat, quae magnetem vehementer adpetebat, 100 pondere aequalis. Postea crusta comminuta 3 horis fuit ustulata,

addito

addito carbonum pulvere, aut nec arsenici ulla detecta sunt vestigia, nec magnetica destructa vis, pondus vero jam 105 erat et color parum mutatus. Hic pulvis cum calce et borace, per horae spatium fusus, dedit regulum, ponderis 72, rubellum, angularem, semiductilem et magneti totum adhaerentem, ejus gravitas specifica erat 8,8750. Idem globulus in aqua regis solutus vitriolo martis praecipitatus quidem fuit, veluti auro foetus, aut sedimentum acido nitri facillime solvebatur, adeo ut auri non sustineret indolem: ceterum plerique, quos obtinimus reguli, nulla monstrarunt vitriolo martis praecipitationis indicia, unde prono, ut ajunt, alveo fluit, aurum, si aliquando, tamen non semper adesse.

- b) 800 partes minerae Niccoli, quae in Saxonia ad Johan Georgenstadt reperitur, per 14 horarum spatium ustulatae, et mediante pulvere carbonum arsenico, quantum fieri poterat, liberatae, ponderis 248 jacturam fecerunt. Post reductionem et primam mineralisationem, consueto more institutam, hoc in primis memoratu dignum sese obtulit, quod regulus sulphuratus posterior, ante perfectam calcinationem 230 adaequans, postea 242 aequilibris fuerit. Et post alteram sulphurationem eodem fere modo in ultima calcinatione auctum est pondus, scilicet a 70 usque ad 78 partes. Regulus, qui tandem adquirebatur, aequalis 22, magneti obtemperans, gravitate specifica 7,3333 gaudens, et vitrum cum borace producens hyacinthinum, aegre calcinabatur, sed tandem in pulverem fatiscibat virescentem, ejusdemque coloris solutionem dedit cum acido nitri.

L i) Cum



- i) Cum 100 partibus minerae Losensis repetitus est, qui in praecedenti momento *b* describitur, mineralisationis et calcinationis processus, est absque ullo ponderis lucro. Regulus, qui ultimum obtinebatur, gravitatis erat absolutae 1, specifica vero circiter 8,0000, boracem hyacinthino lutescente et acidum nitri viridi tingebat colore.

§. 1971.

QUONIAM experimentis constat ab hepate sulphuris facilius dissolvi cobaltum, quam Niccolum, haecque materias hoc medio posse in igne quodammodo separari, suspicio orta est, num inaequalis adfinitatis gradus idem cum ferro et niccolo efficere queat.

- a) Itaque 58 partes reguli niccoli, qui antea fuerat sulphuratus (§. praec. moment *g*), cum 1800 hepatis sulphuris salini fusae, dein aqua fervente solutae, charta bibula colatae et acido praecipitatae pulverem praebuerunt, qui usque ad consummationem sulphuris in patella ustulatus cinereus reperiabatur et aequilibris 35 partibus.
- b) Residuum, quod aqua fervida non poterat solvi, mediante igne, sulphure spoliatum, etiam cinereum fuit, ponderisque 334 partium.
- c) Residuum non solutum, fluxus nigri ope redactum, regulum dedit fragilem, qui quidem parum magneti obediebat, sed cum borace iterum fusus eidem validius adhaesit, antea sulphure impeditus.
- d) Idem etiam tentavimus hepate calcareo, sumimus nimirum ex praescripto Domini BAUME calcem niccoli, gypsum, colophonium et fluxum album in proportionem anatica, quae materiae mixtae et fusae dederunt massam regulinam sparsam et squamosam. Haec cum borace fusa regulum praebuit proprietatibus gaudentem niccolinis,

linis, nondum tamen omni privatum cobalto, qui magneti adhaesit, et ne quidem post binas in acido nitri solutiones, variasque reductiones, et cum borace institutas fusiones, ferrum amisit: sulphur praeterea pertinaciter retinuit.

§. 1972.

TANDEM nitrum, quod melius ulla alia huc usque cognita materia phlogiston evellit, adhibuimus, quo ipso heterogenea immixta facilius scorificatum iri speravimus, cum et segnius inflammabile dimittere videatur niccolum et citius quoque idem recuperare.

- a) Reguli Cronstedtiani unani in crucibulo duodecim partibus nitri igniti addidimus, et in eodem caloris gradu servavimus per horae spatium. Initio debiles visae sunt scintillae, forte ex sulphure, dein vero multum arsenici efflavit massa, tandem latera coerulea induta fuerunt crusta a cobalto, et in fundo virens restitit materia. Haec iterum cum duodecim partibus nitri fusa per horam, coeruleo colore interne tingebat latera vasis, et in fundo demum collecta massa fuscovirescens multum fuit minor, quam in praecedente operatione.

Materia viridis tertium eodem modo duabus horis tractata scoriam reliquit griseum in fundo, quae cum fluxu nigro nullum dedit regulum.

Cum nitro alia ejusdem reguli portio fusa, similiter ac antea, viridis solvebatur, tandem vero, mediante aqua, sale alcalino liberata, neque haec cum fluxu nigro ullum dedit regulum, sed scorias hyacinthinas coeruleo contaminatas, quae acidum nitri viridi tingebant colore, in gelatinam concredebant, et, evaporatione peracta, calcem relinquebant virescentem.



- b) Alia reguli Cronstedtiani portio cum partibus sedecim nitri in crucibulo ignita per aliquot horas detinebatur, quo ipso primum omne preparatum fuit arsenicum, dein acidum nitri phlogisticatum vaporabat, et tandem flores coeruleo virescentes latera penetrabant. Massa, mediante aqua, alcalino liberata et siccata erat dilute viridis, boracemque fusco coeruleo tinge-
bat colore.

Haec iterum per quatuor horas cum duodecim partibus nitri similiter tractabatur, et post edulcorationem pulverem adhuc praebuit viridem, qui $\frac{1}{2}$ fluxus nigri, $\frac{1}{8}$ calcis et $\frac{1}{8}$ boracis reductus dimidia hora regulum dedit flavo album, et magneti, et malleo, obedientem, omnibus praeterea gaudentem niccolinis proprietatibus, cujus gravitas specifica erat 9,0000. Inflammabile parce adhibuimus, ut, si fieri posset, ferrum scorias intraret.

- c) Minerae Losensis una cum octo partibus nitri horae spatio in crucibulo probe fuit ignita, et initio magis distincta, quam cum regulo, adparuit detonatio. Calx, quae aqua a massa salina separabatur, fusco ferruginea erat, ei similis, quae post calcinationem cum pulvere carbonum restare solet. Haec reducta regulum praebuit cinereo album, tenacem et magneti adhaerentem, gravitate specifica 8,5573 donatum: scoriae erant nigrae. Regulus in pulverem reductus, cum duodecim partibus nitri fusus multum amisit cobalti, calcem dedit viridem, quae in reductione cum fluxus nigri duplo, calcis vivae et boracis dimidia parte, non nisi globulos niccolinos sparsos, tenaces et magneti adhaerentes reliquit.

d) Una

- d) Una Reguli Cronstedtiani cum nitri octo partibus fundebatur tribus horis in crucibulo, cujus operculo tubus vitreus apertus ita fuit adaptatus, ut qui adscendebat fumus in eodem colligi posset. Operatione peracta superne in tubo arsenicum reperiebatur album, inferne vero pulvis fusco cinereus parum virens, qui boracem hyacinthino tingebat colore et regulum dabat ita arsenico foetum, ut magneti non adhaereret. Parietes crucibuli coerulei erant, in fundo vero massa salina viridis elixata demisit calcem viridem, quae horae spatio cum duodecim partibus nitri igniebatur, vasisque latera coeruleo tingebat colore: residuum cinereo virescebat. Hoc tertium fundebatur cum nitro per horam, et partim coeruleum, partim viride evasit, at deinde, dum quartum residui pars viridis sola cum nitro eodem tractabatur modo, tota quanta cyanea adparuit, viridis tamen solvebatur acido nitri, et boracem hyacinthinum reddebat, adeo ut niccolum tenuissima crusta circumdatum coerulea esse constaret.
- e) Cum tentamina jam memorata indicarent mediante nitro minima cobalti vestigia, quae alias perfectissime latent, luculenter posse detegi, varia producta niccolina sub fornice furni docimastici in patellis, addito nitro, quatuor horis exploravimus. Nimirum, 1:0 Regulum §. 1969. momenti *i*, qui parum coeruleescebat 2:0 Regulum antea alcali volatili solutum (§. 1975. mom. *a*), qui multum cobalti, antea delitescens, denudare coactus fuit. 3:0 Regulum antea sulphuratum, qui subcoeruleam induebat pelliculam. 4:0 Globulos momenti *c*, qui copiam florum coeruleorum exfudarunt. 5:0 Sublimatum praecedentis momenti *d*, quod per-



quam debilia dedit cyanea indicia, et tandem 6:0 Scoriam niccoli hyacinthinam, quae egrè gie coerulefcebat, cobaltum tamen adeo parce possidebat, ut e vitro boracino, eodem tincto, ope tubi camentatorii omnis expelli posset color, qui vero, addita nitri portiuncula, mox coeruleus comparuit. Scilicet haec est calcium metallicarum natura et indoles, ut eo fortius vitra tingant, quo spoliatae magis sint phlogisto, et contra, dum ad certum gradum inflammabile recuperant, omnis iterum evanescit infectio: prius nitro, postèrius fusione in carbone praestari potest, si nimirum adeo parva sit calcis quantitas, ut e carbone ad saturationem queat hauriri. Scoriae hae hyacinthinae alias acidum tingunt viridi colore et alcali phlogisticato instar niccoli praecipitantur.

§. 1973.

Quum ferrum mediante sale ammoniaco facile sublimetur, utrum hac via niccolum eodem possit spoliari, modo sequenti fumus experti.

- a) Calx niccoli cobalto ita liberata, ut cyaneo boracem omnino nihil tingeret, cum duplo salis ammoniaci mixta, cucurbitae, alembico testae, immissa, ignique sensim aucto exposita, usque dum canderet vitrum, fundum hyacinthi saturatissimo inficiebat colore et flores exhalabat, parietibus adhaerescens, partim cinereos, partim etiam albescentes, qui tamen eandem, ac praecedentes, adtingere nequiverunt altitudinem.

Residuum duo monstravit strata, quorum superius flavum, squamosum et instar auri musivi splendens, cum borace vitrum hyacinthinum, sed nullum efficiens

efficientes regulum; in aëre post aliquot dies liquefactum butyri consistentiam viridemque adquisivit colorem; cum aqua fervida residuum calcis niccolinae colore et proprietatibus insignitum erat et virescens orta solutio, quae cum alcali volatili coerulescebat, sed cum tinctura gallarum nulla monstrabat ferri praesentis signa, quod posterius etiam de floribus valet.

Stratum inferius, niccoli calcem, in vegetationes nondum mutatam acidoque salis parum inquinatam, continebat. Colore nigrescens erat et ad fundum vasis fusco ferrugineum; cum borace vitrum dabat hyacinthinum et regulum fragilem, rubicundo albidum, magneti vix adhaerentem.

- b) Pars strati inferioris momenti *a* cum duplo salis ammoniaci sublimata, eodem ac in praecedenti ignis gradu, (quod itidem de sequentibus valet), fundum sphaerae etiam reddidit hyacinthinum et flores praebuit albisimos, sed residuum fusco ferrugineum, ad latera superne virescens.
- c) Strati inferioris portioni reductae addebantur 20 partes salis ammoniaci, quibus in vase retorto elevatis, immutato colore, restabat pulvis nigrescens, qui in calcinatione viridem et in scorificatione hyacinthinum induebat colorem, aequae ac ipse fundus.
- d) Pulveri in momento *c* relicto immiscebatur duplum salis ammoniaci, quod albisimum iterum in sublime ferebatur, et quae restabat massa virescens infra ferrugineo fusca fuit.
- e) Cum residuo momenti *d* et duplo salis ammoniaci instituta sublimatio dedit flores ammoniacales, ut antea, albisimos, et residuum viridissimum, calci niccoli omnino simile, quod in acido nitri eodem solvebatur colore et in reductione



ductione niccoli porrigebat regulum, albidum, fragilem, magneti parum obedientem.

In quavis sublimatione alcali volatile primum, deinde vero sal ammoniacus, et tandem quidquam acidi salis in vasa transferunt recipientia.

§. 1974.

POSTQUAM tot experimenta ignis ope instituta fuerant, multa etiam via humida facta sunt, et quidem primum cum sale crystallifato, quem niccolum nitratum nominamus, ex niccolo et acido nitri composito, quod si quid aliud efficeret, ut ferrum, a suo menstruo dephlogisticatum, separaretur.

- a) Niccolum nitratum sub calcinatione, carbonum pulvere adpersum, multum arsenici emisit et post reductionem praebuit regulum griseum, semiductilem et retractorium h. e. magneti obedientem.
- b) Hic iterum acido nitri solutus, cum alcali fixo praecipitatus et reductus regulum porrigebat fragilem:
- c) Qui tertium solutus, et eodem ac antea tractatus modo, dedit regulum semiductilem retractorium;
- d) Cum quo quartum eadem repetita fuit operatio.
- e) Regulus tandem quintum solutus ita fuit comminutus, ut calx albida, quae per praecipitationem obtinebatur, ulteriori disquisitioni subijci non posset.

In solutionibus singulis jam memoratis nigrescens sese obtulit residuum, quod in acido relictum sensim albescebat, edulcoratum vero prunaeque candenti impositum sulphureum exhalavit fumum et pulverem reliquit nigrescentem, qui acido nitri solvebatur.

§. 1975.



§. 1975.

Ut innotesceret, quo successu alcali volatile causticum niccolo depurando adhiberi queat, reguli Cronstedtiani portionem acido nitri solutam, alcali fixo praecipitatum, edulcoratum et siccatum sequenti traclavimus modo.

a) 487 partes hujus calcis superfluo immerfae alcali volatili, 24 horis praeterlapsis, residuum dederunt 50 aequale, nigro virescens, et solutionem, coerulei coloris, quae colata et ad siccitatem usque inspissata pulverem praebuit dilute virentem et 282 aequilibrem. Hic cum fluxu nigro reductus albidum, semiductilem et magneti tenaciter adhaerentem effecit regulum, 35 partium et gravitatis specificae 7,0000. Quae jam relinquebatur scoria spadicea erat, sed opoboracis diluta hyacinthinum induebat colorem: niccoli insuper continebat calcem, quae regulum praestitit album 30 partium, qui praecedenti, ope ignis, unitus contumacissimus erat, ita ut flamma et tubo caementatorio in carbone fundi non posset, quamvis borax adderetur. Sub calcinatione, pulvere carbonum abunde admixto, nullum, nec arsenici, nec sulphuris emisit fumum. In sequente reductione hyacinthinam dedit scoriam et flocculos residuos in viridissima solutione acido nitri facta, quae, alcali volatili instillato, ejusdem coloris pulverem demisit.

b) A 50 residui nigrovirescentis partibus per reductionem obtinebatur regulus albedo nitidus, fragilis, squamosus, magnetem parum adpetens, pondere 14 partium et gravitate specifica 9,3333. Scoria ad fundum vasculi obscure cyanea, sed superne erat hyacinthina. Regulus facile fundebatur et boracem primum coeruleo,



deinde hyacinthino inficiebat colore, quo facto, a magnetē validius, quam antea, trahebatur. Caloris ope, acido nitri facta est solutio, quae pulcherrime virefcebat. Sub hac solutione pulvis adpartit nigrescens, qui primo flocculentus innatabat, deinde vero fundum petens albescebat, et post edulcorationem igni expositus cum odore sulphureo qua maximam partem dissipabatur, at in fundo residebat adhuc massula, fusci coloris, alcali volatili solubilis. Solutio antea memorata ab alcali phlogistico cum calcis niccolinae colore praecipit ferebatur et cum alcali volatili mox coerulescebat.

Hinc igitur patet niccolum alcali volatili facillime et totum etiam solvi, nisi sulphure praesente menstrui impediatur efficacia.

§. 1976.

OMNIBUS, quae jam adtulimus, experimentis rite pensatis, haud difficulter elucet, perfectam Niccoli purificationem et omnimodam heterogeneorum separationem mediis huc usque cognitis vix et ne vix quidem posse obtineri. Ipsum *sulphur* calcinationibus et solutionibus aegre aufertur (§. 1968. l. 1974 et 1975.) *arsenicum* adhuc fortius adhaeret (§. 1968. 1969.), mediante vero carbonum pulvere et nitro plene expellitur (§. 1968. n. 1972. b.) *cobaltum* pertinacissimum restat, nam nitro addito ejus deteximus praesentiam, etiam in quibusdam productis, ubi nullo alio signo potuit denudari. Certe cobalti quantitatem eo usque nitro diminuimus, ut solutionibus humidis omnino lateret (§. 1972. d), vix boracem inficeret, et qui oriebatur tinctus carbonis phlogisto, ope tubi caementatorii, saturatus evanescere posset, quod cum cobalto, colore ditissimo, extremam evincit tenuitatem (§. 1972. e.) Quin vero etiam exilia haecce ejus-

eiusdem vestigia tolli queant tanto minus dubitamus, quanto certius nobis constat postremas coerulei coloris evolutiones non cobalto, sed ipsi ferro esse adscribendas, quod mox luculentius demonstrabimus, in praxi tamen molestiam parit haud exiguam eorundem separatio. Scilicet hae reliquiae nitro extricatae ipsum niccolum, quod hac operatione maxime fit spongiosum, in superficie circumdant, eidemque pertinaciter adhaerent, adeo ut mechanice non possint secerni, et aegerrime menstruis, cum eadem utramque solvant materiam, igne praeterea simul scorias intrant, saltem adeo parva hoc respectu observari potuit differentia, ut, nisi operationi ingens subiiciatur quantitas, cum cobalto simul omne evanescat niccolum.

En igitur *ferrum* solum restans, et ejus quantitatem ultra certos limites diminuere non potuimus. Ejusdem praesentiam magnes facillime prodit, et non tantum reguli diversimode torti eidem lubenter adhaerent, sed nonnulli etiam ipsi magneticam adquirunt facultatem (§. 1970. g), quod observatu est dignissimum. Ceterum tenacitas et fusionis difficultas, quae eo magis crescunt, quo torquetur niccolum diutius, abunde testantur de separando ferro vix ullam superesse spem. Nec igitur scorificationes, nec sal ammoniacus (§. 1973.) nec nitrum (§. 1972.) (quod alias, teste Junckero, ferrum adeo efficaciter adgreditur, ut e limaturae martis libra, cum aequali nitri quantitate mixta, post detonationem, fusionem et elixationem non nisi semuncia croci restet), nec acidum nitri (§. 1974.) nec denique alcali volatile (§. 1975.) ad metam duxerunt propositam.

Praeter allata heterogenea *vismutum* interdum quoque adest, hoc vero facillime secernitur, si solutiones acidis factae sufficiente diluantur aqua, quippe



qua menstruum enervatum, instar pulveris albi, calcem memorati semimetalli demittit.

S. 1977.

JURE jam quaeritur, *utrum niccolum distincta sit materia metallica, an vero ex aliis intime unitis naturae manu confecta miscela?* Dudum ab initio indicavimus arsenicum, cuprum, cobaltum et ferum a variis auctoribus instar principiorum proximorum etiamnum considerari. Quod ad *arsenicum* attinet, idem tuto ex hoc numero excludendum postulamus, nam experimenta descripta evincunt hoc penitus posse expelli.

Quin *cuprum* in nonnullis mineris niccoli addit, ideoque ipsum regulum facile contaminet, non dubitamus, ast pleraeque eodem omnino carent. Verum quidem est, quod niccolum totum quantum solvatur alcali volatili, idque colore cyaneo (§. 1975. b.) sed, si hoc valeret argumentum, non nisi cuprum in eodem reperiretur, et hoc in casu longe alia phaenomena monstraret, quam niccolum. Quod alcali volatile utrumque eodem suscipiat colore, non magis probat identitatem, quam solutio flava et auri et ferri aqua regis facta.

Niccolum et cuprum in eo quoque conveniunt, quod utrumque, et acidis et alcali volatili, praecipitetur ferro, sed in modo insignis observatur differentia. Solutioni niccoli immergatur ferrum nitidum, eidem sensim pellicula flavescens niccolina adfigetur, quae tactu evanescit et mox nigrescit, nisi acidum bene fuerit saturatum, vel aqua sufficienter dilutum. Talis quoque post semihoram conspicitur praecipitatio, si loco ferri zincum adhibeatur, ast in solutione cupri eo usque diluta, ut praecipitatio in ferro niccolinae quodammodo sit similis, statim zincum cortice tegitur orichalei coloris.

Quod



Quod nec *cobaltum* ad essentiam pertineat niccoli, quae in antecedentibus descripsimus experimenta factis evincunt (§. 1275. 1279. k.)

Solum itaque jam *ferrum* restat, et sane variae, eademque non exigui momenti rationes suadent, et niccolum et cobaltum et magnesium regulum magnesia nigrae) non aliter ac diversas ferri modificationes esse considerandas.

Primo in genere notamus inaequales phlogisti portiones, eidem unitas ferro, ejusdem qualitates mirum in modum mutare. Quantumne differunt ferri chalybisque multifaria genera? Deinde observandum est, memorata semimetalla quacumque torqueantur huc usque cognita methodo, ferro non tantum non posse penitus privari, sed contra magis ductilia, retractoria et refractaria fieri. Varii demum colores, qui tribus nominatis semimetallis, tam humida, quam sicca via procreantur, ferrum itidem exhibet. Rubrum monstrant cobaltum et magnesium in acidis et posterius etiam in vitris: hyacinthinum praebet niccolum et magnesium cum borace fusa: viridem habemus ex niccolo in acidis, ex ejusdem calce, ex magnesia nigra diu fortiterque calcinata, et hujus quoque coloris scoriam saepe relinquit, si reductio cum fluxu salino instituitur: coeruleum tandem vel potius violaceum exhibent cobaltum in vitro, magnesium fixo et niccolum volatili solutum alcali.

Haec variationes omnes ferrum quoque ostendit. Suscipiunt nimirum hoc metallum acida viridi colore, quamdiu certa adest phlogisti quantitas, sed dum haec minuitur, flavent, rubent vel fusco rufescunt. Vitra similiter tingit viridia, flava, nigricantia vel rubra. Si nitro per plures horas torquetur ferrum flores salinos virides, coeruleos, viridi coeruleos et purpureos, pro re nata, exsudent crucibuli fundus

et



et parietes: haec efflorescentia aquam vix tingit, vitis vero virescentiam sub refrigeratione evanescentem, uti solet ferrum, impertit, unde etiam constat, quam antea e niccolo mediante nitro expulimus, qua magnam partem, martis fuisse progeniem. Ceterum in regno minerali habemus lapides nephriticos, smegmaticos, serpentinos, jaspides, argillas a viriditate dictas (Terres verdes), aliosque virides: Lapidem Lazuli, coerulea berolinensia naturalia, ceteros cyaneos, multasque flavi et rubri diversitates, omnes e ferro ortas.

§. 1978.

Qui haec fundamenta rite examinat, minime improbabilem reperiet conjecturam de illis e ferro derivandis semimetallis, quae hoc penitus spoliari nequeunt, ansamque arripiet eandem ulterius novis experimentis et observationibus disquirendi. Ast quamdiu e puro ferro eadem in medium nemo produxit, processusque explicavit, quibus pro lubitu magnesium, cobaltum vel niccolum procreetur, vagae suspiciones phaenomenis et qualitatibus constantibus cedant oportet, distinctaeque et propriae originis substantiae habeantur. Si enim e metamorphosi tantum opinabili geneses rerum stabilire liceret, Philosophiae naturalis omnis certitudo et praestantia cito evanesceret: dum verisimiles conjecturas thesibus, experimentis sufficienter comprobatis, substituimus, umbras pro corporibus, nubem pro Junone amplectimur.

§. 1979.

QUAMVIS experimenta, quae instituimus synthetica, originem niccoli nobis non detexerint, ideoque eo respectu irrita fuerint, interim tamen praecipua memoranda existimamus, ut aliis facilior paretur via.

Gravi-

Gravitates Specificae cupri, ferri, cobalti et arsenici albi adhibitorum, ad aquam destillatam relatae, fuerunt, ut 9,3243; 8,3678; 8,1500 et 4,0000.

- a) Cuprum et ferrum in ratione anatica, addito fluxu nigro, fusione unita, massam dederunt rubicundam, gravitatis specificae 8,5441, quae acidum nitri primum cyaneo, dein viridi, tum flavo, et tandem fusco opaco, tingebat colore.
 - b) Cupri 2 partes et ferri 1 unitas gravitate gaudebant specifica 8,4634, quae primum cyanae, dein virides solvebantur.
 - c) Cupri, ferri et cobalti ana regulum praebuerunt gravitatis specificae 8,0300, qui fuscus solvebatur.
 - d) Cupri 1, ferri 1 et arsenici 2 mixturam dabant fragilem, gravitatis specificae 8,0468, quae cyanea solvebatur.
 - e) Cupri 1, ferri 1, cobalti 2 et arsenici albi 2 dabant fragilem compositionem, gravitate specifica 8,4186, quae fusco rufa solvebatur et sponte praecipitabatur.
 - f) Cupri 1, ferri 1, cobalti 4 et arsenici albi 2 gravitate specifica gaudebant 8,5714; in acido nitri similiter se habuit regulus, sed magis rufescens.
 - g) Cupri 1; ferri 2, cobalti 4 et arsenici albi 2, gravitate specifica gaudebant 8,2941, solvebantur rufo colore et sedimentum demiserunt.
 - h) Ferri 1 et arsenici albi 4 fusae solvebantur flavae, et, addito alcali phlogistico, coeruleum mox dabant Berolinense.
- Omnes hae mistiones igni expositae calcem reliquerunt, non viridem, instar niccoli, sed fuscam, nigram vel ferrugineam.

i) Cupri



g) Cupri 1, ferri 8, arsenici albi 16 et sulphuris 4 partes igne unitae, addito fluore nigro, massam dederunt, quae saepius calcinata et reducta non nisi ferrugineam vel fuscam praebeuit calcem, acido nitri virescentiam conciliavit, sed alcali phlogistico coeruleum demisit Berolinense.

h) Via humida plurima etiam instituimus experimenta, quorum unicum adduxisse sufficiat. Pars 1 ferri solvebatur 6 acidi nitri, similiterque seorsim cupri 1 et minerae cobalti calcinatae 1, eadem ejusdem acidi quantitate. Dein solutionem ferri totam miscebamus partibus 5 solutionis cupri, unde color niccoli viridis saturatus oriebatur, qui vero tribus cobaltinae evidenter obfuscatus fuit. Huic alcalinum lixivium instillabatur, quo primo sedimentum fusco ferrugineum subsidebat, solutione adhuc viridi restante, dein vero coeruleum praeceps ferebatur, quo initio omnis periit color, sed postea rufus cobalto, alcalino sale soluto, prodiit. Sedimentum reductum regulum praestitit cupro similem et ductilem, qui et vitrum et acidum nitri cyaneo tingebat colore.

Si niccoli solutio saturata dimidio cobaltinae commisceatur, viridis color multum obscuratur, prioris vero quatuor partes tribus posterioris omnem cum niccolina exuunt similitudinem.

§. 1980.

QUALE sit niceolum purum accurate non potuit determinari, cum ferrum semper praesens ejusdem quodammodo confundat proprietates.

a) Gra-

- a) Gravitas specifica non nisi imperfecte eruitur, praesertim ignorata ferri quantitate. *) Niccoli veri gravitas specifica saltim non erit 9,000 inferior.

§. 1981.

Si auri portiuncula compositionem intraret, tanta inde gravitas explicari posset, sed quamvis fere semper absit, uti antea observavimus (§. 1970. g.) tamen ejusdem partes 36, ferri 48 et cupri 1 igne confudimus in globulum, qui gravitate quidem specifica gaudebat 8,8571, acido vero nitri parum solvabatur, post moram duarum horarum in menstruo aurum visu discernendum monstravit, et alcali volatili non nisi fusco ferrugineum praeceps dedit sedimentum, in igne praeterea ferri exusti induens faciem, quibus singulis ab indole niccoli discrepat.

§. 1982.

b) SOLVITUR niccolum acidis: *vitriolicum* calcem adgreditur et viridem format salem decædram, figurae aluminaris compressae, apicibus duobus oppositis truncatis: *nitrosum* calcem aegre suscipit, crystallosque format coeruleovirides, spathosas et deliquescentes: *salinum* et regulum et calcem, tarde tamen, solvit et calore juvandum: *arsenicale* cum niccoli calce in massam salinam viridem concrefcit; *acidum fluoris mineralis* cum niccoli calce aegre soluta crystallos efficit dilute virides: *acetum* similiter in crystallos, at spathosas et viridissimas, abit: *acidum tartari* vix solvit, saltim viridem non exhibet solutionem: *acidum sacchari*, cum regulum, tum etiam calcem niccolinam mutat in pulverem albidum, aqua non

- *) OMISI hic demum computum algebraicum fusioem, quem Cl. BERGMANN circa gravitatem niccoli puri, ferri, et decrementum ponderis a calcinatione oriundum &c. instituit.



non facile solvendum: *acidum phosphori* parum ad-
petit niccoli calcem, cum qua crystallos non effor-
mat, sed solutionem vix virescentem praebet: *aci-
dum formicarum* nec regulum, nec calcem, nec nu-
per praecipitatum niccolum adgredi videtur, hoc ta-
men in materiam salinam, ope caloris, tandem con-
vertit: *succus citri* in niccolum nihil omnino agit:
idem valet de *sale sedativo*, quatenus huc usque co-
gnitum. *Alcali volatile* niccolum coeruleo colore,
et *alcali fixum* lutescente, parce tamen, solvit, omnia
vero acida saturatissima viriditate tinguntur, et haec
tingendi facultas perquam fortis est, cum primus re-
gulus (§. 1967.) aequae ac maxime depuratus, simi-
les exhibeat infectiones: tales coloris divitiae ingenti
materiae quantitati in parvo volumine bene con-
gruunt.

§. 1983.

c) Quo purius, eo funditur difficilior niccolum,
adeo ut purissimus, quem obtinuimus, regulus eum-
dem ferme caloris gradum requirat, ac ferrum cu-
sum. Cum aliis metallis haud difficile colliquescit,
penuria vero hujus materiae non permittit, ut singula
haec obvia phaenomena examinarem. In genere
tantum notamus, regulum impurum nequaquam cum
argento posse uniri, quod cobalto est adscribendum,
nam eo bene liberatus facillime nobili metallo in pro-
portione anatica immiscetur, absque notabili ejus-
dem albedinis vel ductilitatis detrimento: haec mix-
tura cum borace fusa eandem hyacinthinam facit.
Cuprum cum niccolo depurato seignius coit, praebens
massam rubicundam ductilem, et vitrum sanguineo
hyacinthinum. Cum *stanni* aequali, vel etiam ma-
jori mole, non nisi fragilis oritur mixtura, quo etiam
niccolum a cobalto differt. *Mercurio vivo* tritura-
tione unire non potuimus. Cum *zinco* colliquescit
niccolum depuratum, fragilis tamen fit massa.

§. 1984.

§. 1984.

DUBIUM jam videri posset, utrum ductilibus, an vero fragilibus metallis, adnumerari debeat niccolum. Ferrum fusum semper fere fragile est, a eoque ejus cum niccolo ductilitas notatu est dignissima.

§. 1985.

d) NICCOLUM depuratum aegerrime calcinatur methodo ordinaria sub fornice furni docimastici, et colorem non nisi fuscum accipit, mediante autem nitro melius phlogisto privatur et viriditatem induit. Calx metallica borace vitrificata hyacinthinam prodit tincturam, quae tamen, si e regulo parum depurato orta, diuturno igne plane evanescit, vitro restante omni colore orbato, nitro vero addito non nisi debilis coerulesque tinctus adparet. Calx e regulo bene depurato colorem praebet vix evanescentem. Sali microcosmico calx niccolina hyacinthinum itidem impertit colorem, qui diutina fusione in carbone debilitari potest, vix autem penitus extinguui, ast addito nitro violaceum acquirit colorem, qui sale microcosmico aucto iterum fit hyacinthinus. Si calx niccolina ad saturationem usque additur, vitrum fuscum sanguineum esse videtur, sed sub refrigeratione magis magisque flavescit.

§. 1986.

PRO coronide dissertationis hujus CL. BERGMANN enumerationem adfert minerarum niccoli, a se examinatorum, ac in Musaeo academico Upsaliensi adscriptarum, lingua suecica conscriptum sub titulo: *Nickel Malmer, Lösas med grön färg i syror, och gifva grön vittring, samt i rostning dylik Kalk*, quod latine sonat: *Minerae niccolinae ab acidis colore viridi solvuntur, eodem sub colore efflorescunt, similemque, ustulatae, relinquunt calcem.* Quum

Pars II. Sect. II.

K


vero



vero haec ad *Mineralogiam* et *Docimasiam* aptius pertineant, ea traducere, et sectionem, aliunde sat amplam, nimium extendere nolui.

§. 1987.

COMPLEXUS vero, ni fallor, in hocce capite fui omnia, quae hactenus de niccolo nota sunt, experimenta memoratu digna. Dissertationem *Cl. Petri POGARETSKI de Semimetallo Nickel*, quae *Lugd. Batav. 1765. 4.* prodiit, adquirere solam nondum potui.



ARSENICUM.

§. 1988.

I.) **A**RSENICUM (:o--o:) *) in terrae gremio reperitur vel forma praeditum *metallica*, vel *calcinatum*, vel denique sulphuri intime et solutionis more unitum; haec vero diversitas non potuit non primos latere inventores, unde etiam quam diutissime de

*) EXHIBEO hic primo loco, uti jam in Praefatione monui, egregiam dissertationem *Cl. BERGMANN de ARSENICO*, in Germania, aliisque extra Sueciam provinciis, rarissimam, *Upsaliae 1777.* publici juris factam. Quum ego ab inpressionis loco satis remotus sim, hinc paragraphorum, in quas opus meum parti placuit, numeros ordinare ipse nequeam; praeter meas, *Bergmannianas* etiam, in initio sectionum *litteris* notatas, retinui paragraphos, nec citationes Auctoris reciprocae forsan perturbarentur. *Bergmannianae* dissertationi nectam alia, circa substantiam hanc metallicam singularem notanda.

de ejusdem vera indole mirum in modum distractae fuerunt opiniones. Tempus, quo ab aliis distingui mineralibus, quove jam usitato nomine coeperit designari, densa reconditum est caligine. Simillimum est veri, hanc materiem iis primum innotuisse, qui in ustulandis et fundendis mineris defudarunt, et fuligine alba, et odore alliaceo, et pernicioso denique effectum, non minus in enecandis animalibus, quam in depravandis metallis notabilem, imo odiosissimam.

§. 1989.

ARISTOTELES Συνδραμαίνων, ejusque discipulus THEOPHRASTUS ΕΡΗΣΙΟΣ simul Ἀρσενικόν memorat, quod DIOSCORIDI, aliisque circa initium aerae christianae viventibus Graecis Ἀρσενικόν audit; hisce autem denominationibus ea tantum mineralia indicant, quae a PLINIO, aliisque latinis auctoribus *Sandaracha* et *auripigmentum* vocantur. AVICENNA, saeculi undecimi chemicus, qui, quantum hactenus constat, primus subterranea in lapides, metalla, salia et sulphura distinxit, non tantum de *arsenico albo* loquitur, sed, quod notandum, de eodem *sublimato*. a) Ultimus innotuit *regulus*; licet inter lapides metallicos dudum *auripigmentum* et *sandaracham* retulerit THEOPHRASTUS.

§. 1990.

AVICENNA, et post illum ad nostra usque tempora plures, inter *sulphura* arsenicum collocant; ALBERTUS M. alique inter *salina*; BECHERUS vero *saponatam*, ut vocat, vel *salino-sulphuream* eidem tribuit indolem. Certe, quum aquam subeat arsenicum

K 2

a) ARSENICUM aliud est album, aliud citrinum, aliud rubeum - - album ex eo interficit, et sublimatum ex eo interficit. AVICENNA.



cum album, *salini* quid inesse, haud obscure patet, licet illud et in regulo, et ejusdem mineralisationibus, omnino lateat. Quod hoc *salinum acidae* sit profapiae, expetita cum alkalinis connubia luculenter innuunt, praesertim quum celebris MACQUERT experimenta hinc salia, et crystallifabilia et neutra procreare doceant *b*); interim tamen ante nostrum SCHELIUM nemo hoc acidum purum elicere novit, suasque nuper descripsit methodos experientissimus inventor. *c*)

§. 1991.

Quod ad *sulphuream* arsenici indolem adinet, quam urgent nonnulli, fateri oportet ipsum regulum, immo et *auripigmentum* et *risigallum* accendi posse, quod tamen nullo modo valet de arsenico albo. Si igitur ex sola judicandum sit proprietate, sulphuream qualitatem, aequae ac dudum de salina observavimus, non nisi certo cuidam statui adscribi posse adparet. Sed praeterea Zincum, aliaque bene multa corpora, igne quoque facile inflammantur, non ideo sulphurea vocanda, nisi hac denominatione phlogisti copiam et memorato effectui adaptatam connexionem, tantummodo indicatas velimus.

§. 1992.

Vulgo quidem arsenicum metalla mineralifare dicitur, et propterea instar sulphuris habendum autumant nonnulli, qui tamen mineralisationis ideam ita extendunt, ut sub eadem omnem fere comprehendant miscelam, quam metallum quodpiam ingreditur. Ast, si paululum adcuratius hancce significationem examinemus, eandem justo latiore facile confitebimur,

b) MEM. de l'Acad. de Paris 1746 et 1748.

c) KONGL. Vet. acad. Handl. 1775. Et Macqueriana et Scheliana testimonia capiti huic inferam, de W.

binur, quippe quae ita implicat, ut hac adprobata nulla reperiri metalla nativa simul contendere oporteat. Scilicet aurum, quod nativum audit, vix unquam perfecta gaudet puritate, sed vel argento vel cupro plus minus contaminatum, similiterque argentum auro vel cupro, platina ferro, cuprum auro, argento vel ferro et sic porro. Si igitur arsenicum, quod alia nunquam solvit metalla nisi regulinum, (§. VI. A.) instar mineralisantis consideretur, quid impedit, quo minus aurum argento cuprove, et in genere quodvis metallum alio mineralisetur? Certe eadem ubique adest ratio. Multo debiliori specie metalla terris mineralisata dicuntur, quum illa vix, nisi mechanice inmixta suis inhaereant matricibus.

§. 1993.

REI naturae convenientissime metalla, quae mentis soluta et vere larvata occurrunt, *mineralisata* adpellantur. Sulphur heic praecipue adhibet naturae, et quamvis acida vitrioli et salis nonnumquam peregrinam quoque impertiantur faciem, hoc tamen adeo raro et parce factum reperimus, ut hae combinationes, ratione habita sulphuratarum, penitus evanescant. *)

§. 1994.

AST forsan altius est repetenda *arsenici mineralisantis* idea. Scilicet invisum hocce monticolis minerale *alchemisticis*, qui metallorum compositionem subtilissimis ratiociniis detegere strenue adlaborarunt, suum

K 3

*) MONENDUM hic per transennam venit, Cl. JARS imprimis nuper pro *substantiis metallorum mineralisantibus* praeter arsenicum et sulphur, de quibus dudum constabat, invexisse et acidum *muriaticum*, alkali volatile, et materiem pinguem ex decompositione *salis alkalini* volatilis nascentem. de W.



suum magnum molientes opus, suspicio orta est, de principio quodam arsenicali, omni metallo perficiendo sine conditione necessario, *) de quo etiam nostris temporibus, pro anno nempe 1773. sequens proposuit problema regia Scientiarum academia Berolinensis: quid arsenico in mineris praesente efficit natura? Num idoneis evinci queat experimentis, quod metalla revera perficiat? Et si ita, quomodo et quousque hoc fiat? Praemio decoratum fuit responsum celeberrimi MONNET, in quo egregie et vere Arsericum consideratur tanquam semimetallum a reliquis diversum; quod tanto minus eorumdem ingredi potest compagem, quanto certius constat, idem in multis mineris omnino desiderari, et dum adest, semper incommoda causari, vel sub abitu auferendo, vel massam depravando. Certe bonum cuprum aegre eliquatur e minera grysea, et aequè perfectum praebet argentum ejusdem minera vitrea ac rubra. Nemo hucusque ullum metallum arsenico perficere potuit, et si fortuito variis inmixtum reperitur, hoc non

*) TEMPERARE mihi non possum, quin loci hujus fragmentum ex versione germanica dissert. Bergmannianae (quae Altenburgi 1778. prodiit) adferam. a textu latino plane diversum; ut vel ex hoc specimine adpareat, quam caute procedendum sit, dum translatione quadam autographi loco uti debemus: - Es sind nämlich die Bergwerksverständigen, welche die Zusammensetzung der Metalle mit sehr feinen Folgerungen zu entdecken sich bestreben, und eine wichtige Sache dadurch auszuführen suchen, in Ansehung dieses verhassten Metalls auf die Gedanken gekommen, als wenn ein arsenikalischer Urstoff schlechterdings zur Hervorbringung eines jeden Metalles nöthig wäre. - Versionem hanc cum ipso textu accuratius conferens, et linguae peritus facile videbit, versionem deteriorem fieri vix potuisse. de W.



non magis internam sociorum auget bonitatem, quam in galena plumbum proficit argento, vel hoc illi. Si ad principium arsenicale tantae subtilitatis provocare lubet, ut omnes fugiat sensus, hoc suis Auctoribus scrutandum relinquatur oportet.

§. 1995.

TANDEM inter eos, qui nostro aevo in proprietatibus *arsenici* detegendis strenue defudarunt, minime reticendus est *Cel. BRANDT*, qui de eodem varia vel primus observavit, vel etiam accuratius, quam ante illum ullus determinavit. d) De *Auripigmento* eruditam edidit dissertationem *Cel. POTT*. e) De *Sandaracha Veterum* disseruit *J. G. LEHMANN* f) et quae sunt reliqua huc pertinentia scripta. g)

§. 1996.

Arsenicum regulinum.

II.) FORMA instructum *metallica* effoditur *arsenicum* in *Bohemia*, *Hungaria*, *Saxonia*, *Hercynia* et praesertim ad *S. Marie aux mines* in *Alsatia*, ubi haud ita pridem multi centenarii in lucem extracti sunt. Vocatur in Germania *SCHERBENKOBOLT*, et haud raro *FLIEGENSTEIN*, vel *MUCKENPULVER*; sed quo jure nescio, quum aquam non subeat, ideoque, nisi phlogisto spoliatur, muscis onecandis minime idoneum.

K 4

§. 1997.

d) Cfr. *Act. Ups.* pro anno 1733. et alibi passim.

e) *Diss. inaug. Halae* 1720.

f) *Physik. chem. Schriften* 1761.

g) Cfr. *Opera C. NEUMANN, HENCKE* LII &c.



§. 1997.

QUA formam externam, *amorphum* saepe reperitur, friabile et pulverulentum; interdum etiam compactum, in lamellas crassiores convexas divisum, superficie subaculeata, vel micacea. Polituram admittit, sed quae cito in aëre obscuratur.

§. 1998.

FRACTURA recens *granis* parvis instar *aciei* *) composita adparet, colore plumbeo, quae tamen sponte flavescit, dein sensim nigrescens. *Duritie* cuprum superare videtur; *fragilitate* antimonium aemulatur.

§. 1999.

ARTE quoque ex *arsenico albo* adquiri potest *regulus*, vel sublimando cum oleo, fluxu nigro, aliove phlogistico additamento, vel fundendo cum duplo saponis, et cinerum clavellatorum, vel denique praecipitando mediante alio metallo ex sandaracha vel auripigmento cum sulphure et alkali fixo fufis. Qui primo obtinetur modo crystallinam habet formam, plus minus regularem, octaedricam, **) pyramidalem, vel etiam prismaticam. Interdum venalis prostat *regulus artificialis* crassas referens *placentas*. *Gravitas*

*) TRADUCTIO germanica, sed risum teneatis amici! *Der frische Anbruch ist wie eine Schlachtordnung zusammen gesetzt.* Ergo nec scivit TRADUCTOR, *aciem* subin idem denotare quod *chalybs*. PLINIUS 34. 14. *Neque alia genera ferri ex mera acie temperantur*: V. etiam HARDUINUM in *Plin.* T. 2. 667. et FABRI *Thesaur.* T. 1. p. 16.

**) QUAE VOX in germanica translatione non exactissime per *achteckigt* exprimitur; quum diversa utique forma sit *octagona* et *octaedrica*. de W.

vitas specifica ratione aquae destillatae est 8, 310. *)
ideoque pollex cubicus geometricus 16. circiter lotho-
nibus pondere aequivalet.

§. 2000.

REGULINO merito adnumeratur minerale, vulgo
Mispickel, dictum, quippe quod omni privatum
sulphure arsenico constat ferroque in forma metalli-
ca unitis, et licet posterior anaticam, imo interdum
duas tertias partes efficiat, magnes tamen illud repu-
diat. Hoc ignitum arsenicalem efflat fumum, et
mox magneti fit obsequiosum, licet operatio in ti-
gillo sine omni phlogisto peragatur. Haud difficul-
ter igne fluit, et in vase clauso maxima arsenici regu-
lini pars superiora petit, relicto in fundo ferro. Ta-
le etiam arte confici potest.

§. 2001.

ARSENICUM *regulinum* longe facilius et igne ele-
vatur, et suum amittit phlogiston, quam ullum
aliud metallum, ideoque fundi nequit; huic namque
fini major requiritur calor, quam qui calcinando,
volatilizando et accendendo sufficit. Secundum ther-
mometrum Suecanum **) calore 180. graduum in va-
se aperto visibilem efflat fumum. Flamma ex albo
coeru-

K 5

*) Monuit quidem Cl. BECKMANN *phys. oekonom. Bib-
liothek* 9 B. 2^{te} videri, in expressione gravitatis
specificae errorem typi esse commissum; verumtamen
pro recensione Cl. VIR non ipso quo ego utor *sueci-
co autographo*, sed *translatione illa germanica* usus
fuerat, cujus Auctor, textum latinum, seu numero-
rum positionis rationem, denuo non adsequutus,
transfulerat: *die eigenthümliche Schwere verhält sich
zum abgezogenen Wasser wie 8, zu 310. de W.*

**) Cl. CELSI. de W.



coerulescit obscura, *) fuliginem albam, et odorem alliaceum spargens. In vase clauso regulus metallicam retinet indolem, et figura determinata sublimatur igni expositus.

§. 2002.

Arsenici regulini habitus; aliis via sicca admisti materiis.

III.) ARSENICUM forma praeditum regulina, metallis fufis additum, cum plerisque facile colliquescit, sed quae per se malleo obediunt, fragilia fiunt: lutea vel rufescentia pro dosi albescunt **) albaque gryseum adquirunt colorem, stanno excepto, quod nitentem constantemque hinc comparat albedinem, nec platinæ unitum colori obfcit. Ferrum, mediante novo socio paullum copiosiore, magnetis imperio liberatur; quantum autem huic effectui sit necessarium, vix exacte determinari potest, quum semper ferri quidquam scorias intret; minus tamen, quam aequale pondus, sine dubio sufficit. Antimonium regulinum aegre admittit nostrum semimetallum; Bismu-
tbum

*) In germ. trad. abs ratione: *die wenige Flamme. de W.*

**) QUAM dotem ab ipso usque Gebero chemici et Metallurgi omnes uno ore fatentur, ad solum qd unicum Cl. KAIM, libelli *de Metallis dubiis* Auctorem, hanc arsenici proprietatem in cap. de Niccolo inficiaseuntem. *de W.*

***) SENSUS latini textus aperte is est, quod sine dubio minor quam anatica dosis arsenici ferro vim magneticam eripiat. Traductor vero sermonem de scoriis jam finitum huc adhuc referendum autumans dixit: *da allezeit etwas Eisen in die Schlacken eingeht, wie wohl weniger, als dass gleiche Theile ganz gewiss zu- reichen. de W.*

zhum vero omnem fere ejusdem unionem respuere videtur. *Hydrargyrus* plurium horarum sufficiente calore et motu illud revera suscipit, in gryseum abiens amalgama.

§. 2003.

OPE ignis arsenicum iterum expelli potest, sed avolans secum partes quasdam sodalis plerumque abripit, ne quidem *auro* et *argento* exceptis, si vehementis et subitaneus adhibetur ignis gradus; *platina* tamen perfecte resistit, imo ejusdem portiunculam retinet.

§. 2004.

B.) CUM *salibus alkalinis* fusione copulari nequit regulus arsenici, antequam phlogisti copia quantum satis fuerit diminuta. Si itaque regulus *nitro* fuso inmittitur, detonatione peracta ambo facile coeunt, et omnino similis, ut cum arsenico albo prodit unio (§. VI. B.)

§. 2005.

C.) CUM *acido arsenici sicco* (§. V.) regulus destillationi subjectus prius sublimatur, quam illum adgredi possit arsenicum, semimetallum vero acido fuso inmissum, mox accenditur, et fuliginem spargit albam. Scilicet acidum, phlogisto privatum, illud heic regulo eripit, sibi que ex quantitate adpropriet, ut arsenicum regeneret album, vicissimque regulus inflammabili eo usque spoliatur, ut sub eadem prodeat forma calcis.

§. 2006.

D.) CUM *sublimato corrosivo* regulus in destillatione butyrum fumans, paullum mercurii dulcis et hydrargyrum currentem exhibet. Mediante duplici adtractione hic principia commutantur invicem: regulus



lus suum phlogiston basi porrigit sublimati corrosivi, quo haec vere calcinata in hydrargyrum perfectum reducitur, *) acidum autem salis calcem arsenici suscipit.

§. 2007.

E.) SULPHUR regulum facile solvit, et fundendo et sublimando, composita praebens flava vel rubra pro diversa proportionem (§. X. B.) *Hepar* regulum solvit, sed hic adeo laxè eidem adhaeret, ut ab omni alio metallo, quod illud subire potest, praecipitetur.

§. 2008.

Arsenici regulini habitus, aliis via humida admisti materiis.

A.) AQUA sola nihil omnino haec valet.

D.) ACIDUM *vitrioli* non nisi concentratum; et quidem igne adjuvante regulum adgreditur, cujus pars inflammabilis, acidum phlogisticans avolat **) adeo ut, quod remanet, arsenici albi induat naturam, similiterque sese gerat cum menstruo ac illud.

§. 2009.

IDEM valet de *acido nitri*, quod tamen phlogiston vehementius evellit.

§. 2010.

*) Germ. *traduct. wodurch diese vermittlest einer wirklichen Verkalkung in ein vollkommenes Quecksilber reducirt wird* — quam contrarium hoc textus sensui et experimentorum fidei! *de W.*

**) TRADUCT. germ. — *dessen entzündbarer Theil die phlogisticirende Säure fortreibt* — ac si avolare, et abigere idem foret, et non clarum foret legendum esse, pars quae acidum phlogisticat, seu phlogisto inficit — *de W.*

§. 2010.

Acidum salis nihil fere valet, nisi ebulliens.*)

§. 2011.

Acidum arsenici, quod mox memorabimus (§. V.) sub digestionē regulum in calcem albam commutat, et ipsum phlogiston, quod abstulit, totum in talem abit, si iusta adest quantitate.

§. 2012.

ALIA hic praetereo *acida*, quum unionem respuant, quamdiu regulina manet forma. Nullum namque metallum, nisi plus minus phlogisto privatum, *acida* subire potest. Inpedimentum facillime removet nitrosum, aegerrime marinum, quippe quod phlogisto ipsum scatet. In nostro itaque casu cum regulo eadem prodeunt connubia ac cum arsenico albo, quae describuntur in §. VII. C.

§. 2013.

HEIC vero notetur oportet, solutiones reguli nativi semper cum alkali phlogistico coeruleum berolinense porrigere, quod ferri evincit praesentiam.

§. 2014.

PRAETEREA observetur, quod regulus nonnulla distincte praecipitet metalla acidis soluta, qualia sunt *aurum* et *platina* in aqua regis, nec non *argentum* et *hydrargyrus* in acido tam vitriolico quam nitroso. *Argentum* in spiculis nitidis perquam egregie instar arboris Dianae in conspectum venire sollet;

*) TRAD. germ. die Korksalzsäure braust bloß damit auf: ergo traductor ignoravit, quod tyrones sciunt, agi hic de acido, caloris ope in ebullitionem (Aufkochen) deducto.



let; si vero in solutione nitrosa parum diluta nimis diu relinquitur, spicula argentea iterum solvuntur, quum arsenicum interea fuerit phlogisto pauperatum. *Bismuthum* et *Antimonium* obscurius deturbantur.

§. 2015.

ARSENICUM et *ferrum* in miscela naturali, quae *Mispickel* vulgo audit, unita, acido salis vel aqua regis sub digestionem separari possunt. Scilicet prius menstruum hac methodo non nisi *ferrum* adgreditur, et posterius, *) licet utrumque solvere queat, arsenicum tamen non suscipit, quamdiu ferri quidquam restat, idque vi adtractionis electivae. Ut autem omne arsenicum solumque in fundo remaneat, subtilissima requiritur pulverisatio, menstruique et iusta copia, et conveniens fortitudo.

§. 2016.

C.) ALKALIA via humida serius **) quam sicca operantur, quum phlogiston prius sit minuendum, quam realis obtineat unio. *Hepar salinum* equa solum sub coctura regulum pulverisatum adgreditur, etenim, quod acido dein praeceptum ruit, verum in sublimatione praebet auripigmentum.

§. 2017.

*) INTELLIGIT Ch. BERGMANN sub *to prius* acidum salis, sub *to posterius*, aquam regis. Haec non perspicuus Traductor inconcinne hanc vocum catervam procudit: - - *es greift nämlich das Menstruum zuerst nur das Eisen, und hernach, ohngeachtet es beyde auflösen kann, den Arsenick so lange gar nicht an, als noch etwas von dem Eisen vorhanden ist, und dieses deswegen, weil es das eine lieber als das andere anzieht* - de W.

**) GERM. TRAD. *stärker*; quum, ut omnes vident, et ipse textus denotat, *später*, aut *langsamer* ponendum fuisset. de W.

§. 2017.

OLEA unguinosa regulum ebullientia solvunt, massamque nigram, emplastri gaudentem consistentia, formant.

§. 2018.

Arsenicum calcinatum.

§. V.) *REGULUS* perquam leni calore tantum phlogisti mittit, ut in fuliginem abeat albam. Omnes calces metallicaе multum retinent inflammabilis materiae, etsi hoc residuum formae metallicaе non sufficiat. Idem etiam valere de arsenico albo sequenti experimento luculentissime patet.

§. 2019.

In parva retorta arsenicum calcinatum, acido nitri humectatum, igni exponatur, et vapor rufus copiose prodibit, qui collectus quater vel quinques arsenicum volumine excedit, et, instituto examine, nihil aliud esse invenitur, quam fluidum illud elasticum, quod *Cel. Priestley* aër *nitrosus* audit. Hic semper phlogisto abundat, et vix quidquam praeterea continet, nisi acidi nitrosi porriunculam, inflammabilis copia in fluidum elasticum dilatatam. *) Alia documenta mox videbimus.

§. 2020.

RARO et parce calx arsenici *nativa* **) occurrit in Saxonia et Bohemia, copiose vero colligitur, dum ustulan.

*) *TRAD. germ.* einen kleinen Theil der Salpetersäure, welches ein entzündbarer Vorrath ist, der sich in diesem elastischen fluido verbreitet hat — Omnis alius hic vidisset to copia in Ablativo casu positum esse et inflammabilis in genitivo. de W.

**) T. G. gewachsen, pro gediegen. de W.



ustulantur minerae cobalti, in longis sinuosisque spiraculis, *) ex asseribus constructis et horizontaliter dispositis. Haec fuligo phlogisto adhuc ita reperitur inquinata, ut grysea adpareat, nova sublimatione, cum vel sine cineribus potassinis (*clavellaris de W.*) plene dealbanda. Est haec calx volatilis, ipso tamen semimetallo segnius adscendit, quippe minimum requirit 195. graduum calorem. Si in vase clauso igne paulum forti elevatur, pellucida instar vitri prodit, in aëre tamen superficies dein cito opacitatem albam contrahit, quae vero in gremio terrae crystallina reperitur, huic mutationi non est obnoxia.

§. 2021.

ARSENICUM album gravitate gaudet specifica 3,706., et vitrum circiter 5,000.

§. 2022.

IN lingua acrem subdulcemque tarde excitat saporem.

§. 2023.

ARSENICUM album revera nihil est aliud, quam acidum ab omni alio cognitō diversum, tanta phlogisti quantitate foetum, quanta ejusdem coagulationi sufficit. Arsenici albi 100. partes 20 saltem phlogisti adhuc continent, et quidquid has evellere potest, acido ejusdem denudando idoneum est. Hoc acidum alibi ex instituto examinandum (b) per se fixum est, igne vero candens ex calore phlogiston fuscipit, arsenicum album regenerans, quod phlogisto ad satietatem usque oneratum regulinum prodit.

§. 2024.

*) T. G. Kaminen, pro recepta voce *Gistsfängen. de W.*

b) CFR. interea *Act. Stockholm 1775. et Act. Upsal. T. II.*

§. 2024.

VERI est simillimum, singula metalla non esse nisi acida diversa, phlogisto intime saturata, quamvis tantus hic plerumque sit nexus, ut media eundem plene dissolvendi haecenus ignoremus *) Calces metallicae semper phlogisto plus minus scitent, at pleraeque simul acidum continent aëreum, quod loco inflammabilis, aëre ambiente abrepti ab eodem vicissim recipiunt, et pertinaciter retinent. Nonnullae tamen calces acido aëreo semper carere videntur, quales sunt auri et platinae, alkalibus licet aëratissimae praecipitatae. Num arsenicum album acido aëreo gaudeat, nondum certo constat. At haec doctrina alio loco pleniori radiabit luce. Interea hinc patet, quid de *salibus sulphuribusque metallorum* sit tenendum, Veterum licet de illis opiniones multum pariant obsecratis.

§. 2025.

HINC quoque elucet, cur *terrae et calces metallorum arsenicum figant*. Niccolum et cobaltum arsenico plerumque abundant, quod calcinatione sola abigi nequit; etenim dum magna pars vi ignis dissipatur, reliqua vel phlogiston sensim amittit, et instar acidi fixi adhaeret, vel fusione terris metallicis adunatur. Addito vero sub candescencia pulvere carbonum, mox ingens fumi albi erumpit copia, allium spirans,

*) TOTA haecce paragraphus absolvitur hypothesibus Cl. BERGMANN propriis, uti vero per experimenta videtur, vix unquam demonstrabilibus. De acido aëreo Bergmanniano v. opus Cl. MONNET de la dissolution des Metaux, dissert. meam: chemische Abhandl. von den Auflösungen des Eisens. de W.



spirans, quae nihil aliud est, quam arsenicale acidum, phlogisto in formam calcis redactum. *)

§. 2026.

Arsenici calcinati habitus, aliis via sicca admisti materiis.

(§. VI. A.) ARSENICUM ALBUM cum iisdem ac REGULUS *metallis* colliquescit, modo paulum diverso. Nulla quidem calx, qua talis, metallis uniri potest; at arsenicalis nihilo minus, iisdem in crucibulo fufis addita, promte semet adsociat, sed, quod probe est notandum, mediante phlogisto metalli reducta; ideoque, dum hoc *imperfectum* est, semper scoriae simul oriuntur, ex parte calcinata et arsenico albo conflatae.

§. 2027.

B.) ARSENICUM album in *nitrum* fufum projectum vehementem causatur intumescentiam, et effervescentiam, sed sine scintillatione. Si talis additio continuatur, donec nova portio nullum excitat motum, et massa dein bene funditur, haec *arsenicum nitro fixum* vocari solet. Sub hac operatione acidum nitri phlogisto calcis metallicaе volatilifatur, acidumque arsenici denudatum cum basi **) nitri copulatur; crystalli vero obtineri nequeunt, quum ignis vehementia abundet alkali; iusta tamen proportionem et idoneo caloris gradu fieri potest. Scilicet alkali

*) INTELLIGIT Cl. Bergmann sub *to imperfectum*, metallum quodcunque ex sic dictis *imperfectis* (v. §. 41.) haec non callens Traductor vertit: und weil dieses unvollkommen geschieht. de W.

**) T. G. Mit der Grunderde des Salpeters, ac si basis nitri foret *terrea*. de W.

alkali vegetabile exiguum acidi arsenicalis abundantiam requirit, ut crystalli prodeant, qualis etiam in crucibulo conservatur, modo ita temperetur ignis, ut vix rufescat fundus; facilius autem succedit destillando. Residua destillationum cum anatica portione nitri prismatici, quadrangularis, vel flammantis institutarum, singula alkalia arsenicata continent, quae crystallifata haberi possunt. Quod haec aliis acidis decomponi nequeant, vulgo perhibetur, sed frustra. Per se patet, si, addito alio acido illi revera uniatur basis alkalina, arsenicale tamen separatum, tanquam per se solubile, nullam posse causari praecipitationem, et ne quidem congrumationem. At ex non turbata limpидitate solutionis haecenus unice aestimatum fuit compagis robur. In eo error latuit, quod arsenicum album haec salia ingredi existimaverint Chemici, quamvis ejusdem tantummodo acidum revera insit. Itaque, ut evidentius eventus cognoscatur, acido vitrioli solvatur alkali vegetabile arsenicatum, (*sal neutrale arsenicale* D. MACQUER) et, hoc facto, spiritu vini rectificatissimo praecipitetur eluaturque sal neutrale, quod facile perficitur; etenim nec tartarus vitriolatus, nec alkali vegetabile arsenicatum hoc spiritu solvuntur. Sal hoc modo ab acido libero secretum mox dignoscitur, et in nostro casu omnes monstrat tartari vitriolati proprietates. En igitur indubitata salis arsenicalis via humida decompositionem. *) Alkali nihil valet in hoc negotio, quum se ipsum deturbare nequeat. Sed horum salium natura alibi adcuratius explorabitur.

§. 2028.

SAL *digestivum*, commune, et ammoniacum *) arsenico non mutantur. Ratio sine dubio haec est, quod acidum salis phlogisto sua natura sit dotatum.

§. 2029.

C.) MERCURIUS *sublimatus corrosivus*, cum arsenico albo destillatus, inmutatus adscendit, quaecunque adhibeantur proportiones. Cel. POTT dudum observavit, quod hic nullum oriatur butyrum arsenici, et certe oriri nequit, quum calx arsenici acidum salis debilius, quam calx hydrargyri adtrahat. Destilletur butyrum arsenici, cui calx hydrargyri est admista; initio quidem, antequam omne decomponi potuit, paullum butyri elevatur; mox vero mercurius sublimatus corrosivus, tandemque arsenicum album prodeunt.

§. 2030.

D.) ALKALI *fixum* cum arsenico albo igne collescit, et eodem fere modo se habet, ac nitro unitum, sepius tamen phlogiston avolat.

§. 2031.

E.) SULPHUR arsenico albo facile combinatur, illudque reducit, et mineralizat; unde semper sub hisce nuptiis odor spargitur penetrantissimus acidi vitriolici vola-

*) T. G. Sowohl das gemeine als ammoniakalische *digestivsalz* &c. Qua ratione chemiae adeo ignarus, ut ne quidem sciret, agi hic de seorsim sumtis sale digestivo, sale communi, et sale ammoniaco, et nullum in orbe notum esse sal digestivum ammoniacale &c. chemicae diatribes traductionem adgredi potuit! de W.

volatilis; sulphuris namque portio magnam phlogisti partem calci arsenicali cedit. Praeterca cf. §. §. VIII. IX. et X.

§. 2032.

HEPAR quoque *salinum* solvit *arsenicum album*; sed regulum lubentius adgreditur.

§. 2033.

SULPHUR *antimonium crudum* et *arsenicum album* ana fundendo unita in vase clauso, *lapidem de tribus* generant, qui etiam *Pyrmison* vel *magnes arsenicalis* vocatur: hic rubet, et interdum pellucet. *)

§. 2034.

Arsenici calcinati habitus, aliis via humida immisti materiis.

§. VII.) A. AQUAE *destillatae* partes 80. calore medio 15. graduum, unam arsenici albi solvunt, ebullientis autem 15. sufficiunt. Arsenicum vero solutum facilius aqua retinetur, quam prima vice suscipitur, adeo ut calore medio 15. partes unam suspensam tenere possint. Eodem modo se habent aliae solutiones. Solutio *vineturam heliotropii* rufat, *syrupum violarum* viridem efficit, *salibus neutralibus* non mutatur, sed plerisque metallicis praecipitatur (k), et quidem eo modo, ut metallica calces arsenico unitae fundum petant, sed lente.

L 3

§. 2035.

*) Celebre olim in peste *Xenechton*; melioris longe in minerarum exploratione usus. de W.

**) Cfr. C. NEUMANNI experimenta apud ZIMMERMANN p. 1245.



§. 2035.

QUAERI jam potest, utrum integrum an vero solum arsenicale acidum, cum calce metallica coëat, phlogiston menstruo alterius metalli porrigens? Certe, si eos tantum consideremus casus, in quibus menstruum adest nitrosum vel vitriolicum, duplicem hic agere adtractionem, haud improbabilis foret conjectura, sed quam e. g. cuprum acido salis, (quod phlogiston non seernit §. IV.) aequè ac nitroso unitum, similiter albidum praebeat praecipitatum, hinc calcibus metallicis arsenicum album integrum adunari patet.

§. 2036.

B.) SPIRITUS *vini* 70-80. partes unam arsenici adjuvante calore solvunt.

§. 2037.

C.) ACIDUM *vitrioli* concentratum cum arsenico albo coctum solvit portiunculam, quam tamen sub refrigeratione iterum deponit sub forma granorum crystallinorum. Hoc vitriolum longe difficilius, quam arsenicum album, aquam subit. Ope tubi fer-ruminatorii in carbone flammae expositum mox copiosum emittit fumum album, sed simul in globulum fusionem cogitur, qui initio paullum ebullit, dein vero quietus, quamvis candeat, non nisi lente consumitur. Arsenicum album cito avolat, fusionem non sustinens, et multo minus ignitionem.

§. 2038.

Si acidum adfusum calore ad siccum vaporat, haec operatio pluries repetita arsenicum magis magisque figit phlogiston auferendo, tandemque purum exhibet arsenici acidum.

§. 2039.

§. 2039.

Cum *acido nitri* similiter res se habet. Dilutum solvit calcem, quae iterum crystallisatione prodit sub forma fere arsenici albi crystallisati; sed indole verum sal medium metallicum, quod difficulter aqua solvitur, et in carbone flammae expositum eodem se modo gerit, ac de vitriolo arsenici dudum relatum est, paullum tamen citius consumitur.

§. 2040.

ACIDUM nitri concentratum phlogisto calcem efficacius spoliatur, quod, iuxta dosi ad siccum abstracta, eo usque perducitur potest, ut acidum arsenici solum remaneat. Quod vulgo *gummi arsenici* audit, nihil est aliud, quam arsenicum plus minus dephlogisticatum, semper tamen albo pauperius.

§. 2041.

ACIDUM *salis* phlogiston instar principii continet, ideoque arsenicum album aliter adgreditur: concentratum tertiam sui ponderis partem ebulliens solvit, cujus sub refrigeratione haud exigua portio iterum sponte separatur, sed acido *salis* saturata. Hoc sal, quod etiam crystallinum haberi potest, praecedentibus multo est volatilius, nec ullo modo ignitionem perfert: in vase clauso totum facile sublimatur: aqua ebulliente parce solvitur (§. IX. D.) Haec solutio egregie flavet, et a butyro arsenici vix differt, nisi concentrationis gradu (§. III. D.) Ipsa acidi *salis* indoles obstat, quo minus eo mediante acidum denudetur arsenici, quod nihilominus facillime prodit, si arsenico albo, in acido *salis* ebulliente ad saturationem soluto, instilletur acidi nitrosi duplum (respectu arsenici), quo facto ad siccum vaporet liquidum, et restabit acidum arsenici, quod, ut acido peregrino



penitus liberetur, igne torqueatur, donec igniri incipiat. Arsenici albi 100. partes hoc modo tandem acidi ficci 80. exhibent. Sub operatione acidum nitri partem inflammabilem arsenici albi, mediante solutione optime divisi, melius adtingit, quam pulveri adfufum. Hinc quoque intelligitur, cur prae aliis acidis aquam regis facilius, majori quantitate, et sine subsequente crystallisatione, fubeat arsenicum album.

§. 2042.

ALKALI *phlogisticatum*, quod acidis soluta metalla dejicit, arsenicum intactum fere relinquit, et in vitriolico et in nitroso, et in aqua regis, idque vel ob inopiam materiae solutae, vel ob indolem mutatam, sed e marino illud divellit colore albido. Heic sollicito evitetur error, nam solutio sola aqua praecipitatur, nisi acidum salis quantum satis abundat. Praeterea alkali liberum, quod in lixivio hocce probatorio semper adest, acido saturatum fit oportet.

§. 2043.

ACIDUM salis sub digestionem cum magnesia nigra dephlogisticatur, et in auram resolvitur rubram, quae in vase clauso arsenicum album, aqua solutum, inflammabili spoliatur; adeo, ut aqua dein et acidum arsenici denudatum, et marinum regeneratum continere reperiatur. Evaporatione ad siccum prius solutum obtinetur.

§. 2044.

RELIQUORUM *acidorum* in arsenicum vires nondum satis sunt examinatae. *Acida arsenici* et *fluoris mineralis* solvunt, granaque formant crystallina, et quin idem valeat de *sale sedativo* vix dubito, quamvis fateri oporteat, *borracem* eo saturatam arsenicum aqua solutum non dejicere. Quod a *saccharo* nomen habet,

habet, arsenicum album facile fuscipit, et crystallos format prismaticas: idem fere valet de *acido tartari: acetum*, nec non *acida formicarum* et *phosphori* illud etiam adgrediuntur, granaque crystallina exhibent, quae aqua aegre solvuntur, nec ullum conubium deliquescentis haftenus detegere licuit.

§. 2045.

Ex adlatis facile patet, arsenicales solutiones, *acidis* factas, in quibusdam casibus ab indole consueta recedere, quod phlogisto adeo laxè adhaerenti, ut acidum arsenici denudari queat, adscribendum esse, antea evicimus.

§. 2046.

D.) *ALKALIA fixa* aqua soluta arsenicum album fuscipiunt. Si eo, mediante calore onerantur, massa prodit fusca, et tenax, quae soliditatem acquirit, et *hepar arsenici* vocatur, male olens. *Acidis mineralibus* arsenicum qua partem praecipitatur, portio tamen sensim phlogiston amittit et arctius adunatur.

§. 2047.

SOLUTIO alkali volatili facta memoratam decompositionem facilius efficere videtur, quum acidis nihil excutiat.

§. 2048.

E.) *HEPATIS salini* solutio limpida, guttatim et sine quassatione instillata solutioni arsenici albi, enatat, in superficie stratum efficit gryseum, quod tandem totam turbat liquoris massam.



§. 2049.

Arsenicum mineralisatum.

§. VIII.) Quod et regulinum et calcinatum sulphuri uniri queat, antea observavimus (§. §. III. IV.) Has mineralisationes sponte natura exhibet, flavas vel rubras, nonnunquam pellucidas et crystallinas; flava lamellosam adfectare videntur formam, rubra vero prismaticam.

§. 2050.

IN acervis minerarum arsenicalium ustulatis haud raro egregiae occurrunt crystalli, partim tetraëdricae, partim octaëdricae, quarum nonnullae cavas tantum pyramides monstrant, trigonas vel tetragonas, triangulis singulis ex filamentis, lateribus respectively parallelis compositas. Scilicet pyramis cava trigona, minoribus saepe obpleta, continue magnitudine decrescentibus, tetraëdram, octo vero tetraëdra rite disposita octaëdram generant. En via sicca ortam compagem, illi omnino similem, qua via humida salculinare, digestivum, et omnia forsan alia, constructa reperiuntur.

§. 2051.

FERRUM mineralisationes simul intrans colorem album nitidum metallicumque efficit. Huc pertinent mineralia, quae vulgo *pyritis albi*, vel *arsenicalis* nomine veniunt. Arsenicum cum argento sulphurato *mineram argenti rubram* conficit, et cum argento cuproque sulphurato *mineram argenti album*, vel *gryseam*. Mineris stanni crystallisatis et cobalti calcinatis mechanice tantum inesse videtur.

§. 2052.

GRAVITAS specifica auripigmenti est 3,315, realgaris vero circiter 3,225.

§. 2053.

§. 2053.

LENI igne tota quanta sublimantur auripigmentum et realgar, nisi heterogeneis inquinata; fusionem tamen sustinent, et prius in vase clauso hinc rufescit. Pyrites arsenicalis sublimatum exhibet plus minus rufum, pro dosi sulphuris praesentis; maxima tamen pars in fundo remanet.

§. 2054.

*Arsenici mineralisati habitus, aliis via sicca
inmixti materiis.*

§. IX.) A. METALLORUM, quae lubenter sulphuri et arsenico nubunt, certa dosi cum auripigmento et risigallo copulari potest. Lapidem, *Pyrmison* dictum, antea memoravimus (§. VI. E.) pluresque huc pertinentes mineras (§. VIII.) quas etiam arte imitari licet. *Argentum*, mediante auripigmento fusione mineralisatum, ejusdem *mineram rubram* exhibet. Caeterae facilius conficiuntur.

§. 2055.

B.) NITRUM cum arsenico mineralisato alkalifatur; qua partem namque cum sulphure, qua reliquam cum arsenico, in mineralisationibus semper forma praedito regulina, detonat. Alkali denudatum vel cum acido sulphuris sal procreat, quod vulgo polychrestum vocatur, vel cum arsenico intime copulatur. (§. VI. D.)

§. 2056.

C.) ALKALI fixum auripigmento vel risigallo iuxta dosi additum, et igni sublimatorio expositum, sulphur figit, arsenici vero maximam partem mittit;



tit; massa tamen hepatica quidquam retinet, et, si alkali abundat, arsenici fere nil adscendit. *)

§. 2057.

*Arsenici mineralisati habitus, aliis via humida
innixti materiis.*

§. X.) A. Aqua hic omnino inefficax est.

§. 2058.

B. ACIDA pro re nata operantur, praesertim *nitrosum* et *aqua regis*. Prius menstruum, si concentratum, *risigalli* colorem rubrum cito destruit, auripigmenti vero flavedinem non adficit; agit namque inprimis arsenicum calcinando, quod in *risigallo* non potest non rubrum cum flavo commutare.

§. 2059.

Aqua *regis* arsenicum sub diutina digestionem suscipit, adeo ut sulphur tandem solum in fundo remaneat. Hinc rationem sulphuris ad arsenicum eruere licet, eamque in *crystallis risigalli puteolani* circiter ut 1. ad 19., et in *auripigmento georgiano* ut 1. ad 9. inveni. **) Prudenter haec operatio perficiatur, ne ab una parte quidquam menstruo auferendum, ejusdem vel inertia vel insufficienti quantitate, intactum relinquatur, nec ab altera minuatur, quod integrum manere debet. Color residui totus gryseus,

*) SEQUITUR hic in *dissert. Bergmanniana* relatio auripigmenti ad mercurium sublimatum corrosivum, quam vero jam in *capite de MERCURIO* §. 1179-1182. inde excerptam attuli. de W.

**) MAGNO errore in *trad. germ.* hic ponitur: - - *ich habe sie in den Krystallen des Rauschgelbes von Poxzoli und in dem Operment aus Georgien wie 1. zu 9. gefunden.* de W.

gryseus esse debet; nam quamdiu flavae adhuc particulae inmixtae reperiuntur, arsenici quidquam restat. Nimio aestu vel coctura, praesertim si acidum nitri forte adhibetur, sulphuris plus minus simul destruitur. Acidum enim nitri phlogiston vitriolico *) eripit, adeo, ut posterius liberum prodeat.

§. 2060.

Si ferrum mineralisationibus inest, hoc omne vi adtractionis prius quam arsenicum solvitur; nisi sub ipsa operatione, vel calore vel accessu aëris, vel denique menstrui qualitate, justo magis calcinetur.

§. 2061.

MINERA *argenti rubra* egregie *aqua forti* de-componitur, argentum et arsenicum suscipiente, adeo ut tandem solum sulphur in fundo restet. Hae via in centenario crystallorum pelluentium argenti 60. arsenici 27. et sulphuris 13. reperiuntur. **) Ferrum non semper inest.

§. 2062.

MINERA *argenti alba* primum cum *aqua forti* tractata argentum et cuprum mittit, dein aquae regis arsenici residuum praebet, adeo ut tandem sulphur purum obtineri queat. Argentum a cupro separatur sale communi.

§. 2063.

C. ALKALI *fixum causticum* cum auripigmento et aqua coctum solutionem praebet hepaticam foetentem;

*) G. T. dem Vitriol, pro dem Vitriolsauren. de W.

**) T. G. abs ullo textus sensu: Auf diese Art werden im Zentner durchlichtige Silberkry stallen 60 Arsenick 27 Gr. —



tem, quae *atramentum sympatheticum* quibusdam audit.

§. 2064.

AURIPIGMENTUM cum aqua et duplo *calcis viae* coctum *liquorem* exhibet, qui *vini probatorius* vocari solet. Heic hepar calcis operatur. Hae solutiones acidis instillatis sulphur arsenicumque simul demittunt.

§. 2065.

D. OLEA quoque calore adjuta, tam *auripigmentum*, quam *risigallum* solvunt.

§. 2066.

Usus arsenici.

§. XI.) Hunc articulum non nisi levissime jam tangere licet. QUIN in *Medicina* eximium praestare queat usum, vix dubitari potest, et experimenta dum instituta hanc quoque thesin extra dubitationis leam ponunt *m)* sed et qua dosin, et qua praeparationem exquisitissimam requirit curam. Ex ejusdem in praecedentibus denudata indole constat, atrocissimum hocce venenum instar *acidi* maxime corrosivi agere, etiam externe. (§. V.) Quum itaque phlogiston et alkalina efficacissime acidorum vires compescant, hinc facile eruitur, quomodo mitigandum sit arse-

m) Cfr. J. C. BERNHARDTS *chymische Versuche*, et commentar. J. C. JACOBI in *Act. Mogunt. Tom. I.*

INFAUSTOS vero a remedio *Jacobiano* antipyretico productos fuisse effectus Ill. L. B. de STÜRCK retulit. — NUPER arsenicum pro remedio specifico anticarcinomatoso Cl. FEBURE commendavit, et optimo effectu ultra 300. aegros curatos fuisse retulit. de W.



arsenicum, et qua via eidem obviam eundum. *) Hinc etiam elucet, cur risigallum sit fere innoxium; cur regulus mitius agat, quam arsenicum album, et hoc lenius, quam acidum arsenici siccum; cur thermae Carolibadenses, quae alkali minerale continent non nisi aëreo nuptum acido, morbis ex arsenico ortis egregie medeantur; n) cur arsenicum interne absque necessaria correctione sumtum, inter alia symptomata irritando convulsivos excitet motus, tam in ventriculo quam in reliquo corpore, ut alia taceam collaria, quae ex chemica arsenici analysi praxi medicae proficua esse possunt. Hoc unicum addo, quod arsenicum omnium metallorum facillime inflammabile principium mittat (§. II.) adeoque mitigantibus phlogisticis caute fidentum esse, quum in visceribus phlogiston variis modis evelli possit. Sola dispositione putredinosa odorem alliaceum provocari penetrantissimum, exemplum in theatro anatomico Upsalienſi nuper obvium monstravit.

§. 2057.

PSILOTHRUM turcicum auripigmentum cum aliis continet materiis; sed vis depilatoria rectius forſan alkali caustico simul ingredienti est adscribenda.

§. 2058.

*) RECENTISSIMO *Cl. SAGE* invento pro antidoto arsenici sal alkali volatile forma fluida (*ſel alkali fluor*) seu spiritus falis ammoniaci in *Galliis* adhibetur. de *W.*

n) CASUS selectissimos nobis retulit *Cel. Anatomiae Professor D. D. An. MURRAY*, de usu harum thermarum contra arsenicum.



§. 2068.

ATRAMENTO *sympathetico* (§. X. C.) Physici corporum stupendam evincere solent porositatem; *) nam scriptura, aceto lithargyrii facta, per se invisibilis inter pauca minuta e vaporibus hujus liquoris fuscescit, quam plura foliorum chartaceorum millia sint interposita.

§. 2069.

VINA, natura vel aetate nimis acida, saturninis etiamnum nonnunquam edulcorantur, quamvis plures detestabilis sceleris graves dederint poenas. Itaque magni interest, ut inpium mangonium facile detegi queat. In hunc finem vulgo adhibetur *liquor probatorius* (§. X. C.) quippe qui vino sincero instillatus non nili pulverem flaventem praecipitat, adulterato vero fuscum vel nigrum. Idem etiam hepate salino obtinetur. Ast hoc medium foeda lucrandi cupido eludere didicit, nisi iterum Chemiae ope fraus denudetur. Scilicet, si cretae paullum vino est solutum, fallit hepar salinum, etenim calcareum album simul decidens nigredinem minuit: copiosus tartarus probatorium liquorem spernit, quoniam tartari acidum calcem adripit, salque album difficillime solubile efficit. **)

§. 2070.

COMPOSITIONES *metallicas* interdum ingreditur arsenicum, cuprum praesertim et stannum; ***) ut autem

*) Et penetrabilitatem, et divisibilitatem, et effluiorum vim subtilissimam. de W.

**) V. quae circa *docimasiam vinorum* in capite de PLUMBO dicta sunt. de W.

**) V. *Caput de STANNO* et *de CUPRO*, de W.

autem talia, ex culina saltem proseribantur, omnis suadet humanitas. *) Auripigmento grana plumbea interdum indurari solent. **)

§. 2071.


PHOSPHORUM a MENDERO dictum intrat arsenicum regulinum. Calcis in vitrificando vis dudum GEBERO nota fuit; ideoque in officinis vitriariis, vel pro facilitanda fusione, vel pro certa acquirenda opacitate, vel denique pro phlogisto auferendo, non raro adhibetur. Modum, quo *crystalli montanae*, auripigmento, arsenico albo, antimonio crudo et sale ammoniaco in crucibulo commistis, superimpositae ignis vi *tinguntur*, describit NERI, cumque experimento instituto verum reperimus: maculis rubrincis, fulvis et opalinis egregie distinctas obtinimus, sed simul rimarum plenas, quod aegre evitari potest.

§. 2072.

IN arte quoque *tingitoria* nonnunquam juvare autumant artifices. *Pictores* cum oleo saepius usurpant et auripigmentum et risigallum; verique est simile, *lignum* pigmento, cui arsenicum album est immixtum,

*) Quod etiam de incrustatione vasorum cupreorum aut ferreorum ope stanni, arsenicum, aut plumbum recludentis, dictum sit. de W.

**) DAMNANDUS Magistratum imperio est mos, crepundias infantum variis coloribus, quos auripigmentum, aut realgar, aut minium &c. ingrediuntur, oblinendi; dum enim infantes illas ori admovent, et lingunt, toxicum simul in tenellum corpus recipiunt. Tristitia hinc orta fata observante BARTHO-LINO, in *Attilis Hafniensibus*, ac in *Berliner Mangelaltigkeiten* T. I. legi poterunt. de W.



stum, illitum, a *vermibus* non corrosum iri. Hue-
usque *Diatribæ* Cl. BERGMANN.

§. 2073.

ADNECTENDA videntur dissertationi huic obser-
vata nonnulla, quæ illam recensens in *Physikal. öko-
nom. Bibliothek* 9. B. 2. St. S. 292 — 296. adtulit
Cl. BECKMANN. - - - Inter regiones, quæ arsenici
regulum nativum ferunt, *Norwegiam*, *Württembergiam*
Fürstenbergiam et *Transylvaniam* pariter enumerandas
esse -- germanica voce notatam *Fliegenstein* notatam spe-
ciem friabilem, aquam deleteria his insectis dote inficere,
communi et quotidiana per Germaniæ quasdam pro-
vincias experientia confirmari, ut in dubium revoca-
ri nequeat; hinc vero necdum sequi, regulum arse-
nici ab aqua vere solvi; quum et mercurius aquæ largi-
atur dotem anthelminticam, ferrum roborantem,
cuprum saporem singularem ingratum, quin ex eo
adfirmare queamus, metalla hæc ab aqua resolvi —
Adnotavit ex dissertatione *Bergmanniana* Cl. BECK-
MANN, *acidum salis cum regulo arsenici tamen*
effervesce, sed in errorem inductus fuit ab inhabili
traductore germanico, uti ex ipsis antea adlatis Cl.
BERGMANNI verbis abunde patet. — Ait præterea
in recensione Cl. BECKMANN: *überhaupt vereinigt*
sich kein Metall mit einer Säure, wenn es nicht mehr
oder weniger seiner SÄURE beraubt wird: dixit ve-
ro BERGMANN p. 8. *nullum namque metallum, nisi*
plus minus PHLOGISTO privatum, acida subire
potest: nec in traductione germanica hic reperio er-
rorem; ut adeo in recensione vitio calami vel typi
pro *Brennbaren*, *Säure* positum fuerit. — Circa ob-
servationem præcipitati colore coeruleo reguli arse-
nici adfuso lixivio phlogificato quaerit *Recensor* an
ex eo abs ullo dubio præsentia ferri nunquam de-
monstretur, uti adsumere videtur Cl. BERGMANN —

Circa

Circa sententiam *Auctoris* diatribes: metalla omnia nil nisi totidem esse diversa acida, phlogisto in integrum saturata, monet, multa adhuc adferenda fore argumenta, ut, metalla *unice* ex illis principiis componi, evincatur. — In dubium revocare nonnihil videtur adlatam a *Cl. BERGMANN* actionem acidi sacchari puri in arsenicum album, quum in parenthesis addiderit: die Zuckersäure (so wie sie Hr. B. ausscheidet:) — Circa actionem thermarum Carolinarum in curandis morbis ab arsenico enatis monet, verosimile tamen videri, aquam hic mitigandae acrimoniae arsenicali inpendi magis, quam tantillam, quae inhaeret, salis alkalini nudi dosin.

§. 2074.

MONERE per transennam hic non oberit, datum me mox *novam editionem germanicam* libelli *Bergmanniani* praestantis; quum prior non solum mendis copiosissimis minoribus referta sit, sed et insigniter adeo male traducta, ut in variis locis vel sensus *Auctoris* plane non erui queat, vel obpositum prorsus inde sequeretur, prout et speciminibus, quae prius hinc inde ex multis aliis adtuli, extra omnem controversiam positum habetur.

§. 2075.

CL. VIR WALLERIUS, in systemate mineralogico circa arsenicum inter observata reliqua, magis generalia, protulit etiam sequentia, quae in compendium contracta inferuisse sufficit.

§. 2076.

ARSENICUM aquae 15. ad 20. partes, spiritus vini, aceti et oleorum partes 75 — 80. pro solutione requirit; ex solutione aquosa obtinentur crystalli minimae, flavescences, cubicae.

M 2

§. 2077.



§. 2077.

ARSENICUM salina esse indole, et ut sal metallicum considerari debere, facile demonstratur a.) a *facie externa*, salino corpori simili. b.) a *solutionibus* in aqua et omni liquido. c.) a *crystallisatione*, aliorum salium more. Hinc et a plurimis Mineralogis arsenicum ad salia relatum est. Hoc sal metallicum *corrosiva* esse *indole*, acidis mineralibus fortissimis simili, evincitur: 1.) ab indole expellendi spiritum nitri. 2.) a forti adtractione ad salia alkalia. 3.) a saturatione salium alkalinarum, eorundemque mutatione in sal medium.

§. 2078.

Hujus salis metallici corrosivam indolem maximam cum *acido salis* habere convenientiam, probatur a.) a fortiori ejusdem ad acidum salis adproximatione. Hinc solutiones acido salis factae ab arsenico praecipitari non possunt. b.) a similitudine arsenici cum luna cornea, plumbo corneo, quae fere ut arsenicum arte factum considerari possunt; similiter et mercurius sublimatus: si experimentum ELLERI, quod legitur in *Ph. chem. Med. Abhandl. p. 340.* ubi dicit, arsenicum cum parte dimidia mercurii tritum, et binis vicibus sublimatum, verum mercurium sublimatum subpeditasse, succederet, extra omnem dubitationis aleam haec veritas tum esset posita. c.) a vi solvendi crocos martis et veneris, aequaliter ac spiritus salis. d.) a vi volatilifandi metalla, qua aequali cum spiritu salis gaudet. e.) ab arsenicali alliaceo odore, quem sal commune emit, dum cum carbonibus sub fusione scintillat.

§. 2079.

PRAETEREO hic examen analogiae arsenici cum substantiis metallicis, quam *Cl. WALLERIUS* antea dictis



dictis junxit, quum ex dudum adlatis jam perfecta habeatur. Pro coronide vero capitis de arsenico posuit sequentia: — Ab adlatis observationibus concludimus arsenicum esse sal metallicum, volatile, corrosivum, ad partem cum mercurio vivo conveniens, quem iisdem fere, vel similibus constare partibus diximus. Differentiam haec inter semimetalla consistere arbitramur, vel in mutata proportione partium constituentium, vel in principii terrestri diversa natura, vel in his utrisque momentis. Illustrat hanc theoriam, magna arsenici cum mercurio sublimato similitudo, atque arsenici effectus in metallis, idem fere ac mercurii, tollendo eorum colorem, malleabilitatem ac fixitatem.

§. 2080.

DIXIT Cl. WALLERIUS, AVICENNAM albi solum arsenici mentionem injecisse; verumtamen ex adducto in dissertatione Cl. BERGMANN AVICENNAE loco contrarium extra omnem controversiam evincitur; ait enim expressis verbis: arsenicum aliud est album, aliud citrinum, aliud rubeum.

§. 2081.

IN dissertatione inaugurali chemica de Metallis dubiis, quam D. Ignat. Godefr. KAIM in universitate Vindobonensi 1770. defendit, Cl. vero Budensium Botanices et Chemiae Professor WINTERL composuit, (uti D. MADACS in dissert. de adfinitatibus publice monuit) caput primum, de arsenico inscriptum, sequentia, huc facientia, continet, quae vero historiae solum, ut potissima circa arsenicum proposita in unum lecta sistam, referre, haud vero, ceu sententiam propriam, aut admissam tueri volo.



§. 2082.

NULLUM, dissertationis *Auctor* ait, corpus minerale tam varia fata in Mineralogiis habuit, quam arsenicum. VETERIBUS *mephitis terrestris*, *venenatus draco*, *minera rapax* dictum est, nulla propria sede assignata. Cl. BROMEL, qui in suum quodque fossile locum revocare ex instituto tenebatur, inter *metalla* collocavit arsenicum. In eam sententiam WALLERIUS postea, et WOLTERSORDFIUS, et CARTHEUSERUS et JUSTIUS, et egregius *Anonymus Auctor* libri *försk til Mineralogie* *) iverunt, additis arbitrio praecipue rationibus duabus, quod formam metallicam arsenicum induat, dum sufficiens phlogiston inhibet, atque tum grave instar alterius reguli sentitur. His rationibus arsenicum aliquamdiu metalli sustinuit nomen, usque dum verus metalli in genere character peteretur; hunc oculis subjecit LINNAEUS, uti sulphura naribus et salia linguae. Verum perspicax LEHMANNUS in *Mineralogia* ad *menstrua* reduxit, quae singulis parent, cohortes, atque quum in 24 — 30. partibus (*aquae*) dissolvi arsenicum, dissolutum eleganter crystallisari, compereretur, arsenicum e metallorum numero erutum ad *salia* amandavit; quale enim illud metallum, cujus calx divortium a phlogisto suo passa salina fit? Habuit et haec nova sententia suum successorem, Cl. VOGEL, *Göttingensem Professore*m. Neque vero haec ipsa se sustinuit, ut non jam recentior Mineralogus Cl. LINNAEUS utrique renuntiaverit, et arsenicum *sulphuris* genus fecerit, neque id ipsum absque fundamento; nam et calx arsenicalis flammæ candelae adnota hanc ex suo latere manifesto auget, et coeruleam reddit, consistente id contra propriam sententiam Dom. JUSTI: id vero multo fit evidentius, quum phlogisto in regulinam, ceu vocant, substantiam nupta est; tum

nempe


*) Cl. nimirum CRONSTEDT.



nampe in candens crucibulum projectum manifesto ardet, odorem spargit contra reliquorum metallorum morem, et redivulso phlogisto a calce, haec nequaquam remanet fixa, seu diaphoreticum stibium, et revocati in experimentum Zinci flores, quibus cum metallisante principio ipsa demitur volatilitas; verum, nuda licet, sese tamen e crucibulo in sublimem fugacissima proripit; praeterea in mineris alia metalla, quemadmodum ipsum vulgare sulphur, soluta tenet arsenicum, solutisque metallicam admittit formam, et proprietates &c.

§. 2083.

IN tanta opinionum et argumentorum diversitate ad verum metalli characterem provoco; satis vero video, hunc mihimet ipsi quaerendum esse, nullique hae in re fidendum Mineralogo: nam qui arsenicum inter *metalla* collocant, metalli characterem in majori gravitate specifica ponunt, quo hoc commodè comprehendant. Qui *salibus* idem adnumerant, non minerale arsenicum, quod nunquam ob adjunctum sulphur et proprium phlogiston aquam subit, sed igne super sal alkalinum seu mercurium sublimatum abstractum requirunt, quo prius omne phlogiston comburatur, et sulphur a lixivo sale seu hydrargyro retineatur. Sed etiam qui *sulphurum* classi idem adnumerant, phlogisticatum arsenicum, quod regulinum alii vocant, expetunt; quibus patet, evitandos esse progressuro ad veritatem, quibus quisque in suam irretire sententiam cupit laqueos. Verum characterem metalli Chemia dat, corpus in sua resolvens principia, et ex principiis recomponens corpus, non oculus, non libra!



§. 2084.

FAMAM olim BECHERUS tulit, quod confociata triplici terra metallum exsurgere docuerit, scilicet ex vitrescibili, quae volumen et massam faceret, ac reliquis pro basi esset; ex mercuriali, quae metallum specificaret, et ex inflammabili, quae ductilitatem et splendorem metallicum adderet. BECHERIANORUM scriptorum gravissimus arbiter Stahlus mercurialem terram expunxit, et singulis metallis propriam terram vitrescibilem inesse rectius statuit. In hac proinde terra verus metalli character latet, qui compulsa omnium metallorum et semimetallorum comparatione in fixitate, indissolubilitate, vitrescibilitate, odoris, saporisque perfecta carentia consistit. *)

§. 2085.

Huic characteri jam adplico ideam arsenici, et reliquorum omnium. Arsenicum constat materie cum rapacitate volatili, saporem habente dulcem, odorem spargente terribilem, non tantum acidis, sed ipsa aqua dissolubili. Haec materies subinde occurrit compacta, in lamellas splendoris argentei, quae tamen ab aëre paulo post ex fulvo nigrescentem colorem contrahunt, ordinata. Debetur haec forma phlogisto seu inflammabili materiae, quacum arsenicum vel sublimatur, vel, peculiari dexteritate adhibita, in tigilli fundum reguli metallici adinstar subsidet. Ut ergo, quid arsenicum sit, rectius statuam, discernendum prius inter *arsenicum album*, et sic dictum *regulinum* est.

§. 2086.


*) Ex iis, quae circa singulorum metallorum et semimetallorum dotes adnotata fuerunt in specie, an adsertum hoc admitti queat, facile patebit. de W.

§. 2086.

ALBUM aqua solutum, crystallisatum, *sal* esse LEHMANNI argumenta evincunt; *medium* esse *sal*, ex eo, quod neque cum alkalinis neque cum acidis effervescat, nondum satis intelligitur; causa haeret in solutione et conjunctione cum alkali via humida lentissime progrediente, etenim, quum citra aquae additionem conjunctio in mediis carbonibus ignis adminiculo acceleratur, non certe citra spumam vasa transcendentem coeunt; nubit etiam arsenicum acidorum more plerisque metallis et acidum nitri, utut hoc cum ipso vitriolico de praerogativa certet, e basi quacunque dejicit, cui amicroi vinculo jungitur adulter, exsurgente nova salis medii specie crystallisabili; ut tamen metallo interveniente rursus divellatur potiori adfinitate eidem quam lixivo sali adhaerens, quod duplici decompositione via humida, quam salis medii arsenicalis solutio solutioni metallica in acido quocunque immiscetur, arsenico in metallum raptum, basi vero vidua acido reddita, omnium succedit commodissime. Compulsis his experimentis non potest non intelligi arsenicum album *sal acidum* esse.

§. 2087.

QUAE supersunt pauca experimentorum phaenomena, non tam aciditatem ejus suspectam reddunt, quam potius variis heterogeneis conspurcatum commonstrant. Primum est, quum acidum nitri interveniente arsenico per retortam vitream propellitur, evenire solere, ut saepe coeruleum, subinde eleganter viride, nunquam non autem intolerabilem arsenici foetorem spargens transeat. Vidi non infrequenter simillimum phaenomenon in vulgari aquae fortis destillatione, coerulei nempe coloris interveniente colcothare, viridis vero interventu olei vitrioli, coloris



loris aquam, quum utroque modo communis aqua in recipientem praemissa est; foetorem vero semper nocentissimum et vere arsenicalem, qui se una cum colore quoad maximam partem intra primos dies e vitro, utut subere clauso, subduxerat; hi vapores subtiliores sunt arsenico ipso, a lixivo sale non inhibentur, verum sub ipso conflictu in experimento quocumque provolant, adeoque ad acidum arsenici proprie non spectant, forte tamen vere venenatam ejus partem constituunt. Altera impuritas in conspectum venit, dum salis medii arsenicalis solutio cum nitri spiritu remiscetur; nascitur tunc aliqualis conflictus, ex quo mihi videtur concludi posse, non recipere sal alkalinum tantum arsenici, ut non alteri sali acido in eo locus sit; facto hoc conflictu dejicitur terra quaedam, volatilis quidem, et igne facile combustilis, sed jam nec vapores albos, nec alliacum odorem spargens adeoque jam non vere arsenicalis.

§. 2088.

INEPTAM de partibus constitutivis arsenici conjecturam, absque ullius experimenti suffragio, facpius citatus Chemicus JUSTI proponere ausus est; redit illa tota ad hoc arsenicum nihil esse aliud, quam mercurium sublimatum corrosivum. — Risum teneatis amici!

§. 2089.

HUNC ut paucis expediam, sequentia sufficiunt:

ARSENICUM dat foetorem terribilem alliacum.

ARSENICUM nubit libenter salibus alkalinis abs-

MERCURIUS sublimatus corrosivus proprium mercurialem.

MERC. subl. corros. divellitur acido sali alkali-

absque ulla destructione.

ARSENICUM cupidissime jungitur ferro.

ARSENICUM fere semper occurrit sulphuri junctum.

ARSENICUM denique omnibus metallis maleabilitatem minuit, aut demit.

kalino juncto, mercurio vero liberato.

MERC. corros. non fociatur ferro, quum nec inter mercurium ipsum, nec acidum salis cum marte adfinitas intersit major, quam illorum inter se.

MERC. corros. a sulphure divellitur in acidum salis liberum, et cinnabarin, ut arsenicum etiam mediante mercurio sublimato a sulphure depurari possit; testante Cl. LEHMANN *Probierkunst*. §. 214.

MERC. omnia mollia, ductilia, acedumum fluida reddit; et alia plura.

§. 2090.

SUPEREST, ut naturam *arsenici* sic dicti *regulini* determinem: in eam rem jam praemissi, concretum hoc ex arsenico albo et phlogisto conflari; ostendi pariter jam, arsenicum album sal omni nota acidum esse; miscelam vero salis acidi et elementaris phlogisti, *sulphuris* genus esse, nemo est, qui in dubium vocet. Confectum proinde jam est, *arsenicum* sic dictum *regulinum* verum *sulphuris* genus esse, sola diversa



diversa acidi specie a vulgari sulphure distinctum. Possit et vitriolum et bitumen ex arsenico jam metallo jam oleo nupto exsurgere, extra omne dubium est. Habeat ergo *arsenicum purum album* inter *salia*, *regulinum* inter *sulphura*, *cum metallis mineralisatum* inter *vitriola*, *oleis subactum* inter *bitumina*, nullum vero unquam inter *metalla* locum.

§. 2091.

AMPLA satis est arsenici historia chemica, quam Tomo II. *Chymie experimentale et raisonnée* Cl. BAUME inseruit. Adferam vero exin ea solum, quae BAUMEO propria sunt observata et experimenta, quum *Macqueriana*, quae passim recenset tentamina, ex ipso Cl. MACQUERO adlaturus sim. Omittam et ea, quae circa arsenici dotes jam ex dissertatione Cl. BERGMANN, aliisque adlatis innotuerunt.

§. 2092.

ARSENICUM dotibus quibusdam *salia*, *allis metallica* adtingit; nam *salis* adinstar, aqua solvitur, et *phlogiston* recipiens in verum *semimetallum*, *substantiarum metallicarum* in morem, abit.

§. 2093.

PRAESENTIAM arsenici *odor* teterrimus et maxime deleterius *alliaceus*, a *substantia* hac carbonibus candentibus inspersa adscendens, prodit.

§. 2094.

ARSENICUM vase clauso igni expositum fluit, ac volatile sublime petit; prout calor ignis major minorve fuerit, aut massa compactior, aut pulvis texturae rarioris, non cohaerentis, *crystallulis triedris pyramidalibus* compositi, in conspectum prodit.

Priori

Priori forma *sublimati*, posteriori *florum arsenici* nomine venit.

§. 2095.

Quoniam arsenicum sublimatum forma placentae compactae obtinere velis, in pulverem grossiorem terenda arsenici copia quaedam pro lubitu est, hac implendum matrarium chemicum collo longiori donatum ad usque partem dimidiam, inponendum vas balneo arenae ea ratione, ut venter ejus ad colli usque initium arena obruatur. Ignis tum administrandus per gradus auctior, donec omne summa petierit arsenicum; refrigescat tum furnus ac adparatus sponte sua; fracto vase eximatur arsenicum sublimatum, ac diffractum in vase vitreo adservetur. Fundo matrarii pulvis quidam inhaerens reperitur flavicans; quum nullius usus sit, abjiciendus. Alius vero pulvis, in collum usque vasis elatus, albus, colligatur seorsim, quum genuinum pariter sit, et bonum arsenicum, specie solum externa diversum, titulo *florum arsenici* pariter notatum. Si ignis validior fuerit, arsenicum sublimatum nonnihil confluit, crystalli adinstar diaphanum fit, et colore citreo dilutiori tingitur; igne vero remissiori albet, opacum; haec tamen diversitatem essentialem nullatenus inducunt.

§. 2096.

Dum vero *flores* obtinendi sunt, pulvis antea descriptus arsenici indatur retortae vitreae colli brevissimi, amplique ad partem dimidiam vel duas demum tertias; adparatus committatur balneo arenae; collo adponatur excipulum, juncturae vasorum firmentur luto, et destillatio more instituatur solito. Prodebit sic arsenicum vaporum forma, excipulum pulveris albi adinstar obsidentis, in massam compactam, firmam non abeuntis. Pulvis et hic remanet flavicans.

§. 2097.



§. 2097.

ARSENICUM, pellucidissimum licet, aëri expositum, opacatur, et farinaceo polline obsidetur; phaenomenon hoc ab evaporante aqua deducit, quum, uti existimat, aër in ipsum arsenicum non agat.

§. 2098.

UNCIAE octo aquae ebullientis drachmam unam arsenici solvunt, solutione limpida, excolori. Nascentur in ea crystalli exiguae, albae, subfarinaceae; evaporationi vero lentae exposito lixivio prodeunt aliae flavae, pellucidae, irregulares. Dum solutio talis adservatur in lagenis probe clausis, oriuntur flocci leves, meris aciculis minimis compositi, centro communi nexis. Flocci hi levissime nonnisi cohaerent, specie crystallisationis arsenici, vix vero, uti BAUMEUS autumat, substantia phlogistica, per putrefactionem quamdam extricata consistere videntur. Haec omnia (una cum sapore, et symptomatibus, quae in corpore animali excitat, faevissimis, ab irritatione, ut videtur, singulari, summa oriundis) indolem arsenici *saltem* arguunt. Inter calces metallicas reliquas omnes dotem hanc maxime exferit.

§. 2099.

ARSENICI cum *oleis* misti phaenomena BAUMEUS ignota fuerunt.

§. 2100.

REGULUS arsenici arsenicum album est, addito inflammabili in substantiam semimetallicam redactum. Ut obtineatur, arsenici albi pulvis miscetur cum portione sufficiente olei lini, aliusve pressi, ut pasta exsurgat firmior. Ex hac fiant pastilli, ope tubi chartacei collo matracci chemici infixi in ventrem vasis injiciendi; exento demum tubo vas inponatur balneo
arenae,

arenæ, ignis primum adhibetur lenior, ut apparatus paulatim caleseat, et oleum forsan superfluum eliciatur; demum vero ignis intendatur eo usque, ut fundus matræ candescere incipiat. Summa sic patet massa vix non nigra, tum ignis in eodem gradu retinendus donec nil ultra eleveretur. Apparatu sponte refrigerato, fractoque vase eximatur massa elata, *regulum arsenici* reductum sistens, sedimento carbonaceo abjecto.

§. 2101.

OLEO miscetur arsenici pulvis, ut visciditate hujus unguinosa retineatur, pulveri enim carbonum tritu commistus elevaretur, calore accedente citius, quam phlogisto adhuc nupisset.

§. 2102.

PHLOGISTON volatilitatem arsenici, aliunde non exiguum, augeat, hinc regulus arsenico puro multo volatilior. Portio arsenici, quæ, ante perfectam cum phlogisto unionem, in altum sese subduxit, terenda est, oleo jungenda, et novæ sublimationi subjicienda. Methodi hujus regulum arsenici reducendi *Cl. BRANDT* et *MACQUER* debetur inventis.

§. 2103.

METHODUM, qua abs additione substantiæ metallicæ, (quam ante inventam *Brandtianam* Auctores suaserant, regulum tamen sic reddentes magis minusve inpurum) regulus arsenici fusione obtineri queat, *Cl. BAUME* adtulit sequentem.

§. 2104.

UNCIAE octo arsenici albi pulverisati misceantur cum libra una saponis nigri, et uncis 10 — 12. salis alkalini. Miscela fluat in crucibulo igne cito intenso: fusa effundatur in mortarium ferreum calefactum, sebo



sebo illitum, infusa illa regendum, frigefacta regulus malleo a scoriis inhaerentibus separetur.

§. 2105.

REGULUS vero hac ratione obtentus parte salis inquinatus est alkalini, hinc et sequenti jam die ab aëre libero et ipsa luce obnubilatur, quod regulo sublimatione, quin sal alkali addatur, factio non accidit. Praeterea, ut exiguus paretur regulus, magna copia massae adhibenda est, quum plurimum perdatur. Arsenici maxima pars ignis actione fugatur, alia sali alkalino nubit, scorias auctura. Minima plerumque phlogisto nexa remanet in regulum verum unita.

§. 2106.

VENIT in commercio regulus arsenici majori copia in singularibus fabricis confectus, a descripto non diversus, *placentis* constans bilibribus circiter, lamellis, specie subcrystallinis, undique compositus, massam fere referens micae laminis majoribus donatae. Mercatores regulum hunc inepte satis jam *cobaltum*, jam *pyriten arsenicalem*, jam et *Mineram bismuthi* vocant; quae substantiae omnes tum a regulo, tum inter sese toto coelo differunt.

§. 2107.

OMISSIS de regulo arsenici generalioribus, a Cl. BERGMANN aliunde jam adlatis adferam nunc observata *Baumeana* circa acidorum, *aliarumque substantiarum*, in arsenici regulum actionem; non adductis tamen, uti antea monui periculis Macquerianis.

§. 2108.

ACIDUM, ait, *vitriolicum* debilius regulum vix afficit; concentratum vero, accedente ebullitione, solvit. Solutio diaphana est, sed a phlogisto, inhaerente

haerente regulo, colore subfuscescente tincta. Refrigeratae innascuntur plurimae crystalluli amorphae, ab aqua aegrius multo, arsenico puro, solvendae.

§. 2109.

COLLECTAS has crystallos una cum acido vitriolico debiliori denuo exposui decoctioni; solutae sic fuerunt, solutione flavida; ex hac denuo enatae, mediante evaporatione lentiori, crystalli pellucidissimae, magnitudine et forma granis sabuli albis aemulae. Sal hoc *vitriolum arsenici* vocari poterit.

§. 2110.

ACIDUM vitriolicum regulum cui nupsit, in igne fixum plurimum reddit. Vitriolum arsenici gradum caloris ferre valet candescentiae, antequam avolet, quum et arsenicum et vitrioli acidum, seorsim sumpta, ignem hunc non sustineant.

§. 2111.

PHLOGISTON vero arsenicale vitriolum facillime decomponit, coit cum acido inhaerente vitrioli, et arsenicum liberat, forma vaporum alborum illico avolantem.

§. 2112.

ARSENICUM album eandem fere, uti regulus cum acido vitriolico, exhibet phaenomenorum syndromen.

§. 2113.

ACIDUM NITRI regulum facile solvit, actione sat violenta; calor tamen accedat oportet, quum acidum alias illum non adeo adficiat. Solutio flavet, crystallos dimittit, quarum nonnullae cubicae sunt, aliae sectos referunt adamantes, *nitrum arsenicale* fors nuncupandas. Monuit Cl. WALLERIUS in P. I.

Pars II. Sect. II.

N

Mine-



Mineralogiae p. 404. crystallos has referre forma nitrum lunae, tales tamen nunquam enatas vidi. *Arsenicum album* cum *acido nitri* nunquam tentavi.

§. 2114.

SPIRITUS salis vulgaris, quin et *acidum muriaticum fumans*, utut ebulliens in regulum vix agunt; quae forsitan soluta fuit dosis, illico forma pulveris flavi, sulphur referentis, fundum petit. Pulvis hic ab aqua non resolvitur. Interim videbimus, acidum salis, ea ratione uti in mercurio sublimato corrosivo concentratum, cum regulo arsenici probe coire.

§. 2115.

ACIDI aceti actionem in regulum arsenici aqualem fore actioni aquae purae, experimentum non instituens divinavit BAUME.

§. 2116.

ACIDUM salis regulum acido nitri solutum non dejicit.

§. 2117.

ALKALI sal fixum regulum acido nitri solutum deturbat forma pulveris albidii, in fundum aegre coeuntis. Praecipitatum solvitur et a sale alkalino fixo, et ab acido nitroso.

§. 2118.

ACTIONEM salis alkalini volatilis in arsenicum neminem adhucdum tentasse ratus fuit BAUME.

§. 2119.

IDEM de actione *hepatis sulphuris* in arsenicum statuit; nec tentamen levissimum primus instituere voluit. —

§. 2120.

§. 2120.

INMISIT nunc citatus *Auctor* dosin anaticam nitri et arsenici matraccio parvo supra carbones ardentes suspensō, ut actionem harum substantiarum in invicem eo exactius cerneret. Acidum nitri forma vaporum rubrorum avolavit. Massa plurimum tum ebullit, et frequentius in vase fulguratio illico evanida feriit oculos, post quinque aut sex minuta reditura denuo. Ut eo certius sciret, phaenomenon hoc deberi portioni cuidam sulphuris, arsenico nexi, tamen repetiit cum arsenico sulphurato; enatae tum elegantiores adhuc fulgurationes; nec vero fulgur, nec inflammatio alia radians produci potuit, ad experimentum adhibitis floribus arsenici purissimis.

§. 2121.

Sus confectione salis per hunc laborem obtinendi arsenicalis medii non totum arsenicum agit in nitrum; pars in sublime fertur, collo adnascens retortae; caute separanda haec est, ne quid admisceatur sali in retorta enato. Inmixtum tamen insuper sali huic eidem remanet arsenici non decompositi quid, una cum sale ab aqua dein solvendum, ac forma pulveris albi ad fundum descensurum. Obtinetur et nitri non mutati pars, quae arsenici actionem eluserat. Distinguitur a sale reliquo tum forma crystallorum, tum detonatione supra carbones candentes.

§. 2122.

Quum acidum nitri forma vaporum incoercibilium prodeat, aqua infundenda est excipulo, densatura vapores. Colore sic pulcherrimo coeruleo tingeritur acidum; quum vero eundem colorem spiritus nitri fumans nunquam non exhibeat, aquae admixtus, color ille non adeo, uti nonnulli rati fuerunt, singularis est.



§. 2123.

INDOMABILITATEM vaporum horum sequenti ratione *Auctor* noster exponit. Arsenicum, ait, quo nitrum decomponitur, corpus siccum est, nec minimam aquae partem recludens: sal vero arsenicale, quod hac decompositione generatur, dote propria aquam nitri constitutivam omnem in se rapit. Acidum hinc nitri, nullum quo densaretur inveniens laticem, summam retinet volatilitatem, et concentrationem; fere uti accidit, dum oleum vitrioli concentratum sali muriatico adfunditur.

§. 2124.

PERPENDENS BAUMEUS dotem arsenici, nitrum decomponendi, ac sese cum basi hujus alkalina uniendo, concludit, arsenicum esse debere genuinum sal: uti vero *Cl. BERGMANN* crediderat, metalla omnia totidem esse acida diversa, phlogisto intime saturata: sic BAUME hac occasione proponit, an non substantiae omnes salinae mero componantur acido vitriolico, phlogisto diversis rationibus *modificato (modifiée)*; quae quidem quaestio dudum jam fuit proposita, ac pro praemio denuo revocata. Subjungit vero BAUME, adductis instantiis salis sedativi, et acidi phosphori, vero sibi videri simile, *arsenicum* ipsum nil nisi *acidum* esse *vitriolicum*, plurimo phlogisto obvolutum, ac a natura in statum singularem deductum, terris demum quibusdam metallicis, quae indolem metallicam facile fuscipiant, intime nexum. Adsumtae interim, ait, sententiae hujus veritas manifeste evinceretur, si artem parandi arsenicum notam haberemus, prout ego ratione salis sedativi facere debui, quod pariter, uti arsenicum, substantia est, cujus decomponendi nos adhuc latet modus. Arsenicum agit instar acidi, et sal alkalinum vertit in sal medium, uti idem fuit

fuit mediante sale sedativo; videtur itaque arsenicum parum adeo decomponi posse, ac sal sedativum.

§. 2125.

PROBLEMATIS instar posuit *Auctor* haecenus adductus, an non fors arsenicum, adinstar salium quorundam, saepe repetita solutione et exsiccatione decomponi demum posset?

§. 2126.

SALIS arsenicalis medii crystallos figura valde varia donatas deprehendit; secunda crystallisatione progenerati plerumque majores multo sunt; nonnullae lamellas tetragonas, aliae sectos adamantes referunt; tertiae crystallisationis soboles aciculas exhibet saepius, quibus interjectae haerent lamellae tetragonae una cum crystallos aliis trigonis, complanatis. Caeterum vero indole interna haec omnes conveniunt, ac figura, non dotibus essentialibus, ab invicem distinguuntur: cur tamen diversitatem hanc insignem obferant, determinatu non adeo facile est; inprimis quum varietas haec non in omnibus experimentis aequae obtineat. Alias dotes, hic adlatas, ex diatriba *Macqueriana* adferam.

§. 2127.

ETSI arsenicum non caro adeo in commercio veneat pretio, adulteratur tamen subin ab hominibus malae fidei, dum forma pulveris venundatur, creta, aut gypso tuso. Deceptus hac ratione semel ipse BAUME fuit, ac libris arsenici quadraginta cretae librae triginta erant mistae. Docimasia vero fraudis hujus unice exigit, ut drachma una vel una cum dimidia arsenici, cujus in dubium revocatur sinceritas, in cochleari ferreo carbonibus exponatur ardentibus; avolabit sic arsenicum, remanente in cochleari admi-



sta terra. Haec balance examinata facile indicabit dosin admisti heterogenei, genuinique arsenici.

§. 2128.

CIRCA actionem acidi nitrosi in arsenicum sub unionem hujus cum nitro cubico, de qua ex *CL. MACQUERO* paulo post loquar, monuit *BAUME*, videri sibi vero simillimum, actionem omnem acidi hujus hic unice a contento in eo phlogisto repetendam esse, atque hujus principii ope arsenicum et nitrosum acidum in sese mutuo agere. Arsenicum, ait, plurimo abundat phlogisto; volatilitas ejus ingens, odor, quem in vapores resolutum spargit, aliaeque plures dotes indicare videntur, phlogiston hoc ipsum in eo, uti in substantiis salinis aliis, sub statu ignis puri versari. Principium hocce in arsenico nexum est terrae metallicae, quam ob rationem arsenicum salia inter et metallica corpora medio collocatur loco.

§. 2129.

IN acido vero salis, prosequitur, multum abest, quin phlogiston evolutum adeo, ac in acido nitri sit; nec acidum salis vividam illam, qua nitrosum distinguitur, actionem in substantias inflammabiles exferre valet, hinc vero, uti reor, nec arsenicum adgredi, nec ab illo addici valet. In experimentis vidi, acidum hoc non majorem in arsenicum, quam in pleraque alia corpora, quae phlogisto abundant, exferrevim. Vero ex his videtur simile, fore ut acidum salis, metallicarum substantiarum additione phlogisto antea redditum onustum ab illis tamen denuo liberatum, quale v. c. spiritus fumans *Libaviani* est, optime adgrediatur arsenicum, idque acidi nitrosi adinstar solvat. A sale vero communi, ope spiritus *Libaviani* facti, eadem non oritura essent phaenomena, quae a nitro nascuntur cubico. Arsenicum non decompo-

componere posset sal hocce, quum sub unione spiritus Libaviani cum alkali minerali in sal commune, acidum hoc dotes omnes denuo recuperat, quibus, antequam spiritum Libavianum constituerat, instrumentum erat.

§. 2130.

BAUMEANA tentamina et observata excipiunt alia, quae Cl. SAGE cum arsenico instituit, atque in *Elem. de Mineralogie docimastique* publici juris fecit.

§. 2131.

ARSENICI *regulus*, ait Cl. SAGE, ab aqua non solvitur, periculosos multo minus effectus edit, quam paratum inde vitrum, aut calx; dedi feli unciam dimidiam hujus reguli, enecta inde non fuit, sed, aliquamdiu emaciata, pinguis denuo evasit, ac sana.

§. 2132.

CALX arsenici, ex cobalto sublimatione obtenta, nunquam non partem cobalti secum abripit, uti ex tentaminibus facillime demonstratur sequentibus.

§. 2133.

DESTILLATIONI exposui partem unam calcis arsenicalis, partesque tres olei vitrioli, liberatum illi-
co acidum sulphureum, quod excipiebat oleum ipsum vitrioli; elatum et arsenicum album, massa vero remanens colorem obtulit coeruleum, diaphanum; fracta exhibuit maximam partem pyramides hexaedras: residuum hoc ipsum carbonibus inspersum odorem alliaceum non exhalavit; per horam dimidiam in fusione retento, idem phaenomenon; fundum crucibuli materies obsedit vitrescens, subviridis, foraminulenta.



§. 2134.

PARTES anaticas arsenici et falis ammoniaci sublimationi exposui; transierunt primum guttae paucae falis alkalini volatilis cum doli exigua butyri arsenicalis; sublimatum dein cum arsenico fal ammoniacum; residuum viridescens, aëri libero expositum, colore tingebatur fusco; cum borrace fustum eleganter coeruleum reddebatur.

§. 2135.

CL. SAGE pariter monuit, cum arsenico fusione unitum cuprum dealbari, atque miscelam hanc aëri libero expositam citius aerugine obsideri; ut adeo nondum adpareat ratio, cur CL. KAIM observatum negarit, tot Chemicorum observatis et experimentis tamdiu statuminatum.

§. 2136.

CL. BOUCQUET in *Introduction &c.* p. 235. observat, calcem arsenicalem ab adfuso acido vitriolico zeolithorum adinstar durescere.

§. 2137.

VIDEAMUS nunc animadversiones, quas circa solutiones arsenici in *Traité de la dissolution des métaux* p. 289 — 305. CL. MONNET retulit.

§. 2138.

ARSENICUM ait CL. VIR, quod nunquam pro substantia regni mineralis singulari maxime et a reliquis diversissima habitum fuit, atque jam inter salia, jam inter metalla repositum, si ad solutiones ejus attendas, a reliquis metallicis corporibus eatenus abludit, ut semimetallis nec possit adnumerari, nec debeat, sed speciali inferendum sit classi. Hac sub ratione illud etiam consideravi in dissertatione ab academia

mia regia berolinensi praemio 1773. decorata. Veritas adfertur evincetur ex phaenomenorum solutiones corporis hujus comitantium syndrome; antequam vero illa omnia ex ordine recenscam, monendum daco, complecti me simul arsenicum album ac nativum et metallica forma donatum, quum levissima solum intercedat diversitas ratione solutionis eorum omnium in acidis.

§. 2139.

TANGENDAS pariter duco his initiis dotes quasdam satis notas arsenici, quae hinc, ut speciatim considerentur, mereri non videntur; solutionem puta illius in *aqua* et *oleis*, a Cl. BRANDT in *diatriba de arsenico* primum observatam. His addam, arsenicum eandem dissolutionem experiri et in mineris, atque hanc ob rationem saepissime adrosam, seu scorificatum quasi occurrit; aqua vero, quae substantiae hujus majorem partem diluit, quam solutam tenere queat, sub forma *Gur* illam denuo deponit.

§. 2140.

CL. BRANDT jam observavit, *arsenicum album* non nisi difficulter ab *acido vitrioli* resolvi. Addendum observationi huic venit, ab *acido vitriolico*, forma oleosa concentrato, solvi illud sat facile, si calor accedat. Adfudi unciae uni arsenici albi in pulverem redacti uncias duas olei vitrioli. Vas balneo inposui, atque calorem tamdiu protraxi, donec vivide arsenicum ab *acido* invadi viderem. Aetione finita vas balneo exemi, atque partem sat magnam coagulum referentem vidi. Innatavit liquidum flavicans, causticum satis, ut purum acidum vitriolicum esse crederem. Decantavi laticem hunc, odore ingratiissimo nares ferientem; residuo aquam calidam adfudi, materiem salinam resoluturus. Difficulter



tamen solubilem massam deprehendi. Aquam sale arsenicali inpraegnatam filtravi, atque ex ea sat magna dosis materiei solutae ad fundum descendit, ut examinari speciatim posset. Experimentis didici, nil nisi arsenicum purum esse, aquae ope ex acido separatum. In matraccio vero plus quam duae tertiae arsenici non soluti partes remanserunt. Liquidum evaporationi subjeci, ac prout aqua fugabatur, enatae in superficie fuerunt crySTALLULI albae exiguae, seleniten satis referentes. Liquidum ad concentrationem notabilem deductum refrigerio commisi. Inveni demum sal in superficie formatum forma pelliculae salinae in unum concretum. Aliud vero sub refrigeratione natum non observavi. Ablatum illud emporeticae siccandum inposui, siccatum examinavi, ac arsenicum purum esse vidi, eodem plane uti arsenicum genuinum instructum erat sapore, iisdemque dotibus. Carbonibus ardentibus inspersum copiosum sub initium exhalavit vaporem, ac, ob inhaerentem humiditatem ebullit; acidi vero sulphurei volatilis nil percipere potui; quod tamen adesse debuisset, si sal hoc ipsum unione constaret acidi vitriolici vera cum arsenico. Experimentum repetens sal hoc igni exposui in *testa* sub testudine furni docimastici; eadem phaenomenorum ratio, arsenico demum ex integro avolante. Susplicari tum coepi unionem hanc arsenici cum acido vitriolico non nisi momentaneam esse, vel et veram inter substantias hasce ambas non intercedere unionem. Alkali tamen sal ex liquido antea dicto praecipitatum subtilissimum dejecit, quod non nisi arsenico constare poterat. *Cl. BRANDT* monuerat, ab acido vitriolico arsenicum eatenus fixum reddi, ut ignis actioni diu resistat, antequam avolet: quod quidem intimam arsenicum inter et acidum vitriolicum intercedere unionem denotaret. Adserto etiam *Brandtiano* conforme maxime est observatum

Cl. MACQUERI, qui, ut in *Dict. de Chymie T. I. p. 183.* memorat, arsenicum album una cum acido vitriolico retortae indidit, ac, miscela igni subiecta, arsenicum in fundo vasis fixatum vidit in vitrum diaphanum. Quidquid id sit, negandum non erit, speciem hanc unionis denuo decomponi (*desasse*) sponte sua, dum aëri libero exponitur, aut aqua diluitur. Arsenicum, adinstar substantiarum metallicarum difficulter solubile omnium, ab acido vitriolico non nisi ratione concentrationis acidī hujus retinetur. Sal ante dictum non nisi pro arsenico, cui acidum est interpositum, haberi debet. Ab acido vero eatenus figitur, ut, observante *Cl. BRANDT*, in igne fundi queat.

§. 2141.

TRACTAVI pariter arsenicum nativum purissimum cum acido vitriolico, atque eosdem vidi ortos effectus, ea solum intercedente diversitate, quod acidum vitriolicum reddatur phlogisticatum, sulphureum. Phlogiston vero leviter adeo substantiae huic adhaeret, ut facillimo negotio denuo eam derelinquat; actio acidī hunc in finem sufficit, adeo ut arsenicum nativum, dum nunc solutum est, eodem in statu versetur, uti arsenicum album.

§. 2142.

AE *acido nitroso* arsenicum facile promteque resolvitur, etsi dixerit *Cl. BRANDT* quinquaginta partes aquae fortis requiri, ut solvatur pars una arsenici. Non possum non suspicari, *Cl. MONNET*, ait locum hunc diatribes Brandtianae a Traductore germanico male versum fuisse, quum fieri nequeat, *Cl. BRANDT* obpositum plane, quam quod alii viderunt, observavit phaenomenon. Verum nunquam non est, acidum nitrosum inter acida omnia reliqua maximam recipere arsenici copiam, tum non requiri ultra octo-
decim



decim partes aquae fortis, ut solvatur pars una arsenici. Effervescentia hac occasione oriens vivida est, ac subin violenta plane.

§. 2143.

DUM acidum nitri in arsenicum non amplius egit, decantavi illud. Spissum inveni, ac ferme mucilaginosum. Observatu vero dignissimum erat, videri solutionem hanc nullatenus saturatam; acidum potius referebat mistum, maxime corrosivum, quam solutionem metallicam. Vapores ex eo adscenderunt nitrosi plurimi, inprimis dum evaporationi subiciebatur. Praecipitatum interea temporis fundum petiit, meris crystallulis albis compositum. Collectae et examini adcuratori subiectae arsenicum exhibuerunt purum. Exemptis latex spissior erat, quam antea fuerat. Ad fundum delapso praecipitato altero, liquidum evaporatione procedente magma adhuc largitum fuit salinum. Aqua hoc dilutum componebatur; ad fundum scilicet descendit arsenicum.

§. 2144.

INSTANTIA haec altera, uti reor, indicare videtur, arsenicum acidis non eadem ratione jungi, uti aliae junguntur substantiae metallicaе, sed solutionem hanc pro divisione potius mechanica habeo, quae arsenicum ope miscelae simplicis acido unitum manet; vel vero admittendum erit, unionem hanc non nisi levissimo firmari nexu.

§. 2145.

EODEM modo se res habet cum arsenico nativo, nisi quod effervescentia observetur major multo, ac solutio longe vivacior procedat. Solutionis hujus jam memini in *dissertatione de mineralisatione*, tum in alia, quae praemium ab academia regia scientiarum
hero



berolinensi pro 1773. retulit. Revocare tamen debeo, quae in dissertationibus illis binis indicavi de sale persistente, quod ex solutione hac enasci debere credideram; et si quidem fusius examen huic operi reservaverim. Monstratum jam fuit, facta solutione arsenici radicali, seu soluta portione quadam arsenici, remanere saepius tantillum quarzi, calcisque martialis in vasis fundo, quod quidem in solutione minerarum vix non omnium videri valet; difficulter etiam inveniuntur substantiae metallicaes satis purae, quibus non admistum quid sit saxi hujus fundamentalis, et universalis illius calcis metallicaes. Ferrum caeterum in solutione hac detegitur colore coeruleo, quo a lixivio phlogificato tingitur.

§. 2146.

MANIFESTAM crediderim ex his fieri rationem, cur arsenicum solutionem minerarum turbidam reddat, et opalinam (*louche*); uti in solutione minerae argenti grysea observatur, et minerae cobaltinae, quae ambae arsenici magnam recludunt copiam. Vidimus partem arsenici sponte sua ex solutionibus hisce ruere. Rerum praeterea ordo exigit, ut arsenicum his circumstantiis positum minorem adhuc cum acido nitroso unionem ineat, quam dum solum fuerit. Cupro, cobalto, et argento acidum per praeferentiam debetur; atque dum non nisi pro illis acidum superest, arsenicum descendere omnino debet. Quum tamen dejectio haec non ex facili adeo fiat, lixivium turbidum et sublaeteum diu exhibet speciem.

§. 2147.

CALX arsenicalis a *spiritu salis* lentissime non nisi, ac dosi exigua recipitur; quin, ut hoc demum fiat, calor sat magnus adhibendus est. CrySTALLI exin obtinendae non majori jure pro sale haberi queunt ex
unione



unione acidi muriatici cum arsenico enato, quam crystalli paulo ante examinatae, ope acidi nitrosi productae. Cl. POTT et solutionis hujus, et crystallorum in *dissertatione de sale communi* meminit, atque easdem pariter pro arsenico puro habere videtur. Dum solutionem hanc excessu acidi donatam evaporationi commisi, speciem liquidi spissioris obtinui, quod cum *butyro* sic dicto *arsenici* comparari poterit. Melius adhuc id ipsum obtinuit, miscelam destillationi subijciendo. In genere fateri queo, eadem ratione, uti cum acido nitroso fieri solet, arsenicum eo retineri fortius, quo concentratior solutio fuerit. Hanc eandem ob rationem et olei adinstar spissa evadit, dote denuo acido nitroso, arsenicum solutum tenenti, analoga.

§. 2148.

ARSENICUM nativum facilius adhuc in spiritu facilis resolvitur, eodem tamen oriente producto. Phaenomenon hac occasione adnotasse juverit singulare. Dum solutionem hanc, residuo adhuc inhaerente arsenico, igne calefaciebam, color ex flavo viridescens illi erat, remoto vero ab igne vase, ac miscela agitata, color hic idem evanescebat, et latex aquae purissimae adinstar evadebat excolor.

§. 2149.

NOTUM est, acidum muriaticum concentratum sublimati corrosivi adgredi arsenicum, solvere hoc, et a mercurio, quem antea solutum tenuerat, recedere. Hoc quidem singulare tanto magis videtur, quum antea monstratum fuerit adfinitatem non manifestam adeo has inter obtinere substantias. Indicasse phaenomenon, qui chemicas dedere disquisitiones satis esse rati, ne minimum rei hujus addiderunt examen; Cl. POTT inter omnes unus latius nonni-

nonnihil eam in dissertatione de auripigmento perfectus est; mentionem etiam solus iniecit liquidorum binorum, quae hac occasione enascuntur; unum ex iis oleum refert, alterum vero aquae adinstar limpidum est. Qui vero liquida haec ipsa ab invicem distincta sint, et quam ob rationem commisceri nequeant, non revocavit sub examen. *Cl. ROUELLE* in *Procedés chimiques* p. 155. ait, liquidum oleum referens partem mercurii tenere solutam. An itaque portio huic mercurii fluidi hujus indoles et consistentia in acceptis referenda erit? Adcuratius quaestio haec mereretur examen. Quidquid id sit, contrarium prorsum *Cl. POTT* perhibuit, atque statum hunc unice debere sulphuri dixit, dum auripigmentum una cum sublimato corrosivo destillationi subjicitur. Laticem alterum quod concernit, aquae limpiditate analogum, quum *Cl. POTT* inter Chemicos reliquos unus de eo egerit, non abs ratione admitti posse crediderim, illum non nisi methodo debere, qua *Cl. VIR* operationem suam perfecit. Refert sane, miscelam sese exposuisse in cavea subterranea per nycthemerum, antequam subjiceretur destillationi; hinc fluiditatem illam aëri humido caveae natales suas in acceptis referre existimo. Praeterea ratio quoque proportionis ingredientium, qua *Cl. POTT* usus fuit, libram unam sublimati corrosivi miscens cum libra dimidia auripigmenti, facere huc pariter multum valet. Tum et observatum non negligendum hic est *Cl. POTT*, quod et antea dictis analogum maxime est, decompositio nempe butyri arsenici, aut secessus acidi ab arsenico, dum butyrum hac aqua diluitur. Chemicis etiam omnes, qui operationem hanc perfecturunt, advertere potuerunt, acidum salis minime saturatum esse arsenico; quin contraria ratione omnes fatentur, liquidum hoc summe corrosivum esse. Monedo denique, quod quidem jam antea innui, unionem



nem hanc referre unionem binorum acidorum. Mirum ex his omnibus itaque non videatur, observasse Auctores quosdam liquidum saepe dictum solvere substantias plures metallicas, v. c. ferrum et cuprum, eadem fere ratione, uti ab acido misto fit. Non recensebo fufius, butyrum arsenici eadem ratione fieri posse, qua paratur mercurius sublimatus corrosivus, quod adfertum concipi facile potest, et a Chemicis insuper demonstratum experimentis fuit. Mirabitur vero plurimum lector, eundem *Cl. POTT* in dissertatione de sale communi adserere, butyrum arsenici sese non potuisse acquirere mediante arsenico vulgari, obtinuisse tamen mediante arsenico regulina forma donato, vel et arsenico nativo. — Rario, quam diversitatis hujus *Cl. POTT* adtulit, non satis est plausibilis, ut eam hic adducerem. Quidquid id sit, mirum hoc tanto magis videri debet, quum jam antea observaverimus, arsenicum album aequae facile ab acidis resolvi.

§. 2150.

DIVERSA vero obtinet ratio inter solutionem arsenici acidorum ope et salium alkalinorum. Coit arsenicum lubentissime cum alkalinis in salia perfecte neutra. *Cl. BRANDT* inter Chemicos reliquos primo loco adnotasse videtur, arsenicum resolvi posse a sale alkalino fixo in laticem resolutum. *Cl. vero MACQUER*, quin, uti reor, tentamina *Brandtiana* prius novisset, speciem hanc solutionis pariter sub examen revocavit; longius insuper progressus fuit, quum detexerit, solutionem hanc via sicca aequae ac humida fieri posse. Observata sua circa hanc rem complexus fuit dissertationibus binis egregiis, quae insertae habentur in *Mem. de l'Acad. roy. des sciences pro anno 1746.*

et

et 1748. *) Monuit demum *Cl. MONNET*, sese tentamina omnia Macqueriana pariter instituisse, atque eundem, quem *MACQUERUS* vidit, notasse eventum.

§. 2151.

CL. CARTHEUSERUS in opere *Mineralogische Abhandlungen*, 2. *Tbl. S.* 102 — 127. nonnulla adduxit circa arsenicum observata, quorum praecipua hic inferam.

§. 2152.

OMNIUM primo recenset *Cl. VIR* sententias Auctorum circa indolem arsenici prolatas varias, una cum rationibus, quas quisque pro sua confirmanda proposuerat; (inter quas, quum reliquae aliunde jam notatae fuerint, sententia occurrit *Cl. PÖRNER*, qui arsenicum terra componi credidit indolis siliceae, cum acido vitriolico et muriatico intime nexa.) Circa sententiam *Cl. von LINNE*, arsenicum sulphuribus accensentis observat, momenta, quae in illius adferri solent confirmationem, parum firmo inniti talo: nam arsenicum, ait, purum, album, igni expositum non flagrat: in igne quidem emittit vapores (*er raucht*); verumtamen dotem hanc cum hydrargyro, bismutho, regulo antimonii, aliisque semimetallis habet communem; atque hinc proprietas haec pro sulphuris characterem essentiali venditari nequit. Nec odore, quem arsenicum, igni expositum, spargit, sulphurea indoles magis confirmatur, quum odorem etiam exhalent bitumina (quae quidem *LINNAEUS* classi sulphureae pariter inferuit); salia urinosa regni mineralis e. s. p. — Inficias quidem, his addit, ire non possu-

*) DISSERTATIONES has mox adferam, unde et pauca, quae *Cl. MONNET* ex illis excerpfit, tuto hic omitti posse reor. *de W.*

Pars II. Sect. II.



possumus ab arsenico mineralisari metalla, et cum sulphure substantia mineralisans princeps est; quum vero et substantiae aliae, v. c. terra argillacea, calcarea, e. s. p. metallis mineralisandis inpendantur, uti potissimum circa ferrum obtinet, haec denuo ratio pro sufficiente vix adsumi poterit.

§. 2153.

MISSIS reliquis *Cl. CARTHEUSERUS* dotem inprimis considerat arsenici, in aqua, salium adinstar, liquescendi, tumque crystallos formandi, speciem salinam exacte referentes, ac in aqua denuo solubiles. Dum nempe, ait, arsenicum vulgare album, quae nil nisi calx est volatilis semimetallica, decoquitur cum aquae vulgaris partibus quindecim, aut pluribus, paulatim soluitur, mox tamen ex solutione denuo recedit, ac in crystallos concrevit.

§. 2154.

VERUMENIMVERO, prosequitur *Cl. VIR*, quam crystallos format arsenicum, in statu salino nunc versans, et quaenam his forma est propria? Refert *WALLERIUS*, arsenicum aqua solutum concrevere, praemissa evaporatione, in crystallos irregulares. *LEHMANN* observat, arsenicum purum album crystallinum jam prismaticum esse, jam pyramidale, jam et rhomboideum. Multi, quin et plurimi Mineralogorum et Chemicorum formam crystallorum arsenicalium exacte haud determinarunt. Interim tamen dubium nullum superest, crystallos arsenici puri, adinstar crystallorum, in quas variae species mediorum salium, vitriolorum, aluminis e. s. p. coeunt, figura determinata et regulari esse debere donata, utut haec ipsa pro diversa encheireseos ratione nonnihil mutari, vel et irregularis reddi queat, prout idem circa alia obtinet salia.

§. 2155.

§. 2155.

REFERAM vero hic paucis methodum, qua intra parvum temporis spatium crysalli regulares maxime ab arsenico obtineri queant; an ea jam alibi fors descripta sit, perspectum non habeo.

§. 2156.

ADFUDI auripigmento, in pulverem redacto, sufficientem dosin *aquae fortis*; miscela, per aliquot dies reposita, dimisit sensim bullulas aëreas, arsenicum in auripigmento delitescens paulatim solvebatur, ac solutionem demum obtinebam flavicantem, subturbidam, filtratione praemissa reddendam limpidam. Huic instillavi solutionem saturatam cinerum depuratorum clavellatorum; orta fuit effervescencia, arsenicum illico, sub forma crysallorum albarum, petiit fundum. Crysallos hasce, filtro a liquore separatitas, reposui siccandas. Figura donatas vidi prismatica, tetraëdra, apicibus truncatis, hinc *sali sedlitzensi* aut *seidschützensi* analoga, paulo tamen planiori. Ab aqua frigida solvebantur brevi, et dosi sat notabili. Mistum vero erat crysallis hinc inde quid materiei flavicantis unctuosae, facta exsiccatione terram referentis, ac, uti vero videtur simile, particulis quibusdam sulphuris una cum arsenico solutionis inpetu abreptis compositae. *)

§. 2157.

CIRCA crysallificationem hanc arsenici varia occurrunt notanda: primum crysallorum figura, quae, uti prius dictum fuit, cum crysallis salium, quae

O 2

ex

*) SUSPICIONIS hujus, quam Cl. CARTHEUSERUS facili tentamine dilucidare potuisset, veritatem demonstrat flamma et vapor sulphureus, ab ea carboni candenti injecta adscendens.



ex aquis obtinentur amaricantibus, conveniunt, vel et cryсталlos falis medii arfenicalis referunt, ea tamen intercedente diverſitate, quod in fale arfenicali cryсталli terminentur pyramidibus tetraëdris, dum cryсталli arfenicales extremitatibus inſtructae ſunt truncatis. An vero arfenicum non niſi dicta tractatum methodo illam induat formam, an alia encheireſi obtentae prioribus tamen nihilofecius nonnunquam accedant, ulteriori diſquiſitione examinandum venit.

§. 2158.

NOTANDA praeterea facilis cryсталlorum ſolutio in aqua etiam frigida; quum arfenicum alias pro ſolutione aquae indigeat ebullientis magna ſatis copia, lente tamen nonniſi ſuccedente ſolutione; patet hinc non pro generali canone ſtatuendum eſſe, arfenicum ab aqua difficulter ſolvi. Admittendum hoc ipſum de arſenico unice erit, forma calcarea et vitriformi donato; diverſitas dependere videtur a ratione, qua ſecretum fuit, varia. In noſtro enim tentamine arfenicum menſtrui acidi ope ex minera ſua ſecretum fuit, ac educum. Arfenicum vero calciforme, aut hyaloideum album violentia ignis e matrice fugavit. Notum ſiquidem eſt, ſub uſtulatione minerarum cobalti, aliarumque arſenici magna doſi inpraegnatarum expelli arfenicum, et ſub forma farinae, aut pulveris albi adfigi ſpiraculis (*Giftfänge*). Farina haecipſa, quam Germani *Giftmehl* vocant, nova ſublimatione formam acquirit materiei albae hyaloideae, qua vulgo arfenicum venale ſolet occurrere.

§. 2159.

NOTANDA demum circa cryсталlos ante dictas arfenicales earundem cita, et ſub ipſo praecipitationis momento contingens geneſis. Occurrunt tamen in Chemicis inſtantiæ plures, ubi aliae quoque ſubſtantiae

tiac metallica celeriter praecipitatione sub ipsa in crystallos coeunt. Sic v. c. adfuso vitrioli oleo, aqua plurima diluto, in solutionem argenti nitrosam, paulo post luna, acido chalcanti nunc nupta, ruit forma crystallulorum minimarum, albarum, splendentium, lanceolarium, praemissa exsiccatione colore ex gryseo atro tingendarum; quod saepius ortum vidi phaenomenon.

§. 2160.

SOLUTIONEM, methodo prius indicata, factam arsenici, nitri acido ex auripigmento extracti remiscui cum anatica dosi alcoholis rectificatissimi. Limpida mansit miscela, nec ad fundum quid dejectum. Instillavi tum solutionem cinerum clavellatorum depuratorum saturatam, enata sic effervescentia, ac arsenicum, eadem, uti prius ratione forma crystallina denuo obsedit fundum. Crystalli hae albae erant, splendentes, utraque dote prius descriptas excedentes; figura vero donatae eadem, sed tenuiores multo ac delicatiores, textu floccis nivis aut floribus benzoës vix non analogae. Aqua frigida mox denuo solvebantur, paucio tamen demisso albo pulverulentoque sedimine.

§. 2161.

SOLUTIONI eidem arsenicali anaticam admiscui dosin saturatae solutionis ferri in aqua forti; miscelam per aliquot dies reposui, diaphana mansit, nec fundum quid ex ea petiit. Adfusa clavellatorum cinerum solutione saturata dejectus pulvis flavus ochraceus, ne minima tamen in conspectum veniente crystallo; praemissa exsiccatione colore ex fusco flavescente tinctus pulvis.

§. 2162.

SOLUTIONI eidem arsenicali adfudi dosin anaticam solutionis cupri nitrosae. Nec hic turbatum quid



quid. Adfusa solutione cinerum clavellatorum nullae exortae crystalli, dejectus pulvis ex coeruleo viridescens.

§. 2163.

Coit hinc arsenicum sub miscelis hisce cum metallo soluto, ac unitum una cum eodem forma pulveris fundum petit; quam ob rationem nullae conspiciuntur crystalli.

§. 2164.

Quodsi solutio ante dicta arsenicalis mediante calore leni evaporationi subjiciatur, abit in materiem, gelatinam ex integro referentem, uti phaenomenon jam adnotaverat HENCKELIUS, qui vero dotem singularem hanc arsenici intercedere ratus fuerat. — Instantias tamen plures Cl. CARTHEUSERUS hic adfert gelatinarum ex substantiis diversis mineralibus acidorum ope confectarum.

§. 2165.

PRODIIT 1771. *Lips. et Amstelredami* altera vice collectio duarum dissertationum chemico metallurgicarum sub titulo: *Bifolium chemico - physico - metallicum, bestehend in zwei besondern Abhandlungen, deren die erste den Zink und Galmey, die andre aber den Arsenik &c. untersucht, von J. L. AB INDAGINE L. M.* Continentur in ea p. 127 — 226. sub titulo *Arsenicologiae* varia observata circa arsenici indolem, dotes, denominationes, species, ac habitum ratione metallorum geneleos. Quum vero plura ibi occurrant, in scopum nostrum non facientia, intactis illis omnibus reliqua compendiarie hic inferam.

§. 2166.

At quidem Auctor hic sub initium diatribes de arsenico, substantiam hanc, sive alba sit, sive flava, sive

sive rubra, Veteribus omnino fuisse ignotam, et dum illi expressis verbis arsenicum nominant, aliud quid, quam verum arsenicum deleterium, ab illis denotari. Sententiam suam confirmaturus adducit locum Auctoris medii, ut ajunt, aevi, ISAACUM HOLLANDUM, qui scripserat: quo saepius aurum cum arsenico fundatur, eo melius id fieri; quae vero de arsenico genuino accipi nunquam possint. — Obponere tamen adserto huic generali locum AVICENNAE licet, extra omnem controversiam positum, a Cl. BERGMANN sub initium dissertationis suae adductum; ubi de arsenico vero agi, vix quis inficiabitur. Locum quod adtinet HOLLANDI, arsenicum Auctor hic ceu saponem considerasse videtur, metallorum sordes abstergentem, quae sententia et aliis *Alchemicorum* textibus confirmari posset; an vero rationi consentanea sit, inpraesentiarum disquirendum minime videtur.

§. 2167.

IN ipsa jam diatribe Auctor noster sub examen revocat, quid arsenici constituat indolem, vel quidnam voce hac denotetur. Ut vero hoc determinari queat, arsenicum matrici adhuc inhaerens saxosae disquirendum esse monet. Absurda satis arsenici evocatione praemissa definit illud mercurium metallicum qui dispositionem alat proximam, in metallicam substantiam abeundi; *) quam quidem definitionem Chemicorum judicio lubens relinquo. Sub finem additur, arsenicum maximam inde partem componi terra Becheriana tertia, quae et reliquorum metallorum omnium principium constitutivum fit primum.

*) Ein metallischer Mercurius, der die nächste Disposition hat, ein Metall zu werden.



§. 2168.

AIT dein vim corrosivam arsenici, tum et coagulationem ipsius mercurii metallici acido unice deberi salis communis; mercurium vero metallicum non unius ejusdemque per omnia esse indolis: exinde, verba ejus propria sunt, sequitur prima et primaria arsenici differentia: sic arsenicum saturninum non erit lunare.

§. 2169.

CUR vero arsenicum in verum non abierit metallum, eam adfert rationem, quod ad compositionem genuinam (*Grundmischung*) metallorum plus, quam terra unica mercurialis requisita sit, defectu itaque terrarum reliquarum binarum metallicarum arsenicum, ceu nudus mercurius verum non constituere queat metallum.

§. 2170.

TERRA secunda Becheri, ceu phlogisto cum arsenico debita sub proportionē coeunte, arsenicum verti in regulum, verumque semimetallum, volatilitate, colore albidiori, partiumque tenuitate majori praeditum regulo antimonii. Melius rem perfici, marte (*die Schwerdter des Martis*) in auxilium vocato. Metallificationem vero semimetallici hujus reguli ulterius procedere non posse, quum in eo conjunctio nondum obtineat terrarum trium metallicarum, metalla constituentium. In omnibus vero semimetallicis terram fixam et figentem Becheri primam.

§. 2171.

QUA porro ratione arsenico ea conciliari queunt, quae in eo adhuc desiderantur, ut in verum et perfectum abeat metallum? Quaestionem hanc, ait, facile resolvi valere, quum constet, ad metallificationem requiri coitum terrarum trium metallicarum, indolem

lem vero metallicam una solum praesente, vel et unitis binis non obtinere posse; quum praeterea constet, phlogiston facili negotio ab metallis avelli, facile denuo restitui posse; hinc sequi, phlogiston sub metallificatione ultimo loco accedere, nexu vero, (inprimis in metallis ignobilioribus ac semimetallis, facile in calcem exurendis, phlogistoque privandis) minime forti jungi, quum tamen terrae reliquae binae constitutivae, mercurialis et vitrescibilis, durante calcinatione ab invicem non recedant, sed arctissimo unitae maneant vinculo: quum enim solius phlogisti accessu metallum denuo reducatur integrum, sub calcinatione etiam nil nisi phlogiston abreptum fuisse liquere. Fluere ex his omnibus axioma novum, hactenus parum cognitum: terras ambas constitutivas metallicas, sub calcinatione sese invicem non deferentes, vinculi sui arctissimi beneficio basin metallorum porrigere debere.

§. 2172.

Juncto arsenico, seu principio mercuriali, aut terra Becheriana tertia cum terra Becheri prima exurgere basin metallicam, ad metalli veri indolem omnino requisitam, a calcinato quocunque metallo non diversam. Accessu demum phlogisti terras illas binas catenus necti, ut sub conspectum prodeat cohaesio metallica, malleabilitas, color, et splendor metallis proprius. *)

§. 2173.

Pro novo nunc invento praedicat Auctor thesin: arsenicum capax esse metallicam indolem induendi; quodsi vero quis quaerat, quodnam ex illo surgere debeat metallum, determinandum hoc esse, subjun-

O 5

git,

*) VIDERI vero circa hanc theoriam ea debent, quae in capite de metallis in genere fuerunt adlata.



git, ab mercurio metallico, et figente terra constituta; differentiis metallorum non a phlogisto, ubique catholico, sed a terra varia metallica, constituta, specificante dependentibus.

§. 2174.

ARSENICUM forma vaporis ingredi metallorum omnium, excepto solum ferro, genesin *), in metallorum omnium mineris, seu matricibus fidum occurrere comitem: illud vocandum esse *genitorem metallorum communem*: metalla omnia nasci ex halitibus mineralibus aut subterraneis (*Witterung*, et *Schwaden*); vapores hosce, metallis generandis aptissimos, partim sulphureos esse, partim arsenicales; sulphur et arsenicum, vel se juncta, vel unita simul sub omnium metallorum genesi occurrere; primas tamen concedendas esse principio mercuriali prae sulphure, quum illud primarium sit ac praecipuum principium geneleos metallorum; vicinius esse arsenicum auro et argento, (quae ambo ex illo enasci queant), aliisque metallis, quam sulphur, unde et cum metallis omnibus lubentius, et arctius, sulphure, coëat; vaporum arsenicalium inde primas esse in genesi metallorum, quum substantiam secum vehant mercurialem, in quorum confirmationem plurimi textus Henckeliani adlegantur.

§. 2175.

EODEM, ex dictis, rem redire, sive quis pronuntiarit, metalla omnia prognata esse ex arsenico, sive alter, ea ex vaporibus generata sustinuerit; halitus subterraneos, (*Bergschwaden*) et arsenicum, hoc sub sensu, synonymas esse voces.

§. 2176.

*) VIDENDAE circa negotium hoc dissertationes Cl. LUGEL, et Cl. MONNET, in quibus, quid arsenicum ad genesin metallorum faciat, disquiritur.

§. 2176.

METALLA aut oriri ab arsenico, aut arsenicum oriri a metallis; prius vero adfuisse arsenicum sub forma vaporum (*quod vero ipsum examinandum antea erat, ratione praexistentialis*) metalla generantium; metalla vero ad coagulationem suam, fixationem, et fusibilitatem longiori indigere temporis intervallo, tum et miscela speciali constitutiva, terrarumque plurium unione; hinc aegerrime collocare potuisse *Auctorem* arsenicum post metalla, ratione ad ordinem genesis naturalis sumpta, quum, si arsenicum ortum suum deberet metallis, metalla redire etiam deberent in arsenicum, hoc vero obtinente, disjiciendam fore ex integro miscelam metallorum constitutivam, atque tum arsenicum, quod metallum jam fuerat, secretum nunc solum etiam occurrere debere; difficilius vero hoc ipsum concipi posse, quam thesin: arsenicum aptum natum esse metallisationis futurae; ex re simpliciori, qualis arsenicum est, oriri quidem posse rem magis compositam, qualis metallum deprehenditur, non vero vice versa *) e. s. p.

§. 2177.

PRAETEREO jam lubens, quum in scopum nostrum non faciant, etsi nonnulla vero satis consentanea censcam, quae *AUCTOR* circa dosin variam, qua arsenicum

*) MINIME vero attendit hoc loco *Auctor*, thesin hanc generalem pronuntians, ad instantias copiosas obvias, quibus refutatur; vel unicam hic adduxisse sufficiat Vitrioli, aut aluminis genesis ex pyritibus, vel extricationem plurimarum substantiarum simpliciorum ex magis compositis, naturae vel artis ope peragendam.



cum diverforum metallorum genesin ingrediatur, *) tum circa rationem, qua arsenicum in metallicam indolem transire, ac metalla alia sensim constituere autumat, circa diversitatem mercurii metallici, ipsiusque arsenici ratione artis metallopoëticae, circa gradus metamorphoseos in argentum, circa thesin demum, ortum argenti ab arsenico repetendum, ac argentum nil nisi arsenicum esse fixum, ac in metallum versum, arsenicum vero mercurium lunae particulis corrosivis salinis infectum: horum vero loco adferam paucis observata Auctoris alia, unionem arsenici cum substantiis diversis concernentia. **)

§. 2178.

ARSENICUM metalla omnia, ne quidem auro argentoque exceptis, volatile secum abripit, si dosi eas excedat, aut si moleculae metallorum minimae involutae sint particulis arsenicalibus: arctum vero satis cum metallis connubium init, si ea dosi adjiciatur, ut illa sexies, octies, aut decies arsenicum exsuperent.

§. 2179.

LUBENTISSIME ferro nubit, quam ob dotem et ferrum avellendo ab aliis metallis arsenico adhibetur; rationem phaenomeni Auctor denuo a principio mercuriali, in ferro deficiente, ac ab eo avidè adripiendo, exponit. — Dum ferro $\frac{1}{8}$ circiter ratione ponderis jungitur, illud colorem inde acquirit albidiorē, sed

*) PRO singulari phaenomeno AUCTOR adnotavit, stannum cum nitro detonare acsi dos haec uni stanno foret propria.

**) VARIA etiam huc facientia, in haecenus expositis capitibus de singulorum metallorum cum arsenico unione fuerunt dicta, ut adeo haec illis subplemento serviant.

sed fragile simul redditur, quosdam in usus tamen adhuc idoneum.

§. 2180.

CUPRUM ab arsenico albescit (quod inter omnes reliquos credere solus noluit KAIM), et fragile redditur: quo major addita fuerit arsenici dosi, eo deterius evadit cuprum.

§. 2181.

STANNUM ab admisto arsenico, imprimis regulino, album magis, durum, sonorum fit. Arsenicum primas obtinet in operatione *Baronis URBIGERI* cum stanno fuscepta argyropoëtica.

§. 2182.

PLUMBUM admisto arsenico mallei inpatiens evadit, fractura teneriori, simul et argyrophorum.

§. 2183.

CONFECIT saepius Auctor vitrum saturni arsenicale, fundendo uncias 8. minii cum uncis 4. arsenici: obtentum vitrum colore donabatur flavidissimo, uncias decem cum dimidia adpendens; ut adeo unciae $2\frac{1}{2}$ arsenici vitrificationem plumbo nexae subierint. Vitrum hoc, notante etiam HENCKELIO, summus minerarum refractariarum est domitor. *)

§. 2184.

MERCURII ope arsenicum depuratur, forma albissima sublime petens, ac admistum sulphur, aliave impura mercurio relinquens.

§. 2185.

*) EAMDEM dotem et magneti arsenicali, seu lapidi *Pyrnison* competere novi.



§. 2185.

Cum auro arsenicum facile jungitur.

§. 2186.

EAMDEM et argentum versus amicitiam exserit.

§. 2187.

LUNA cornea, etsi caeterum volatilis plurimum, arsenico tamen juncta, ac igni exposita cum eodem non adtollitur; $\frac{1}{8}$. arsenici retinens, quae omni criterio examinata verum sistit argentum.

§. 2188.

EXPERIMENTUM pauciori copia instituturus deducat, methodo alibi descripta, unciam dimidiam lunae in lunam corneam, misceat hanc cum partibus binis arsenici albi crystallini, et sublimationi ex balneo arenae, igne adhibito remissiori, miscelam subijciat; summa sic petet maxima pars arsenici, drachma tamen una remanente, per argentum in argentum fixata. Quodsi nunc reducere materiem velis, deflagret prius adjecta illi cera, tum cupellae una cum plumbo ingeratur, ac ad corruscationem usque promoveatur; remanebit demum argentum drachma una auctum. Demonstratur, ait Auctor, experimento hocce (quod exigua dosi institutum, lucri quidem nil adfert), arsenicum sensim figi, ac in argentum mutari posse. *)

§. 2189.

EXAMINAT nunc Auctor relationem arsenici ad salia nonnulla, inprimis ad sal ammoniacum, nitrum, borracem, et sal mirabile Glauberi. Praemittit vero,

*) RELATIONEM arsenici ad aurum etiam disquisivit HENCKEL in *Pyritologia* p. 233. 229. 140. 154. 623. 709.

vero, arsenicum a *spiritu salis* resolvi, ab *acido autem nitroso* verti in substantiam viscosam, resiniformem.

§. 2190.

ARSENICUM, ut superfluum Auctoris verborum paucis complectar, una cum sale ammoniaco sublimatur; remanet, adjunxit, quid, ulteriori disquisitione dignum: cur vero non disquisivit? —

§. 2191.

MISCELA arsenici cum nitro, aut anatica dosi, aut ea ratione facta, ut parti arsenici uni jungantur nitri partes duae, tumque destillationi per retortam subiecta, prodit aqua fortis colore cyaneo tincta (*quod vero phaenomenon singulare adeo, uti quidem multis visum, plane non est.*) Removendum tamen illico vas recipiens non erit, sed quietus per horas 24. apparatus maneat, donec vapores subsederint.

§. 2192.

REMANET finita operatione *arsenicum* sic dictum *fixum*, *nitro fixatum*; monente AUCTORE *nitrum arsenico fixatum* vocandum.

§. 2193.

VULGARI methodo perficitur operatio, ingerendo repetitis vicibus, ob sequentem tumescentiam, anaticas doses nitri ac arsenici in crucibulum candens, retinendo massam tamdiu, donec aquae adinstar fluat, tum demum effundendo in tabulam marmoream. Quum humidum aëreum avide adripiat, in vase probe clauso et loco sicco erit adservandum.

§. 2194.

ADJECTIS uncis binis salis gemmae ad uncias quatuor nitri ac arsenici, massa exurgens compactior fit,



fit, in aëre ficcior permanet, murrhyni adinstar semiopaca, et, lumen versus spectata, colore subcoerulefcente gaudet; Auctor ex adlata substantiarum portione uncias illius 7. aut $7\frac{1}{2}$ obtinuit.

§. 2195.

FUNDENDO arsenicum album crystallinum cum dosi anatica, aut majori paulo, admista borracis, obtinetur vitrum satis pulchrum, fluxum egregium substantiarum refractariarum in metallurgicis praebens.

§. 2196.

SAL mirabile Glauberi demum aegre arsenico jungitur: miscuit AUCTOR unciam $1\frac{1}{2}$. arsenici albi crystallisati cum uncia dimidia salis Glauberiani, miscellam in cucurbitula vitrea igni exposuit; elatum in sublimis omne arsenicum fuit, ab sale mirabili, fundum vasis oblidente, prorsum sejunctum.

§. 2197.

OMITTO denuo ea omnia, quae in adducta dissertatione nunc sequuntur, arsenicum ratione metallurgica et cameralistica spectatum concernentia; minerarum scilicet metallicarum et arsenicalium explorationem, ustulationem, argenti eductionem, e. q. f. r. Omitto et examen, quam sibi ipsi proposuit, quaestionis, cur marti in genealogia metallica nullus sit locus? &c. &c. *) Ferrum nativum ex integro negavit.

§. 2198.

*) RETULIT inter alia et tentamen Becherianum notum sideropoëticum, producendi martem ex luto et oleo lini; non vero advertit, miraculi plane nil hic intercedere, quum terrae martiali in luto contentae phlogiston unice jungatur, quo facto mars facile nascetur.

§. 2198.

LIBELLO ipsi nequitur adpendix, in qua varia examinantur, tum antea jam exposita, tum alia, quae vero indicasse solum hic sufficiet. — Non omne arsenicum idem esse; illud nil nisi mercurium esse metallicum a mercurio vulgari diversum; principio corrosivo adhaerente factum deleterium, forma foliata donatum; arsenicum esse toxicum vi corrodeute nocuum; vim hanc nasci ab acido adhaerente salino *); acidum salis corporibus metallicis arte adhaerere, ut vix divelli ex integro queat; adhaerere magis minusve arsenicum substantiis metallicis pro ratione majoris minorisve gravitatis ipsarum substantiarum, confirmari hoc instantia mercurii vulgaris, ope acidi muriatici in mercurium sublimatum corrosivum versi; lunam corneam, volatilem adeo, evincere in acido salis communis adesse principium quoddam mercuriale (*ein merkurialisches Wesen*) **) adesse

*) **SENTENTIA** haec simillima est sententiae *Justinae* de natura arsenici, alibi adlatae, a *KAIMIO* refutatae.

) **SINGULARIS est **AUCTORIS** de natura deleteria arsenici sententia, quam, ne fors quidpiam deperdatur, ipsis ejus verbis adducam: *Wir müssen, ait, aber noch ein Wörtchen von der Luna cornua sprechen. Das Silber ist doch bekannter massen eines von den fixesten, und nächst dem Golde das fixeste Metall. Da nun das acidum salis communis den fixen Körper des Silbers so flüchtig macht, daß die ganze Substanz des Silbers gleich einem Arsenick im Rauch davon gehet: So ist aus dieser Volatilisation des Silbers zu schließen, daß das acidum salis communis ein merkurialisches Wesen entweder seyn oder in sich haben müsse. Nun nehme man beydes zusammen, was vom* Queck-



adesse in arsenico mercurium metallicum diversae indolis; vero videri simile, mercurium in quovis metallo esse ab aliis distinctum; arsenicum hinc esse vel saturninum, vel joviale, vel lunare, vel venereum, vel demum solare; maximam partem occurrere indolis lunaris; rarissimum esse arsenicum solare, reperiri tamen nonnunquam in fodinis hungaricis &c. semimetallis potius quam salibus adnumerandum esse arsenicum, evinci pondere majori, insolubilitate in aqua, insipiditate; maxime vero ex eo, quod sal nullum largiatur unquam regulum metallicum, ab arsenico tamen semper obtinendum; ideis omnibus physicis repugnare thesin *Iustianam*, qua arsenicum non solum sal, sed et *sal tertium naturale primarium* esse statuitur. Reliqua omnia, circa metallopoësin, ac in specie argyropoësin, (quae ferri cum arsenico juncti beneficio imprimis perficeretur) ope arsenici producendam, ab Auctore adlata, in ipsa diatribe videri debent.

§. 2199.

PIACULUM vero foret, si reticerem egregia tentamina, quae *Cl. Vir. MACQUERUS* circa arsenicum instituit atque in *Mem. de l'Acad. roi. des sc. de Paris* 1746.

Quecksilber ratione der Schwere, und vom Silber ratione der Flüchtigmachung ist angemerkt worden; so wird man leicht auf den Arsenick den Schluss machen können, dass, wenn der Mercurius metallicus beyderley Veränderung zugleich leiden muss, daraus kein andres Ding als dasjenige corrosivische Gift entstehen könne, welches insgemein Arsenicum genennet wird, und dass es seine corrosivische Eigenschaft nirgends anders herhabe, als vom acido salis communis, welches aus denen beyderseits Mercuriis, nämlich aus Mercurio vulgari et metallico, die beyden höchsten Gifte gemacht hat.

1746. et 1748. inferi curavit. En eorum amplam, ac ipsis plerumque Auctoris verbis ex gallico avtographo traductis, descriptam recensionem.

§. 2200.

PRIMA dissertatio *) sequentibus potissimum absolvitur. — Arsenicum singularia prorsum obfert phaenomena, quum jam metalli, jam salis corrosivi adinstar agat, maximam vero partem amborum in unum concretorum obeat vices; quam ob rationem Becherus arsenicum definivit substantiam compositam terra sulphuris in sale communi contenti (qua phrasi, monente Cl. MACQUER, probabiliter acidum muriaticum denotatur), et metallo illi nexo; BECHERUS arsenicum praeterea dixit aquam fortem coagulatam, mercurium vero arsenicum fluidum; mercurium demum sublimatum corrosivum, saturnum corneum, lunamque corneam ceu totidem agnovit arsenici species.

§. 2201.

ARSENICUM unice album crystallinum, purissimum, ab aliis heterogeneis admistis liberrimum, ex cobalto maxima copia educendum, laborum suorum scopum praefigens Cl. VIR, primum observat, Chemicorum maximam partem examinasse solum relationes arsenici ad substantias diversas metallicas, quibuscum arsenicum aut natura junctum est, aut arte sociatur; nullum tamen, quid arsenicum salibus nexum agat, peculiari criterio subjecisse: vel si quae factae fuerint observationes, negotium hoc ipsum concernentes, exiguo solum easdem absolvi numero, nec ad finem usque fuisse perductas.

P 2

§. 2202.

*) RECHERCHES sur l'Arsenic. Prem. Memoire, par Mr. MACQUER. Mem. de l'Acad. des Sc. Ao. 1746. pag. 223. &c. edit. in 4.



§. 2202.

INTER primaria, quae arsenicum hoc sub respectu exferit phaenomena, actio referenda venit illius in nitrum; quod, acidum nitrosum expellendo, decompōnit aequē facile ac ab acido vitriolico fieri solet.

§. 2203.

ILL. STAHLIUS destillationi subjiciens miscelam librae unius vitrioli puri martialis ad rubedinem calcinati, librae dimidiaē nitri depurati, unciae unius antimonii, sulphuris, ac arsenici, seu trium unciarum lapidis sic dicti *Pyrmieson*, qui nil nisi compositum est substantiarum trium ultimo loco dictarum, spiritum nitri confecit summe volatilem, ac penetrantem, vaporum obscuriorum forma prorumpentem, qui nonnisi aquae in excipulo contentae opē condensari possunt, colore eleganter coeruleo inde tingendae. Repetens experimentum, eundem plane nasci vidit eventum *Cl. MACQUERUS*.

§. 2204.

KUNCKELIUS aquam fortem similem confecturus arsenico solo intermediae substantiae loco usus fuit. Repetens tentamen *MACQUERUS* miscuit anaticam dolin arsenici ac nitri depurati; miscelam in retorta vitrea igni per gradus aucto exposuit, injecta prius, in excipulum aqua pluvia; adscendit sic, calore satis moderato, magna copia vaporum ruberrimorum, summe penetrantium, sub condensatione aquam colore coeruleo pulchro, saturatiori adhuc, quam in tentamine procedenti tingentium. Ignem sensim augendo destillationem ad candescentiam usque vasis produxit, et arsenici in fornacem illius collumque sublimationem.

§. 2205.

§. 2205.

IGNIS hoc sub labore prudenter administrandus ac lente nonnisi augendus est, vasa vero exacte luto non obferanda, quum miscela nitri ac arsenici explosioni violentae subiecta sit.

§. 2206.

KUNCKELIUS, operatione hac aquam fortem obtinuisse contentus, residuam in retorta massam salinam examinare neglexit; peculiari vero examine dignam eam CL. MACQUER iudicans enarranda nunc suscepit pericula.

§. 2207.

MASSAM destillatione finita in retorta residuam aqua solvit; lubenter illa in latice disparuit; lixivium obtentum aëri libero expositum spontaneae exhalationi subiecit; prout aqua sensim avolabat, juxta marginem vasis crusta nascebatur, seu species vegetationis salinae circa parietes proserpens, eosque transcendens; in medio vero liquidi coagulabatur vis magna crystallorum pulcherrimarum, summe regularium, ac crystallorum nitrosarum quaevis absolvebatur prisma tetragono rectangulo, extremitatibus pyramide pariter tetragona rectangula terminatis, cujus anguli correspondebant angulis ipsius prismatis; totum vero, uti jam dictum, maxime regulare erat.

§. 2208.

SAL itaque hoc ipsum connubium sistit singulare prorsum arsenici cum basi alkalina nitri, a nullo Chemico antea examinatum, ac a sale non multum diversum, quod in Chemicis titulo arsenici per nitrum fixati notum est, ac unione quidem arsenici cum basi nitri pariter constat, facta tamen in vase aperto, ingerendo arsenicum ad nitrum in crucibulo fufum.



§. 2209.

DIVERSITAS *Macquerianum sal arsenicale* inter *ac arsenicum* sic dictum *fixum* vulgare intercedens eo potissimum absolvitur, quod in posteriori hocce quaedam solum contineatur arsenici dosi, saturando sali alkalino praesenti omni non sufficiens; unde et arsenicum *fixum* vulgare humiditatem atmosphaericam in se rapit, in deliquium abit, crystallisationem renuit, syrupum violarum viridi colore tingit; verbo, dotes omnes salium alkalinarum exferit. Sal vero *Macquerianum arsenicale* species salis est, quae pro sale perfecte neutro haberi queat, arsenicum vehens ad punctum usque saturationis cum basi alkalina nexum, adeo ut omnes abolitae ex integro sint dotes, quibus alkalinum sal ab salibus omnibus aliis distinguitur.

§. 2210.

RATIO diversitatis hujus eo absolvitur, quod arsenicum, cum sale alkalino nunc junctum, avelli ab eo jam non queat, etsi violentissimus ignis gradus in auxilium advocetur, dum operatio vase clauso perficitur.

§. 2211.

INMISIT portionem quamdam salis arsenicalis re-tortae MACQUERUS, ac ignem admovens fortem satis, quo funderetur demum vas, nil tamen arsenici in altum elevari vidit, nec solutum ulla ratione salis connubium. Sed, quod singulari sane adtentione dignum est, ne acidorum quidem mineralium inter-ventu sal decomponitur; decomponendum tamen facillimo negotio, dum crucibulo inmissum ignis actioni subjicitur; avolante magnam partem arsenico, remanente massa salina, laticis atmosphaerici bibula, alkalini salis dotibus cunctis instructa, verbo, arsenico fixo vulgari plane analoga.

§. 2212.

§. 2212.

VAPORES arsenicales in altum non feruntur, antequam sal candeat, et fluxum subierit; funditur vero difficiliter nonnihil nitro. Quodsi carbonibus ardentibus injectum fuerit, detonationem nullam exerit, nec fulminat; placido fluxu liquefit; carbonem, cui incumbit, per ambitum nigro colore inficiens, extincto scilicet inhaerente igne; magna vero vis arsenicalium vaporum in altum elevatur; qua dote differt a crusta salina, parietes vasis, in quo crystallisatio instituta fuit, obsidente, nitri dosin exiguam adhuc recludente, sub destillatione nondum decompositi; prout didicit MACQUERUS ex detonatione leviuscula, quam crusta illa carbonibus ignitis injecta excitavit.

§. 2213.

ETSI vero arsenicum, dicta nunc ratione fixatum, sal perfecte neutrum sit, plerasque tamen in menstruis acidis resolutas substantias metallicas dejecit; phaenomenis singularibus, ac observatu dignissimis stipata praecipitatione. Ut diversitas eo melius patefcat, comparavit Cl. VIR phaenomena, quae sal suum producit, cum phaenomenis ab arsenico fixo vulgari generatis, adhibito utroque ad dejiciendas substantias metallicas.

§. 2214.

SUBSTANTIAE metallicae acido nitroso resolutae salis novi arsenicalis beneficio sequenti ratione deji-
ciuntur. *)

P 4

Substant.

*) PERSPICUITATIS gratia, ut uno obtutu phaenomenorum cerneretur syndrome, tabularem formam hic adhibui; etsi in gallico autographo lineae non interruptae sint. de W.



<i>Substant. metall.</i>	<i>colores.</i>
Mercurius - - -	flavo.
Ferrum - - -	albo, subflavescente.
Plumbum - - -	eleganter albo.
Argentum - - -	purpureo.
Cuprum - - -	illico non subsidet; elapso tamen temporis quodam intervallo miscela, prius diaphana, opalina (<i>louché</i>) ac albescens, nonnihil ad coeruleum tendens redditur.
Zincum - - -	praecipitatum seu potius coagulum album praebet, diaphanum.
Bismuthum - - -	praecipitatum album sistit.

§. 2215.

Ersi vero dissolutio bismuthi aqua sola instillata pariter deiciatur, facilius tamen redditur dejectio superaddito sale arsenicali, quum bismutho dejecto junctum arsenicum deprehendatur; prout expertus fuit MACQUERUS, praecipitatum carbonibus ardentibus injiciens.

§. 2216.

Solutio vitrioli coerulei	illico deicitur colore dilute viridi (<i>céladon.</i>)
Solutio vitrioli martialis . . .	illico non turbatur, elapsis aliquot minutis redditur opalina; speciem coaguli fœdide virentis.

Solutio stanni et reguli antimonii in aqua regia	virentis, obscurioris demittit.
Solutio auri in aqua regia	dant coagulum album: prius ad rubedinem nonnihil tendit.
Solutio mercurii sublimati corrosivi	nullae turbæ; nullum præcipitatum, nil turbarum; nil præcipitati.

§. 2217.

PHAENOMENA concomitantia miscelam solutionum nunc dictarum cum arsenico fixo vulgari:

<i>Substant. metall.</i>	<i>colores.</i>
Solutio mercurii nitrosa	flavo.
Sol. ferri nitrosa	rubente (<i>rouffe.</i>)
Sol. plumbi nitr.	pulchre albo.
Sol. argenti nitrosa.	purpureo.
Sol. cupri nitrosa	albo coerulescente.
Sol. Zinci nitrosa	coagulum non format, sed præcipitatum eleganter album.
Sol. bismuthi nitr.	iisdem, uti Zincum, phaenomenis.
Solutio vitrioli coerulei	dilute viridi (<i>Celadon.</i>)
Sol. vitrioli viridis	Sordide obscureque viridi.

§. 2218.

Sol. auri in aqua regia	uti per sal alkali fixum vulgare.
Sol. Stanni in aqua regia	pariter.



Sol. reguli antimonii in		pariter.
aqua regia		
Sol. mercurii sublimati		citreo.
corrosivi		

§. 2219.

DEDUCIT jam ex adlatis *Cl. MACQUERUS* confectaria sequentia: — demonstrari, sal hoc novum arsenicale esse speciem salis neutrius, in quo pars alkalina nitri ex integro cum arsenico nupta est; quum alias, quantulacunque alkali salis portio libera foret, pro ratione illius aurum ac mercurius corrosivus deiceretur, quod vero non evenit — ex obposito, arsenicum fixum vulgare compositum esse, in qua alkalinum sal praedominatur, quum illius interventu et aurum et mercurius corrosivus deiciantur: — doti huic alkalinae adtribuendas pariter esse diversitates, quae intercedunt inter dejectionem salis arsenicalis et arsenici fixi vulgaris ope factam; hanc ob rationem v. c. dejecti ferrum colore rubente per arsenicum fixum, dejecti albo per sal arsenicale.

§. 2220.

UT optime intelligatur ratio hujus phaenomeni, *Cl. MACQUERUS* ait, tenendum est, omnes praecipitationes, mediante sale arsenicali peragendas nonnisi beneficio adfinitatis duplicis, (seu reciprocae) fieri; coeunte scilicet acido, quod metallum tenuerat solum, cum basi alkalina salis novi; coeunte arsenico, in sale arsenicali contento, cum metallo antea soluto per acidum.

§. 2221.

NOTANDUM praeterea et illud, nullum acidum, purum adhuc, aptum natum esse dejectiendo arsenico, in sale arsenicali contento, connubium inueniendo cum
hujus

hujus basi in ejusdem detrimentum. Hoc statumina-
to, in instantia prius adducta ferrum unitum cum
acido nitroso praeceps ruere nequit, quin simul ad
fundum secum rapiat proportionatam dosin arsenici,
quae, uti videtur, satis magna est, ut obducatur
(*masquer*) color ruber, quo ferrum naturaliter tin-
gitur, dum sale alkalino puro ex menstrui amplexibus
expellitur, et ut mars veste alba indutus nunc sub
conspectum veniat: quodsi vero subponamus, in prae-
cipitante contineri portionem salis alkalini puri, pars
martis, per sal hoc ipsum dejecta colore rubro ves-
tita prodibit, cum colore albo constituyente tertium
flavo-rubentem, quem cernimus, dum solutio haec
ferri per arsenicum fixum vulgare dejicitur.

§. 2222.

ADVERTENDUM praeterea circa praecipitationes
nostras metallicas, valde singulari phaenomeno mer-
curium acido nitri referatum a sale arsenicali dejici;
nam, prout antea jam monitum fuit, praecipitatio
haec ipsa non nisi mediante adfinitate duplici fieri
potest; acidi nempe cum alkali, et metalli cum ar-
senico: ast Chemici nullam haecenus observarunt ad-
finitatem (*rapport*) mercurium inter et arsenicum,
nec substantias haec metallicas amico foedere jungere
potuerunt. Praecipitatum hoc mercurii cum arseni-
co nexum, prosequitur MACQUERUS, examen mere-
tur exactius, atque methodum forsitan subpeditat,
ambas illas connectendi substantias: examen illud ex-
actius in aliud tempus distulit vir egregius.

§. 2223.

Quod vero sal hoc novum, quo mercurius acido
nitri solutus dejicitur, actionem nullam in sublima-
tum corrosivum exferat, deduci posse rationem MAC-
QUERUS autumat ex diversis adfinitatibus acidi muria-
tici;



tici; ex adfinitate scilicet illius majori cum mercurio, quam mercurii cum acido nitroso; tum ex adfinitate illius minori cum sale alkalino fixo, quam acidi nitrosi cum nunc dicto alkalino sale: indicare demum phaenomena, quae sal hoc novum cum mercurio soluto in acido nitroso, et cum mercurio exhibet sublimato corrosivo, indicare, inquam, videntur phaenomena illa, analogiam arsenicum inter et acidum vitriolicum; quum tartarus vitriolatus, qui nil nisi compositum est, acido vitriolico et alkalino fixo sale constans, uti sal arsenicale compositum est ex arsenico saleque alkalino fixo, eosdem cum binis hisce compositis substantiis producat effectus.

§. 2224.

ADTENDENDUM pariter erit, qua ratione ab arsenico fixo vulgari dejiciatur mercurius sublimatus corrosivus; quum enim arsenicum methodo *Macqueriana* fixatum nullam prorsus in solutionem hanc mercurialem vim exferat, videretur, fore ut arsenicum fixum vulgare mercurium non nisi vi salis alkalini simplicis dejiceret; interim tamen diversa in solutionem illam agit ratione, quum alkalia fixa vulgaria mercurium dejiciant colore lateritio, dejiciendum a nitro fixato per arsenicum colore citreo; quod quidem phaenomenon nonnisi ab arsenici portione quadam una cum mercurio fundum petente proficiscitur, uti expertus fuit *MACQUERUS*, praecipitatum hocce carbonibus ignitis inspergens; tum enim vapores elati fuerunt arsenicales. Rationem phaenomeni deducit ex eo, quod in arsenico fixo vulgari adsit portio quaedam arsenici cum sale alkalino non firmo adeo nexu cohaerentis, uti cohaeret cum sale hoc eodem in sale arsenicali *Macqueriano*; quae itaque portio fundum petere queat, dum ex obposito in sale arsenicali fieri idem non possit. Demonstratum illico fuit,

fuit, arsenicum fixum vulgare a sale arsenicali eo solum differre momento, quod ignis vi pars arsenici a sale alkalino abrepta fuerit cum eodem sale prius nexi; vero videtur simile, in residuo adhuc portionem quamdam adesse semiliberam, ac debile solum adhaerentem; atque pars haec ipsa in nostra instantia praeceptis ruit: indies evincitur experimentis, easdem substantias varia diversaque plurimum ratione inutuum inire posse connubium, unde et effectus diversissimi, quibus ab invicem substantiae distinguuntur, dependebunt; quod quidem in sequentibus, ubi de nexu arsenici cum alkalina nitri basi sermo recurret, uberius adhuc demonstrabitur.

§. 2225.

TERTIO loco attendendum venit, salis novi arsenicalis ope lentissime nonnisi ac exigua dosi dejici ex solutione nitrosa venerem; dejici vero et illico, et magna copia metallorum meretricem ex solutione vitriolica in vitriolo coeruleo; ex obposito denuo sale mediante arsenicali eodem facile ac magna dosi excutitur ferrum solutum in acido nitri, aegre vero et elapso quodam temporis intervallo excutitur Mars ex solutione vitrioli viridis. Ratio facile reddi poterit phaenomenorum nunc dictorum ex legibus adfinitatum, quibus diversae substantiae, composita haecce subeuntes, invicem adtrahuntur: acidum vitriolicum, Marti et Veneri in vitriolo viridi et coeruleo unitum, majorem colit adfinitatem cum salibus alkalinis, quam cum iisdem colat acidum nitrosum; Mars autem majori adfinitate accedit ad acidum vitriolicum, ad acidum nitrosum, ac ad arsenicum, quam accedat cuprum ad substantias omnes nunc dictas: hoc posito, si sal arsenicale facile dejiciat solutionem vitrioli coerulei, aegre vero solum dejiciat solutionem veneris nitrosam, ratio phaenomeni sita erit in adfinitate.



adfinitate, qua majori jungitur acidum vitrioli cum alkali falis arsenicalis, quam adfinitas sit, quae acidum nitrosum solutionis venereae inter et sal idem alkalinum versatur. Si ex obposito sal hoc ipsum facile dejiciat Martem solutum in acido nitri, difficulter autem solutionem vitrioli viridis; ratio est, quod ferrum adfinitatem colat minorem cum acido nitroso, quam cum acido vitriolico: dum autem rem hanc alia ratione consideramus, quae adest causa, ut sal arsenicale facilius dejiciat solutionem vitrioli coerulei, difficilius solutionem vitrioli viridis? Ratio est, quod ferrum validius nectatur acido vitriolico quam cuprum. Cur denuo sal idem facilius praecipitat solutionem ferri in acido nitroso factam, aegrius autem solutionem cupri in eodem acido? Ratio est, quod ferrum majorem habeat adfinitatem ad arsenicum in sale arsenicali praesens, quam habeat cuprum. Nil sane, uti videtur, in omnibus hisce instantiis obtinet, quod non exacte conveniret cum regulis adfinitatum, jam antea, maximam partem, propositis a Cl. GEOFFROY, et quod insuper legibus illis confirmandis non foret idoneum.

§. 2226.

ULTIMO demum loco expendendus venit color, quo luna acido nitroso resoluta dejicitur tum per sal novum arsenicale, tum per arsenicum vulgari methodo fixatum: singularis plurimum in praecipitato hoc eodem purpurae color est, quod non sine fundamento quodam analogiam habere videretur cum minera argenti rubra dicta, in qua junctum pariter arsenicum argento est; quum tamen in minera illa et sulphuris quaedam adsit portio, quum praeterea constet, sulphur arsenico junctum rubro hoc ipsum colore tingere posse, suspicio nasceretur, rubrum illud colorem in minera et praecipitato descripto ex binis

binis nasci causis: in praecipitato siquidem ne minimum quidem continetur sulphuris. Praecipitati vero latius examen in aliud differens tempus MACQUERUS nunc unice monuit, ab injecto carbonibus magnam in sublime elatam fuisse vaporum arsenicalium catervam, et, prout arsenicum magis magisque fugatum fuerat, rubrum quoque ab luna recessisse colorem, adeo, ut vaporibus jam nullis adscendentibus, argentum pristino colore tinctum rediret in conspectum.

§. 2227.

MONUERAT jam antea MACQUERUS, arsenicum diversa plurimum ratione cum alkalibus inire posse connubium, et pro diverso hocce connubio diversis etiam dotari proprietatibus. Adfert jam indicatam prius instantiam.

§. 2228.

SOLVIT arsenicum in lixivio, nirri per carbones fixati magnam tenente copiam, ignis accedente auxilio arsenici non exigua in illo disparuit dosi; liquidum, prout majori arsenici ditabatur dosi, colorem induit brunum, atque consistentiam indeptum fuit adinstar meracioris glutinis; dum parum adhuc fluiditatis supererat, novum semper suscepit arsenicum, donec demum solidum vix non foret factum; miscela haecce odore ingrato donatur, qui tamen describi difficulter queat; MACQUERUS *hepatis arsenicalis* illi indidit etymon. Massa haecce composita refrigerens dura evadit ac fragilis, inprimis dum arsenico probe saturata est; diversitas etenim, uti alia occasione monebitur, intercedit pro diversitate doseos arsenici in illa contenti.

§. 2229.



§. 2229.

DUM vero hepar hoc arsenicale maximam, quam recipere queat, arsenico quantitatem continet, elapsis aliquot diebus humiditatem atmosphaericam adtrahit, et ex substantia indurata in subviscidam abit. Aqua facile solvitur, non vero ex integro in ea disparet, remanente nunquam non magna satis quantitate floccorum brunorum, prorsus indissolubilem. Decoxit enim eos MACQUERUS plus quam quatuor horarum spatio in maxima aquae copia, quin tamen ne minimum quidem foret resolutum: indidit tum irresolubilem hanc substantiam crucibulo, et igni follium ope animato exposuit vivacissimo; elati exin nulli fuerunt vapores arsenicales, canduit, quin mutationem experta foret sensibilem, nisi quod colorem pristinum brunum albo nunc commutaverit. Quae-
nam itaque, quaerit *III. Vir*, substantiae hujus, fixitate sua ab arsenico, et insolubilitate in aqua ab alkalino sale adeo diversae, est indoles? Quaestionem hanc in alia dissertatione revocabo sub examen.

§. 2230.

EXPOSUIT etiam in crucibulo hepar arsenicale ignis actioni, prompte liquabatur calore mediocri vaporibus arsenicalibus adscendentibus plurimis, qui tamen odorem alliaceum non fortem adeo spargere viderentur, uti ab arsenico puro igni subiecto percipitur. Materie in fluxum legitimum nunc deducta partem exemit, in vitrum pellucidissimum versam; ignem dein magis auxit: vapores elati fuerunt per aliquod temporis spatium sensim tamen minuendi: prout vero arolabant magis magisque vapores, eo tenacior evadere materies, adeo ut sub finem, igne licet fortiori multo, plurimum fluiditatis deperdiderit; igni tandem exemta substantiam exhibuit vitrificatam, a priori
tamen

tamen diversam, quum non vitrum foret diaphanum, sed opacum et lactescens; quod quidem phaenomenon a praesente majori copia materie fixiori, minusque fusibili deduxit MACQUERUS, qua vitro erepta foret diaphaneitas, ac inminuta fusibilitas, et quae, uti videtur, eadem esset cum floccis antea descriptis aqua irrefolubilibus.

§. 2231.

SOLUTIO aquosa hepatis arsenicalis illico deijcitur colore albo ab omnibus acidis instillatis, quod vero cum sale novo arsenicali non ex aequo accidit; praecipitatum illud album nil nisi arsenicum ipsum est cum alkalino sale antea junctum, ab acidis expulsum; notandum tamen venit, nullum formari praecipitatum sensibile, dum ab alkalino sale exigua solum resoluta fuit arsenici copia; etsi acidi adjiciatur dosis major multo, quam saturando alkali sit requisita.

§. 2232.

PROUT ex tentaminibus hisce adparet, arsenicum non arcte adeo cum alkalino sale nuptum esse in hepate arsenicali, quam in sale saepe dicto neutro; con-jicere etiam licet, fore ut ab hepate arsenicali excu-tiantur solutiones metallicaes omnes; et nulla omnino est, quae non illius experiretur actionem, uti ex ta-bula sequenti adparet.

SOLUTIONES *metalli-*
cae.

Solutio ferri in acido
nitri -
— vitrioli martis -
— cupri nitrosa -
— vitrioli cupri -
— plumbi nitrosa -

Pars II. Sect. II.

COLORES *praecipitato-*
rum.

obscure, sordide viri-
dis.
pariter.
laete gramineus.
pariter.
pulchre albus.

Q

Solu-



Solutio lunae nitrosa -	pariter.
— mercurii nitrosa -	pariter.
— zinci nitrosa -	pariter.
— bismuthi nitrosa -	pariter.
— sublimati corrosivi -	pariter.
— auri -	aurantius.

§. 2233.

NOTANDAE veniunt in praecipitationibus hisce differentiæ binæ essentielles ab illis, quæ mediante sale arsenicali perficiuntur. Primum hepatis arsenicalis auxilio aurum et mercurius corrosivus, (etsi alkalinum sal arsenico ex integro saturatum sit, quum syrupum violarum non reddat viridem) ex suis solutionibus deturbantur, quod ope salis arsenicalis non evenit; secundo loco notatu dignius adhuc illud est, argentum, quod ab arsenicis fixis colore purpureo dejicitur, ab hepate arsenicali dejici colore albo; atque id ipsum contingere nunquam non eadem plane ratione, quaecunque demum adhibeatur proportio arsenici ad corpus hocce compositum producendum.

§. 2234.

BINIS hisce inter effectus circa easdem substantias ab arsenicis fixatis et hepate arsenicali productos intercedentibus differentiis confirmantur antea adserta: arsenicum jungi posse cum alkalinis salibus diversis rationibus, adeo ut phaenomena exhibeat plane diversa. Adparet hinc, non esse indifferens, an jungantur binæ illae substantiae via sicca an via humida; etsi indifferens hoc sit ratione acidorum, quæ nunquam non eosdem excitant effectus, sive hac sive illa ratione cum salibus alkalinis fuerint unita.

§. 2235.

§. 2235.

DUM hepar arsenicale in crucibulo calcinatur, analogum evadit arsenicum fixato vulgari, et argentum colore purpureo ex solutione dejicit.

§. 2236.

SOLVIT illud MACQUERUS aqua, solutionem aëri libero exposuit evaporandam; enatae nullae crystalli, orta solum in superficie crusta tenuis alba, dein rumpenda, ac fundum petitura, mero arsenico, sponte sua secedente composita: liquor pro majori evaporationis progressu magis magisque spissescere, demum non amplius verti in crustam illico dictam arsenicalem: speravit tamen *Cl. Vir*, fore ut mutata encheiresi nascantur crystalli.

§. 2237.

EXAMEN arsenici, sali muriatico, sali sodae, nitro cubico, sali ammoniaco, salibus alkalinis volatilibus diversisque acidis juncti aliis dissertationibus reservans *Cl. Macquerus primae* coronidem inposuit.

§. 2238.

VIDEAMUS nunc tentamina ab eodem Inlustri Viro circa arsenicum capta, et in *Mem. de l'Acad. Sc.* 1748. pag. 35. *Sc. edit.* in 4. inserta.

§. 2239.

ORDITUR nunc a phaenomenis, quae arsenicum exhibet cum sale muriatico nuptum. Miscuit anatemicam octo unciarum utriusque substantiae in pulverem usam dolin, miscelam indidit retortae furno reverberii committendae, distillationem instituturus, uti antea cum nitro factum; vix tamen sperans, fore ut arsenicum in sal commune agat eadem ratione ac



in nitrum vim exferit, expellendo acidum, probe gnarus, plurium Chemicorum praecepto miscendum esse cum arsenico sal commune, miscelam sublimationi exponendam depurationis gratia; quod quidem minime accideret, si arsenicum eandem in sal commune, uti in nitrum, exfereret potestatem, quum vero diversitas haec effectuum jam singularis plurimum sit, ac expectationem superet, acido nitri, majorem, ut videtur, alente adfinitatem cum salibus alkalinis fixis in genere, in specie vero cum basi salis communis, cujus expellit acidum, viduae nupturum basi; exactissime omnia phaenomena ad examen revocanda esse duxit, tum circa ipsum arsenicum, tum circa sal illi admistum, et una cum eo igni expositum commune, obventura.

§. 2240.

CALEFACTIS jam vasis guttae nonnullae prodierunt acidi salis debilioris, mox tamen subflaminandae; ignis intensus per gradus, donec nullae amplius extorquerentur: adscendere tum in collum retortae arsenicum forma primum farinae seu florum, igne vero denuo intensiori, massae crystallinae, figurae fornici vasis, cui arte adhaerescibat, exacte analogae: ignis sub finem gradum adusque auctus, qui in furno posset excitari maximus, adeo ut retorta plurimum candesceret, ac fusioni vix non foret proxima: hoc tamen admoto licet aestu nulli in conspectum venire vapores, quin et ipsa filere arsenici sublimatione.

§. 2241.

REFRIGERATO fractoque vase patuit, arsenicum, quod adscenderat, esse purum; fundum tegens massa sale communi maximam partem absolvi videbatur; licet arsenici, fixati quasi, dosin exigua adhuc reclude-

cluderet, nonnisi exposito in crucibulo igni, follium
ope animato, sale demum avellendam.

§. 2242.

ETSI vero tanto amoris vinculo ab sale retinere-
tur arsenicum, intimam tamen invicem non contra-
xerunt unionem, nec cum basi salis arsenicum fuit
nexum: solutum aqua sal commune, experimento
nunc dicto adhibitum, dein admistum metalli-
cis, nonnisi consueta sibi produxit phaenomena,
nil referens arsenico per nitrum fixato, nil unioni
cuidam arseniei cum sale alkalino proprium; ex solu-
to sale obtentae crystalli cubicae pulcherrimae salis
marini puri. Eviſtum hinc sane est, arsenico nul-
lum in sal muriaticum esse actionem, nil hoc ab illo
mutari. Dosin exiguam acidi salis, primum prod-
euntis, quod adtinet, sejuncta illa fuit solius ignis
vi, nil plane auxilii adferente arsenico; quod MAC-
QUERUS certissime didicit, destillationi subjecto sale
muriatico purissimo solo eandem obtinens acidi co-
piam. Cl. POTT phaenomenon idem in *dissert. de
sale communi* jam adnotaverat; vidit vero MACQUE-
RUS, nonnisi ab humente sale avelli exiguam hanc
partem acidi, nil vaporum acidorum largiente probe
exsiccat, largituro tamen praemissa humectatione;
quin et septem octove ex ordine vicibus repetita ope-
ratione eadem nunquam non acidi ejus interventu ob-
tinuit MACQUERUS, monens per transfennam, non
quidem ad omnem usque acidi expulsionem sese pro-
duxisse experimenta, fieri tamen fors posse, ut hac
sola encheiresi acor omnis muriaticus ab alkalina
basi disjungatur.

§. 2243.

EXPERIMENTO adlato edoctus MACQUERUS, arse-
nici solius actione acidum muriaticum fugari non
posse,



posse, tentaturus, an non alia quadam substantia, cum acido maris adfinitatem majorem alente, hinc decompositioni perficiendae apta nata, superaddita, unionem praefixam arsenici cum basi salis muriatici obtinere posset, selegit huic fini mercurium, seu corpus tum ob adfinitatem cum acido salis, tum ob adfinitatem nullam plane nec cum basi alkalina salis dicti, nec cum arsenico valde idoneum.

§. 2244.

EXTINXIT hinc terendo exacte uncias duas mercurii vivi cum anatica quantitate arsenici, salisque communis, miscelam in matraccio balneo arenae commisit, spe fretus, fore ut beneficio adfinitatis duplicis decomponi posset sal muriaticum, obtinerique composita duo nova; arsenici, cum basi alkalina salis communis in speciem quamdam salis hermaphroditici, arsenicali antea dicto sali, cum nitro parato, fere analogi, nunc mutati; ac acidi muriatici, cum mercurio sublimatum corrosivum constituentis: tentamen tamen hoc ipsum non successit expectationi; substantiae nullum in invicem exereuerunt imperium, et, indole prorsus non mutata, denuo sese dereliquerunt; mercurius quidem guttularum forma in partem superiorem matraccii primo loco ascendit; hunc excepit arsenicum, remanente in vasis fundo arsenico, partem tamen quamdam arsenici fixatam recludente, eadem, uti in operatione priori, ratione.

§. 2245.

PERTINACIA, qua sal muriaticum resistebat arsenico, incitamento fuit *Cl. Viro*, ut experiretur, an acido hoc ipsum, an deberetur basi alkalinae dicti salis. Sagax itaque substituere proposuit acido maris basin alkalina vegetabilem, verbo, ex sale muriatico facere sal febrifugum Sylvii: huic scopo adhibuit cineres

cineres clavellatos *); punctoque saturationis obtento exactissimo, salis obtenti uncias octo, siccatas antea miscuit cum eadem copia arsenici, miscelam retortae indidit, ac destillationem, uti prius factum, instituit. Effectus denuo hic, uti in praecedenti experimento, nascebantur iidem, nisi quod, ob praemissam salis digestivi exsiccationem ne gutta quidem prodiret acidi. Conclussit ex tentamine hocce, quodsi ab arsenico non eadem, uti nitrum, ratione decomponatur sal muriaticum, non dependere phaenomenon a minori fors adfinitate arsenici cum basi salis hujus, quam cum basi nitri; sed dependere probabili ratione **) ab adfinitate ipsius arsenici cum acido muriatico.

§. 2246.

PERSPICIENS jam MACQUERUS, incassum tentari salis muriatici per arsenicum decompositionem, unionem suscepit substantiae hujus cum sale sodae, quod, uti notum, omnibus gaudet salis alkalini, basin salis communi subpeditantis, dotibus, ac eidem substitui valet: decoxit itaque arsenicum in solutione salis sodae, illudque maxima copia solvi observavit: prout liquorem major dosis ingrediebatur arsenici, ortus color obscure brunus, odor ingratus et consistentiam adeptus est glutinis meraci, ac arsenicum tamdiu solutum,

Q 4

*) PACE tamen Cl. Viri dixerim, cineribus clavellatis substituturum me sal tartari alkalinum; ut omnis omnino abesset heterogenei cujusdam salis, aut acidi, suspicio. de W.

**) CL. BERGMANN, uti antea vidimus, rationem cur sal digestivum, commune, et ammoniacum ab arsenico non mutantur, ex eo deducendum autumat sine dubio, ut ait, quod acidum salis phlogisto sua natura sit dotatum. de W.



lutum, donec solida fere ex integro enata foret massa; eadem ratione uti in solutione, prius exposita, arsenici per sal alkali fixum, lixivii nitri fixi, fuerat factum; cui et phaenomenis reliquis haec accedebat solutio, non exceptis quidem, expressis verbis mone[n]te MACQUERO, praecipitationibus metallicarum solutionum, et miscelis cum acidis puris, aliisque substantiis, de quibus in prima diatribe actum fuerat. Unica solum intercedebat diversitas, quod solutio arsenici in liquore nitri fixi omnem renueret crystallisationem, largiente solutione semimetalli hujus crystallos, sed irregulares maxime, ac eatenus informes, ut determinari non possent, ne mutata quidem encheiresi, ac arsenici proportionem vix reddendas perfectiores.

§. 2247.

VIA quoque sicca unionem tentavit arsenici cum sale sodae. Anaticas partes arsenici salisque sodae siccissimi indidit retortae, per trihorium igni gradatim aucto exponendae. Durante temporis hoc intervallo pars notabilis arsenici adscendit in fornem retortae; fundum obsedit massa salina, sale sodae cum parte arsenici juncto constans: alkalinam adhuc sal referebat indolem, eademque vix non phaenomena, uti antea expositum nitrum in crucibulo igne aperto arsenici ope alkalifatam. Eadem denuo ratione ab illo dejiciebantur solutiones metallicaе, imprimis argentum colore purpureo; prout nunquam non accidit, dum arsenicum via sicca alkalino cuicunque sali nupsit.

§. 2248.

QUUM vero CL. MACQUER sal obtinere volebat arsenicale perfecte neutrum, analogum sali ex capite mortuo destillationis spiritus nitri per arsenicum obtento: nullum, incassum jam tentatis aliis omnibus, superesse

superesse putavit remedium praeter unionem primo loco perficiendam baseos alkalinae salis marini cum acido nitroso, ut nasceretur nitrum cubicum, tum vero huic subjungendam divulsionem acidi mediante arsenico, uti prius ratione nitri vulgaris fuerat factum. Junxit hoc sine spiritum nitri cum sale sodae ad punctum usque exactissimum saturationis; nitri obtenti cubici dimidiam libram, lente prius exsiccatam remiscuit cum arsenico in pulverem tuso, destillationem igne gradatim aucto instituit. Mox in conspectum venerunt vapores rubicundi acidi nitrosi, major tamen iis fugandis requisitus videbatur ignis gradus, quam in destillatione nitri vulgo adhiberi solet; caeterum nulla occurrebat diversitas. Quum quatuor cum dimidia horis ab instituta primum operatione elapsis exigua solum in excipulum prodiret copia vaporum, ignem intendere debuit; tum vero in sublime adtolli arsenicum, ac non interrupto ordine collum retortae confertim satis implere; quo viso operationem *Cl. Vir* non diutius protraxit, ne fors decomponeretur sal neutrum arsenicale, quod in retorta praesens, ac perferendae violentiae ignis in vasis clausis non aptum natum suspicabatur. Fracta retorta massam obtentam salinam aqua solvit: liquabatur prompte; solutionem filtratam spontaneae exhalationi reliquit in aëre libero. Elapso quodam temporis intervallo natas vidit duas crystallorum species; prima componebatur crystallulis exiguis cubicis, aut ad figuram cubicam accedentibus, sat regularibus; vero constituebantur nitro cubico, nondum decomposito. Altera species crystallos obserebat majores multo, sed confusas adeo, ac irregulares, ut figura determinari non posset: obsidebat praeterea crusta arsenicalis laticem; arsenicum hocce superabundans, una cum nitro ante dicto cubico crystallisationem regularem salis neutrius arsenicalis turbasse videbantur.



Quum non sufficiens obtenta foret pro instituen-
dis experimentis cryſtallorum ſalis arſenicalis copia,
operationem cum eadem quantitate arſenici nitrique
cubici repetiit; nunc vero ignem validiorem admo-
vit, ut retorta nunquam non retineretur candens ma-
xime, donec nil amplius vaporum ſorumque arſeni-
calium adſcenderet, quod ſex circiter horarum decur-
ſu deſiniebatur: maſſa in retorta contenta liqueſacta
erat, ac bullulis interrupta adſcendentibus: refrige-
rata hemiſphaerium obſerebat vitri albi, diaphani,
mox tamen colore albedo, lacteſcente obnubilandi,
humidum atmophæricum avide adtrahentis, ac in
liquorem demum diſſuentis; partem illius, meta-
morphoſes haſce nondum expertam, redegit in pulve-
rem, aquae miſcuit; calor ex hac miſcela natus tan-
tus fuit, ut vas retineri manibus non poſſet. Solvit
aquae ope omnem fere hanc maſſam ſalinam; ſolu-
tionem filtratam in aëre libero exhalationi ſpontaneae
reliquit, uti factum in prima operatione; tempore
quodam praeterlapſo congeriem magnam vidit in me-
dio liquidi cryſtallorum pulcherrimarum, maxime
regularium; mirabundus vero vidit, figuram illarum
examinans, exhibere omnes priſmata tetragona re-
ctangula, quavis extremitate pyramide pariter tetrago-
na rectangula, cujus anguli reſponderent angulis priſ-
matis, terminata, ſeu accedere exacte ad figuram cry-
ſtallorum ſalis medii arſenicalis, in diſſertatione pri-
ma deſcripti, ex unione arſenici cum baſi nitri, in va-
ſis clauſis facta, naſcentis: ſimilitudo haec, ait, cry-
ſtalliſationis duorum horum ſalium mediorum orien-
tium ex diverſis alkalibus arſenico, acidi vices eorum
reſpectu obeunte, ſaturatis, analogiam indicat inter
arſenicum hoc ipſum et acidum muriaticum; inter
omnia etenim acida hoc ſolum dote gaudet, cum duo-
bus

bus alkalibus nunc dictis producendi salia neutra,
figura ad sese invicem accedentia.

§. 2250.

MONET hic MACQUERUS, antequam salis obtenti ordiatur examen, videri sibi, acidum nitrosum sub destillatione nitri cubici cum arsenico facta transiens, ejusdem esse indolis cum acido nitroso, quod ex decompositione nitri vulgaris per eandem substantiam intermediam acquiritur. Spiritus hic nitri parum adeo retinet phlegmatis, penetrans adeo est ac volatilis, ut ex integro resolvatur in vapores non densandos in laticem; ac ut ne gutta quidem ejus obtineri queat, nisi praemittatur aqua in excipulum cum qua coit, saporem acidum elegantemque colorem coeruleum eidem largiens. Monet vero simul MACQUERUS, se non firmasse luto exacte juncturas vasorum, dum acidum in excipulo retinere volebat abs additione aquae, adeo ut vaporibus confertim prorumpentibus, pars notabilis eorum sese subduceret; quod quidem ut fieret, dictare videbatur ratio, quum, juncturis firmissime obseratis, adhibito licet excipulo amplissimo, periculum manifestum adforet dispendio-
nis vasorum, sanitatisque aut vitae eripiendae.

§. 2251.

FACILITAS, qua ab arsenico decompouitur nitrum cubicum, denuo confirmare videtur adsertum pristinum: quodsi non eandem exferat arsenicum actionem in sal commune, dependere hoc potius ab acido muriatico, quam ab alkalina salis muriatici basi.

§. 2252.

JAM ad examen salis arsenicalis mediū, alkali minerali, ac arsenico constati. Sal hoc neutrum jure optimo dici poterit, quum nec syrupi adficiat colo-
rem



rem coeruleum, nec effervescat cum ullo acido; his dotibus simillimum sal in prima dissertatione descripto.

§. 2253.

INMUTABILIS ex aequo est in vasis clausis, nec, addito licet quocunque demum concentrato acido, decomponendus; carbonibus vero injectus ardentibus prompte funditur, carbonem exstinguit, ac emissis vaporibus arsenicalibus plurimis decomponitur.

§. 2254.

Cum solutionibus metallicis eandem fere exhibet phaenomenorum syndromen, uti arsenicum fixatum per nitrum; interim tamen diversitates quaedam intercedunt, prout ex sequenti patet elencho.

SOLUTIONES metallo- rum &c.		PRÆCIPITATORUM colo- res.
Solutio mercurii nitrosa		flavus.
— ferri nitrosa	-	ex albo flavicans.
— plumbi nitr.	-	eleganter albus.
— bismuthi nitr.	-	pariter.
— cupri nitrosa	-	cyanea.
— zinci nitr.	-	coagulum album.
— argenti nitr.	-	saturate violaceus.

PRÆCIPITATUM hoc ultimum lunare differt ab eo, quod arsenico antea dicto fixato dejicitur, quum posterius colore potius lateritio donatum cernatur; differt praeterea, quod praecipitatum album prodeat, si major dosis addatur solutionis salis arsenicalis, de quo in secunda hac dissertatione agitur. Album vero praecipitatum istud, nonnisi quantitate excedente arsenici, cum luna non uniti, absolvi videtur. Probabile pariter est, ab eodem arsenico, albo colore deorsum ruente, et praecipitato argenti, per arsenicum ope nitri fixatum excusso, sese immiscente, colorem

prae-

praecipitati argentei mutari, quod alias saturate violaceum foret, uti in experimento praesente, ac in sublateritium verti. Demonstratur hoc ex eo, quod illico producatetur color lateritius, dum praecipitatum album violaceo admiscetur.

§. 2255.

Solutio coerulei vitrioli	sub ipsa miscela color emascitur cyaneus.
Sol. vitrioli viridis -	fordide albus, schisto- sus.
Sol. stanni in aqua regis.	albus.
Sol. reg. antim. in eadem -	albus.
Sol. auri in eadem -	viridescens leve.
Sol. merc. subl. corro- sivi -	successu temporis nube- culae albae.

§. 2256.

ALIA denuo notanda occurrit diversitas inter salia bina arsenicalia neutra. Illud enim, de quo in prima dissertatione actum fuit, solutionem auri et sublimati corrosivi nullatenus adficit: an fors, MACQUERUS interrogat, minori paulo adfinitate jungitur arsenicum basi salis communis, quam basi nitrosae; ut inde nascantur effectus diversi, quos bina nostra salia in solutionem solarem et mercurialem exferunt?

§. 2257.

MISCUIT etiam MACQUERUS arsenicum nitrumque cubicum, et miscelam in crucibulo igni aperto exposuit. Egit in sal hoc arsenicum eadem plane ratione, uti agere solet in vulgare nitrum; effervescencia nata fuit insignis, ac expulsum acidum nitrosum forma vaporum rubrorum densissimorum. Natum inde fuit sal alkalinum arsenicatum, quod in tentami-



minibus suis idem plane cum sale orto ex decompositione nitri prismatici per eandem methodum invenit *Auctor.*

§. 2258.

EXAMINAT nunc phaenomena *arsenici* conjuncti cum *sale ammoniaco* — Miscuit anaticam octo unciarum dosin arsenici, salisque ammoniaci in subtiliorem pulverem tusorum; inmisit pulverem retortae vitreae, atque hanc destillationi, per gradus aucto igne, exposuit: prodierunt sub initium guttae quaedam salis alkalini volatilis penetrantissimi, horum vero in locum mox adscenderunt flores arsenici; his non ultra sublime petentibus, ignem auxit MACQUERUS ut candesceret vas; relicto tum hujus fundo massa tota ad duas circiter tertias altitudinis elata fuit; nil tamen in excipulum transiit: fracta retorta invenit massam salinam, compositam laminis duabus distinctis ab invicem facileque separandis; superior, altera albidior, carbonibus injecta forma vaporum arsenicalium ex integro avolavit; inferior absoluebatur sale ammoniaco vix non puro, exiguum solum copiam arsenici, non tamen arte uniti, ac mediante solutione in aqua facile sejungendi, recludente.

§. 2259.

VIDETUR hinc, arsenico non majorem in sal ammoniacum quam in sal commune actionem esse; exigua enim salis alkalini, sub initium operationis liberati, quantitas adtribui solum valet moleculis quibusdam terreis, arsenico forte admistis, et substantiam intermediam subpeditantibus.

§. 2260.

NON eadem vero ratio est salis ammoniaci nitrosi; agit in hoc arsenicum efficaciter, ac decompōnit uti salia omnia reliqua nitrosa, expellendo acidum ex basi,

basi, cui nunc ipsum nubit, una cum ea sal daturum novum neutrum arsenico — ammoniacale, valde singulare.

§. 2261.

ENUMERANS MACQUERRUS phaenomenorum, decompositionem hanc et subsequam unionem novam concomitantium, syndromen, sequentia protulit.

§. 2262.

MISCUIT anaticam denuo dosin unciarum octo salis ammoniaci nitrosi ac arsenici, in pulverem redactorum, pulverem indidit retortae, destillationi subijciendae; prodierunt primo loco vapores acidi nitrosi rubicundissimi; his expulsis, et igne fors nimium paulo intenso, materies tota fusa, ebulliens magnam denuo quantitatem vaporum ex albo rubroque mistorum, excipulum obnubilantium, ac lutum ipsum penetrantium exhalavit: magna simul in excipulum liquidi prodivit copia.

§. 2263.

MUTATO, effervescencia hac sedata, excipulo ignis gradus fortis satis, quin ad candescencia usque valis, admoendus erat, ut prodirent denuo guttae. Candescente demum ex integro retorta, materies fusa fuit, ac exigua quantitas in collum retortae sublimate, quo facto nullae amplius in conspectum prodire guttae; liquidum in secundo excipulo contentum nil fere nisi alkalinum volatilem spiritum constituere apprehendit; nascebantur simul in illo crystalli exiguae informes: in retorta mansit massa subvitrificata, humidum aëreum adtrahens: injecit eam aquae, ac ebullitioni exposuit; aqua colorem adepta fuit lactescentem, et ad latera vasis concreverunt, elapso aliquo tempore, crystalluli exiguae, informes. Mate-

ries



ries in collum retortae sublimata mero componebatur arsenico.

§. 2264.

QUUM sal ammoniacum nitrosum, dote sibi propria, inflammetur, ac detonet, utut nulla materies adjiciatur inflammabilis; probabile autumat MACQUERUS, effervescentiam ac turbas, quibus operatio prius interrupta fuerat, inflammationi deberi salis hujus, ob calorem justo majorem enatae; vapores rubri producentes simul pars erant acidi nitrosi salis ammoniacalis, ab arsenico adhuc expulsi; vapores autem albos constituebat pars ipsius salis ammoniacalis nitrosi, ob calorem excedentem elevati, antequam detonare, vel per arsenicum decomponi posset; liquidum demum depluens in excipulum binis nunc dictis componebatur substantiis, prout examine instituto patuit.

§. 2265.

SAL quod adinet alkalinum volatile, elevatum, dum, destillationem producturus, MACQUERUS ignem ad candescentiam usque vasis intenderat, vero videtur simile, fuisse illud ipsum, quod cum arsenico nexum fuerat, ut formaret sal novum arsenico-ammoniacale, per hanc operationem obtinendum, actione tamen excedente ignis denuo destructum; dubio enim non superest locus, fore ut alkali hoc ipsum, nisi retentum fuisset ab arsenico, gradu ignis multo minori adscendisset; caeterum residua in vase massa arsenico vix non absolvebatur puro; quod, calore hoc non per sese sublimatum, fixum, ut videtur, hac occasione fuerat redditum, prout in aliis pariter accidis instantiis, quarum enumerationem in aliud tempus distulit MACQUERUS.

§. 2266.



§. 2266.

OMNIBUS, quae sub hac operatione acciderant, pensitatis, non aderat spes, ex capite mortuo in retorta residuo, novam speciem salis arsenico-ammoniacalis obtinendi; facta etiam solutione illius aquae ebullientis ope, solutionis in aëre libero evaporatione spontanea, crusta solum formata fuit tenuis arsenicalis, qualis ab arsenico puro produci solet; conspiciantur tamen simul crystalluli paucae informes, ex quo nimis numero examen latius omne prohibentes.

§. 2267.

REPETENDA hinc denuo erat operatio; instituit eam MACQUERUS dosibus pristinis adhibitis, cautissime vero administrato igne; omnibus tamen licet observatis, evitare non poterat, quin idem, quod prima vice natum fuerat, denuo accideret phaenomenon: quum tamen lucta et effervescencia tardius multo nunc inceperint, producta jam magis ipsa destillatione, augurabatur non mediocrem in retorta contentam fore copiam salis hujus arsenico-ammoniacalis, atque destillationem ex integro subflaminavit, ne, igne adhibito nimio, hac quoque vice sal enatum jam denuo decomponeretur. Solvit itaque obtentam in retorta massam, et lixivium in aëre libero evaporationi spontaneae reliquit; nata nunc quoque fuit crusta salina arsenicalis, majori tamen crystallulorum, regularium magis, quam prima vice, numero stipata. Quum tamen regulares ex integro nondum forent, nec sufficienti prognatae copia, tertia quoque vice operationem instituit, patientia, quae cogitari queat, summa usus. Longius nunc multo, quam antea, produxit destillationem, ad finem tamen perducere ex integro noluit: quum videret ad propellendos in excipulum vapores admovendum eum fere esse caloris gradum,



qui priores binas detonationes produxerat, operationem subito abruptit, massam in retorta residuam aqua solvit, solutionem evaporationi dedit, atque sic notabilem satis copiam crystallulorum obtinuit, referentium figuram acicularum complanatarum, utraque extremitate acuminatarum, irregulariter sibi incumbentium, atque sese mutuo in omnem sensum decussantium: crusta arsenicalis nunc quoque nata fuit, minori tamen multo, quam antea, copia. Quum in liquido sal nullum ammoniacale nitrosum venerit in conspectum, conjecit MACQUERUS, proportionem dosium anaticarum arsenici hujusque salis nimis quam sufficientem esse illi ex integro decomponendo.

§. 2268.

ENUMERANDAE nunc veniunt dotes praecipuae salis novi arsenico-ammoniacalis.

§. 2269.

IGNI in vasis clausis expositum, prompte funditur, ac decomponitur, primo tamen loco avolante sale alkalino volatili; fixiori arsenico adhuc relicto.

§. 2270.

CARBONIBUS inspersum ardentibus cito destruitur, magna vaporum arsenicalium avolante copia.

§. 2271.

ACIDUM vitriolicum, nitrosum ac muriaticum majorem in sal hoc actionem non exerunt, quam in salia neutra arsenicalia reliqua, de quibus hactenus actum fuit.

§. 2272.

COLORIBUS metallicas solutiones dejicit sequentibus:

Mer.

Mercurium solutum in		
acido nitroso	-	citreo.
Plumbum solutum in		
acido eodem	-	albo.
Ferrum in eodem	-	flavo.
Cuprum in eodem	-	solutionem subopalinam
		(louche) reddit.
Zincum in eodem	-	nullatenus mutat.
Argentum in eodem	-	violaceo - purpureo.
Solut. vitrioli viridis	-	sordide albo.
Solut. vitr. coerulei	-	non adfcit.
Solut. sublimati corro-		
sivi	-	non adfcit.
Solut. auri	-	praecipitatum parcum,
		levissimum praebet.

§. 2273.

PHAENOMENA quae sal nostrum arsenico - ammoniacale cum solutionibus mercurii, saturni, martis, veneris, et lunae in acido nitroso factis, tum et cum solutione vitrioli martialis, sublimati corrosivi, et solis exhibet, prorsus non, aut parum nonnisi, uti videtur, differunt a phaenomenis, quae producunt salia reliqua exposita neutra arsenicalia, cum iisdem solutionibus metallicis juncta. Maxime vero differunt illa, quae in conspectum veniunt cum solutione Zinci nitrosa, ac solutione vitrioli venerei: sal enim hoc solutiones binas istas nullatenus mutat; dum tamen earum prima cyaneo colore dejicitur, altera vero coagulum album format, dum salibus aliis neutris arsenicalibus copulantur. Causa disparitatis hujus examine singulari digna est: examen vero hoc ipsum in aliam denuo dissertationem distulit MACQUERUS.



§. 2274.

ALKALIA fixa salia, et calx facile decomponunt sal novum arsenico - ammoniacale, expellendo alkali volatile, ac unionem contrahendo cum arsenico, cui juncta salia alkalia formant neutra arsenicalia, antea descriptis similia; calx vero novam producit speciem salis valde singularis, cujus examen denuo promissit MACQUERUS, monens nunc unice, salia haec omnia neutra arsenicalia, in quae acida fortissima non agunt, quae et omnia, excepto solum sale novo arsenico - ammoniacali, actionem, vivacissimam licet, ignis eludunt, facillimo tamen negotio decomponi mediante contactu phlogisti, quo pars eorum arsenicalis, reducta in regulum, hac ratione sejungitur a basi, quacunq; demum, cui prius nupserat.

§. 2275.

RETULIT *inlustri viro Cl. HELLOT* phaenomenon a se observatum sub examine minerae cujusdam *) docimastico; antea adlatis observatis maxime analogum. Vidit scilicet HELLOT, a minera hac paucissimos nonnisi in altum tolli vapores arsenicales, etsi ustulata fuisset igne sat vegeto; materie vero adjecta inflammabili, aut, quod eodem redit, ustulata ea immediate intra carbones ardentes, ingentem quantitatem vaporum arsenicalium plurimum infestorum fugatam fuisse quantitatem. Vero, MACQUERUS ait, videtur simillimum, arsenicum, huic minerae nuptum,

*) EN faisant l'essai d'une mine. Non supervacua vero fuisset exactior paulo minerae hujus mineralogica determinatio. Caeterum idem phaenomenon in docimasia minerarum niccolinarum haud raro observavi, ubi pariter arsenici, alias vix detegendi, phlogisto saepius superaddito, magna in altum propellatur copia. de W.



ptum, terrae irretitum esse absorbenti, atque cum ea formare compositam substantiam satis similem ei, de qua, ex unione calcis cum arsenico nata, illico dictum fuit; quae hinc, more salium omnium neutrorum arsenicalium, basi fixa praedictorum, resistere debeat violentiae ignis tamdiu, donec immediatus accedat contactus phlogisti; reducenda tamen in regulum, & a basi pristina, uti et in salibus istis accidit, avellenda parte arsenicali eo momento, dum phlogisto eidem nubere valet. — Hucusque tentamina *Macqueriana*, dissertationibus antea dictis binis comprehensa.

§. 2276.

TENTAMINIBUS hisce jungenda sunt pauca, quae circa usum salis arsenicalis adnotavit *Cl. Vir in Dict. de Chymie T. 3. p. 337.* Usus, ait, salis arsenicalis nondum satis assignari valuit; quum tamen ex adlatis (ac in praemissis binis dissertationibus fuse expositis) proprietatibus hujus ejusdem salis pateat, arsenicum in illo arte satis junctum esse alkalino fixo sali, adsumere licet, sal hoc ipsum cum successu adhiberi posse 1) ad producendum regulum arsenici, 2) ad uniendum commode arsenicum metallicis cum substantiis, 3) in compositione crystallorum plurium, ac vitrificationum: 4) quum acida mineralia maxime corrosiva salia largiantur mitissima, dum ad punctum usque saturationis unita fuerint salibus alkalinis, credere licet, fore ut arsenicum exactissime saturatum alkalino fixo sali, uti re ipsa saturatum occurrit in sale arsenicali neutro, eadem ratione largiatur sal blandissimum, magnarum forsan in re medica futurum virium; interim tamen vel nomen jam arsenici horrorem adeo magnum, idque jure merito, injicit, ut vix sperare queamus, usum salis hujuscemodi in medicam artem unquam fore introducendum: numerosa vero et diu continuata tentamina in brutis antea debe-



deberent institui, quam hominibus remedii hoc genus propinaretur. Credere demum licet, sal hocce in plurium artium exercitio non sine emolumento adhiberi posse, et reipsa adhiberi; *Cl.* enim BAUME ab aliquot jam annis illud magna copia conficere solet in diversarum fabricarum usum; cui vero fini adhibeatur, in secretis est.

§. 2277.

IN *Chemiae Physicae Cl. WALLERII T. 2. sect. 3. et 4. c. 15.* diffusior arsenici historia traditur: quum tamen pleraque horum jam antea uberius adlata sint, excerptam sequentia solum in compendio, *Cl. Viri*, ut videtur, periculis confirmata.

§. 2278.

QUUM arsenicum in pulverem redactum, absorbentibus mistum, et sublimationi expositum, partim subline petat, partim vero in massam hyaloideam confluat, quum et idem terris vitrescibilibus argillaeve misto arsenico eveniat; patere hinc ait WALLERIUS, magnam substantiae hujus affinitatem cum terris calcareis, vitrescibilibus, et argilla; eadem ex ratione difficulter adeo sejungi a mineralibus, quibus nuptum est, substantiis, tum et cum metallorum calcibus, aliisque substantiis fusibilibus uniri fluxu abs emissio vapore.

§. 2279.

AN aqua arsenicum in pulverem redactum, calore accedente, et quassatione solvi, dum parti uni arsenici partes 48 — 50 aquae fuerint junctae *) (*Videnda*

*) IN corollario vero addidit *Cl. AUCTOR*, arsenicum minori multo v. c. 5 — 20. partium dosi resolvi posse; ob decoctionem tamen accedentem praestare, ut

denda circa hoc monita Cl. BERGMANN sub initium capitis hujus adlata) ex solutione evaporationi data nasci crystallos exiguas flavicantes, praemissa comminatione, aqua denuo resolvendas — ex inspissata solutione arsenicali, flavo colore nunc tincta ruere terram inspidam, aqua non solvendam, cum metallis confluentem, (*aber mit Metallen fließt*) ac borracis auxilio in vitrum redigendam, hinc speciem arsenici fixi sistentem.

§. 2280.

SOLUTIONEM arsenicalem sequentia obferre phaenomena.

§. 2281.

a) SYRUPUM violarum claspō aliquo temporis intervallo viridi ab illa colore tingi.

§. 2282.

b) NEC cum acidis effervesce, nec cum alkalis.

§. 2283.

c) A salibus non dejici mediis; nil enim mutationis adtulisse solutiones, tartari vitriolati, nitri, salis muriatici, salis Glauberiani, aluminis, borracis, salis ammoniaci, salisque ammoniaci fixati: ab solutione vero arsenicali deturbari plerasque solutiones metallicas, sequenti ratione.

R 4

§. 2284.

ut magna dosis aquae recipiatur — Cl. WEIGEL in superaddita adnotatione retulit, quindecim partes aquae requiri, ut mediante calore (*in der Hitze, sed quot graduum?*) pars una solvatur arsenici; hanc tamen superveniente refrigeratione crystallina forma denuo abscedere.



§. 2284.

Solut. auri post 24. ho- ras	flavo colore.
Argenti sol. post 24. horas	ex gryseo - fusco.
Ferri nitrosam sol. post 12. horas	dejici ochram flavam.
Cupri in aqua forti sol.	colore albo, laticem in- cumbentem viride- scere.
Cupri in aqua regia sol.	non dejici.
Stanni solutionem	multum praecipitati de- mittere.
Plumbi solutionem	ruere ex ea post aliquod tempus praecipita- tum.
Mercurii solut. in aqua forti	plurimum dejici.
Mercurii sublimati sol.	non dejici.
Bismuthi solut.	non facile dejici, nisi multum solut. arseni- calis adfundatur.
Vitrioli albi solut.	non dejici.
Vitrioli ferri solut.	non dejici.
Sacchari saturni solut.	non dejici.
Zinci in aqua forti sol.	non dejici.
Reg. antim. sol. in aqua forti	non dejici.
Solutionem arsenici cum liquore silicum mi- stam	post aliquod tempus in- spissari.

Ex his omnibus patere, qua ratione aquarum ar-
senicalium instituendum sit examen, et quam parum
vulgares aquarum docimasiae huic scopo satisfaciant.

§. 2285.

§. 2285.

Ab rectificatissimi alkoholisi *) partibus 75 — 80. resolvi partem unam arsenici accedente calore, et repetita quassatione; excuti tamen, superveniente refrigeratione maximam denuo arsenici portionem: an vero quid remaneat solutum, pateferi, si adfusa solutione sulphuris mediante calce viva, vel et sale alkalino (verbo hepate sulphuris salino aut calcareo) fiat praecipitatio.

§. 2286.

Ab 70 — 75. partibus aceti, ac spiritus aceti solvi pariter arsenicum, si methodo illico dicta perficiatur operatio.

§. 2287.

Adfusis partibus binis olei vitrioli ad partem unam arsenici in pulverem subtiliorem triti, miscelaeque hac in balneo arenae ad siccitatem fere decocta, vel donec bullae non amplius occurrant, adfusa demum residuo aqua calida, filtratoque liquore obtineri solutionem arsenici vitriolicam.

§. 2288.

SOLUTA, mediante fortiori decoctione, parte una arsenici in partibus binis olei vitrioli, adjecta dein anatica arsenico dosi borrae pulverisatae, magnam sequi effervescentiam, in sublime adscendentibus nonnullis floribus; miscelam tum sensim limpidescere, ac refrigeratam acquirere consistentiam tenacem, diaphanam vero manere adinstar terebinthinae, sistere sic dictum *gummi arsenici*, calore diffuens, in aëre libero albescens, opacandum.

R. 5

§. 2289.

*) VIDENDA denuo hic, quae Cl. BERGMANN circa eandem rem in dissertatione ad initium capitis huius posita adnotavit.



§. 2289.

ABSTRACTO saepius ab arsenico oleo vitrioli, figi hoc, ac in igne dein fluere, magni, antequam in vapores abeat, caloris patiens, et si sublimetur simul quid, alumini plumosa forma analogum.

§. 2290.

AD solvendam unam partem arsenici requiri quinquaginta partes aquae fortis: errasse cum GELLERTO eos omnes, qui partim solum ab acido hoc arsenicum recludi dixerunt: ad solutionem requiri decoctionem repetitam, cum adfusa quavis vice ad drachmas binas arsenici uncia una aquae fortis: obtineri hic quoque speciem guminatis arsenicalis.

§. 2291.

OMNIUM facillime patere arsenicum acido salis; requiri tamen ebullitionem curtiorem ut ab 20—24. partibus acidi solvatur pars una femimetalli: sub solutione in superficiem abscedere pulverem; ex refrigerata illa maximam partem arsenici excuti denuo, ac in crystallos abire, quarum tamen non determinavit figuram.

§. 2292.

MELIUS adhuc succedere solutionem cum aqua regis, cujus partes 6. sufficiant solvendae parti uni arsenici, accedente coctione; ex refrigerata nil excuti; nec salibus alkalinis multum dejici.

§. 2293.

CIRCA solutiones haecenus expositas memoratu dignum esse, vix alkalini fixi salis interventu quid exturbari, solutione solum excepta muriatica, ex qua elapso

elapso solum temporis quodam intervallo succedat praecipitatio. *)

§. 2294.

ADLATIS hucusque circa arsenicum observatis jun-
genda nunc sunt egregia *Suecorum* quorundam *Inlu-
strum* cum eodem instituta tentamina; quae inter
primo loco enumerandi sunt labores *Cl. BRANDT* ex
actis literariis Upsaliensibus 1733. p. 39. &c. li-
bro, quum in magna *Vindobonae* urbe aegerime
nonnisi invenire potuerim, nec in multis Bibliothecis
celebrioribus habeatur, fane rarissimo) excerpti. **)

§. 2295.

ARSENICUM, *Cl. BRANDT* ait, album in igne
nullam concipit flammam, neque liquefcit, sed to-
tum, salis ammoniaci adinstar, igne mediocri evapo-
rat, et foetidum allii spirat odorem.

§. 2296.

IN alkohol redactum, et sali alkalino fixo, igne
liquefacto, ingestum, solvitur, adeo ut mistura
haec, quae statim ab igne removeri debet, in aqua
colliquefcere, per filtrum transire, et acidis iterum
praecipitari possit arsenicum.

§. 2297.

*) INTACTAS relinquo salium alkalinorum ope factas ar-
senici solutiones, a *WALLERIO* enumeratas; quum
vel ex adferendis adhuc, vel ex antea adlatis uberius
multo pateant; omisi et eandem ob rationem habi-
tum e-o ad sal commune, nitrum, sulphur, e. f. p.

**) TENTAMINA *Brandtiana Gallorum* Chemici maxi-
mam partem ignorasse videntur, uti ex eorum scri-
ptis utique adparet: alii v. c. *WALLERIUS* varia
ex *BRANDTIO* excerpterunt, quin, unde hauserint,
monuissent.



§. 2297.

Si oleum tartari per deliquium fundatur super venenum hoc, et igne ebulliat, etiam solvitur, eodemque modo rursus potest.

§. 2298.

Oleo amygdalarum solutio itidem procedit, nec non oleo olivarum, aliisque oleis expressis.

§. 2299.

ITEM aliis subtilioribus destillatis, ex terebinthina, caeterisque. *)

§. 2300.

Ex hisce veneni hujus solutionibus in materiis oleosis et pinguibus non alienum videtur concludere, quod exinde xylobalsama ope picis, resinae, et sulphuris confici possent ad ligna induranda, atque a putredine, teredine **) aliisque insectis conservanda, quod tam artificio fabricandi naves, quam aliis contignationibus et aggeribus ad arcendas aquas extruendis, minimum non adferret emolumentum.

§. 2301.

PRAETER solventia memorata, aqua etiam menstruum arsenici est, in illa enim penitus solvitur, si 48. partes ejus ad unam veneni hujus fumantur, et super ignem ebulliant.

§. 2302.

*) QUAE WALLERIUS quoque iisdem verbis retulit, BRANDTII non omnino mentionem injiciens.

**) Hoc denuo contra xylophagum propositum non multo abhinc tempore ceu recens detectum alicubi fuit remedium.

§. 2302.

IN 70 — 75. partibus aceti aut spiritus aceti arsenicum eodem modo colliquescit. (WALLERIUS haec denuo retulit anonyma.)

§. 2303.

SPIRITUS vini rectificatissimus idem efficit in proprietate eadem, hac tamen cum differentia, quod ex hac solutione in frigore sponte iterum praecipitetur.

§. 2304.

AQUAE fortis 50. partes unam solvunt arsenici.

§. 2305.

SPIRITUS salis 24. idem praestant.

§. 2306.

AQUAE regis vero sex tantum requiruntur ad unam toxici hujus.

§. 2307.

IN spiritu sulphuris et oleo vitrioli quoque solvitur, atque ope olei hujus, vel rectius, spiritus acidi fortissimi, fusile evadit, magnumque sustinet ignem, antequam in fumum abeat; et mirum sane, quod una eademque res in tam multis diversisque solvatur menstruis. *)

§. 2308.

CUPRUM arsenico per sal alkalinum in igne soluto additum, facile funditur, albo tingitur colore **) et fragile evadit.

§. 2309.

*) SUPERSEDERE sane hac animadversione potuisset BRANDT, quum utique non soli arsenico dos haec ipsa competat.

**) CAPIAT sibi hoc denuo AUCTOR *dissert. de Metallis dubiis*, indolem arsenici, cuprum albente colore tingendi, contra omnium aliorum Chemicorum et dicta et facta praeferre negans.



§. 2309.

ARGENTUM eodem modo facile funditur, et in massam abit fragilem, coloris in fractura cineritii subobscuri.

§. 2310.

AURUM pariter cum arsenico per ignem miscetur, fragile fit, et cineritium in fractura contrahit colorem.

§. 2311.

STANNUM maxime redditur friabile, et simul resplendens; mistura vero haec iterum fundi non potest, sed abit in calcem albam absque ulla fusione praegressa.

§. 2312.

Si super plumbum igne fluidum spargatur arsenicum, statim magna pars metalli hujus in vitrum mutatur una cum parte arsenici; plumbum vero reliquum, quod metalli formam adhuc retinet, fragile evadit, et aliquatenus in fractura micat.

§. 2313.

Cum plumbi vitro igne liquefacto miscetur, et rubeo vitrum illud inbuit colore, quod tunc ad difficillimae fusionis res in fluorem redigendas instrumentum est efficacissimum.

§. 2314.

At ferrum, arsenico per sal alkalinum in igne soluto injectum, flammam concipit, et totum dissolvitur in massam salinam nigram una cum alkali et arsenico.

§. 2315.

REGULUM inesse arsenico ex mistura jam memorata nobiliorum praecipue metallorum cum veneno hocce, sine tamen destructione formae metallicaе, fati-

tis



tis superque adparet, siquidem formam semimetalli adhuc retinet; si illud, quod ex arsenico sese metallis hñce admiscet, lapidis vel salis haberet formam, ut ipsum arsenicum in tota sua substantia habere videretur, et si præterea nihil aliud occulte lateret; tunc necessario eandem induerent formam, scilicet lapidis vel salis, ut per hepar sulphuris vel sal mirabile Glauberi et plura ejusdem generis perfecte fieri posse videremus.

§. 2316.

Ut regulus ille purus sine metalli admistione obtineatur, varia quidem apud Auctores chemicos de regulo arsenici per alkali et phlogiston producendo, perhibentur, quae revera sic non procedunt, quamvis ex mineris omnibus metalliferis metalla hac ratione elici posse notum sit; modo autem sequenti instituenda est operatio.

§. 2317.

SUMANTUR salis alkalini fixi, puri, fortissimi, et salis volatilis ammoniaci, nec non arsenici ana partes aequales, quae bene contrita et mista crucibulo ingerantur, ita ut maxima pars vasis ab hac materia vacua sit. Deinde aliud crucibulum priori luto firmissime adglutinetur, ut, quam maxime fieri potest, egressus impediatur aëris inclusi, prius tamen per calorem rarefacti, antequam penitus claudatur; inclusus enim frigidus nullo modo coërceri potest, quin per obstacula fortissima, calore nimium expansus, erumpat. Postea locatur crucibulum inferius, quod materiem continet, in furno anemio per foramen operculi, quo furnus contegitur; ita ut alterum illud superinpositum extra ignem et flammam sit, eoque melius vis aëris inclusi elastica cohibeatur. Tandem subjicitur ignis, qui nec major nec diuturnior esse debet, quam ut materia lique scat, et liquefacta
illico



illico ab igne removeatur; alias regulus in sublime fertur, et fundo ac lateribus crucibuli superinpositi adhaerescit.

§. 2318.

REGULO huic sublimato mirae sunt proprietates; nam superior pars album et fere argenteum colorem habet et nitorem, inferior vero aurichalci vel auri speciem prae se fert, imprimis quoad superficiem. Et si igni inponatur ut candescat, flammam concipit coeruleam, qua exstincta, calx alba et fixa erit residua, et quidem maxima pars sublimati in calcem ejusmodi albam mutatur. Mirum sane, unde phlogiston illud, quum neque arsenicum, neque alkali fixum, vel volatile tale quid producant *); item quare calx illa alba igne non fiat volatilis.

§. 2319.

GRAVITAS specifica reguli se habet ad gravitatem aquae dulcis ut 8308 ad 1000; arsenici vero ut 3706 ad 1000.

§. 2320.

TOMO octavo *Act. Acad. reg. scient. holm.* pro 1746. inserta habentur *tentamina Celeb. BRANDT de cobalto*; quibus imprimis demonstratur, cobaltum dari, pigmentum coeruleum optimum largiens, quin tamen arsenicum, aliorum instar, vehat adjunctum.

§. 2321.

COBALTUM, de quo hic agitur, forma externa pyritem arsenicalem plurimum referens, nec BRANDTIO antea visum, in pulverem redactum ustulavit; vapor quidem ascendit sulphureus, nil tamen arsenicalis indolis referens: ut vapor omnis abigeretur, candescencia diutius protracta opus erat. Acidum sulphureum,

*) QUOD quidem suo aevo quaerere poterat BRANDT.

phureum, non vero sulphur ipsum adesse demonstratur flammæ absentia.

§. 2322.

Ab ustulatione residuus pulvis niger erat, cobaltum pigmentosum vel colore solo jam prodens.

§. 2323.

QUUM ad manum non foret alkalinum sal, nec filix, quibus minera ustulata verteretur in vitrum coeruleum, addito solum carbonum pulvere, igne congruo administrato, reguli confectionem tentavit BRANDT; obtinuit et facti satis negotio scopum; regulus enatus a regulo cobaltino alio vix differebat.

§. 2324.

HOLMIAM redux cobalta similia ustulata, sale alkalino et silicibus adjectis, exploravit, pigmentum æque bonum, ac ab aliis cobaltis obtinuit, nullum vero regulum; qui tamen, granis saltem nonnullis vitro colorato interjectis, produci alias adsolet.

§. 2325.

Nec regulum obtinuit opè fusoris cum fluxo nigro, triplici dosi adjecto; massa solum in conspectum veniebat vitrescens colore coeruleo tincta.

§. 2326.

ALIO tentamine obtinere voluit regulum pulveris carbonum beneficio, uti prima vice obrinuerat; nunc vero eventus expectationi prorsum non satisfecit. In residuo pulvere, carbonibus aqua dentis mera granula microscopio detexit.

§. 2327.

GRANULA hæc sequebantur magnetem; indidit ea BRANDT cum quadrupla borracis dosi crucibulo, atque



que igne follibus animato per quadrihorium fusionem reliquit: regulus nullus nascebatur; borrae vitrum colore coeruleo penetratum ex integro erat; granula omnia disparuerant.

§. 2328.

ALIAM portionem eorundem granulorum tractavit in igne cum pulvere carbonum, et fluxu nigro: ne sic quidem plus, quam praecedenti labore, obtinuit.

§. 2329.

Cum fluxu mineris ferri refractariis maxime proprio eadem per quinquaginta minuta igni vivacissimo subjiciens, regulum nullum obtinere potuit.

§. 2330.

MASSAM demum ultima operatione ortam una cum fluxu pro mineris ferri igni, quem excitare poterat violentissimo torlit. Granum hac vice obtinuit metallicum, tenacissimum, malleo non frangendum, sed ductile frigus licet; compage interna ferro malleabili bono simile, magnetem sequens.

§. 2331.

PARTEM dimidiam grani crucibulo inmisit, anatica filicum, quadruplici vero borrae dosi adjecta; igne per 45. minuta continuato violento, nullum, finito labore invenit granum, sed fluxus colore subfusco in flavum nonnihil tendente tinctus cernebatur.

§. 2332.

PHAENOMENON miratus grani disparentis, in vitrum verum, adeo tamen prius refractarii, tum et coloris quo scoriae tingebantur, a ferro colore nigro, a cobalto vero coeruleo alias tingendae, experimentum

nam altera quoque vice repetiit cum reliqua grani parte, igne tamen quadrante horae diutius applicato. Finito labore invenit granum, in superficie specierosae insignitum, septem faciebus circularibus composita, quarum media convexam maxime grani partem occupabat, reliquis per ambitum cincta. Pars colorem coeruleum, pars flavicantem aurichaleum obserebat.

§. 2333.

GRANUM hocce minime inducibile, sed malleo facile obtemperans erat. Operatione cum borrace addito repetita granum inducibilius adhuc factum didicit.

§. 2334.

Nunc anaticam grano dolin silicum, et arsenici crystallini albi, duplicem vero cinerum clavellatorum grano miscuit, miscelam per horam dimidiam igni violento exposuit: granum hac encheiresi solum fuit maximam partem, fluxum colore pulchro coeruleo tingens, reliquum collectum vidit in granum inducibile, quod subtilissime pulverisatum magnetem non amplius sequebatur. Pulverem hunc sub testudine furni docimastici urgens colore nigro tingi vidit; cum alkalino sale ac silicibus smaltam largiebatur. Smaltae subiciebatur aliud denuo granum exiguum, inducibile, pulverisatum non obtemperans magneti.

§. 2335.

ETSI vero notum foret BRANDTIO, smaltam ex ferro aut chalybe, additione arsenici, silicum, salisque alkalini parari non posse; ut tamen eo esset certior, tentamen nihiloscius instituit, ferri limatura, tum et optima specie chalybis Smalkaldensis usus; nullum in conspectum venit vitri ejusdam coerulei vestigium. Grana enata singula mista erant arsenico,



etfi expertum quodvis fuisset ignem per dimidiam horam maximum. Nec granorum horum pulvis, cum filicibus et alkalimo sale tractatus, coerulei quid gignebat. — Ex antea dictis tentaminibus autem patet, in hac cobalti specie plurimum ferri, exiguam partem veri cobaltini reguli contineri. *)

§. 2336.

*) HACTENUS tentamina ipsa in compendium ducta: ex iis quae sequuntur paucis excerptisse hic sufficiat frequentia: ferrum cobalto illi admixtum non crudum fuisse sed malleabilis indolem sequens; teste tum ipsa malleabilitate, tum infusibilitate notabili, quae in crudo ferro nunquam non minor est — miscelam partium trium reguli cobalti cum una parte ferri magnetem adhuc sequi — rationem, cur massa, ferro cuso analoga, colorem coeruleum ante additionem arsenici non dimiserit, repetendam esse a vi arsenici albi vitrescente, qua regulus cobaltinus plurimo ferro obvolutus demum liberabatur — errare eos, qui arsenicum in omni cobalto adesse debere contendunt, quum res haec ipsa experientiae certae repugnet. — Regulum cobalti ferro mixtum separari ab hoc non posse, quum utraque substantia iisdem pateat menstruis, tum et in metallificatione ac vitrificatione eadem ratione sese habeat. Quum praeterea ferrum nigro, cobaltum vero coeruleo colore pictum largiatur vitrum, colores vero hi ipsi proxime ad invicem accedant, videri hinc, exigua additione coerulei vitrum quoque nigrum colore coeruleo penetrari posse, ut adeo smalta ex cobalto siderophoro parata, tum ferro, tum cobalti regulo invicem vitrificatis, constet. — Concludi denique exin etiam posse, exigua dosi reguli cobaltini ferro admixti, metallum hoc non in fragile frigans, (*kaltbrüchig*) sed in ferrum bonum, malleo probe obtemperans verti: invenit vero per experimenta BRANDT, ab arsenico regu-

§. 2336.

IN actis vero *Academiae regiae scient. Holmienfis* pro anno 1744. continentur tentamina et experimenta circa arsenicum, ac imprimis ejus metallicam partem, Auctore *Cl. Joh. BROWALL.* Praemittit vir egregius, incertum adhuc inter naturae Consultos esse, cuinam classi mineralium substantiarum arsenicum inferendum sit; substantiarum mineralium classificationem compendiarium his jungit, atque tum arsenici ipsius examen sequentibus exponit.

§. 2337.

ANTE septem circiter annos, ait, libram unam pyritis albi, arsenicalis, micacei, hinc inde granulis majoribus (*grobkörnigt*) compositi *Löfängsbergensis* prope *Fänsås* in *paroecia Subornensi Dalarinae*, comminuti in frustilla minora, indidi crucibulo amplo, inferne munito, uti sub examine cum crucibulis duplicatis fieri solet, huic adposui crucibulum aliud, cujus fundum foramine diametri semipollicaris instruxeram, crucibulo huic denuo superinposui crucibulum fundo privatum, atque hoc demum texti crucibulo tertio, cujus pertuso fundo insertum erat fistulae tabacariae magnae longioris extremitas pyrophora (*Pfeiffenkopf*); tubi hujus extremitas altera inferebatur vitro aquam continenti, excipuli vice fungenti: adparatum luto exacte firmatum, exsiccatione luti praevia, commisi, una cum receptaculo cineres continente, furno anemio adparatum ambiente, atque horarum quinque spatio ignem administravi sensim auctum eatenus, ut sub finem crucibulum pyritem continens candesceret.

S 3

§. 2338.

regulino, ferro adjuncto, tum teste fractura, tum aliis dotibus, crudo et fragili frigenti ferro analogum illud reddi.



§. 2338.

REFRIGERATO solutoque adparatu in crucibulis inferioribus nil, in crucibulo vero primario (*im Haupttiegel*) substantiam subtilem martialem, materie lapidosa remissam forma pulveris grossioris ex nigro fuscescentis inveni, pondere $\frac{3}{4}$ circiter pyritis injecti aequantem. Crucibulum illud primum ad thorium superiorem partem dimidiam obidebatur circa oras ac fundum crystallis figurae variae irregularis, maximam tamen partem striatis, et subobscuris: figuram hanc prae reliquis adfectabant in medio positae maximae; plumbi recens politi adinstar splendebant omnes, mox tamen nitore hoc denuo privandae.

§. 2339.

In tertio crucibulo, ordine ab subiectis cineribus ducto, adfixum marginibus obtinui arsenicum flavum et rubrum sulphure mistum, crystallos exhibens parvas, forma aluminari, aut duplicata pyramidali praeditas; inferiorem locum occupabant flavae, superiorem rubrae, copia prioribus cedentes: ambae nondum se habebant ad arsenicum ex coeruleo gryseum splendens uti $\frac{1}{1000}$.

§. 2340.

CRUCIBULUM summum rubro solum tinctum cernebatur colore, verumtamen excipulum subierat vapor subtilissimus arsenicalis, aquae, tenuis nubeculae adinstar, diu incumbens, demum evanidus, remanente nonnisi vix notabili cuticulae specie aquam obsidentis, ac obscuratione quadam vitrei vasis: aqua foetorem ingratisimum arsenicalem exhalabat, quo et ipsum vitrum diu infectum mansit, vix aquae ope ab eo liberandum.

§. 2341.

§. 2341.

OSTIUM fistulae tabacariae ad semipollicem usque in interius tubi lumen replebatur substantiâ obscure rubra, sub initium cerae adinstar mollis, demum vero induranda, ad flammam candelae facile liquanda, foetorem quemdam spargens, non tamen accendenda; ut adeo non purissimo arsenico rubro componi videretur.

§. 2342.

PARTEM crystallorum antea dictarum arsenicalium, speciem metallicam exhibentium in pulverem redegî, hunc laminae candenti ferreae inspersi, atque momento ex integro in flammam exardescere vidi, quin tamen odorem ullum perciperem sulphureum. Idem phaenomenon pulvis hic, tegulae ac crucibulo calefacto inspersus, exhibuit.

§. 2343.

DOSIN ejusdem pulveris quamdam intra vas huic fini congruum igni exposui, ut resolveretur in vapores: adscendit sic lente pulvis albus cum interjectis quibusdam granulis micantibus: pulvis hic omni nota similis erat arsenico nostro vulgari, albo, nisi quod calore majori sub ipsa sublimatione in substantiam hyaloideam abierat.

§. 2344.

Nec repetita sublimatione pulvis descriptus mutavit indolem; adjecto sulphure more solito abiit in arsenicum flavum et rubrum, pro diversa dosi sulphuris admisti.

§. 2345.

QUUM vero arsenicum hocce album praeter formam metallicam et inflammabilitatem omnem perdidit, tentare velui, an hae dotes addito inflammante



bili restitui possent; ut sic eo certior forem, non solum ferrum nullum genuinum (*förmliches*) quod in sic dicto *Mispickel* nunquam non adest, sed et sulphur nullum, in pyrite ad experimentum sumto prius praesens, crystallis expositis arsenicalibus interjici.

§. 2346.

SUBLIMATIONI itaque exposui arsenicum album cum sapone veneto, eadem, uti prius descripseram, ratione: obtinui crystallos easdem micantes, colore metallico donatas, quales ex *Mispickel* obtinueram, quin arsenici flavi aut rubri adesset indicium.

§. 2347.

FUDI quoque arsenicum album cum sapone veneto in regulum: colore obtentus dotabatur metallico splendente, ignem facili negotio concipiebat, ac regulus crystallinus ex integro erat analogus, nisi formam excipias, densitatem aliquanto majorem, et in aëre, quin nigresceret, paulo diuturniorem persistentiam.

§. 2348.

CONCORDANT his experimenta ab *Cl. HENCKEL* in *cap. 10. Pyritologiae*, manifestius adhuc in *Miscpto Collegio chemico lib. 3. c. 4. Sc.* adlata, ac exposita; inprimis vero *Celeb. POTT* in *exercit. de auripigmento* nonnulla adtulit phaenomeno huic inlustrando facientia; reduci scilicet, metallorum aliorum adinstar, posse arsenicum album adjecto sale alkalino fixo, ac phlogisto, quo factio nomine reguli arsenici (a *LEMERY* regulus antimonii) vocatur; eadem ratione arsenicum album vulgare, addito sapone, sublimari forma splendente metallica, ubi notari meretur, non nisi in auripigmento contentum arsenicum sine addito sapone sublimari forma splendente metallica, uti hunc
in

in finem captis a Cl. POTT experimentis confirmatus.
 Sequitur hinc praeterea, sulphuri nullam plane vim
 in formam crystallinam arsenici esse, quum, ex Che-
 micorum quorundam sententia, phlogiston in sulphu-
 re nimia dosi salis acidi obrutum sit, ut regulinam
 auripigmenti (vel arsenici) partem in calcem potius
 vertat, quam in formam reducat metallicam.

§. 2349.

GRAVITATEM quod adinet specificam arsenici, se-
 quentia excerpere juvat ex *Tabula Menderiana*:

Succinum diaphanum adpendit	-	I.
Sulphur depuratum	-	545.
Arsenicum rubrum	-	771.
Intense rubrum	-	784.
Obscure rubrum	-	785.
Auripigmentum	-	807.
Lapis de tribus, seu <i>Pyrmeson</i>	-	828.
Arsenicum citrinum	-	833.
Arsenicum album	-	838.
Antimonium	-	858.
Minera antimonii	-	863.
Reg. Arsenici per sublim. paratus	-	906.
Vitrum antimonii	-	915.
Pyrites albus, <i>Mispickel</i>	-	940.
Arsenicum nativum	-	958.
Pyrites arsenicalis alius	-	962.
Zincum	-	993.
Stannum virgineum (<i>seines Zinn</i>)	-	997.
Ferrum	-	1007.
Cuprum	-	1028.
Bismuthum	-	1029.
Argentum	-	1046.
Plumbum villacense	-	1058.
Mercurius	-	1073.
Aurum	-	1098.

S 5

§. 2350.



§. 2350.

Pro comparationis norma ac ulteriori dilucidatione adferam adhuc sequentia, tum ex tabula *Muschenbroeckiana*, tum ex tentaminibus meis propriis: pondus assignatum est in partibus decimalibus, ratione ad aquam sumata.

Succinum	-	-	-	1,040.
Alumen	-	-	-	1,714.
Vitriolum	-	-	-	1,750.
Sulphur commune	-	-	-	1,800.
— nativum	-	-	-	2,000.
Muria nativa	-	-	-	2,143.
Antimonium	-	-	-	4,000.
Pyrites sulphuris	-	-	-	4,590.
Antimonium hungaricum	-	-	-	4,700.
Reg. antim. per sublim. paratus	-	-	-	5,000.
Vitrum antimonii	-	-	-	5,280.
Antimonium nativum, cui regulus antimonii fusione paratus proxime accedere videtur	-	-	-	5,450.
Zincum	-	-	-	7,000.
Stannum	-	-	-	7,328.
Ferrum	-	-	-	7,645.
Cuprum	-	-	-	9,000.
Bismuthum	-	-	-	9,700.
Argentum	-	-	-	11,091.
Plumbum	-	-	-	11,325.
Aliud plumbum	-	-	-	11,350.
Mercurius	-	-	-	14,000.
Alius mercurius	-	-	-	14,020.
Aurum	-	-	-	19,640.
Aurum 24. Ceratiorum	-	-	-	20,000.

§. 2351.

Ut vero scopo nostro magis adpropinquemus, arsenicum salinas notas exserere videtur.

§. 2352.

§. 2352.

1.) AQUA solvitur, uti vel ex aqua vulgari illa *muscinæ* aliquatenus adparet: arsenicum aquae partim patere, WEFFERI et POTTII tentamina loquuntur; Auctorum nunc dictorum *postremo* loco nominatus adduxit etiam illa, quae LUDOVICI in *Dissert. de arsenico* circa solubilitatem arsenici in aqua observavit.

§. 2353.

2.) SAPIORE donatur, licet mediocri; solutio ejus inspissata, notante POTT, saporem in lingua relinquit debilissime quidem stypticum, diu tamen persistentem.

§. 2354.

3.) FORMAE crystallinae adsumendae aptum naturum est.

§. 2355.

4.) CHEMICI celeberrimi non solum arsenico partem occultam salinam adtribuunt, sed et, ob vim solventem, coagulata aquam fortem naturae vocant; adferentes insuper, arsenicum maximam partem salinae esse texturae et prosapiae.

§. 2356.

SULPHURIBUS adnumerare alii arsenicum maluerunt, sequentibus moti argumentis.

§. 2357.

1.) IGNI expositum fumat, foetet, quin et flagrat, dum integrum est, ac non destruitur, nisi sub sulphure arsenicali Auctores nonnulli aliud quid intelligant.

§. 2358.

2.) ARSENICUM in mineris vulgare sulphur imitatur, ac de praerogativa certare quodammodo videtur,



tur, dum de mineralisatione agitur; quo quidem phaenomeno demonstrari videtur, arsenici in mineralisatione corporum easdem, uti sulphuris, esse partes.

§. 2359.

3.) VIM vocis dum consideras in V. V. scriptis, nunquam non arsenico substantia designatur, quae sulphur adjunctum habeat, v. c. arsenicum rubrum, arsenicum citrinum, auripigmentum, sandaracha, realgar &c. *)

§. 2360.

Ex obposito adtendendum erit 1.) sal verum aut sulphur ex arsenico nunquam obtineri posse; uti nec ex calce viva, nec ex metallis inflammabilibus (*aus feuerfangenden Metallen*) acquiritur.

§. 2361.

2.) ETSI vero demonstratum habeatur, salini quid v. c. in arsenico delitescere, sal ideo tamen non erit; atque indoles arsenici vera eo minus determinari exin valet, quum simile quid ex aliis *mercurialibus* obtineri queat.

§. 2362.

3.) DOS in crystallos coëundi arsenico cum aliis corporibus ex aequo communis est, quum et in sulphure non raro occurrat, nec semimetallorum sic dictorum natura repugnet. Arsenicum idem fere phaenomenon exferere videtur in minera argenti rubra, ubi et magna sulphuris adest copia, tum in crystallis jovialibus, et in quibusdam pyritis arsenicalis (*Misspickel*) speciebus: verumenimvero simile quid observare datur tum in statu naturali, tum praegressa fusione,

*) EXCEPTIONEM hic adferre videtur, adductus, in praecedentibus, jam aliquoties AVICENNAE locus.



ione, in antimonio, in Zinco, in bismutho, in ferro, aliisque metallis. *) Etsi inficias ire non possumus, in sale principium crystallisationum reconditum esse, ubi sal occurrit; multum tamen abest, quin exin sequatur, arsenicum salibus esse adnumerandum; atque hoc de arsenico parum adeo valet, ac de sulphure crystallino, aut metallis, quae determinata sua gaudent configuratione. **)

§. 2363.

4.) Nec, quae num. 4. circa salinam arsenici indolem fuerunt adlata, dum de mineralium substantiarum distributione agitur, in censum veniunt, sed ad chemiae pomeria sunt ableganda.

§. 2364.

5.) Dos arsenici in igne fumandi, foctorem emittendi, ac ignem concipiendi, substantiae huic cum sulphure, quin et cum semimetallis omnibus maximam partem communis est.

§. 2365.

6.) Nec attendendum magis erit ad phaenomenon cum metallis uniatur, quum id ipsum circa minerales substantias omnes jam manifestius jam obscurius obtineat; idem erit circa indolem arsenici mineralisantem iudicium; atque si rem adtente expendamus,

*) SENTENTIA haec *Browallii* confirmata habetur tum quotidiana metallorum ac semimetallorum legitime fusorum, et lentissime refrigeratorum symmetricae configurationis instantia, tum elegantibus magni REAUMURII circa hoc negotium tentaminibus.

**) EPICRISIS haec et in doctrina de generatione crystallisationum diversorum lapidum ignobilium aequae ac gemmarum adtendi meretur. de W.



damus, id non nisi conficitur, metalla, natura archi-
recta cum arsenico mista deprehendi. Nec alienum
adeo est phaenomenon, ferrum, Zincum, antimonium
e. s. p. metallis quibusdam mineralisandis inpendi;
praeterea naturae periti, quibus arsenici natura inno-
tuit, alias facili negotio detegent rationes, cur arse-
nicum saepe adeo in fodinis hospitetur, ac metalla
insequatur.

§. 2366.

7.) NOMINE quidcunque demum designante, le-
gem tamen naturae non inponunt nomina olim rece-
pta; substantia haec non a longo adeo tempore quoad
nomen suum exactius innotuit; ut adeo mirum non
videatur, si *totum* secundum partem quamdam ad-
pellatum sit, aut si error in denominatione accesserit.

§. 2367.

8.) ANALOGUM demum arsenicum non solum sub-
stantiis aliis mineralibus, sed et metallis volatilibus
est; quod si enim dicas, illud esse mallei inpatiens,
ac in pulverem terendum, inpatiens quoque est anti-
monium; reliqua vero malleum non optime ferunt,
ac mercurius nunquam non est fluidus. Arsenicum
sub sublimatione calcinatur; sed idem quoque cum
Zinco evenit: volatile est; sed et reliqua non multo
majori gaudent in igne fixitate; atque, ut uno verbo
complectamur omnia, characterem hoc inter alia con-
stituit semimetallorum. Quin et metalla ignem fe-
rentia nostro auxilio in conditionem talem deduci ne-
queunt, sed natura ipsa talem illis haud raro concil-
liavit indolem, talemque crasin, ut, hoc respectu,
arsenico fiant analogia.

§. 2368.

ARSENICO itaque, tum ob dictas nunc rationes, tum ob sequentia momenta, locus inter metalla in igne volatilia assignandus erit.

§. 2369.

1.) QUUM in arsenico partes omnes ad crasin metallicam requisitae valeant demonstrari.

§. 2370.

2.) QUUM gravitate gaudeat metallica, pondere quoque antimonium exsuperet; utut arsenicum album, utpote calcinatum aut vitrificatum, levius sit.

§. 2371.

3.) QUUM formam habeat metallicam splendorem, quum nondum destructum fuit.

§. 2372.

4.) QUUM in massam metallicam fundi, sublimarique possit, dum requisitum adest phlogiston, nec sub ipsa operatione in calcem vertitur.

§. 2373.

5.) QUUM tandem, calcinatum antea et in vitrum versum, aliorum metallorum in morem, adjecto phlogisto reducatur.

§. 2374.

MONENDUM tamen simul est, 1) nullum hucusque innotuisse metallum volatile, ex aequo forma sua metallica inlaesa sublimandum; etsi quidem aliorum inadoles non multum adeo remota sit.

§. 2375.



§. 2375.

2.) CRASIN metallicam in arsenico laxissimo non-
nisi cohaerere vinculo &c. *)

§. 2376.

*) MONET hoc loco BROWALLIUS, *metallica* sub forma se non intelligere figuram reguli gibbosam, seu ad sphaericam accedentem, praeterquam enim, ait, quod forma haec fluidis omnibus propria sit, atque phaenomenon hoc ipsum ex legibus adtractionis exponi queat, his ideis *forma* *metallica* cum *figura* *metallica* confunderetur. Idem vero esse autumo, rem quamdam formam metallicam habere, vel metallum illam esse genuinum; ut adeo metallum hoc vel illud formam habeat metallicam, dum in crasi sua perfecta specifica una cum omnibus suis partibus tali gaudet indole, nexu, atque specie, quali vel natura ipsa donavit *nativum*, vel quam ignis auxilio ac operationum requilitarum indipiscitur eliquatione ac fusione, abs additamentis miscelisque extrinfecis, vel abs partis cujusdam essentialis avulsione.

ADJECIT et in nota *Traductor* operis Cl. KAESTNER, formam reguli antea descriptam maxime urgeri a Cl. WALLERIO in *Mineralogia*, videri autem tibi, jure merito characterem hunc a Cl. BROWALLIO perstringi, quum abs dubio (*uti et ipse jam alio loco monuit*) simul dependeat a conditione vasorum, in quibus metallum funditur. Si quis, ait, stannum in crucibulo aureo funderet, aegerrime sane, ut videtur, metallo fuso figuram convexam secundum Walleriana monita conciliaret. Quodsi liceat, mercurium ceu metallum in continuata fusione positum considerare, vitrum, illum continens, pro crucibulo haberi poterit. Mercurius vero in vitro hoc figuram convexam sphaericam non exhibet.

SENTENTIA haec *Kaestneriana*, rationi maxime consentanea, et aliorum fluidorum vasis, quorum lateribus

§. 2376.

CONCLUDI tandem ex adlatis prius tentaminibus posse reor: 1) Arsenicum figura crystallina metallico - splendente donatum figura sibi propria, formaeque metallica esse instructum; accedit huc, in mineris arsenicalibus occurrere nonnunquam vestigia, quae indicetur, naturae manibus arsenicum hac sub specie fuisse elaboratum.

§. 2377.

2.) ARSENICUM in regulo antea exposito fusionis ope confecto forma pariter donari metallica; tum et regulo huic analogi quid occurrere in minera illa arsenicali atra (*schwarzer Fliegenstein*) de qua legi meretur *Pyritologia*. Ch. HENCKEL c. 10. p. 604. &c.


§. 2378.

3.) QUUM arsenicum album nonnisi alkalini salis ope ac inflammabilis substantiae tum fusione tum sublimatione in formam deducatur metallicam; quum et arsenicalis regulus et descriptae prius crystalli colore metallico donatae concipiant ignem; inflammabilitatis hujus ratio non a sulphure esse repetendam, utpote non praesente.

§. 2379.

4.) VERO potius videri similis, ab arsenico forma metallico donato respui sulphur, atque substantiam

bus facillime, difficulter, aut prorsus non adhaerescere queunt, inclusorum eleganter confirmatur instantiis; v. c. aquae infusae vitro nitidissimo aquoso halitu antea obducto, infusae vitro, linteo turgente oleo antea absterfo, infuso vasi ex cera facto &c. de W.



tiam hanc non nisi praevia calcinatione, amissione proprio suo phlogisto admittere in connubium.

§. 2380.

5.) PHLOGISTON hoc ipsum *arsenici proprium* cum reliquo metalli corpore laxissime solum jungi; flamma vero accedente mox comburi, ac sejungi.

§. 2381.

6.) IN pyrite vero supra dicto arsenicali adfuerat sulphur, ac arsenici pars, quae vel ignis solius ope, vel adjuvante simul sulphure in illum delata erat calcinata, et phlogisto suo spoliata *), una cum sulphure concretum in crystallos flavas rubrasque sublimabatur; crystallos hae gravitate sua specifica cedebant arsenico ipsi, levissimaque erant rubrae.

§. 2382.

7.) PARUM adeo detegere queo, ferri quid, in pyrite albo copiose alias reperiundum, crystallos antea expositis fuisse intermixtum. Nam si suspicio oriretur, an non ferri portio quaedam ex pyrite arsenicum insequuta sit; quaestio recurrit, qua ergo ratione ferrum accesserit regulo crystalisque colore metallico donatis, ex arsenico albo sublimatione fusioneque

*) Obscurus nonnihil hic, ut et aliis translationis hujus universae in locis, textus est germanicus, quem ideo adjiciendum duxi: - - - *und der Theil des Arsenicks, der durch Feuer allein, oder mit Beyhülfe des Schwefels dahin gekommen war, dafs er war kalzinirt worden, und sein eigenes Brennbare verloren hatte, war zusammen mit eben dem Schwefel u. s. w.* MONNETUS jam observavit, TRADUCTOREM Actorum Holmiesium vim suecici autographi non ubique fuisse adsequutum.

que paratis; hic enim ferri nil additum; nec detegi ullo pacto valet metalli hujus quid antea adfuisse: eadem tamen ex pyrite ac arsenico albo obtentae fuerunt crystalli. Ab ferro autem reduci arsenicum, uti et cum aliis quibusdam metallis fit, atque reductionem tum fusione tum sublimatione obtinere, res est alio loco seorsim sub examen revocanda.

§. 2383.

BROWALLIANAE huic arsenici disquisitioni subjicitur *additamentum Cl. TILAS* circa figuram speciemque crystallorum arsenicalium *), quae pyriti arsenicali, pulveris pyriti ope diffracto infederant, tum colore aureo, tum metallico, galenae plumbi analogo instructae. Magnitudine quaedam aemulabantur capita acicularum parvarum, aliae his minores erant. Colore aureo donatae obferebant formam tetragonam tetraëdram, latus unum in quibusdam subpeditabat basin, incumbente pyramide trigona; aliae insisterant apici inversae. Latus quodvis compositum cernebatur triangulis variis, sese mutuo excipientibus; latera tamen triangulorum non in eadem disponebantur superficie, nam quo minores evadebant trianguli, eo magis in centrum commune a superficie externa remouebantur. Hinc inde plurimae crystalli in agmen unum collectae occurrebant, exhibentes figuram a sibi propria valde diversam, corpus scilicet octaëdram apicibus sex donatum, crystallis exiguis octo compositum, jam lateri, jam apici cuidam innixum. — Aliae crystalli, colore galenam aemulantes, nunc descriptis partim accedebant forma, partim depressiores erant, et galenae tessulis (*Stüchen*) subsimiles; jam et cavae erant, pulpitum fere exhibentes; lateri praemi-

T 2

nenti

*) Figura earum in adposita tabula exprimitur, quam tuto omitti posse credidi.



nenti acuto pleraeque insisterant, hanc ob rationem diaphanae. — Cryſtalli ſubaurei coloris non ſubibant mutationem, metallici vero intra 24. horas deperdebant ſplendorem, externe nigreſcentes ex integro, ſolutae tamen paulatim *) interne ſplendebant.

§. 2384.

AGMEN claudant pauca ex *Cl. CRONSTEDT* circa indolem arſenici excerpta. Eſſi, *CRONSTEDT* ait, arſenicum per praecipitationem aegre queat reduci, metallica tamen ex eo indoles illi denegari nequit. Ratio haec ipſa et reſpectu Zinci in lapide calaminari, antequam detecta fuerat methodus nunc nota, educendi illud ſub forma metallica. Id vero non tentatur ab hominibus, qui non ignorant, metalla ſolum commiſceri poſſe cum aliis metallis eo pacto, ut denſitatem (*Dichtigkeit*) ſuam retineant, ac ductilitatem quamdam; qui praeterea terram nullam noverunt ſic dictam metallicam, nulla arte reducendam.

§. 2385.

INFICIARI quidem non poſſumus, a ſulphure ratione inducibilitatis ſub malleo peiores non produci effectus, quam ab arſenico; hoc vero addita ſubſtantia pura phlogiſtica per ſe ſub forma metallica ſubludari poſteſt. Maniſteſtius id evincitur in arſenico ſic dicto teſtaceo (*Scherbenkobolt*). Argumenta tamen non ignoro, quibus adſeri queat, arſenicum, acidi vitriolici adinſtar, ſal eſſe ſui generis, quod cum phlogiſto nuptum ſpeciem exhibeat metallicam, uti circa piſces quosdam obtinet ac inſecta nonnulla; quibus praeterea evinceretur, arſenicum, uti ſulphur,

*) DIVINARE enim non poſſum, quid ſibi velit phraſis Traductoris: *wenn man ſie gelinde zerſetzte: decompositionem enim chemicam hic vix intelligendam reor.*

phur, metalla solvere posse in substantiam Suecis sub nomine *Skärstein* (minera, arsenicum sulphuri nexum recondens) notam. Ad haec reponi pauca queunt, antequam conveniamus, in systematibus mineralogicis non magnam adeo requiri exactitudinem.

§. 2386.

REFERENDA demum ad caput de arsenico sunt tentamina, quae in anno V. *historico-naturali Cl. SCOPOLI* cum auripigmento instituta exponuntur, sequentia. — Auripigmentum, ait, argillae cinereae inhaerens repertum fuit ante triennium in comitatu *Solienfi* prope *Tayobam*, non procul *Neusolio*, constans particulis micantibus, et modo massulas amorphas, modo vero exiguas crystallos constituentibus, colore ut plurimum flavo, cum aliquo translucente rubore, quandoque tamen et omnino rubro.

§. 2387.

ARGILLAE hujus unciae duae ablutae dederunt auripigmenti drachmas duas et grana triginta duo, nec non exigua quarzi fragmenta hinc inde inniata. Fosfilis hujus, una cum adhaerente terra, libra una civilis retortae indita dedit 1.) in excipulo humorem aqueum cum pauca copia sulphuris 2.) in collo vitri unciam dimidiam sulphuris rubri. 3.) Residuum duplex, nempe unum pulverulentum, cinereum, et aliud flavo-cinereum, ac crystallis rubineis hinc inde adpersum.

§. 2388.

RESIDUUM cinereum pulverulentum, denuo igni traditum, dedit novum sublimatum rubri et flavi coloris. Eademque sublimata obtinui in igne ex residuo solido. Sublimavi ita septies, et semper ex capi-



re mortuo prodiit novum sublimatum rubrum, nitidissimum, vitro simile.

§. 2389.

Hoc cum duplo mercurii sublimati corrosivi dedit in retorta vitrea sublimatum rubro-flavum, ac residuum cinereum et compactum. Eadem miscela in cella vinaria per duos dies relicta, modice diuque fumat, scripturam cum atramento vulgari mox tingit colore luteo-viridi, et tertia die in igne obtinui cinnabarin, una cum liquore flavescente, fumante foetido.

§. 2390.

Ex centenariis tribus docimasticis ejusdem rubinei sublimati, cum hydrargyro diu trituri, obtinui in igne 1.) sublimatum fusco rubrum cinnabarinum libr. 422. 2.) Residuum denuo vitreum ac rubrum sublimatum hoc denuo igni commissum dedit granula extus nigricantia, intus vero cinnabarini coloris, mercurii globulos numerosos, cinnabarino polline adspersos, et residuum gryseum pulverulentum. Residuum praedictum rubineo vitro simile, tritum cum mercurio, tanta facilitate cum eo uniebatur in amalgama, ut 1349 lb. mercurii susceperit, integrum vero amalgama ponderaret lb. 1388. Id porro retortae inditum dedit in igne sublimati fusco-rubri lb. 888. Hydrargyri lb. 551. residui atro-grysei lb. 4. hinc augmentum lb. 55.

§. 2391.

ERGO arsenicum non tam facile separatur a sulphure, ut quidam scribunt, nec ab eo penitus delivelli potest ope mercurii. In omni fere sublimatione auripigmenti rudior pars arsenici constituit crystallos albas, opacas, trigonam et tripteram pyramidem referentes. Sed figura haec alumini propria, an ergo
et

et figura crystallorum arsenicalium determinata a terra alkalina aluminosa? *)

§. 2392.

DIXIT BRANDT in *act. succ.* 2. 1735. p. 6. arsenicum cum mercurio amalgama non constituere, sed contrarium patet ex paulo ante adlatis. At longe mirabilius est augmentum ponderis dictae massae, absque ulla ignis actione nati, ad quem confugiebant chemici daturi rationem, cur calces metallorum graviores sint metallis ipsis, unde originem duxerunt. Mater itaque veritatum chemicarum sola est Experientia.

§. 2393.

AD finem capitis hujusnectere libuit decantatum adeo, ac praesentaneum toxicon illud, quod sub nomine *aquae della Toffnina*, vel *aquae toffanae*, vel et *aquettæ* notum est, ac multa hominum insignium strage, imprimis sub ALEXANDRO VII. Romae infame; componebatur solo arsenici crystallini in aqua decoctione meraciori, cui addebatur *herba cymbalaria* dicta, prout patet ex epistola Archiatri Caesarei Cl. de GARELLI ad celeberrimum Frid. HOFFMANNUM data. **)

T 4

An

*) Vix hoc videtur inde evictum; alias enim v. c. in mineris saturninis, quibusdam spathis figura cubica etiam ab alkali minerali, aut, ut alii voluerunt aequè indemonstrato argumento, ab acido muriatico foret repetenda. de W.

**) EN fragmentum ipsius epistolae, uti habetur in HOFFMANNI *Medic. Rat. et Systemat. Tom. 2. P. 2. c. 2. §. 19. schol.* „Occasione elegantis tuae dissertatio-
„ nis de erroribus circa venena in mentem venit
„ lentum quoddam venenum, quo famosa venefica,
„ in carceribus Neapolitanis adhuc vivens, in sex-
„ cen-



An vero *cymbalariae* additione augeatur arsenici, perimendo homini utique per sese nimium quantum sufficientis, indoles deleteria, vix dixerim, etsi quidem lubens, ac multiplici edoctus experientia, fateriqueam, venena varia substantiae cujusdam, quae, si seorsim sumtam consideres, prorsus non, aut vix, nocua videretur, additione plurimum intendi, ac validiora reddi; instantias hic per transfennam indicasse sufficiat eupri remitti cum succo armoraciae, vel et raphani vulgaris, arsenici cum succo betae rubrae &c. calomelani cum arsenico albo, limaturae stanni cum albumine decocto ovorum per aliquod tempus digesti &c. ac animantibus exhibiti — Symptomata *aquae* hujus toffinae venenum stipantia febris enormis, ac sitis ardentissima inter alia saeva mala constituebat. Remedio adhibebatur tum temporis cum successu succus citri et limoniorum. — Aliam vero aquettæ descriptionem LANZONUS *Op. T. 2. p. 529.* sequentibus adtulit: recipe pulveris arsenici, stibii crudi, herbae hyosciami, fermenti panis, ana partes aequales: ebulliant omnia in aqua communi, donec tertia pars consumpta sit, inde coletur et serva; haec aqua epota mortem adferret, nisi celeriter opem portaret succus citri vel limoniorum; sic enim multi, quibus data fuit dicta aqua, sanati sunt, et necem fugerunt.

§. 2394.

„centorum perniciem usa est. Hoc vero nihil aliud
 „est, quam arsenicum crystallinum in larga aquae
 „copia per simplicem decoctionem soluta, addita,
 „nescio in quem finem, cymbalaria herba. Hoc mihi
 „communicavit Augustissimus Imperator, cui trans-
 „missus est processus criminalis, propria veneficae
 „confessione confirmatus. Aqua vero vulgari idio-
 „mate Neapolitano *Aqua della Toffina* adpellatur.
 „Certissime interficit, et plurimi hoc veneno occu-
 „buerunt.”

§. 2394.

NE vero veneficae aquae descriptione capiti huic inponatur coronis, illi subjungendam ratus fui descriptionem remedii anticancrofi a Cl. FEBURE nuper in publicum emissi, quo a cancro curatos fuisse ducentos homines retulit in libello: *Remede approuvé pour guerir radicalement le cancer.* — Solvantur in hunc finem grana quatuor arsenici crySTALLINI in aquae destillatae libris duabus; hujus solutionis cochleare unum, remistum apaticae dosi lactis drachmaeque dimidiae syrupi papaveris albi, exhibeatur indies mane aegro per octiduum; elapso tempore hoc propinetur eadem dosi bis, tum et per quatuordecim dies ter de die. Lagenis sex ad curationem ex integro perficiendam canceri exulcerati plerumque opus esse monuit. Omni hebdomade semel detur purgans. Quodsi vero cancer non apertus sit, abluatur solutione arsenicali, quae ex granis octo arsenici crySTALLINI, librisque binis aquae destillatae constet; cancro tum inponatur cataplasma ex dauco, saccharo saturni, arsenico in aceto soluto, laudano et cicuta; cancer apertus fomentetur solutione tepida arsenicali. V. PLENCK *Materia chirurgica*, p. 472. 2. Aufl.

COBALTUM.

§. 2395.

COBALTI expositurus historiam, quatenus in scopum nostrum videbatur requisitum, ordior ab amplissima substantiae hujus descriptione, quam Cl. LEHMANNUS suscepit, ac in opere: *Cadmologia, oder Geschichte des Farben-Kobolds u. s. w. Königsb.*



1761. 2. *Theile in 4to*, partim (non enim ultimarum labori admovit manum) descripsit. Quum facile pateat, per omnia me non sequi posse *Auctorem celeberrimum* in praesenti opere, adferam hic non nisi ea, quae in scopum praefixum magis faciunt, omnis omnibus aliis, Docimasiam, Mineralogiam &c. concernentibus. Monendum vero ante omnia est, LEHMANNUM inter eos qui de Cobalto scripserunt principem tueri locum.


§. 2396.

COBALTI nominis origo et etymologia crassiori teguntur caligine. Veteribus *daemunculi* fictitii metallici, *lemuresque fodinarum* (*Bergmännchen, Grubengeist, Berggespenst, Kobold*) cobaltorum titulo fuerunt insigniti: tum translata sensim vox ad semimetallicam nostram substantiam, quod ab ea, ut a daemunculo, metallicolae nobiliora metalla sperantes seducerentur, tum et ob latens in illa minera arsenicum sanitatis vitaeque incurrerent detrimentum: unde et MATTHESIUS cobaltum substantiis mineralibus maxime deleteriis accensuit, quo muscae, grylli, mures, pecora, volucres, hominesque necarentur: quin regionem, a SALOMONE HIRAMO dono datam, *Cabul* dictam, a Cobalto nominatam fuisse credidit; aliis quoque nonnullis Auctoribus *cobaltum* ab hebraico *כחל*, *destruxit* deducuntibus. Metallifossores autem cobaltum olim tanto prosequuti fuerunt odio, ut in orationculis suis Deum rogarent, ne cobalto punirentur. — Latinis CADMIA FOSSILIS METALLICA dictum fuit; nondum evicta demonstratione, a CADMO *Phoenice* nomen hoc ipsam esse deducendum. Caeterum *cadmia* non solum cobaltum dictum fuit, quum occurrat et CADMIA FOSSILIS PLINII (seu *cadmia fornacum*); qua *flores Zinci* ac *nihilum album* designari LEHMANNUS monuit: PLINIUS et lapidem *calami-*
narem

narem CADMIAM dixit, quem sequutus AGRICOLA. Praeterea PLINIUS memorat CADMIAM SUBLIMATAM IN VASE CLAUSO; qua, uti videtur, *sublimatum arsenicale* designatur; tum CADMIAM ATRAMENTOSAM, quae, uti ex ejus verbis adparet, *pyrites sulphuris* fuit, nisi fors tum temporis jam nota fuerint cobalta pyriticosa, in aëre facili negotio fatifcentia, materie tamen colorante turgida. — Cobaltum demum et *Zaffera* (*Safflor*) et MARCASITA, inproprie licet, dictum fuit.

§. 2397.

VETERIBUS cobaltum (saltem ex proprietatibus) non prius ignotum fuisse probari autumat LEHMANNUS ex sequenti loco PLINII, l. 33. c. 13. *hist. nat.* "Coeruleum harena est, cujus genera tria fuerant antiquitus: aegyptium, quod maxime probatur; scythicum, hoc diluitur facile; quumque teritur, in quatuor colores mutatur, candidiorem, nigrioremve, crassiorem tenuioremve. Praefertur huic etiamnum cyprium: accedit his puteolanum et hispaniense, harena ibi confici coepta. Tingitur autem omne, et in sua coquitur herba, bibiturque succum reliqua confectura eadem quae chrysocolle. Ex coeruleo fit, quod vocatur lomentum; perficitur id lavando terendoque, et hoc est coeruleo candidius. Pretia ejus XXIII. in libras, coerulei XVIII. usus in creta, calcis inpatiens. Nuper accessit et Nestorianum ab Auctore adpellatum; fit ex aegyptii laevissima parte; pretium ejus XL. in libras; idem et puteolani usus, praeterquam ad fenestras: vocant celon. Non pridem adportari et indicum est coeptum, cujus pretium XVII. in libras; ratio in pictura ad incisuras, hoc est, umbras dividendas a lumine. Est et vilissimum genus lomenti, quidam tritum vocant, quibus assibus aestimatum." Plausibili satis ratione
loci



loci hujus interpretationem LEHMANNUS instituit, atque, ex eo patere, ait, cobalti productum, Zafferam Veteribus notum fuisse, ignorasse tamen PLINIUM et rationem, qua, et materiem ex qua conficiatur; quum ex herba, chrysocollae modo, parari crediderit. Demonstrat dein, usum cobalti ad vitrum parandum coeruleum latuisse AGRICOLAM, MATTHESIUM, ALBINUM, CARDANUM, FERRANDUM IMPERATUM, LOHNEISIUM; circa annum circiter 1617. cobaltum in Germania magis innotuisse, referente MELZERO, *Schneeberg. Chronick. p. 406.*

§. 2398.

COBALTI fusiolem curtioremve mentionem iniecerunt in suis scriptis KUNCKELIUS, POMETUS, SAMUEL DALE, VALENTINI, BARBA, BROMELIUS, LINNAEUS, WALLERIUS, GESSNERUS, POTT, HENCKEL, KRAMER, GELLERTUS et JUSTI; systematice tamen, LEHMANNUS ait, et ex professo nullus horum de cobalto egit.

§. 2399.

OMISSIS nunc, quum ad opus hoc non faciant, cobalti locis natalibus, (inter quae *Saxonia, Thuringia, Hassia, et Bohemia* eminent) laboribus cum substantia illa variis in locis primum institutis, commercii rationibus, cobalti speciebus *) (ubi monet rarum satis esse cobaltum purissimum, ab aliis admistis substantiis immune) amplissime ab Auctore descrittis; mineris, miscelis naturalibus cum substantiis metallicis, semimetallicis, aliisque; usu mechanico cobalti in fabricis Zafferarum (ubi ampla denuo traditururnorum ac operationum omnium descriptio, et opera-

*) NON oberit tamen hic ipsis LEHMANNI verbis adduxisse divisionem cobaltorum, ab illo pro optima inter reliquas Auctorum classificationes propositam:



operationes ad tria capita revocantur, eas nempe, quae cum cobalto crudo instituuntur, ante miscelam, quae fusionem ipsam, et quae coloris demum ulterio- rem praeparationem concernunt) *) inferam nunc ex
LEH-

Derb
und
reine { schwarzer, mulmiger,
weisser,
Schlackenkobold,
speisiger. Schlacken-
bold &c.

Kobol-
de sind
entwe-
der

ver-
mischt

mit Metallen und halb-
metallen, mit

Silber, verschie-
dene Arten.

Kupfer verschie-
dene speisige
und Kupferni-
ckel; der grüne
Kobold.


Eisen, fast alle
speisige, der
gelbe &c.

Arsenick-Regulo,
gestrickter Ko-
bold, einige
Arten vom
Scherbenkobold
&c.

mit Schwefel } in Kiesen
mit Salzen }

mit Erd- { mit glasachtigen Steinen, mit
und Kalkstein; verschiedene Sor-
Steinarten ten.
mit Letten, allerley Arten.

*) SEQUENTIBUS haec, ut compendiarium ideam exhi- beam, absolvuntur. Cobaltum ex terrae gremio ex- tractum, lectum, confringitur, examinatur, de quo postea,



LEHMANNO ea solum omnia, quae experimentis chemicis nituntur; inter haec vero primo loco tentamina occurrunt cum cobalto instituenda, ut vis ejus colorans major aut minor eruatur.

EXAMEN CHEMICUM COBALTI TINCTORII VIA HUMIDA.

§. 2400.

Acido puro nitroso, vel aceto destillato, aut acido salis, aut acido formicarum injiciatur sensim cobalti tinctorii cujuscunque in subtilem pulverem tussicae dosi, quae in menstruo solvi queat. Solutio mittatur per chartam emporeticam, residuum non solutum edulcoretur aqua, siccet, ponderetur, atque sic menstruo soluti quantitas facile patebit. Hoc facto salis communis dosi anatica soluto cobalto injiciatur retortae vitreae, adfundatur huic facta solutio, et ignis congruo gradu adhibito denuo evocetur liquidum in aquam regiam nunc mutatum. *)

§. 2401.

postea, tunditur, calcinatur, ut ab arsenico liberetur, per cribrum mittitur, tussicae denuo majoribus frustillis, cum cineribus clavellatis et arena probe miscetur, vasis huic operationi destinatis furno proprio, lente calefacto, expositis, candentibus, cochleari ferreo magno ingeritur, funditur, rutabulis ferreis agitatur, in vitrum fustum cochlearibus ex vasis antea dictis eximitur, dolio, aqua frigida adfluente pleno, a felle vitri et *Speise* antea liberatum, injicitur, vitrum contunditur, molendini ope teritur, elutriatur (*verwaschen*), pulvis tenuissimus siccat, doliis inmittitur, variis admodum characteribus, pro diversitate melioris sequiorisve coloris, notandis, et commercio demum exponitur.

*) Si scilicet ad solutionem cobalti adhibitum fuerit acidum nitrosum.

§. 2401.

ADTENDENDUM probe hic erit, ait LEHMANNUS, ad phaenomena omnia: dum enim latex spissescit, color plerumque oritur pulcherrimus viridis, in coeruleum amoenum dein haud raro abiens. Nonnunquam et color coeruleus primo loco in conspectum venit, excipiendus a virente, quod quidem a diversitate cobaltorum proficiscitur. Humidum omne ad siccitatem usque evaporationi detur; frigida demum massa colorem obfert florum persicorum, quo nitrum inficitur enatum cubicum. Hoc vero solvatur triplici quantitate aquae, fundum petet pulvis albus, dum bismuthum admixtum fuerit cobalto, qui edulcoratus verum sistit praecipitatum seu magisterium bismuthi, sub nomine *blanc d'Espagne* (v. cap. de BISMUTHO) alias notum.

§. 2402.

QUODSI nunc solutione hac nitri cubici cobaltini sympathetica in charta ducantur characteres, evanescunt prorsum charta frigente, redituri colore gramineo illa tepefacta.

§. 2403.

DUM vero cobaltum ope acidi muriatici solvitur, additio nulla requiritur cujuscunque substantiae, sed illam evaporationi exposuisse sufficit, salque obtentum in aqua destillata solvitur; unde patet, adjectum in priori operatione solutioni cobalticae sal commune solum parte acida, non vero alkalina generando atramento sympathetico inpendi.

§. 2404.

REFUTAT LEHMANNUS errores quosdam, qui in praeparatione atramenti sympathetici committi vulgo solent. Sic requisitum minime est, ut, ex praescripto nonnullorum, anatica, ratione ponderis, quantitas



titas salis communis cobalto ad solutionem primum adhibiti solutioni addatur; quum ex obposito dosi illa cobalto vere soluto aequalis esse debeat; quodsi ad hoc non attendamus, atramentum enatum sympatheticum corrosivum fit, et chartam rodit: etsi vero obviam incommodo huic ire liceat, paulo diutius producta ignis actione sub abstractione menstrui, ut sic acidum omne superfluum abigatur muriaticum, quum pars colorans cobalti, ceu basis atramenti sympathetici non majorem retineat acidi muriatici copiam, quam qua saturari valeat; etsi, inquam, hac ratione incommodo illi obviam ire liceat, operatio tamen haec ideo difficulter nonnisi perficitur, quum igne auctiori aut dissiliant retortae, aut massa remanens non ejus per totum fiat indolis. *) Didicit tamen experimentis LEHMANNUS, jam majorem nonnihil, jam minorem salis communis requiri dosin; quum utique non eadem ubique soluti corporis obtineat ratio.

§. 2405.

DIXERUNT praeterea plurimi, atramenti sympathetici colorem esse debere rubrum: erroneam hanc esse sententiam, jam C. GESSNERUS monuit; atque instantia cobalti Gollwitzensis Mannsfeldici, colorem viridem largientis, demonstravit. **)

§. 2406.

EVICIT etiam GESSNERUS, cobaltum acido nitri solutum, adfuso lixivio saturato alkalino ad fundum demittere pulverem subtilem rubellum: etsi autem vero consentaneum hoc sit, esse tamen, qui a regula generali exceptionem faciant, casus LEHMANNUS adnectit,

*) Die zurückbleibende Masse nicht schön egal wird.

**) AN vero GESSNERO nota fuit indoles niccoli? — de W.

neſſit, de quibus in ſubſequentibus adhuc recurret ſermo.

§. 2407.

ENARRAT jam AUCTOR noſter tentamina varia, quae cum diverſis cobaltis, acido nitri ſolutis, et alkalini ſalis ope inde deſecto pigmento inſtituit: antequam vero ipſa tentamina recenſeantur, ſequentia ex illo praemittenda ſunt.

§. 2408.

COBALTA experimentis adhibuit cruda, non uſulata, ex minerarum ſpeciminibus lecta — Aqua forti uſus fuit argento praecipitata, facta filtratione denuo deſtillationi ſubjecta; reliquis praeterea acidis nunquam non puriſſimis — Loco cinerum clavellatorum vulgarium ſelegit ſal tartari puriſſimum et oleum inde deliquio paratum. — Arenam recepit puriſſimam albam Freyenwaldenſem, et quarzum purum; utrumque toties repetitae calcinationi, et in aqua pura deſtillata factae extinctioni ſubjecit, donec terendo in mortario vitreo redigi poſſent in pulverem inſalpabilem; moleculas omnes abjecit, quae calcinatorio aëſtui expoſitae colorem album mutarent. — Sublimiori Chemiae in his tentaminibus nil detulit, illi ſacra parti ſecundae reſervans. — Pro canone catholico ſtatuit, quo rubicundiores, aut ex rubro ſuſcae ſint ſolutiones, eo ditiora pigmento eſſe cobalta experimentis adhibita, exceptis paucis illis, quae tum ſolutionem tum praecipitatum viridi colore tingunt. *) Non omnia menſtrua aequali ratione in omnes cobalti ſpecies agunt.

§. 2409.

*) HAEC vero non adeo cobalta ſunt, quam niccola, de W.



§. 2409.

TENT. 1. Unciam dimidiam cobalti flaventis Alspierbachensis Württembergiae, rubro colore efflorescentis, spatho calcareo et corneo nigro misti, in pulverem subtilem redactam sensim iniecit uncis binis aquae fortis, calore leniori solutionem promovit; scrupuli quatuor remanserunt irresoluti, nec addita quidem aquae fortis majori nonnihil dosi solvendi; solutionem filtratam adfudit drachmis duabus totidemque scrupulis salis communis in retorta vitrea contentis; illico enatus color obscure ruber: aquam regiam abstraxit a residuo magmate pulcherrime virente, ex quo, humido omni prorsum dispulso nitrum producebatur cubicum eleganter roseum; solutum hoc aqua destillata largiebatur atramentum sympatheticum optimum intense rubrum: dosi minima calcis albae ruebatur ad fundum, manifesto documento, vix quid bismuthi admistum cobalto illi fuisse: terra in filtro residua vitrum colore parum adeo coeruleo tinxit, ut coloris nomen ne quidem mereatur. Nunc dicta encheiresi et in sequentibus tentaminibus usus fuit, ut repetitio foret supervacua.

§. 2410.

TENT. 2. Ex Cobalti rubro coeruleo, viridique polline fatifcente obsessi, cupro nicolai (*Kupfernickel*) remisti, Gollwitzensis Mansfeldiae uncia dimidia $2\frac{3}{4}$ drachm. aquae fortis injecta remanserunt $2\frac{1}{2}$ drachm. non solutae, fusione *Speise* venereum largientes. Adjecta $1\frac{1}{2}$ drachm. salis communis, destillationeque instituta obsedit sub initium cremor viridis residuum magma; nitrum enatum cubicum virebat, refrigeratum eundem retinens colorem; aqua destillata solutum atramentum praebebat sympatheticum olivaceum, characteres eo scripti accedente calore pulchre virebant.

§. 2411.

§. 2411.

TENT. 3. Cobalti calcareo corneoque lapidi minimis particulis inspersi polline rubro fatiscantis Lauterbergensis aquae fortis drachmis 7. iniecit, solutio processit plurimum spumescens: residuum insolutum aequabat drachm. $1\frac{1}{2}$. color solutionis ruberrimus; additis 2. scrupulis salis communis olivaceus. Destillatione praemissa nitrum cubicum pallide virescens; solutum violaceum; paratum inde atramentum sympatheticum coloris laete graminei.

§. 2412.

TENT. 4. Drachmae duae cobalti compacti drusici Theuerdankensis Andreasbergae plurimum effervuerunt cum uncia dimidia aquae fortis, cito processit solutio materiei solubilis, remanente drachma unica cum scrupulo: solutio virescens; adjecta drachma salis communis color sordide fuscus: aqua regis lentissime prodiit in excipulum; magma obsedit cremor densior viridis (*Seladon*). Nitrum cubicum solutum colore pallide rubello; atramentum sympatheticum pulchrum (*cujus coloris?*)

§. 2413.

TENT. 5. Cobalti grysei, saxo arenario gryseo inspersi, polline rubro fatiscantis Wiegersdorfensis Hohensteiniae drachmae duae cum drachmis 5. aquae fortis praebebant solutionem rubram; insoluta mansit drachm. $1\frac{1}{2}$. Scrupulis 2. salis communis adjectis solutio fuscescens; nitrum cubicum flavum; atramentum sympath. pallidum.

§. 2414.

TENT. 6. Ex uncia dimidia cobalti nigri, firmae texturae, piceae, nunc dicti loci, adfusa uncia una
 V 2 aquae



aquae fortis remanserunt insolutae drachmae $2\frac{1}{2}$. Solutio fusca mista cum drachma una salis communis praebat nitrum cubicum viride colore psittacorum; atramentum symp. pallide rubrum; characteres co scripti coloris psittacei.

§. 2415.

TENT. 7. Cobalti chalybei (*Stahlderb*) bismutho remissi Kupferbergensis Silesiae drachm. 2. solvebantur ex integro in drachmis 6. aquae fortis; color solutionis pulchre rubens; adjectis drachmis binis salis communis nitrum cubicum viride pulchrum; atramentum sympatheticum ruberrimum, calore accedente eleganter virens.

§. 2416.

TENT. 8. Cobalti tinctorii plurimo bismutho misti ex Annae et Danielis fodina Schneebergensi Saxoniae uncia dimidia solvebatur ex integro in uncia $1\frac{1}{2}$ aquae fortis; color solutionis ex fusco ruber; adjecta uncia dimidia salis communis nitrum cubicum rubellum; atramentum sympath. pallide rubens; characteres pallide virentes. Adparet hinc, mineram sic dictam bismuthi non esse, uti olim credebant, basin atramenti sympathetici; ex illa enim, dicta ratione tractata, atramentum nullum enatum sympatheticum. Animadversionem hanc omnium primo Cl. GESSNERUS fecit.

§. 2417.

TENT. 9. Drachmae duae cobalti chalybei puri Joachimsthalensis Bohemiae solvebantur ex integro in drachmis sex aquae fortis; color solutionis flave-virens; adjectis drachm. 2. salis communis nitrum cubicum pulcherrime virens; solutio viridis, virides characteres. Ex cobaltis scoriformibus maximam partem color solutionis viridis.

§. 2418.

§. 2418.

ADTULIT LEHMANNUS tentamina adhuc novem alia, quae hic praetereo, quum haecenus expositis magis minusve sint analogae. Ex omnibus vero simul sumtis, inquit, patet: characterem indelebilem cobaltorum plerorumque, quin omnium esse, ut acidis (*acido nitri*) resoluta, sale communi *) remissa, nitrum largiantur cubicum **) aut, dum solutio acidii solius muriatici ope fit, evaporatione praemissa sal constituent, quod, aqua solutum, atramentum generet sympatheticum: nil vero interesse, quo colore pictum sit nitrum cubicum, aut atramentum sympatheticum, dummodo eo scripti characteres calore admodum virescant; quo intensior, et saturatior color viridis nascatur, eo ditius materie tingente esse cobaltum, ex quo paratum fuerat atramentum: hinc examen cobalti acidis factum tuto inter criteria praecipua illius reponendum esse: eadem ex ratione separari posse ex atramentis sympatheticis jam factis pigmentum aut praecipitatione per alkali fixum, aut abstractione.

§. 2419.

VERITATEM theseos nunc dictae Auctor institutis cum plusquam septuaginta diversis cobalti speciminibus didicit: patuit simul eo pallidius virere atramentum sympatheticum, quo majori arsenici dosi cobalta nupta fuerint: vidit et ex pyritibus nonnullis arsenicali-

V 3

*) In textu legitur: *dass solche mit einigen Acidis aufgelöst und mit dem Kochsalzsauren verbunden, ein nitrum cubicum -- geben müssen.* Facile vero patet, pro *acido salis communis* legendum esse *sal commune*, cujus utpote basis cum *acido nitri* solutionis cobalticae nitrum cubicum largiatur: simili negligentia positum fuit: *mit einigen Acidis aufgelöst.*

**) SEU potius nitrum enatum cubicum subeat,



nicalibus antea dicto modo tractatis nitrum nasci cubicum, quod, aqua destillata solutum, atramentum largiretur sympatheticum prorsum flavens: evincit hoc speciatim adducta quinque tentaminum historia.

§. 2420.

REFERT dein ex *Cl. GESSNERO*, cobaltum tractatum cum mercurio sublimato corrosivo relinquere in retorta pulverem sub initium flaventem, mox vero rubescentem in superficie, qui color aqua calida elui prorsum queat, remanente in illo vix non omni pigmento cobalti, adeo ut a residuo vitrum coeruleo colore non amplius tingatur. Idem phaenomenon nasci vidit *LEHMANNUS* ex miscela cobalti tinctorii cum butyro antimonii, et cum spiritu fumante Cassii. Diversitas tamen orta fuit, experimento adhibito cobalto nigro, de quo in subsequen- tibus recurret sermo.

§. 2421.

DEMONSTRARE nunc suscipit AUCTOR, qua ratione pigmentum cobalto inhaerens concentrari, et oculis subijci queat. Illico dictum fuit, ait, ope acidii muriatici concentrati partem cobalti colorantem exacte adeo extrahi posse, ut residua materies vitrum colore coeruleo non amplius tingat: dum vero pulvis obtentus ruber, aquam coloratam reddens, ab adhaerente acido aqua destillata eluitur, siccatur ac substantia tingens pura et concentrata obtinebitur.

§. 2422.

OPTIME autem oculis subijcitur pigmentum cobaltinum, dum, encheiresi *Gessneriana*, cobalti acido puro facta, et filtratae solutioni tamdiu lixivium cinerum clavellatorum instillatur, donec pulvis ruber aut roseus fundum non amplius petat. Pulvis hic edulcoratus maximam pigmenti sistet copiam; essi
simul

simul ad fundum deturbetur solutum bismuthum, quod tamen alia encheiresi demi denuo queat, sub vitrificatione etiam in reductis granulis occurrens facili negotio separandum.

§. 2423.

Quum tamen et hic diversitas quaedam a cobaltorum ipsorum diversitate producat, et pulvis non in omni experimento colore rubro deiciatur, quatuordecim hunc in finem LEHMANNUS instituit experimenta, ex quibus omnibus patescit, praecipitari ex omnibus ope acidi nitrosi solutis cobaltis posse pigmentum sale alkalino, nec adeo interesse, quoniam colore tingatur praecipitatum: plerumque tamen illum esse rubrum, rubellum, floribus lini (*gris de lin*) analogum, violaceum, hinc nunquam in rubicundum tendentem.

EXAMEN COBALTI VIA SICCA.

§. 2424.

PRAEMISSA curtiori suppellectilis docimastricae huic labori propriae enarratione, ipsum cobalti ignis ope perficiendum examen LEHMANNUS adgreditur: referam in compendio laborum praecipua momenta.

§. 2425.

COBALTI in pollinem subtilem terendo et cribrando versi centumpondia duo docimastrica (drachmae duae) in testa exponuntur actioni ignis furni docimastrici, sub continuata agitatione rutabulo ferreo, ne pulvis in grumos abeat, ac ut aequali ubique ratione ustuletur. Fugatur sic arsenicum, tum foetore, tum polline albo, quo rutabulum obducit, sese prodens. Protrahitur labor tamdiu, donec nil fere arsenici amplius



plius elevetur. *) Exemptus nunc pulvis cobaltinus effundatur in phialam ferream aut in mortarium ferreum terendus: quo sub labore magna satis arsenici portio adhuc avolat, unde a vaporibus cavendum. Massa refrigerata denuo teratur in subtilem pulverem, per setaceum trajiciendum, ponderis decrementum prodet quantitatem ustulatione fugati arsenici, quae vix non in omni cobalto diversa erit. Calida vero massa terenda non est, quum vapor arsenicalis Docimastae maximum adferre posset sanitatis detrimentum; quum praeterea cobaltum saepe non solum bismutho sed et galena plumbi remistum sit, cujus in gratiam refrigeratio praemittenda est, ne cobalto sub tritu illa admisceantur, sed in setaceo remaneant.

§. 2426.

NIMIA copia praesens bismuthum praevia eliquatione optime avellitur; hinc minera contusa crucibulum inpleatur, tegendum opereculo, admoveatur illi undique ignis, donec obscure candeat; is gradus caloris tamdiu producat, donec rutabulo, quo miscella frequenter agitanda est, indicet, bismuthum omne eliquatum nunc esse. Eximatur nunc igni crucibulum, et fortius nonnihil ejus feriantur latera, ut sic eo melius in apicem subsidere bismuthum liquatum possit. Residuum contusum eadem, uti ante dictum fuit, ratione tractetur. Idem scopus obtineri poterit, fusioni subjecta parte una minerae cobaltinae bismuthiferae cum partibus binis fluxus nigri. Commodissime haec fiunt in capaciore *dutta*, quum in vase hoc bismuthum

*) LABOREM non ad perfectam arsenici dispulsionem producendum indicant verba Auctoris: *Mit dieser Arbeit führt man so lange fort - - bis man gewahr wird, daß sich der Arsenick nur sehr sparsam an den Rührhacken anhänget.*

muthum facillime colligatur in unam massam; interspersis hinc inde reliquae massae granis nonnullis bismuthi, dum in crucibulo instituitur operatio.

§. 2427.

COBALTI, haecenus exposita ratione ustulati, in pol-
linem subtilissimum triti, centumpondium docimasti-
cum unum, arenae purissimae, candefactione, ex-
stinctione in aqua, tritu, elutriatione praeparatae, cen-
tumpondia tria, salis alkalini puri (optime hunc in
finem sal tartari purum seligitur) centumpondia duo,
aut duo cum dimidio, in mortario vitreo exactissime
invicem remista, ingerantur testae docimasticae majori,
octo circiter centumpondiorum capaci, aut, hoc de-
ficiente, binis minoribus, igni docimastici furni sensim
ad summum usque gradum aucto subiciantur. Dum
massa intumescit, testudini docimasticae, cui inposita
testa est, carbonem ingerantur minores non dissilientes,
probe candentes, ut undique illis cingatur testa, ignis
animetur folle minori, et massa docimasticae subiecta
saepius agitetur rutabulo ferreo candente, donec vi-
deamus vitrum eleganter coerulescere, arenam probe
liquatam totamque miscelam dilutam ex integro esse.
Eximatur demum vas, et vitrum aut mollius adhuc
separetur instrumento ferreo ab adhaerentibus hete-
rogeneis, aut frige facta massa tota idem fiat labor.

§. 2428.

ADVERT nunc LEHMANNUS experimenta sex circa
confectionem vitri coerulei ope cobalti. In primo
miscela facta drachm. 2. praeparatorum silicium,
drachm. 1. salis tartari, granorumque octo pigmenti,
oleo tartari per deliquium ex solutione cobalti Goll-
witzensis dejecti obtinuit vitrum saturate coeruleum;
utque in hoc quidem tentamine grana pigmenti co-
baltici octo tinxerant grana 240. arenae salisque tar-
tari;



tari; hinc a parte una versae fuerunt partes triginta in vitrum eleganter coeruleum.

§. 2429.

In altero tentamine miscuit drachm. 2. filicum, drachmamque unam salis tartari cum granis decem pigmenti cobaltici obtenti ex cobalto supra descripto Wiegersdorfeni prope Ihlefeld Hohensteiniae: vitrum enatum coloris amoene, sed pallide solum, coerulei: hinc pars una nonnisi partes 18. tinxerat. In tertio tentamine, ut rem paucis expediam, pars pigmenti, ex alio denuo, (quod et de subsequen- tibus valeat) cobalto producti, una tinxit partes 22½ frittae; in quarto tentamine tinxit pars una pigmenti partes 66. frittae; in quinto pars una pigmenti partes 10½ frittae. Experimento huic ultimo adhibitum fuit pigmentum cobalti nigri Saalfeldensis: miscuit LEHMANNUS dein grana decem terrae nigrae, facta solutione cobalti hujus, ac solutionis filtratione in filtro residuae cum drachmis binis praeparatorum filicum, et drachma una salis tartari: obtinuit hac methodo vitrum pulchrum coeruleum saturate coloratum: ex quo patet, illo monente, speciem hanc cobalti nigri a reliquis omnibus differre, quum acidi nitri ope non omne pigmentum educatur.

§. 2430.

ADICI nonnunquam solet miscelis ante dictis Speise (qua sub voce in universum miscela denotatur partium arsenicalium, metallicarum et semimetalliarum) quum particulis colorantibus orba prorsus non semper sit; hunc in finem docimasiae, ratione prius dicta, subji- cienda: vitrificatio simul, illius beneficio, arenae redditur facili- or: examinari tamen debet, quam cupri recludat dosin cobalti minera, quum non exigu- a illius in colorem oriturum sit actio. — Errant pluri-

plurimum cobaltorum Docimaestae, dum, promovendi fluxus gratia, calces plumbi adjiciunt, ratio ex principiis chemicis haud erit obscura.

§. 2431.

SUPEREST vitri obtenti coerulei elutriatio, (*das Probeverwaschen des Glases.*) Ab heterogeneis omnibus moleculis depuratissimum vitrum confringatur in particulas lentem circiter dimidiam aequantes, mallei ope, corio russo interjectum *); teratur tum in mortario vitreo pistillo vitreo in pollinem subtilissimum, pulveris demum elutriatio fiat ope aquae tepidae, quae turbida effundatur in phialam murrhynam; repetatur id saepius, moleculas crassiores fundum citius petentes denuo terendo, atomos vero subtilissimos tollendo; quamobrem vasis pluribus murrhynis (LEHMANNUS sex praescripsit) ex ordine opus est.

§. 2432.

ADPLICATIO tentaminum horum ad majores labores ex sequenti schemate dilucidabitur:

Ad manus v. c. sunt quatuor cobalti species: A. B. C. D. ex quibus miscela fieri debeat: singulae tamen species aliam foveant pigmenti quantitatem, adeo ut A. 9. B. 8. C. 4. D. 3. partes arenae jungi queant. **) Fiat jam ex his omnibus miscela, ut a 4. partibus cobalti tingantur partes 24. arenae; seu, ut pro centum pondio uno cobalti recipiantur centum pondia 6. arenae:

*) SUADET hoc LEHMANNUS non abs ratione, tum ne ferrum aut aurichalcum, a mortario tritu avulsum, misceatur pulveri; tum, ne majori, qua sub initium opus est, vi mortarium vitreum diffringatur.

**) SIC utique sensus est: vitio enim, ut reor, typi in textu legitur: - - *es vertringe z. E. A. 9. u. f. w.* ubi legendum est: *es verträge &c.*



arenæ: quæ itaque cobalti cujusvis recipienda ad mæscelam erit dōsis? Procedatur hac ratione:

1. Centumpondium cobalti A. tingit 9. centump. arenæ.							
—	—	—	B.	—	8.	—	—
—	—	—	C.	—	4.	—	—
—	—	—	D.	—	3.	—	—
<hr/>							
4.	—	—	—	—	24.	—	—

Quorum centumpondiorum quodvis 120. libras, ponderis montanistici (*Hüttengewicht*) continet.

Jam dico: A. et D. tingant centumpondia duodecim A. vero duplo majorem quantitatem tingit quam D.; hinc de cobalto D. duplo major dōsis erit, quam de cobalto A.; quum autem duobus centumpondiis cobalti jungenda sint duodecim centumpondia arenæ, recipere debeo de cobalto A. centumpondium dimidium, seu libras 60., duplum vero de cobalto D, huic centumpondium unum cum dimidio, seu libras 120. Præterea B. et C. tingi pariter debent centumpondia duodecim arenæ; B vero duplo majorem copiam tingit, quam C.; hinc et duplo major quantitas erit recipienda de cobalto C., seu recipere debebo de cobalto B. libras 80, de cobalto C. libras 160. in regula arithmetice ponatur sic:

de cobalto A.	—	60 lb.	tingunt	3. Centump.
— — B.	—	80 —	—	4. —
— — C. 1. Centump.	40 —	—	8.	—
— — D. 1. Centump.	60. —	—	9.	—
<hr/>				
4. Centump.	lb	—	24. Centump.	arenæ.

Ex quo patet hic, uti in aliis operationibus monetariis ac docimasticis, ope regulæ sic dictæ adligationis rem perfici.

HACTE-

HACTENUS dicta compendium exhibeant partis primae *Cadmiologiae* LEHMANNIANAE, quatenus in rem nostram videbatur requisitum.

§. 2433.

ALTERA *Cadmiologiae* pars agit de cobalto nigro pulverulento (*mulmigt*) Saalfeldensi; de arsenico in cobalto contento, de auro et argento cobalto admistis, et de massa metallica, quae vulgo sub nomine *Kobold-speise* nota est. Adducam et ex hac parte nonnisi Chemiam propius concernentia.

§. 2434.

DEFINIT LEHMANNUS Cobaltum hoc nigrum *Saalfeldense fodinae Principis ERNESTI FRIDERICI* *), substantiam mineralem nigram, ochra hinc inde remissam, texturae rarioris, manus nigro colore inficientem, facta solutione in acido salis, formicarum, vitrioli, phosphori, partim et in-acido nitri, et aceto destillato spathum album, ponderosum, feulentium relinquentem, facta vero praecipitatione partim in menstruis dictis vere solutae ope salis alkalini puri terras vitrescibiles in vitrum coeruleum redigentem. Absolvitur, ait, definitione hac, quae nec secundum externum solum habitum, nec secundum relationes unice chemicas facta fuit, verus et genuinus character specificus hujus ejusdem cobalti.

§. 2435.

PRAEMISSIS monitis generalioribus circa formam externam cobalti nigri, substantias minerales illi vicinas, puritatem, ac indolem menstruorum adhibitorum &c. Auctor ipsam orditur tentaminum, quae cum substantia hac instituit, octoginta et unius enarratio.

*) VON Prinz Ernst Friedrichs Fundgrube.



rationem. Conabor arctioribus nonnihil limitibus illam coërcere.

§. 2436.

TENT. 1. Ab aqua destillata solvebatur una cum adhaerente ochra; eadem quoque specifica gravitate donata ambo fundum junctim petiere. Suspiscatur LEHMANNUS cobaltum hoc, eadem ratione, uti ochra admista minera martis (verba ejus sunt) aut destruetta, aut initiata est, aut principia continere cobalti nigri scoriformis, (*Schlackenbold*) aut ex hujus fatiscantis reliquiis oriri.

§. 2437.

TENT. 2. Materiem nigram cobaltinam aqua destillata ex contusa minera eluere incassum tentavit; interjecto lamellis spathi selenitici plurimo cobalto, aquae ope non elutriando.

§. 2438.

TENT. 3. Ex ustulato, sub testudine docimaistica vulgari, odor fortis ascendit sulphureus, arsenici, cobalti alias magni adeo amici, nulla, oculo naribusque judicibus, vestigia.

§. 2439.

TENT. 4. Igne violento adhibito destillatorio adparatu guttae paucae laticis extortae, quas ab retortae adhaerente halitu (*von dem Schwitzen der Retorte*) potius quam ex ipso cobalto deducere mavult LEHMANNUS; ex uncia minerae dimidia scrupulus dimidius retortae, ignis vi liquatae, substantiam subiecit, vitrum colore coeruleo inde tinctum. Color cobalti obscure fusco-rubens.

§. 2440.

§. 2440.

TENT. 5. Testudini docimasticae, postica parte et ex lateribus probe clausae, inposita uncia dimidia cobalti, ignis vegetus per bihorium admotus, nec sulphuris nec arsenici nunc odor: Cur vero adfuerat in *tent.* 3. ? generatum ibi autumat LEHMANNUS ex connubio phlogisti carbonum cum acido vitriolico spathi selenitici; quod in praesenti tentamine, intereluso phlogisticis halitibus aditu, fieri non poterat.

§. 2441.

TENT. 6. Ut eo certior foret, phlogiston, quod cum acido vitrioli sulphur constituerat, a cobalto non profectum esse, tritu miscuit drachm. unam cobalti nigri cum anatica dosi mercurii sublimati corrosivi, miscela sublimationi exposita in cucurbita. Mercurius, ne grano quidem redditus levior, petiit summa; residuum 3j. gr. XVij. pondere aequabat, fuissefcens.

§. 2442.

TENT. 7. Eandem ob rationem anaticam denuo 3j. quantitatem cobalti nigri, et arsenici purissimi supra sal tartari depurati, probe mistam sublimationi dedit: ascenderunt arsenici purissimi crystallini, nulla flavicante atomo tincti 3ij. gr. viij. cobaltum aequavit 3j. gr. xij. quod ponderis augmentum in se raptò arsenico debuit.

§. 2443.

TENT. 8. Cum nitro candente cobaltum hoc ipsum nullam excitavit detonationem; avolarunt solum paucissimi vapores rubri.

§. 2444.

TENT. 9. Ex miscela anatica 3j. nitri depurati et cobalti prodierunt, adparatu destillatorio, igne validiori



diori adhibitis 6 — 8 guttae liquidi grate aciduli. Residui color non mutatus, cobaltum cum nitro in unam confluit massam.

§. 2445.

ADPARET ex his omnibus, in cobalto hoc nec sulphur contineri, nec phlogiston subtile adeo, ut cum acido vitriolico sulphur constitueret.

§. 2446.

EXAMINANDUM nunc erat, an nil arsenici in illo lateret; etsi quidem ope *tentam.* 3. 4. et 5. nulla ejus detecta fuerint vestigia. Retulit vero III. MARGGRAFIUS AUCTORI, arsenicum fixum adeo corporibus haud raro inhaerere, ut omnem eludat decimatiā, detegi tamen haud difficulter, admoto phlogisto: confirmavit MARGGRAFIUS sententiam suam instantia vitri crystallini, quod arsenicum ingreditur. Vasis enim exemptum, in quibus nunc fusum fuerat, arsenicum nulla ratione prodit, facile tamen detegendum bacillo ligneo illi admoto.

§. 2447.

TENT. 10. Candenti itaque prorsum pulveri cobalti nigri, quod testudini decimasticae undique clausae inposuerat, addidit majorem dosin scobis piceae: vaporem resinofum solitum sub combustionē lignum exhalavit; arsenici nullum indicium.

§. 2448.

TENT. 11. Tractato in retorta vitrea loricata cobalto cum carbonum pinei ligni pulvere, paucae prodierunt in excipulum guttae liquidi inspidi inodori; nil in sublime elatum, nulla coloris mutatio; nullum itaque ex his omnibus arsenici vestigium.

§. 2449.

§. 2449.

TENT. 12. Anatica 3j. dofis cobalti nigri, falis-
que purissimi tartari in retorta vitrea igni arenae ex-
posita. Nil in excipulum prodiit, nil sublimē pe-
tiit; residuum in unam compactum massam, colore
non mutato.

§. 2450.

TENT. 13. Nunc ad examen cobalti nigri, ceu
substantiae vitrum colore coeruleo tingentis. Cobalti
sub testudine clausa calcinati 3j. arenae purae albae 3j.
falis tartari 3ij. miscuit, fusioni per bihorium in cru-
cibulo clauso exposuit furni anemii igne adhibito.
Confluxit massa in vitrum colore amoeno et intenso
coeruleo praeditum. Idem cum cobalto non calca-
to eventus.

§. 2451.

TENT. 14. Ut videret, an ex cobalto eadem ut
ex multis aliis ratione *Speise* obtineri queat, fusioni
subjecit cobalti 3ij, tartari 3ij. nitri puri 3ij, per bi-
horium in vase clauso: enata massa spongiosa, pul-
chre coerulefcens, humidum aëreum nonnihil adtra-
hens, non tamen diffuens, quin adeo indurefcens,
ut vix ab aqua solveretur: nullum *Speise* vestigium:
idem denuo cum cobalto calcinato eventus.

§. 2452.

TENT. 15. Cobalti nigri 3j, falis tartari 3ij, mi-
scuit, per bihorium in vase clauso igni anemio ex-
posuit, nata fuit massa pulchre coerulefcens, compa-
cta satis, humidum non adtrahens, solutionem in
aqua pariter respuens: idem cum cobalto calcinato
eventus.

§. 2453.

Quum sicca non sufficeret, humidam tentavit
viam, ceu lenissimam, inprimis quum pleraeque co-
balti



balti minerae experimentis adhibendae, forent drusicae, atque hinc figuram suam, fors et crasin solutioni cuidam in acceptis referre viderentur.

§. 2454.

INJECTA 3j cobalti pulverisati aquae regiae (dosis non additur) partibus octo acidi nitri, parteque una salis ammoniaci depurati, in illo soluti: in cobaltum agebat menstruum vivacissime; exposuit vas leniori digestioni; elapsa nondum hora cobaltum omne solutum vidit, residuo solum spatho selenitico: solutio obscure fusca, filtrata colorem eundem obtulit dilutiorem, cerevisiam sic dictam fuscam (*Braunbier*) puram, limpidissimam aemulantem.

§. 2455.

TENT. 17. Injecit 3j cobalti 3j acidi salis communis; orta ebullitio summa, cum explosione vaporum maxime suffocantium vix tolerabilem. Adfudit sensim acidum salis recens, quamdiu procedebat solutio, adfusus unciiis sex tandem silens; solutio filtrata pulchrum colorem fusciorum exhibuit; remansit spathum album, splendens, seleniticum, ponderosum, peracta edulcoratione et exsiccatione 3℥. adpendens.

§. 2456.

TENT. 18. Adfudit 3j cobalti 3ij acidi nitrosi. Valida illico nata ebullitio, nulla tamen vaporum rubrorum explosio; durante solutione nigrescens ejus color; igne digestorio solutionem non amplius promovente, laticem colorem florum persicorum nunc exhibentem decantavit, adfudit residuo recens nitri acidum; reiteratis operationibus acidi quindecim unciiis opus nec tamen omne cobaltum ex remanente spatho extrahere potuit, quum gryseum obferret colorem,



lorem, etsi non amplius tangeretur ab acido. Patet hinc, menstruum hoc cobalto nigro referando non esse aptissimum.

§. 2457.

TENT. 19. Mistas cum ℥xij aquae destillatae olei vitrioli ℥iv adfudit 3j cobalti nigri sensim repetitis vicibus, donec igne digestorio non segni adeo adhibito in cobaltum agere inciperet. Solutio filtrata colore pulchro intense granatino donata. Sed ne hujus quidem acidi ope cobaltum omne amplexibus ereptum spathi. Repetit operationem; et cobaltum una cum acido per octiduum digestionem dedit: soluta sic substantia semimetallica omnis remanente spatho selenitico albo.

§. 2458.

TENT. 20. Ab acido phosphori violenter adficiatur cobaltum hocce; digestionem per 16. horas protracta color solutionis eleganter amethystinus; remansit spathum album soluto illius interstitiis inhaerente cobalto omni.

§. 2459.

TENT. 21. Egerunt cum strepitu ℥vj. acidi formicarum sensim adfusae in 3ij cobalti nigri: extracta substantia cobalti omnis, remanente spatho albo; solutio eleganter rosea.

§. 2460.

TENT. 22. Adfusae sensim librae duae aceti destillati 3j. cobalti nigri; illico natum solutionis tranquillum initium. Vase per 4. septimanas fornaci inposito, readfuso saepius aceto recenti non ex integro tamen solutum cobaltum. Filtrata solutio pulchre virens.



§. 2461.

TENT. 23. Zij cobalti ne minimum quidem afficiebantur ab Zij. olei tartari purissimi: etsi digestioni validiori diu exposita fuerit miscela.

§. 2462.

TENT. 24. Nec felicior in usum vocato spiritu salis ammoniaci cum sale alkalino fixo parato eventus; color liquido solum accessit exiguus thalassius (*aqua-marinfarben*), natus a praesente in cobalto venere, de quo mox pluribus agetur.

§. 2463.

PERACTIS hisce cum menstruis acidis et alkalinis tentaminibus, evaporationi exposuit obtentas solutiones, atque sequentia inde oriri vidit phaenomena.

§. 2464.

TENT. 25. Solutio cobalti mediante aqua regis facta dedit sal crystallinum cubicum *) intense virens; solutum hoc tripla dosi aquae destillatae largitum fuit atramentum generosum sympatheticum.

§. 2465.

TENT. 26. Solutio cobalti muriatica evaporatione praemissa dedit massam viridissimam crystallinam; crystalli cuboideis, a nitro cubico tamen diversis. Cum tripla parte aquae destillatae sal hoc dedit atramentum sympatheticum optimum. Evincitur tentamine hoc, falsum esse praecjudicium, cobaltum atramentum sympatheticum non producere antequam mista sit terra alkalina (*sal alkalinum*) salis communis cum acido nitri.

§. 2466.

*) SAL hoc LEHMANNUS nitrum dixit cubicum; quod quidem, si ad partem solum attendas acidam nitrosam, in aqua regia contentam, admitti poterit.

§. 2466.

TENT. 27. Ex solutione nitrosa cobalti crystalli, forma nitro regenerato maxime analogae; aqua destillata solutae nullum praebebant atramentum sympatheticum; oriturum, debilius saltem, si acido nitri acidi muriatici quid adhaesisset.

§. 2467.

TENT. 28. Ex solutione nitrosa cobalti, ope acidi nitri vulgaris facta, crystalli natae roseae; solutae haec aqua destillata atramentum constituebant sympatheticum pallidius. Patet hinc, quanta in rebus chemicis opus sit cautela; quanta saepe a diversa mensuorum puritate diversitas.

§. 2468.

TENT. 29. Ex solutione vitriolica cobalti crystalli ortae ruberrimae, Kermesino pulveri analogae, figura vitriolum Zinci intense rubrum *) referentes: aqua destillata solutae atramentum sympatheticum nullum largiebantur. Est hoc, LEHMANNUS ait, vitriolum rarum illud, cum gallis turcicis solutionem nigram non producens, quod Auctores nonnulli Bismutho deberi clamitarunt; etsi tamen rem exactiori scrutinio subjicientes detegere potuissent, crystallos illas rubras nonnisi pigmento cobaltico, per acidum vitriolicum educto, constare: exigua enim quantitate miscelae terrae siliceae, salisque alkalini fixi adjectae vitrum largiuntur coeruleum pulcherrimum. Quum vero in crystallis his ferrum non contineatur, singulare phaenomenon haud est, vitriolum rubrum cum gallarum tinctura atramentum non constituere: adtentione vero

X 3

dignum,

*) POSSIDEO ipse vitriolum roseum ex Neosoliensi Hungariae fodina; sed in hoc manifesta cobalti vestigia.
de W.



dignum, LEHMANNO monente est, acidum vitriolicum ex cobalto illo nonnisi pigmentum educere, intacto, quod ei simul inhaeret, ferro.

§. 2469.

TENT. 30. Ex solutione cobalti per acidum phosphori facta nullae exortae crystalli; mellaginis adinstar unctuosum mansit residuum.

§. 2470.

TENT. 31. Ex solutione ope acidi formicarum facta sal rubellum, figurae singularis (non tamen eam AUCTOR determinavit); cum aqua destillata atramentum sympatheticum non dedit.

§. 2471.

TENT. 32. Ex solutione acetosa sal violaceum, humidum aëreum adtrahens, cum aqua destillata atramentum sympatheticum non praebens.

§. 2472.

TENT. 33. Solutio thalassia per spiritum salis ammoniaci facta substantiae cupreae *) minimam portionem reliquit.

§. 2473.

ADGREDITUR, his expositis, LEHMANNUS historiam praecipitatorum ex solutionibus antea descriptis per oleum tartari purissimum obtentorum, calente edulcoratorum, siccatorum.

§. 2474.

TENT. 34. Ex solutione per aquam regiam facta praecipitatum coloris florum lini (*gris de lin.*)

§. 2475.

*) Ein kupfrigtes Wesen.

§. 2475.

IDEM color praecipitati ex solutione cobalti nitrofa, formicata, phosphorica, tum et, encheiresi praecipitationis vulgari adhibita, ex vitriolica.

§. 2476.

TENT. 35. Pulchre coeruleo vero colore pictum praecipitarum solutionis vitriolicae, in usum vocata encheiresi, qua in praecipitatione coerulei berolinenfis utimur, effundendo nempe laticem repetitis vicibus ex uno vase in aliud: color nec exsiccatione moderatori tollitur; phaenomenon hoc ipsum Auctor fortuito casu didicit, vase ad praecipitationem iusto minori usus, hinc ob natam effervescentiam, miscellam in aliud effundere coactus. Post quamlibet instillationem salis alkalini, solutionem denuo in aliud vas effudit.

§. 2477.

AUTUMAT LEHMANNUS, methodum illam arcanam, colorem coeruleum ex cobalto abs vitrificatione educendi, quam olim invenit, secumque ad inferos tulit Pharmacopoeus aulicus Saxonicus LINCKE, eadem fors ratione perfici. Natus et in ante descriptis tentam. 14. et 15. color coeruleus, quin accessisset vitrificatione.

§. 2478.

TENT. 36. Ex solutione muriatica praecipitarum dilute fuscum.

§. 2479.

TENT. 37. Ex solutione acetosa praecipitarum margaritaceum.

§. 2480.

TENT. 38. Ex solutione muriatica per spiritum salis ammoniaci praecipitarum multum, illico denuo solvendum; adjecta majori dosi praecipitantis lapsus



pulvis coloris florum lini, liquidum huic incumbens intense violaceum.

§. 2481.

EXAMINANDA nunc relatio cobalti soluti ad alia corpora. Tentamina nunc exponenda LEHMANNUS ratione sequenti instituit. Solutionis purissimae corporis, cuius relationem ad cobaltum explorare volebat, partem quamdam infudit vitro puro cylindrico, addidit huic anaticam dosin solutionis cobalti muraticae, vitrum clausit, atque per quinquiduum quieti tradidit. Materiem per temporis hocce intervallum depositam per filtrum egit, reliquae parti instillavit oleum tartari per deliquium, praecipitatum filtratione denuo separavit a liquido, exsiccationi dedit.

§. 2482.

TENT. 39. Solutio auri in aqua regis composita octo partibus acidi nitri parteque una salis ammoniaci depurati, adfusa solutione cobalti nigri ex fusco flavescibat, praeterea non turbata. Addito sale alkalino totum colore florum lini dejectum; ex liquido natum nitrum cubicum pallidissime rubens, atramentum cum aqua destillata sympatheticum non praebens.

§. 2483.

TENT. 40. Ut videret, an aurum hocce cobalto unitum admisto alkalino volatili sale dotes fulminantes exserere posset, addidit drachmae uni auri aqua regia soluti anaticam partem solutionis cobalti muraticae; quum nil denuo turbaretur, instillavit sensim spiritum salis ammoniaci, donec nulla amplius nasceretur effervescencia, nilque fundum peteret. Liquido filtrato praecipitatum obtentum flavicans; edulcoratum hoc, et siccatum, igni expositum, non fulminavit.

§. 2484.

§. 2484.

TENT. 41. Solutione lunae purissimae in acido nitri mista cum solutione cobalti muriatica dejectum argentum in lunam corneam, comitante tamen simul cobalto, illico denuo resolvendo; filtrum transiit solutio cobalti rubella, dejicienda per sal alkalinum abs effervescencia colore rubente.

§. 2485.

TENT. 42. Cupri solutione cum solutione cobalti mista nullae turbae, color vero natus viridis elegans; cuprum cum cobalto ab alkalino sale colore viridi dejectum. Praecipitatum hoc spiritui salis ammoniaci colore pulcherrimum cyaneum dedit. Notandum, adfusa solutioni cobalticae solutione venerea, illam fuscam semper incumbere venereae; unde adfusio tamdiu protrahenda, donec miscela tota pulchre vireat.

§. 2486.

TENT. 43. Mista solutioni cobaltinae jovialis, aqua regis facta; nullae turbae; color fuscus; praecipitatum ab alkalino sale coloris florum lini.

§. 2487.

TENT. 44. Admista solutioni cobaltinae solutione saturnina nitrosa, ortum praecipitatum saturni cornei; cobaltum non videbatur admistum solutione rubra filtrum transiens; ab alkalino sale praecipitatum colore florum lini.

§. 2488.

TENT. 45. Admista sol. cob. solutione martiali nitrosa, turbarum quid; media hora elapsa pulvis ochraceus dejectus; ex solutione incumbente, flavidissima, filtrata sale alkalino dejectus pulvis obscure fuscus; liquidum, quod peracta praecipitatione trans-



ierat filtrum, pallide flavebat: evaporatione praemis-
sa vix grana duo pallide flaventis ochrae dimittens.

§. 2489.

TENT. 46. Admista sol. cob. solutione mercuriali
nitrosa orta quidem praecipitatio albida, illico tamen
denuo evanescens. Sale alkalino lente adfuso fundum
petiit pulvisculus, pariter mox evanidus; sale demum
alkalino majori copia addito lapsus pulvis colore ele-
gantissimo florum lini donatus.

§. 2490.

TENT. 47. Admista sol. cob. solutione Zinci ni-
trofa nullae turbac; ab alkalino sale versa illico in
magma pallide rubens; paucis horis elapsis fundum
petiit pulvis coloris florum lini.

§. 2491.

TENT. 48. Admista sol. cob. solutione bismuthi
nitrosa nullae turbac, solutio dilute fusca, dejicienda
ab alkali colore ex coeruleo margaritaceo.

§. 2492.

TENT. 49. Admista sol. reg. antimonii nitrosae
solutione cobalti nullae turbac, sub initium nil ab
alkalino sale dejectum, nata semper redissolutione
praecipitati; natum tandem praecipitatum coloris flo-
rum lini.

§. 2493.

TENT. 50. In pulverem redacti cobalti tinctorii
Rappoldensis Schneebergae, bismuthum plerumque
simul vehentis partem unam miscuit cum dupla por-
tione fluxus nigri; miscelam pluribus indidit cruci-
bulis, in superficie strato salis communis textit, fu-
sioni subjecit, massam fusam cono fusorio aurichalceo
injecit, ut subsiderent partes graviores facilius, latera
coni

coni fortius percussit, atque sic demum obtinuit regulum, cujus inferiorem locum tenebat bismuthum, medium illi incumbens *Speise* cobalti, summum vero scoria coerulea, humidum atmosphaericum adtrahens.

§. 2494.

SPEISE hoc separavit ab adhaerente inferius bismutho, et insidente scoria, et viginti quatuor ex ordine repetitis vieibus fusioni dedit cum tripla arenae Freyenwaldensis et dupla salis alkalini dosi ad unam dosin reguli, donec demum, pigmento omni educto, vitrum colore coeruleo non amplius tingeretur. *Speise* quavis operatione natum semper denuo fudit, ac, prout possibile foret, liberavit a bismutho fundum petente. Omne tandem *Speise* simul fudit, modulo cylindrico iniecit, partem aquae regis indidit, solutionem igne leniori digestorio promovit: aliam partem acidi nitrosi ope solvit.

§. 2495.

TENT. 51. Solutionem hanc nitrosam admiscuit solutioni cobalti; nil dejectum: ab alkalino sale exturbatus pulvis margaritaceus: idem cum solutione regali phaenomenon.

§. 2496.

TENT. 52. Ab admista solutione platinae per aquam regiam facta nullae turbac: ope salis alkalini pulvis ex flavo rubens dejectus.

§. 2497.

TENTAVIT etiam solutionis expositae cobalti relationes ad metalla nondum soluta, singularis tamen, ait, nil obvenit, quum paucissima salis acido paterent. Circè miscelas etiam solutionum cobalti per alia acida cum metallis non nisi sequens notatu dignum observavit phaenomenon.

§. 2498.



§. 2498.

TENT. 53. Infudit solutionem cobalti nitrosam vasi vitreo cylindrico, inposuit illi bacillos ferreos politos purissimos: illico in ferri superficiem dejecta venus; abstulit praecipitatum, bacillos denuo inposuit, atque operationem tamdiu repetiit, donec nil amplius deponeretur. Per filtrum misit residuum liquidum, partes duas aquae destillatae addidit, iniecit Zincum destillatione depuratum: calorem admovit lenem digestorium: solvi sic Zincum, dejici exigua portio ferri forma metallica, copiosa forma ochracea dilute fusco colore. Dum nil amplius menstruum subiret, filtravit liquidum, colore rubello transiens: hujus drachmas duas miscuit cum sesquiscrupulo salis communis: evaporatione praemissa natum sic nitrum cubicum pulcherrimum; ex hoc vero aqua destillata soluto atramentum optimum sympatheticum.

§. 2499.

RELIQUAM solutionis partem per aliquot dies in vase vitreo puro, probe obturato reposuit, lapsa sic ad fundum grana circiter sex calcis albensis, quem a Zinco repetebat Auctor, filtratione illam separavit, solutionem rubicundam obtentam sale alkalino miscuit: ortum illico coagulum, praecipitato pallidissime rubente subtilissimo, levissimo liquido interjecto. Natus color pallidus a subsidente simul calce alba Zinci colorem aliunde dilutum satis florum lini eo magis infringente. Praecipitationem eandem ferri, pulveremque pallidulum produxit immerso nitrosae cobalti solutioni Zinco, non dejecta antea venere.

§. 2500.

PATET hinc, ait, manifeste, in cobalto, ex interstitiis spathi selenitici jam educto contentum fuisse cuprum et ferrum; nec objecisse juverit, adhibuisse

me ferrum pro deijcienda venere: praecipitatus namque per Zincum ex solutione Mars fuit, quin cuprum separassem.

§. 2501.

EXACTIUS nunc in naturam obtentorum praecipitatorum inquisiturus, varias eorum cum spiritu salis ammoniaci, veneris lapide lydio combinationes instituit, nunc enumerandas. Acida non adhibuit in hunc finem, ne antea jam late descriptae denuo exurgerent solutiones; olei tartari per deliquium ope autem, omni licet adhibita cura, perficere nil potuit.

§. 2502.

TENT. 54. Uncias duas spirit. sal. amm. adfudit unciae semis praecipitati per sal alkalinum ex solutione cobalti muriatica dejecti. Minutis paucis elapsis color natus pulcherrimus saturate violaceus; saturatione sufficienti peracta liquorem per filtrum sensim misit, residuo recentem spir. sal. amm. adfudit, atque id tamdiu repetiit, donec nullus amplius extraheretur color. Evasis sic paulatim spiritus ex violaceo obscuriori dilutior, amethystinus, ruber rubellus, demum omnino manens excolor: ad unciam semis praecipitati unciae viginti quatuor spiritus requirebantur. Optime vero hac encheiresi cuprum educitur. Praecipitata etiam omnia reliqua, colore florum lini, aut rubello ex omnibus antea dictis acidis dejecta, quin et alia, nata ex unione solutionum cobalti cum metallorum solutionibus, urinosum spiritum eadem ratione tingebant. Adfuso autem spiritu nunc dicto viridi praecipitato, exorto ex miscela solutionis cobalti cum solutione venerea, illico ferit oculos color pulcherrimus, saturatissimus florum cyani, quod quidem eo minus mirum videatur, quum cuprum una cum cobalto dejectum foret, hinc praecipitato



rato majori copia adhaerens. Descripta nunc ratione sese gessit cobaltum artificiale, viride, ex cobalto vulgari *Lauterbergensi* *) a LEHMANNO paratum, et *Academiae regiae scient. Berolinensi* oblatum.

§. 2503.

VENEREAM hanc extractionem retortae vitreae dein commisit, spiritum urinosum calore leniori arenae ad ficcitatem usque evocavit: prodiit primum forma sicca sal volatile, dein ab insequente aquoso liquido resolvendum; remansit demum pulvis fuscus umbraceus ℥iv. gr. xvj. pondere, a spiritu salis ammoniaci resolvendus, colorem cyaneum producens. Praecipitatum ab extractione in filtro residuum ℥ij. gr. iv. pond. pallide fufcescens, ℥ij. gravius redditum; solvit hoc Auctor acido salis, solutionem filtravit, ferrum Zinci ope dejecit, grana duo circiter ponderans. Oleo tartari p. del. ex solutione nunc dicta rubello-flavente praecipitavit pulverem coloris Isabellini; liquidum turbidum filtrum transiit, sapore submuriatico linguam adficiens; evaporationi expositum denuo sale alkalino dejecit; natum nunc praecipitatum rarioris texturae flavo-rubellum; liquidum per filtrum meavit limpidum, evaporatione praemissa speciem salis communis regenerati (digestivi Sylvii) reliquit.

§. 2504.

TENT. 55. Cuprum nunc detectum satis; ut et ferrum manifestius detegeretur, ℥i℥ solutionis cobalti muriaticae ℥j Zinci purissimi addidit: nata illico solutio ebulliens; fundum petente ferro forma floccorum nigerrimorum splendentium. Liquido demum filtrato, edulcoratione residui praemissa invenit gr. vij Ferri dejecti, magnetem lubentissime sequentis. Ex liquido pulchre rubente diluto, oleo tart. p. del. praecipitavit

*) Von der frischen Lutter zu Lauterberg.

precipitavit pulverem eleganter roseum: liquor praecipitato pulveri adhaerens colore flavo-rubente filtrum denuo transiit, alkali sal pulverem albo-rubellum ex eo exturbavit; nunc vero, limpidum prorsus, praecipitatum nullum amplius continuit, evaporatione praemissa speciem salis digestivi Sylvii largiens.

§. 2505.

DEMONSTRATA itaque et ferri praesentia in cobalto nigro, Lehmannus tentavit, qui ex praecipitatis antea descriptis colores possent obtineri. Praemisit vero, ante tentaminum enumerationem, monita sequentia.

§. 2506.

PRAECIPITATA omnia calida optime edulcoravit, aëri in vase tecto, ut siccarentur, exposuit.

§. 2507.

SAL alkalinum ex sale tartari puro petiit.

§. 2508.

ARENAM recepit puram Freyenwaldensem, ex qua in fabrica Neostadtensi ad Doffam specula conflantur.

§. 2509.

MISCELAS factas alkalini salis, praecipitati cujuslibet cobaltici ac arenae crucibulo quasvis novo haffia-co, aut, si grana suspicaretur metallica, *duttæ* indidit; vasa exacte tecta, juncturis luto firmatis, in furno anemio pedicello majori inposuit: plures binis una vice nunquam furno commisit; ea simul illa ab invicem removit distantia, ut vase fors rupto, aut materie illud transcendente, ex uno in alterum intrare nil posset. Ignem ad minimum per bihorium quavis operatione produxit. Vasa antequam prorsus frige facta forent, non diffregit.

§. 2510.



§. 2510.

TENT. 56. Praecipitati cobaltici ex solutione cobalti regali (*v. tent. 16. praeced.*) per ol. tart. p. del. dejecti gr. viij, arenae Freyenwaldensis 3j. gr. iv. falis tartari ʒij, (hinc arenae part. 8. alkalique falis part. 5. ad unam partem praecipitati) vitrum dederunt pulchre coeruleum, satis firmae texturae.

§. 2511.

PRAECIPITATI cobaltici ex solutione muriatica (*v. tent. 17.*) gr. 8. arenae 3j. gr. iv. falis alk. ʒij. dederunt vitrum saturate coeruleum, pulchrum, durum.

§. 2512.

EADEM proportio arenae et falis alk. cum gr. viij praecipitati cobaltici ex solutione nitrosa (*v. tent. 18.*) dedit vitrum amoenum, colore minus saturatum.

§. 2513.

EADEM proportio arenae et falis alk. cum praecipit. cobalti ex solutione vitriolica (*v. tent. 19.*) dedit vitrum pulchre coeruleum.

§. 2514.

Ex miscela arenae falis alk. et praecip. cobalti ex solut. formicata (*v. tent. 21.*) vitrum pulchrum, coeruleum, non adeo saturate coloratum.

§. 2515.

Ex arena, fale alk. et praecipitato cobalti ex solutione acetosa (*v. tent. 22.*) vitrum saturate coeruleum.

§. 2516.

MISCELA, antea dictis proportionibus facta, crystallorum rubrarum ex evaporationi data solutione cobalti vitriolica (*v. tent. 29.*) nascentium, arenae falisque alkalini, dedit vitrum pulchrum saturate coeruleum.

§. 2517.

§. 2517.

SPATHI albi, ponderosi, selenitici, post solutionem cobalti in acido salis, vitrioli, et formicarum residui 3j arenae 3ij, sal. tart. 3iſſ, dederunt vitrum prorsus excolor.

§. 2518.

RESIDUUM a solutione cobalti nitrosa et acetosa vix sensibilem vitro dedit colorem.

§. 2519.

CRYSTALLI reliquae, ex solutionibus evaporationi datis natae, colores eosdem prodixerunt, uti praecipitata.

§. 2520.

NUNC ad praecipitata ex miscelis solutionis cobalticae cum solutionibus aliis metallicis. Praemittit Auctor in compendio, adhibuisse se praecipitata dejecta ex miscelis cobalticae solutionis muriaticae, cum solutionibus aliis metallicis, uti enumerantur a *tent.* 38—51. cujusvis praecipitati grana 8. miscuit cum arenae Freyenwaldensis 3j gr. iv. salisque tartari 3ij. reliquam fusionis encheiresin ratione paulo ante dicta perfecit.

§. 2521.

TENT. 57. Praecipitatum cobalti lunare (*v. tent.* 41.) pulchre fufum; amoeniori multo intensiorique colore praeditum vitrum antea expositis: grana metallica nulla.

§. 2522.

TENT. 58. Praecipitatum cobalti solare (*v. tent.* 39.) cum antea dicta frita dedit vitrum pallide coeruleum; grana nulla metallica.



§. 2523.

TENT. 59. Luna cornea, in prius adducto tentamine cum argento instituto ad fundum deturbata, frittae admista reducta fuit: forma granulorum minimorum vitro probe fuso, excolori (*ganz weiss aussehendem*) interjecta haesit.

§. 2524.

TENT. 60. Praecipitatum viride ex solutionis venereae cum cobaltica (*v. tent. 42.*) miscela dejectum legitime fusum; pallidissime coeruleum in viridescentem colorem tendens vitrum. Metallica grana nulla.

§. 2525.

TENT. 61. Praecipitatum cobalti joviale (*v. tent. 43.*) cum fritta antea dicta dedit vitrum pulchrum coeruleum, metallica nulla grana.

§. 2526.

TENT. 62. Praecipitatum cobalti saturninum (*v. tent. 44.*) dedit vitrum sat bene coloratum coeruleum: nulla grana metallica.

§. 2527.

TENT. 63. Saturnus corneus, (*v. tent. 44.*) ex miscela solutionis cobalticae ac saturninae ad fundum delapsus, cum fritta confluit in vitrum album, (excolor?) plumbi nil reductum.

§. 2528.

TENT. 64. Praecipitatum ex miscela solutionis cobalticae et martialis (*v. tent. 45.*) ad fundum dejectum

Etum dedit vitrum pulchre coeruleum; grana metallica nulla.

§. 2529.

TENT. 65. Praecipitatum miscelae solut. cobalti, et regulinae antimonialis (*v. tent. 49.*) dedit vitrum subviolaceum, grana metallica nulla.

§. 2530.

TENT. 66. Praecipitatum miscelae cobalticae, ac mercurialis solutionis (*v. tent. 46.*) dedit vitrum coeruleum inter reliqua pulcherrimum, ac intensissimo colore donatum.

§. 2531.

TENT. 67. Praecipitatum miscelae solut. cobalti, et zincinae (*v. tent. 47.*) dedit vitrum eleganter, intense coeruleum; grana metallica nulla.

§. 2532.

TENT. 68. Praecipitatum miscelae solut. cobalti, et bismuthi (*v. tent. 48.*) vitrum dedit subviolaceum; nil metallici.

§. 2533.

TENT. 69. Praecipitatum solutionis cobalti cum solutione cobalti regulini tum nitrosa, tum regali (*v. tent. 50.*) dedit vitrum probe fustum, nimis tamen violaceum; nil metallici. Vitium hoc in omnia vitra cobaltica redundat, dum nimia dosis *Speise*, exigua nimis veri cobalti additur.

Y 2

§. 2534.



§. 2534.

TENT. 70. Praecipitatum ex flavo rubens solut. cobalti cum solutione platinae regali, per sal alkali (*v. tent. 52.*) dejectum, dedit vitrum bonum; nil metallici.

§. 2535.

TENT. 71. Dictum antea (*v. tent. 53.*) ferri ope cuprum, et Zinco mediante ferrum ex cobalto nigro fuisse separatum; dejectum dein per alkali sal ex liquido residuo pulverem levem pallide rubrum; adhibitam his experimentis cobalti solutionem tam muriaticam, quam nitrosam: utrumque horum praecipitatorum dedit vitrum grate coeruleum; saturatius ex solutione muriatica, pallidius ex nitrosa.

§. 2536.

TENT. 72. Pulvis autem ochraceus, in illa operatione (*tent. 53.*) simul enatus, cum frita dedit vitrum pallide coerulescens, scorias martiales referens.

§. 2537.

TENT. 73. Pulvis in eadem (*tent. 53.*) operatione exortus albus, zincinus, probe edulcoratus, ponderis granorum fere, junctus cum granis xvij cupri fusi, adjectis simul granis tribus pulveris carbonum, constituit regulum satis malleabilem, colore aurichalceo, intenso donatum.

§. 2538.

TENT. 74. Dictum in *tentam. 55.*, nata ex solutione cobalti muriatica, dejecto jam per Zincum ferro,

ferro, praecipitata bina; relatio primi ad frittam exposita *tent.* 71.; alterum dedit vitrum pulchre, sed pallidissime, coeruleum.

§. 2539.

TENT. 75. Diluit Auctor solutionem cobalti nitrosam binis partibus aquae destillatae; iniecit sensim Zn Zinci, per destillationem redditi purissimi, miscellam digestionem octiduanam dedit; dejectum sic lente ferrum forma metallica, magnetem sequens, ruente simul pulvere quodam ochraceo; lapsum demum praecipitatum parvissimum album, eadem ratione, uti pulvis albus *tent.* 73. ad cuprum sese habens; filtrum transit liquor eleganter roseus. Iniecit huic denuo Zn Zinci purissimi; solvi quid videbatur; elapsa vero hora solutio turbulenta, nec frigidus liquor in Zincum amplius egit; nec admotus calor quid praeterea praestitit. Per filtrum misit laticem, atque sale alkalino praecipitavit; coagulum denuo natum; lapsum demum praecipitatum pallide rubens, rarum, levissimum, cum fritta vitrum optimum coeruleum constituens, antea (*tent.* 71.) dicto praestantius.

§. 2540.

TENT. 76. Liquidum nunc dictum, excolor per filtrum transiens largitum fuit nitrum regeneratum; constituit hoc cum fritta vitrum, vix margaritaceum.

§. 2541.

TENT. 77. Dictum prius (*tent.* 54.) ex concentrato pigmento cobaltino per solutionem in spiritu salis ammoniaci, facta abstractione, ortum fuisse pulverem



rem umbracei coloris: dedit hic cum frita vitrum pulchre coeruleo, nonnihil violaceo, colore praeditum.

§. 2542.

TENT. 78. Cobaltum, sale ammoniaco ex solutione dejectum (v. tent. 38.) frittae mistum, dedit vitrum pallidissime coeruleum.

§. 2543.

TENT. 79. Ex solutione cobalti acetosa dejecit cuprum ope ferri, tum cobaltum ope salis alkalini: praecipitati hujus edulcorati, ficcati, grana octo miscuit cum arenae purae Freyenwaldensis 3j. gr. iv. salis alkalini ʒij; ortum vitrum vilius, scoriam martialem referens, pallidissime coerulefcens (*bleumourant.*)

§. 2544.

COBALTUM nunc miscuit solutum cum substantiis metallicis: hunc in finem 1. solutioni cobalticae metalla omnia ac semimetalla immerfit, 2. fusione unire cum illo tentavit eadem corpora mineralia. Exponenda sunt nunc tentamina classis primae.

§. 2545.

TENT. 80. Aurum purissimum solutioni cobalti regali immersum solvebatur, colorem excitans ex fusco flavum; in solutione cobalti muriatica nigrescebat, non solvebatur; nec tangebatur a solutione nitrosa; uti nec a vitriolica, in hac denuo nigrescens.

§. 2546.

§. 2546.

ARGENTUM purissimum a solutione cobalti muriatica non solvebatur; disparebat quidem in nitrosa et vitriolica, partim tamen ex posteriori denuo secedens, quum acidum phlegmaticum nimis adhucdum foret.

§. 2547.

CUPRUM, encheiresinota solutum, in solutione cobalti muriatica, nitrosa, et vitriolica.

§. 2548.

STANNUM solutum in solutione cobalti regali, muriatica, nitrosa, et vitriolica.

§. 2549.

FERRUM solutum in solut. cobalti muriatica, nitrosa, et vitriolica.

§. 2550.

PLUMBUM solutum in solut. cobalti nitrosa et vitriolica; non tactum a muriatica.

§. 2551.

MERCURIUS solutus in solut. cobalti nitrosa et vitriolica partim tantum, in muriatica prorsus non.

§. 2552.

ZINCUM solutum in solutionibus cobalti omnibus; deturbatum sic simul praesens ferrum forma metallica.



§. 2553.

BISMUTHUM sub initium vix tactum, accedente digestionē leniori solvendum a muriatica, olivaceo nascente colore. Ex evaporata solutione hac ortae crystalli pulcherrimae intense virentes, cum aqua destillata atramentum probum sympatheticum daturae. Ab vitriolica solutione bismuthum vix mutatum, a nitrosa solutum ex integro.

§. 2554.

REGULUS antimonii solutus in solutione cobalti muriatica et nitrosa, partim in vitriolica.

§. 2555.

PLATINA del Pinto soluta solum in solutione cobalti regali, nec in hac resoluta ex integro.

§. 2556.

SPEISE cobalti, juxta operationem ante (v. tent. 50.) dictam depuratum, solutum in solutionibus cobalti omnibus.

§. 2557.

PRÆCIPITORUM ex nunc dictis solutionibus singulatim dejectorum quaevis edulcoravit, siccavit, atque tum octo singulorum grana miscuit cum 3j gr. iv. arenae purae Freyenwaldensis, et salis tartari ℥ij. vitra, uno verbo ait, sese hac methodo obtinuisse eadem plane, qualia prius, dum de praecipitatis exortis ex miscela solutionis cobalticae cum solutionibus metallicis sermo erat, leguntur descripta.

§. 2558.

§. 2558.

UNIRE etiam voluit cobaltum cum aliis metallis via fusionis; metallum tamen adhibitum in granulis exiguis nunquam non dispersum vidit. Miscuit v. c. gr. iv. auri purissimi cum \mathfrak{D} j cobalti nigri, gr. xij tartari, granisque viij nitri depurati; miscelam in crucibulo luti ope probe clauso per trihorium igni furni anemii subiecit: frigesacto fractoque vase massam vidit coeruleam spongiosam, auro forma granulorum minimorum eidem intersperso: idem cum aliis metallis institutorum tentaminum eventus.

§. 2559.

SUPERVACUUM ratus fuit, plura tentamina instituere circa unionem colliquationemque praecipitati cobaltici cum aliorum metallorum calcibus, quum ea omnia jam facta fuerint in antecedentibus docimasiis hyalurgicis praecipitatorum, ex miscelis metallicarum solutionum cum cobaltica enatorum: unicum tamen sequens adferre scorsim voluit.

§. 2560.

TENT. 81. Fusioni in furno anemio subiecit $\mathfrak{3}\mathfrak{B}$ cupri purissimi, tum fuso indidit \mathfrak{D} ij praecipitati, prius (v. tent. 47.) ex unione solutionis zincinae cum cobaltica nati; obtinuit sic regulum, satis indurabilem sub malleo, aurichalco vulgari paulo rubicundiorum.

§. 2561.

EXAMINAT demum spathum album ponderosum, facta solutione cobalti in aqua regia, acido salis, et acido vitrioli residuum. Hoc vero seleniticum esse,

Y 5

seu



seu terra calcarea componi acido vitriolico saturata, certissimum, ait, reddi periculis sequentibus.

§. 2562.

EDULCORATUM probe et siccatum ab acido nullo tangitur.

§. 2563.

CUM oleo tartari per deliquium purissimo decoctum, terram dimittit calcaream puram; ex lixivio, nota encheiresi, obtinentur tartari vitriolati crystalli.

§. 2564.

CUM phlogisto tractatum spathum hoc ipsum sulphur prodit; residuum foetorem spargit hepatis sulphurei.

§. 2565.

CUM nitro puro saleve communi mistum, atque in retorta terrea loricata destillationi expositum, acidum ex utroque sale liberat.

§. 2566.

PHOSPHORUM demum largitur, si *Marggrafiana* tractetur methodo.

§. 2567.

CONSECTARIA jam ex haftenus dictis omnibus LEHMANNUS duxit sequentia.

§. 2568.



§. 2568.

1.) COBALTUM nigrum crudum componi pigmento ipso speciali, spatho selenitico, paucaque ochra martiali.

§. 2569.

2.) PIGMENTUM illud, variorum acidorum ope eductum componi particulis venereis, pauco marte, terraque alkalina, cum acido nitri speciem nitri regenerati exhibente — Mentionem simul injicit, notas sibi esse operationes plures, quibus ex pluribus corporibus aliis, cobalti nil vehentibus, color coeruleus elegans adeo, ac ex ipso cobalto, parari queat; quas tamen detegere nondum velit.

§. 2570.

ALTERA partis hujus sectio *de Arsenico in cobalto* agit; tertia *de auro et argento in cobalto*, quarta *de Speise cobalti*. Haec omnia DOCIMASTICIS relinquo.

§. 2571.

IN edita Vindobonae 1770. *dissert. inaug. de Metallis dubiis, caput secundum de COBALTO* inscribitur. Omissis quibusdam generalibus circa cobalti etymon ab *Auctore* adlatis, tum et omissis animadversionibus *Brandtianis* circa diversitatem cobalti a bismutho, quae ex ipso BRANDT uberius exhibeo, sequentia capiti huic inferere volo, rem propius tangentia.

§. 2572.

SOLUM, *Auctor*, (sive is CL. WINTERL, sive, qui in libelli titulo occurrit, KAIM sit) quod adhuc
de



de cobalto remanet dubium, id est: sitne revera principiis a reliquis metallis et semimetallis primordialiter distinctum, vel vero ex reliquorum miscela igne generatum? Posterius hoc suspicatur VOGEL, defendit JUSTI, adlato in rei documentum directo satis *Cel. HENCKELII* experimento, de quo KRAMERUS memoriae prodidit, novisse virum industrium ex limatura chalybis styriaci ad certum calcinata gradum cum silicibus et alkalino sale veram producere smaltam; experimentum quidem successit nemini, quod certas in processu circumstantias desiderari creditum est, e quibus expectatus dependeret eventus; eas non ita pridem a familiari HENCKELII discipulo acceptas, quod in additione quartae partis arsenici et tridua ab igne gradatim ad vehementissimam reverberationem aucto confisteret, revelavit D. JUSTI. Sed mihi tamen taediosam operationem saepius repetenti nunquam respondit successus. *)

S. 2573.

DUBIUM etiam non leve movent ipsius *Cel. HENCKELII* scripta, ex quibus satis constat, virum hunc per omnem vitam in ea perstitisse opinione, cobaltum cupri esse productum; tum quod arsenicum potius colores vitrorum metallicorum exstinguat, ceterum notum, quam ut tam elegantem colorem producat; et fides quoque D. JUSTI non omni exceptione major sit: audacter huic sententiae obviam ivit, et primordiale a reliquis cobalti distinctionem vindicare contendit

*) ETSI lubens credam, tentamen libelli Auctori non successisse, monendum tamen est, praeruptum hoc nimis esse effatum: non successit, abs enatorum simul phaenomenorum vel minima mentione injecta. de W.

tendit egregius ANONYMUS *) saepius citatae *Mine-
ralogiae* AUCTOR: „in quantum, ait, ex vitro cobal-
ti, ex quo antea omne arsenicum vi ignis abactum
et ferrum cum aliis metallis destructum est, addi-
ta re inflammabili verus regulus, proprietatibus
suis ab omni alio regulo distinctus, producitur,
profecto non satis video, quomodo locum ei pos-
sem inter semimetalla denegare. — Constantia,
addit, ipsa vitri cobaltini in igne satis demonstrat,
hanc distinctam ab omnibus aliis terris et metal-
licis calcibus substantiam esse. Demum subjungit
non improbabile **) conjecturam, quod si un-
quam verum vitrum coeruleum ex metallorum ***)
„et

*) *Cl. CRONSTEDT. de W.*

**) CERTE MACQUERUS solo cum arsenico vitrum coeru-
leo colore tinxit, *Tom. 2. vers. germ. p. 286.* sed ut
experimentum succedat, gravissimi et compactis-
simi arseniei flores, quibus manifesto heterogenea
inpuritas inmixta est, seligi debent, non nostrum ve-
nale album, ac depuratum. KAIM.

AN vero repetiit Macquerianum tentamen; an cum no-
stro venali albo ac depurato ipse instituit CRITICUS?
de W.

*** Ex metallorum. Textus Cronstedtianus sic se habet.
*Der Versuch, von Eisen oder Stahl mit Arsenick ein
Koboltglas zu machen u. s. w.* Cur non exactius ver-
tit hoc KAIMIUS; diversum enim utique est, si fer-
rum, aut chalybem vel si metalla v. c. cuprum, plum-
bum &c. cum arsenico misceam: quis vero, qui
Cronstedtium ipsum non legit, haec ex oscitanter
vertentis KAIMII translatione subodorabitur — Si
cui haec justo acriora videantur, is ut methodum,
qua KAIMIUS ipse in refutandis Auctoribus usus fuit
expen-



„ et arsenici miscela productum sit, id ex arsenico,
 „ cobalto jam pridem inpraegnato, productum vi-
 „ deri. Adnectit etiam ultimo: alia quaevis metal-
 „ la a cobalto separari se arte pati, ferrum etiam ei-
 „ dem *) inmixtum magnete detegi. ” Mirabile in-
 super et plane proprium hoc habet cobaltum, quod,
 acido salis solutum, aqua dilutum, atramentum det,
 ejus in charta characteres per se quidem non cadant in

expendat velim, adfensurus ni fallor, talionis poenam
 MARHERROS (lege ejus *Praelect. Physiologicas*, atque
 mirare tum in alios viros egregios, tum in optimum
 HALLERUM, ex cujus tamen operibus *Marherriana*
 BONA pleraque descripta sunt, et a quo MARHER-
 RUS tum scientia anatomica, tum doctrina physio-
 logica, tum eruditione latissime patente, tum gravita-
 te, et, ut ita dicam, anthropognosi, multo minori-
 bus, maxime remotus erat, mordaces, ac pueriliter
 dicaculas (v. c. ut unicum saltem adferam specimen,
 in *capite de visu*: aut quanam aranea HALLERO
 revelavit se unicum tantum objectum videre), vibra-
 tas crises;) KAIMIOS &c. ferientem, non iniquam
 adeo esse posse, utique proprio illorum exemplo (et
 quisnam ex demonstratis illico hoc negabit?) arcessi-
 tam, coram omni iudice defendendam. de W.

*) EIDEM — ex verbis *Kaimianis* suspicari quis posset,
 CRONSTEDTIUM hoc loco de cobalto in genere lo-
 qui, quum tamen non nisi de miscela illa artificiali
 fermo sit: *und das letztere Metall (das Eisen) in dieser*
Mischung durch den Magnet leicht entdeckt wird:
 Studio posui: hoc loco, ne fors KAIMIUS, aut RE-
 CENSOR quispiam supervacuum fuscipiat laborem,
 ane docendi: *in cobalto adesse posse ferrum v. Cap. de*
NICCOLO de W.




in conspectum, accedente vero calore pulchro viridi colore sese repraesentent. Id atramentum docimastae pro signo habent bonae smaltae exinde obtinendae, dum contra, quaeque minera hoc non largiatur, ad productionem quoque smaltae inepta existat.

§. 2574.

ISTA vero omnia ad tria haec redeunt capita: I. ad vitri coerulei et atramenti sympathetici productionem II. reguli proprietates peculiare, III. aliorum metallorum a cobalto separabilitatem.

§. 2575.

Quod jam pigmentum illud, tam sympatheticum, quam vitrarium, spectat, profecto non tam arcto vinculo regulo suo aut calci suae cohaeret, ut ex eo desumi character metalli possit, quin potius se multiplici arte ex utroque separari patitur. Minera cobalti calcinata vulgatissimo in processu excoctionis smaltae dissolvitur in pigmentum vitrum tingens, et in regulum (*Speiße*) fundum petentem; hic jam regulus repetita cum vitro fusione adeo orbatur suo colorante principio, ut vitrum ulterius nullo modo tingat; diffitendum quidem non est, cobalti mineras saepe variis metallis refertas occurrere, adeoque regulos earum ab excoctione smaltae residuos ex aliis magis metallis, quam vero cobalto constare; certum tamen est pariter, dari etiam puram cobalti mineram, qualis est Rothenbergensis ex Saalfeldensi districtu, quae nullum fere aliud metallum, vel quae Bismuthum una in sinu foveat e. g. Rappoldensis ex Schneeburgensi Saxoniae districtu, quod impedimento esse nequit, quum proprium cobalti regulum non inquinet;



net; in utroque tamen casu regulus obtinetur, cui dictum, repetita cum arena silicea et lixivo sale fusione omni pigmento coeruleo exutus; purus in priori, non minus purus, etsi bismuthi distinctio strato insidens, in posteriori casu *) regulus.

§. 2576.

CITRA vitrificationem, et via quidem humida, primus, quod sciam, Pharmacopoeus Lipsiensis LINCKE fuit, qui artem novit, evocandi ex minera sua pigmentum coeruleum; verum nemini revelato mysterio, eidem immortalis est. Sed *Cel. LEHMANNUS* arcanam methodum investigavit et invenit; vidit nimirum acida quaevis mineralia pigmentum illud ex cruda minera extrahere, metallica cobalti substantia **) intacta, immo intactis quibusve aliis minerae cobalti inmixtis, utpote arsenico, et gypseis spathosisque particulis ita obvolutis, ut ab acido attingi non possint; etenim magnes licet ferri praesentiam ad oculum detegat, tamen vitrioli acidum cum eadem minera digestum nihil inde inbibit, quocum gallarum decoctum nigrescat ***), aperto satis ac manifesto signo, ferrum in minera irresolutum restitisse. Documentum veritatis clarissimum hoc est, quod tingens materies ex minera mediantibus acidis extracta, deinde per salia alkalia dejecta et edulcorata triginta ad sexaginta usque partes tingere par sit ****), quod certe minerae cobaltinae cujuscunque regulus nullus posset.

*) *LEHMANN Cadmiol. p. 2. pag. 27.*

**) *l. c. p. I. pag. 81. et in Probiorkunst pag. 314.*

***) *l. c. p. 20.*

****) *IDEM l. c. p. 95. seq.*

set. Extractio haec materiae colorantis tunc optime succedit, quum multo metallica pars arsenico, gypsea aut spathosa terra obvoluta est; minus, quum unda actioni acidorum exponitur, ubi fere semper aquae regiae auscultat *); licet forte tunc acida vitrioli et salis cum fructu adhiberi possent, quippe quae nec purum quidem regulum satis adgrediantur. **)

§. 2577.

ULTIMO novam separandi materiem tingentem a cobalto methodum evulgavit Cl. BAUME in *Manuel de Chymie*: sumit picem, gypsum et sal alkalinum, qua miscela hepatis sulphuris species progignitur; cum hac fundit mineram calcinatam cobalti; obinet regulum parte sua tingente orbatum, adeoque tam ad productionem atramenti sympathetici, quam vitri coerulei ineptum; ipsum vero pigmentum, quod ille etiam regulum vocat, scoriis supernatans. Graviter itaque et incondonabiliter erravit egregius ille ANONYMUS saepius citatus, quod pro comperto adsumserit, ex vitro coeruleo recuperari regulum cobalti posse; certe ego experimentum saepe suscepi, smaltae varias species, haud exigua in quantitate, cum duplo fluoris nigri remiscens; verum nunquam exinde vel granulum regulinae substantiae inpetrare valui, quo certe eventu frustrari non semper potuissem, si vel tantillum metallicaе terrae eidem vitro infuisset. ***)

§. 2578.

*) LEHMANN l. c. part. 2. pag. 16.

**) l. c. p. III. seq.

***) Quid inquiet nunc KAIM, audiens, in Cl. Viri ab ENGESTRÖM oratione suecica de impedimentis Mineralogiae,



§. 2578.

His ergo compulsis satis liquet, principium finalitae, seu pigmentum, quodcumque cobalto inest, ad metallicam seu regulinam ejus substantiam haud pertinere, sed facili potius negotio ab eadem secedere. Secedens autem ad alia quaevis metalla eadem cum adfinitate adhaeret; adhaerendo et proprias qualitates perdit, et metalli sui proprietates vicissim destruit: scilicet cum auro proprietatem perdit producendi atramenti sympathetici, in auro vero destruit vim post praecipitationem fulminandi, redditque idem, et argentum et platinam, contra perfecti metalli naturam, vitrescibilia; reliquorum vero omnium metallorum ac femimetallorum vitrescentiam insigniter accelerat. *)

§. 2579.

giae, sequentia contineri: ex ignorantia regulus niccolinus cum aurichalco comparatus fuit, atque adfertur, eodem jure hoc uti illum pro metallo speciali venditari posse. Inde ratio erroris BAUMEI, dum methodum novam, regulum cobaltinum decomponendi sese detexisse ratus fuit: fundens enim regulum cobalti cum additamentis, hepar sulphuris producentibus, magnam reguli partem solutam vidit, reliquum vero coeruleum vitro non amplius largiebatur colorem. Tentamini adhibui varias cobalti species, easque nunquam non niccolo mistas deprehendi: niccolum vero minori adfinitate jungitur hepatis sulphuris, reguli cobaltino; hinc ejus ope substantias illas ab invicem sejungere facile potui. His ipsis inventum *Baumeanum* legitime simul illustrari videtur. Haec *Cel. ab ENGESTRÖM*. Si *KAIM Marggrafiana* methodo tentamina sua instituisset, (si tamen ullum unquam instituit), ac descripsisset, reguli residui, et scoriarum obtentarum ratio facile nobis indicasset, qualenam cobaltum illis adhibuerit. *de W.*

*) LEHMANN l. c. p. 24. seq. et p. 33. seq.

S. 2579.

Ex quibus certe phaenomenis satis patet, tingentem cobalti substantiam haud minori cum aliis quibusve metallis adfinitate, quam cum cobalto ipso cohaerere posse. Nec defunt casus, quibus in rerum natura aliis metallicis substantiis ipso facto nexumprehendatur: magnesia vitrariorum, de qua paulo post demonstrabimus, esse ab omni cobalto alienissimam, tamen cum arsenico tractata smaltae obscurioris speciem exhibuit. *) Minera quaedam bismuthi eliquato omni suo metallo terram quamdam faxeam subtili principio colorante inbutam reliquit, quae instar cobalti fundamentum vitri coerulei praebuit, ut tamen celeberrimi viri POTT et HENCKEL **) duo summi Metallurgi clare adfirmant, hanc eandem terram nihil perfecte metallici largiri; idem confirmavit, et mineras mere arsenicales tamen saepe smaltam praebere, etsi omni metallica substantia destitutae sint, *Cel. MACQUERUS* memoriae tradidit, ***) forte posterum industria his exemplis plurima alia adjunget. Mihi vero his demonstratum sufficit, tingens smaltae principium aliarum etiam subinde quam cobalti minerarum incolam esse; hoc autem posito pro characteristica cobalti nota ruber color sumi non potest, qui solutionibus seu potius extractionibus cobaltorum ab iisdem ut plurimum inducitur; monuit enim jam *Cl. GESSNERUS* in *historia cadmiae*, nonnulla cobalta viridi

Z 2

*) JUSTI *Chem. Schrift.* p. I. pag. 449.

**) DE bismutho. p. 127.

***) *Prakt. Chemie.* p. 386.

QUID circa instantias has, a KAIMIO adlatas, sentiendum sit, alio loco exponere debeo, quum uberius disquisitio hic adferri nequeat. de W.



ridi colore solvi *) exempla ubique quam plurima ad-
fpergit *Cl. LEHMANNUS*, et compulsis omnibus gene-
ralem inde canonem deducit, quo solutiones magis
rubrae, aut rubro-fuscae essent, eo ditiora materie
colorante cobalta esse; **) ut rubrum solutionis co-
lorem a pigmento illo pendere, a cobalto autem tam
esse peregrinum, quam id ipsum, nullum sit dubium.

§. 2580.

REGULUS cobalti ab omni pigmento, tanquam re
aliena, perfecte purgatus talis adhuc remanet, quem
non facile cum alio cognito metallo primo adspectu
conferas; malleabilitatem non habet, itaque ei inter
femimetalla quaeres socium, sed non inuenies! Prae-
duri chalybis colorem et textum habet, sed differt ta-
men, praeterquam quod malleabilis non sit, in mul-
tis alijs: solutio certe martis in nitri acido ex auran-
tiaco fusca est, hujus metalli ex flavo viridescens.
Haec eadem solutio crystallisationem subit, quam
perpetuo recusat martis solutio nitrosa, ut et inspissa-
ta rursus deliquescat. Deinde crocus hujus metalli
perpetuo niger est, dum in martis puri terra obscure
rubens cognoscitur. ***) Vitrum vero, quod a mar-
te viridescit, ab hoc metallo fuscum nascitur. Quid?
quod hic regulus etiam a magnete non trahitur, qui
tamen caracteristicum putatur substantiarum martia-
lium criterium. —

§. 2581.

*) SED, quod KAIMIUS observare simul debuisset, GESS-
NERUS tum non cobalti, sed niccoli, sibi quidem igno-
ti, fecit solutionem. *de W.*

**) *l. c. part. I. p. 76. n. 6.*

***) CONFERENDA haec sunt cum tentaminibus *Cl.*
BRANDT ex act. holm. adlatis. de W.

§. 2581.

SED novi bene, quantas mutationes omnibus fere metallis arsenicum inferre valeat. Arsenicum in mineris cobalti fere domicilium suum habet, ut venale nostrum non ex alia educatur: paucae sunt arsenico carentes cobalti minerae, eaeque vel pulverulentae, vel saltem friabiles sunt, adeoque ab aëris pluviarumque actione multum a primaevo suo statu mutatae; potuit his pluvia subtrahisse, aut subterraneus calor expulisse superfluum, quam quod ferrum attractum tenet, arsenicum.

§. 2582.

HIS permotus arsenicum cum marte combinare tentavi; miscela igne fluxit celerrime, sed effusa regulum non dedit. Scorias itaque cum dupla fluoris nigri parte combinatas iterum iterumque fudi, verum eodem cum eventu. *)

§. 2583.

ERGO de alia erat methodo cogitandum, qua possem regulum martis arsenicatum obtinere: obtulit se auripigmentum, quod arsenicum sulphuratum est; idque, nescio an ob maiorem sulphuris cum arsenico adfinitatem, primo compactam massam, quae quasi ex limatura martis modo conglutinata, etsi omnia rite fluxerint, constare videbatur, deinde vero altera cum fluore fusionis verum regulum dedit.

Z 3

§. 2584.

*) SUPERSEDERE laboribus his potuisset KAIM, post instituta jam circa rem eandem BRANDTII tentamina,



S. 2584.

Hic regulus omni nota cum cobaltino a suo pigmento perfecte purgato congruebat, nam diutius in fluxu detentus tandem in scorias ex nigro coerulescentes abit, quae in pulverem redactae nigrae sunt. Cum borrae autem tandem fuscis obducitur scoriis. Aqua fortis hoc eodem regulo colore ex flavo viridescente tingitur, et inspissata cubicas in crystallos coit, quae solutae chartam, calore accedente, flavo colore sed persistente tingunt. Praecipitatio per alkali fixum ex acido quocunque obscure viridis est, cum alkali autem volatili ex fulvo obscure rubet. Amicitiam fugacis mutabilisque mercurii nunquam non respuit, cum igne fusus ebullienti hydrargyro immiscetur utroque modo, quo sese contingunt momento, cum ingenti strepitu et erepitatione ex crucibulo exsiliunt, ut nihil in vase remaneat, nec extra vas colligi alterutrius metalli vel vestigium possit; hoc summae diffinitatis signum esse exemplo aliorum liquorum, aquae et olei, mercurii et aquae, olei et mercurii, qui frigidi non junguntur, calidi vero cum strepitu sese adversantur, didicimus. Paulo minor, sed constans tamen est huius artefacti semimetalli erga bismuthum inimicitia, utpote cum quo fustum distincto semper strato consistens. Ultimum est, quod etiam jam non amplius a magnete trahatur haec vera licet ferri progenies, arsenico virtutis adtractoriae domitore. Omnibus proinde proprietatibus ferri arsenicatus regulus cum cobaltino regulo a suo pigmento satis purgato perfecte coeedit.



§. 2585.

SED et propriis insuper hic idem cobalti regulus notis non cum hoc modo arsenicato, sed cum quocunque ferro convenit: omnis nonne limatura martis leviter humectata aërique exposita paulo post non levem caloris gradum fuscipit - - *) similis plane incallescendi vis cobalto inest: notum, quaedam cobalta vitrum valde opacum, nonnulla valde dilutum **) praebere; metallicolae hoc in casu unum cum altero temperare, quam singulum cum proportionata ad materiem tingentem silicam quantitate fundere malunt; in eum finem contusas commistasque mineras aqua humectant, quo facto fermentativus subnascitur calor, quo omnes intime uniuntur; cobaltum ergo hac proprietate non abludit a ferro.

§. 2586.

HABEMUS praeterea adhuc adminiculum expeditum, facile et certum ad manum, metallorum diversitates explorandi: lixivium nempe materie colorante sanguinis bovini saturatum; hoc singula metalla ex solutionibus suis proprio colore dejicit: argentum nigro, cuprum ex rufo fuscescente, Zincum candidissimo, bismuthum viridi, ferrum coeruleo, (quod berolinense dicitur), alia aliis coloribus. Ut rite succedat experimentum, saturatum esse materie colorante lixivium debet, nec jam cum acido ullo effervesce; qua-

Z 4

*) OMISI hic paucas lineas, phaenomenon in corp. de FERRO dudum expositum describentes.

**) ADNOTARE potuisset KAIM, si scivisset, rationem diversitatis ab praesente in illis, deficiente in his ferro plerumque promanantem.



qua vero in re punctum difficillime tangitur, etenim nec tres, nec sex, nec novem saepe sanguinis ficcati partes sufficiunt; opportunius hoc respectu est, colorantem materiem ex metallo jam colorato, v. c. coeruleo berolinensi, lixivio reddere; qua methodo saturationis punctum exactius tangitur, quum, quamdiu saturatum non est, ocyus omnem colorem destruit; nequaquam vero adgreditur novo pigmento readfutum, ut primum suum punctum adigit. Incommodi autem vulgaria coerulea berolinensia hoc habent, quod cum alumine praeparata terrae ejusdem plurimum in sinu suo foveant, quae cum magno operationis dispendio lixivium additum absorbeat; cujus majorem portionem adjicere non licet, quod non saturaretur, nec nimis diluere, quum materiem colorantem tunc non satis adgrediatur. Itaque coeruleum berolinense mihi in proprios usus absque alumine praeparavi; hujus pigmento lixivium alkalinum digerendo, cohobando, usque dum colorem coeruleum non amplius mutaret, saturavi. Ope hujus lixivii ex solutionibus ferri, ferri arsenicati, et ipsius cobalti simillima praecipitata coerulea obtinentur, quemadmodum jam ante me varias cobalti species in examen vocans LEHMANNUS viderat. *) Itaque regulus cobalti, et vulgare ferrum primordialibus suis principiis metallicis a se mutuo non differunt. **)

§. 2587.

*) l. c. part. 2. p. III. sq.

**) SED, an non ex cobalto *Cl. BRANDT* examinato, ferro plurimo turgente praecipitatum pariter coeruleum hac encheiresi ruere debuisset, manifesto a ferro praesente repetendum? An ad haec attendit *KAIMUS*, canonem suum proponens? *de W.*



§. 2587.

SUPEREST explicanda paradoxa res, quomodo tamen, si cobaltum nonnisi ferrum est, separatio ferri a cobalto locum habeat? Tentamen certe vanum non est, quin magnorum virorum testimonio extra omne dubium ponitur! — Verum in solis succedens speciebus, quae arsenico non videntur esse saturatae, tostione nempe nec fumi arsenicalis signum dant, nec de pondere suo perdunt, sed potius arsenicum additum imbibunt, et cum eo post calcinationem pondere augentur, cujus generis est Austriacum Cellense, quod examinavit D. Justi *) et Rothenbergense in districtu Saalfeldensi, quod in altera *Cadmiologiae* parte examinatum dedit LEHMANNUS; quid mirum ergo, si, dum arsenicum omni saturando ferro non sufficit, pars ejusdem supersit magneti adhuc obediens, et ejusdem ope e minera comminuta provocabilis? An non potius argumento hoc est, quod si plus nactum arsenici fuisset, etiam tantillum hoc ferri, quod nunc superest, tunc in cobaltum convertendum fuisse? **) Ex aliis enim mineris arsenico satis saturatis magnete educi ferrum nequit, nisi certo artificio: quum nempe solutioni reguli cobaltini injicitur frustillum Zinci; tunc nempe solubilius et arsenico adfinius Zincum non solum dejicit ex solutione cobaltum, sed, erepto ei arsenico, pro cobalto reddit verum metallicum post fusionem malleabile adtractorium ferrum. ***) Quo tamen magis mirum est, ipsum quoque

Z 5

*) *Chem. Schrift. T. I. p. 450.*

**) Ac si jam extra omnem positum foret controversiam, cobaltum nil nisi ferrum esse, *arsenico* versum in cobaltum — de W.

***) LEHMANN *l. c. p. 2. pag. 31.*



quoque verum ferrum pariter cobalto furripere arsenicum, et sic ferrum ferro insidiari, ut idem inde, qui in priori casu, eventus sit. *) CELEB. CRONSTEDT, *Versuch einer Mineralogie* &c. §. 244. sequentes cobalti dotes recensuit. 1.) Color ejus ex albo gryseus est, fere uti chalybs probe induratus tenior.

§. 2588.

2.) DURUM est, fragile, in fractura grannulis minimis praeditum, unde et splendorem non obfert (*matr.*)

§. 2589.

3.) GRAVITAS ejus est ad gravitatem aquae uti 6,000. 1,000.

§. 2590.

3.) IGNEM sustinet fixum, calcinatum nigrescit. Vitrum cobaltinum colore coeruleo subviolaceo, inter colores omnes reliquos in igne fixissimo tingitur.

§. 2591.

5.) AB oleo vitrioli concentrato, *aqua regia*, et *aqua forti* solvitur; solutiones rubrae sunt. Calx cobalti ab iisdem recluditur mensuris, uti et ab alkalino sale volatili, et ab acido salis.

§. 2592.

6.) CUM arsenici calce sub ustulatione miscela illius facta, colorem indipiscitur rubrum. Non tamen hoc igne adhibito violento, sed lento potius evenit. Natura fatiscientiae (*Verwitterung*) ope idipsum praestat;

*) IDEM l. c. p. 114.

stat; atque tum calx cobalti *ochrae cobaltinae* (*Koboltbluthe*) nomine venit. Dum cobaltum et arsenicum una funduntur, flamma coeruleo tingitur colore.

§. 2593.

7.) CUM *hydrargyro*, quatenus hucusque constat, non misceri valet.

§. 2594.

8.) CUM *bismutho* pariter non jungitur, nisi tertia superaddatur substantia, unionem perficiens.

§. 2595.

SUB titulo vero *observationum de cobalto*, specierum enumerationi subjunctarum, adnotavit CRONSTEDT potissimum sequentia.

§. 2596.

QUUM ex vitro cobaltino, arsenico, ustulationis ope, omni privato, ferri etiam ac metallorum aliorum destructione praemissa (dum v. c. vitrum ex ochra crystallina forma induta conficitur) addito phlogisto regulus verus obtineri queat, dotibus instructus a reliquis omnibus metallicis substantiis diversis; nulla superesse videtur ratio, locum inter metalla alia cobalto denegandi. Interim tamen denegatur et a recentissimis multis Auctoribus. — Cobaltum omnium primo *Celeb.* BRANDT sub examen revocavit, atque tentamina sua *Actis Upsaliensibus* 1785. inseruit.

§. 2597.

INDUCTILITAS reguli cobaltini non obstat, quin semimetallis adnumerari queat. Eodem caractere semime-



rimetalla a metallis perfectis discriminantur. Terra, fixae ac vitrescibili cobalti terrae similis, habetur in cupro et ferro. Persistentia coloris vitri cobaltini in igne demonstrat, indole propria differre a reliquis terrarum speciebus, metallorumque calcibus. Tentamen conficiendi ex ferro aut chalybe, cum arsenico mistis, vitrum cobalti nunquam succedet, dum in usum vocatur arsenicum non obtentum ex minera cobalti. Quodsi ortum coloris a terra quadam irreducibili metallica derivare velis, non accersendum erit in hunc finem tentamen illud, quum regulus cobalti ab arsenico ferroque liberari possit, atque ferrum in miscela praesens magnete facile detegatur. — Ideis inadaequatis seductus Auctor recens cobaltum miscelam pronuntiavit ferri, cupri, plumbi, bismuthi, ac arsenici. Quibus tamen sententia sua confirmaretur, non adduxit tentamina. Expeti jure merito hic possunt talia, quae naturam ipsam in combinationibus suis diversissimis aemulantur. Determinare tum liceat, an proficuum futurum sit tentamen, ubicunque terrarum substantiae illae occurrunt, vitrum cobaltinum, aut Zafferam conficiendi.

§. 2598.

Celeb. MONNET circa solutiones cobalti notavit, solvi id ab acido vitrioli dosi exigua, etsi ebulliverit cum eo acidum; (quod et *Cl. BAUME* adnotavit) feliciter succedere tentamen, experimentis adhibito acido vitrioli dilutiore, et calce cobalti, minerave ustulata. Ex solutione facile succedente nitrosa, (quae tamen secundum BAUMEUM calorem requirit, dum cobalti regulus purus adhibetur) nasci sal humidum aëreum adtrahens. Difficillime patere acido salis, (*Baume*

ne cohobationem requirit) facile aquae regiae. *) Solutiones cobalti omnes a lixivio phlogificato dejici colore inter dilute coeruleum, et ardaesiaceum dubio, quo et a gallis excutiantur. Addita pro praecipitando cobalto ex solutione sua justo majori dosi salis alkalini redissolvi partem praecipitati, atque tum forma praecipitati albi sponte denuo secedere cobaltum. Ab aceto non adfici cobaltum, solvi tamen ejus calcem ex acidis deturbatam. Exactius cobalti examen *Cl. Vir de niccolo* agens proposuit *v. caput de Niccolo*.

Atque haecenus dicta circa chemicam substantiarum metallicarum et semimetallicarum historiam sufficiant. Infinita sane adferre potuissem, plurima adferre volui, multa jam chartae mandavi, subpressi denuo, ne Tyronum Medicinae, quorum inprimis commodo laborem hunc suscepi, laceraretur encephalon. —

Eandem

- *) Circa nascens ex solutione hac atramentum sympatheticum legi inprimis meretur *Cl. HELLOT* in *Mem. de l'Acad. de Paris* 1737. fusiolem diatribes recensio- nem, terminis partis hujus adstrictus, omittere nunc debeo, daturus alio loco. *BAUMEUS* adtulit formulam sequentem: drachmis quatuor cobalti, in pulverem redacti grossiorem, adfundantur unciae duae aquae fortis, digestioni trihorii vel quadrihorii miscela in cucurbita exponatur, donec solutus pulvis sit, addantur nunc drachmae quatuor salis communis, et septem vel octo unciae aquae purae: filtratum liquidum atramentum sympatheticum constituit.



Eandem ob rationem et substantiarum quarumdam, ex quibus metallici quid obtineri potest, esse posse a nonnullis adsumtum frustra fuit, v. c. *Magnesia*, *spumae lupi*, *spumae ferri*, &c. mentionem non injeci. — Sequuntur

INFLAMMABILIA.



